

ЎЗБЕКИСТОН РЕСПУБЛИКАСИ
ОЛИЙ ВА ЎРТА МАХСУС ТАЪЛИМ ВАЗИРЛИГИ
МИРЗО УЛУҒБЕК НОМИДАГИ
ЎЗБЕКИСТОН МИЛЛИЙ УНИВЕРСИТЕТИ

Дилнавоз ЮСУПОВА

**ЎЗБЕК МУМТОЗ АДАБИЁТИ
ТАРИХИ**

(Алишер Навоий даври)

Тошкент
«Akademnashr»
2013

УДК: 821.512.133(09)

КБК: 83.3(5Ў)

Ю-91

Ю-91

Юсупова, Дилнавоз.

Ўзбек мумтоз адабиёти тарихи (Алишер Навоий даври) /
Д.Юсупова. – Тошкент: Akademnashr, 2013. – 272 б.

ISBN 978-9943-4116-8-5

УДК: 821.512.133(09)

КБК: 83.3(5Ў)я73

Мазкур қўлланма республика олий ўқув юртлари ўзбек филологияси ва журналистика факультетлари бакалавриат ихтисослигининг 1-босқич талабалари учун мўлжалланган бўлиб, унда Алишер Навоий ҳаёти ва ижоди билан боғлиқ энг муҳим маълумотлар қамраб олинган, буюк мутафаккир ижодига доир янгича талқинлар берилган. Қўлланма навоийшуносликда кўлга киритилган энг сўнгги ютуқларни ўзида акс эттирганлиги билан алоҳида аҳамият касб этади.

Масъул муҳаррир:

Афтондил Эркинов,

филология фанлари доктори

Тақризчилар:

Насимхон Раҳмонов,

филология фанлари доктори, профессор,

Каромат Муллаҳўжаева.

филология фанлари номзоди, доцент

Қўлланма Мирзо Улуғбек номидаги Ўзбекистон Миллий университети Илмий кенгашининг 2012 йил 28 декабрь 5-сонли мажлисида нашрга тавсия этилган.

ISBN 978-9943-4116-8-5

© Дилнавоз Юсупова
«Ўзбек мумтоз адабиёти тирихи

(Алишер Навоий даври)»

© «Akademnashr», 2013

МУНДАРИЖА

Улуғ шоирни англаш йўлида (Афтондил Эркинов).....	4
Алишер Навоий ижодининг ўрганилиши.....	6
Алишер Навоий ҳасби ҳоли масалалари.	
Ҳаётига доир муҳим маълумотлар	18
Алишер Навоий лирикаси. Девонлари.....	31
«Ҳазойин ул-маоний» куллиётидаги	
лирик жанрлар тавсифи	41
«Девони Фоний»нинг жанрлар кўлами,	
ғоявий-бадиий хусусиятлари	66
Хамсанавислик анъанаси ва Алишер Навоий «Хамса»си	82
«Ҳайрат ул-аброр» достонининг	
ғоявий-бадиий хусусиятлари	90
«Фарҳод ва Ширин» достонининг тимсоллар олами	102
«Лайли ва Мажнун» достонининг ғоявий-бадиий хусусиятлари	114
«Сабъаи сайёр» достонининг тузилиши, ҳикоятлар таҳлили	127
«Садди Искандарий» достонининг ғоявий-бадиий хусусиятлари.....	145
«Лисон ут-тайр» достонининг ғоявий-бадиий хусусиятлари	157
Алишер Навоийнинг адабиётшунослик	
ва тилшуносликка доир асарлари	178
Алишер Навоийнинг диний ва тасаввуфий асарлари.....	193
Алишер Навоийнинг тарихий, ёднома ва	
турли мавзудаги асарлари	209
Фойдаланилган адабиётлар рўйхати	229

УЛУФ ШОИРНИ АНГЛАШ ЙҮЛИДА

Алишер Навоийнинг туркй халқлар маънавий хазинасига кўшган ҳиссаси бекиёс. У зотнинг яратган шоҳ асарлари инсоният руҳий-маънавий дунёси намояндалари: Жалолиддин Румий, Ҳофиз Шерозий, Данте, Вильям Шекспир, Лев Толстойлар ижод намуналари билан бир сафда туради. Агар қиёсласак, баъзи ўринларда Алишер Навоий асарларидаги юксак гуманистик ғоялар ифодаси «классик» дея эътироф этилган кўплаб Фарб адилариникидан кўра устунроқ эканлигига гувоҳ бўламиз. Шу маънода мустақил мамлакатимиз ёшларини баркамол инсон қилиб тарбиялашда ҳазрат Навоий асарлари муҳим аҳамият касб этади. Умуман, Алишер Навоий барчамизни руҳий поклашга, маънан юксалтиришга қодир безавол маънавий қудратдир.

Истиқололгача бўлган даврда Алишер Навоий ижодига тор маънода ёки сиёсийлаштириш мақсадида ёндашилганлиги бугун сир эмас. Шоир асарларининг нотўри талқинлари, уни динга салбий муносабатдаги шахс сифатида тасвирлашга урениш, тадқиқотларда Навоийнинг ижодий фаолиятидан кўра ижтимоий ва сиёсий ишларига кўпроқ ургу берилгани халқимизнинг буюк маънавий меросдан узоқ вақт бебаҳра қолишига сабаб бўлди. Мустақиллик шарофати билан аллома ижодкорнинг асарлари кенг миқёсда ўрганила бошланди, ҳазрат Навоий ҳақида биз билмаган кўплаб ҳақиқатлар рўёбга чиқди, шоир асарларидаги дунёвий ва илоҳий ғоялар ҳамда бадиий маҳоратга оид масалаларни ҳар томонлама тадқиқ қилишга киришилди. Юқорида таъкидланганидек, мутафаккир шоирнинг ижодини ўрганиш ва ҳис қилишга барчамиз эҳтиёжмандмиз, демак, бу хайрли ишларни келажакда яна катта ҳафсалা билан давом эттиришимиз керак.

Гарчи бугунги кунгача буюк шоир ижодига бағишлаб монография, илмий тадқиқотлар кўплаб эълон қилинган бўлса-да, турли қўлланма ва дарсликларда Навоий ижодига анчайин кенг ўрин берилса-да, Алишер Навоий ижоди яхлит қўлланма шаклида тақдим этилмаган эди. Шу маънода Д.Юсупованинг мазкур ишига на воийшуносликдаги илк тажриба сифатида ёндашилса, мақсадга мувофиқ бўлади.

Мазкур қўлланма Алишер Навоий ҳаёти, навоийшуносликнинг шаклланиши. ривожланиши ва шоирнинг ижодий мероси таҳлил

этилган мавзулар ҳамда шу мавзуларни жадвал, чизмаларда акс эттирган икки йирик қисмни ўз ичига олади. Замонавий педагогик тажрибалар шуни кўрсатмоқдаки, талабага мавзуларни кўргазмали тарзда мультимедиа ва компютер технологияларидан фойдаланиб тушунтириш кучли ижобий самараға эга. Қўлланманинг иккинчи қисмидаги жадвал ва чизмалардан айнан кўргазма, слайдлар тайёрлашда фойдаланиш мумкин.

Қўлланмада мустақилликдан кейинги Алишер Навоий асарлари талқинларида диний ва сўфиёна ёндашув, айни пайтда, турли ёндашувларнинг комплекс тарзда, бир-бирини инкор қилмаган ҳолда олиниши алоҳида эътиборга молик жиҳатлардандир. Алишер Навоийнинг лирик мероси, хусусан, шоирнинг форсий шеърияти билан боғлиқ таҳлиллар, «Ҳамса» таҳлилида бешлиқдаги ҳар бир достон кириш ва хотима қисмларининг алоҳида кўриб чиқилганиги, «Лисон ут-тайр» достонининг ғоявий-бадиий хусусиятлари борасидаги қарашлар, Алишер Навоийнинг ёдномалари, адабиётшунослик, тарих ва тилшуносликка, ислом фиқҳи ва тасаввуфга оид асарлари таҳлили қўлланманинг илмий қимматини оширган.

Умуман олганда, ўзбек мумтоз адабиётининг Алишер Навоий даврига багишланган мазкур қўлланма фактларга бойлиги, ўқувчига янги маълумотларни бера олиши, содда ва тушунарли услуби билан нафақат талабалар, балки соҳа мутахассислари, кенг аудитория вакилларининг қизиқишини уйғотишига умид билдирамиз.

Афтондил ЭРКИНОВ,
филология фанлари доктори

АЛИШЕР НАВОИЙ ИЖОДИНИНГ ЎРГАНИЛИШИ

РЕЖА:

- 1. Навоий ҳақида шоирнинг ўз асарларидағи маълумотлар.*
- 2. Замондошларининг асарларида келтирилган маълумотлар.*
- 3. XVI – XIX асрлардаги тазкира, лугат, тарихий ва бадиий асарлар.*
- 4. Навоий ижодининг илмий мезонлар асосида ўрганилиши.*
- 5. Навоий ижодининг Гарбда ўрганилиши.*

Туркий халқларнинг «шамс ул-миллат»и бўлган Низомиддин мир Алишер Навоий жаҳон адабиёти хазинасини ўзининг ҳассос шеърияти, буюк «Хамса»си, фан соҳаларининг турли тармоқларига бағишлиланган бой илмий мероси билан бойитган сўз санъаткоридир. Ўз ижодий меросида 26 мингдан ортиқ луғат бойлигидан фойдаланган бу буюк даҳо мана беш асрдан ошибдики асарларидаги чуқур фалсафий мушоҳадакорлик, маъно-моҳиятнинг кенг кўламлиги ва назмий меросидаги фасоҳат дengизининг бепоёнлиги билан жаҳон аҳлини ҳайратга солиб келади.

Дунёда Алишер Навоий каби асарлари кенг тарқалган, жаҳоннинг деярли ҳар бир чеккасида китобларининг нусхалари сақланаётган бошқа бир ижодкорни топиш қийин. Ҳазрат Навоий ҳаётининг сўнгги йилларидаёқ унинг асарлари тилига луғат ишлангани биз ҳозир навоийшунослик деб атаётган соҳанинг анча қадимий эканини кўрсатади.

Шу маънода айтиш мумкинки, Алишер Навоий фаолияти ва меросининг ўрганилиш тарихи шоирнинг ўз давридан, замондошлари асарларидан бошланади. Навоийшуносликнинг тадрижий тараққиётини шартли равишда қуйидаги босқичларга ажратиш мумкин:

- 1. Навоийнинг ўз асарларидағи маълумотлар.*

Алишер Навоийнинг ҳаёти ва ижоди ҳақида илк маълумот берувчи манба. шубҳасиз, улуғ шоирнинг ўз асарларидир. Шоир

гарчи таржимаи ҳолини маҳсус ёзиб қолдирмаган бўлса-да, лекин Навоийнинг деярли барча асарларида унинг шахсияти, ижодий ва ижтимоий фаолияти ҳақида муйян маълумотлар келтирилади. Хусусан, «Вақфия», «Муншашт» асарларида улуғ шоирнинг ижтимоий фаолияти акс этса, «Мажолис ун-нафоис», «Хамса», «Муножот», «Ҳазойин ул-маоний» каби асарларида шахсий ҳаёти, «Муҳокамат ул-луғатайн», «Ҳамсат ул-мутаҳайирин», «Ҳолоти Сайид Ҳасан Ардашер» каби асарларида шоир қаламига мансуб баъзи асарларнинг ёзилиш тарихи билан боғлиқ маълумотларни учратиш мумкин. Навоийшунос олим Ш.Сирожиддинов бу маълумотларни қуидаги гурӯҳларга ажратишни тавсия қилади:

1. Ёшлиқ даври.
2. Мураббийлари.
3. Тутинган фарзандлари.
4. Суҳбатдошлари.
5. Навоий ва Жомий ҳамкорлиги.
6. Навоий ва сарой.

2. Замондошларининг асарларида келтирилган маълумотлар.

Абдураззоқ Самарқандийнинг «Матлаъи саъдайн ва мажмай баҳрайн» («Икки баҳтли сайёralарнинг келиб чиқиши ва дарёларнинг кўшилиши») асари шоир ҳақида маълумот берувчи илк манбадир. Бу асар 1467 – 1470 йиллар оралиғида яратилган ва бевосита ҳазрат Навоийнинг назорати остида яқунланган. Ундаги маълумотлар кейинчалик бошка тарихий асарларда айнан тақорланаиди. Ўша даврнинг яна бир тарихчиси Муҳаммад ибн Ховандшоҳ Мирхонднинг «Равзат ус-сафо» («Софлик боғи») асарида ҳам Алишер Навоий ҳаёти ва фаолиятига доир қимматли маълумотлар келтирилган. Китоб 7 жилдан иборат бўлиб, Навоийнинг бевосита топшириғи ва ҳомийлигига яратилган. «Равзат ус-сафо» Ўрта Шарқ ва Осиё тарихига бағишланган бўлиб, Навоий ҳақидаги маълумотлар, асосан, 7-қисмда – султон Ҳусайн Бойқаро салтнати даври тавсифида учрайди.

Давлатшоҳ Самарқандийнинг «Тазкират уш-шуаро» («Шоирлар тазкираси») асари Алишер Навоий номи зикр этилган илк тазкирадир. Унда беш аср давомида яшаб фаолият юритган 150 га яқин ижодкор ҳақида маълумот келтирилади. Асар 1486 йилда яратилган бўлиб, муқаддима, 7 қисм ва хотимадан иборат. Ҳазрат

Навоий ҳаёти ва фаолиятига доир маълумот асарнинг хотима – муаллифга замондош шоирлар ҳақидаги қисмида келтирилган.

Муъиниддин Мұхаммад ал-Замжий ал-Исфизорийнинг «Равзат ул-жиннот» («Жаннат боғи», 1492) асарида ҳазрат Навоийнинг Бодгис вилоятининг Чихил дұхтарон қасабасида работ курдиргани, Фарииддин Аттор мозори устида равоқли иморат соглани ҳақидаги маълумот келтирилади.

Абдураҳмон Жомийнинг «Баҳористон», «Ҳафт авранг» («Етти тахт»), «Нафаҳот ул-унс» («Дүстлик таровати») асарларида ҳам Алишер Навоий ҳаёти ва ижодий фаолияти билан боғлиқ күплаб маълумотлар келтирилади. Хусусан, Саъдий Шерозийнинг «Гулистон»и таъсирида яратилган «Баҳористон» асари 8 равза (боб)дан иборат бўлиб, 7-равзада 39 шоирдан бири сифатида Алишер Навоийга тўхтабиб ўтилади ва унинг комил ахлоқи ижодидан ҳам юксакроқ эканлиги таъкидланади.

Ҳусайн Бойқаронинг «Рисола»сида ҳам ҳазрат Навоийнинг туркий тилдаги ижоди, хусусан, шеърияти ҳамда «Ҳамса» асарига юксак баҳо берилиб, буюк шоир «сўз мулкининг кишваристони, соҳибқирони» деб улуғланади.

Фиёсиддин Ҳумомиддин Ҳондамирнинг «Хулосат ул-ахбор» («Хабарлар хулосаси», 1498 – 1499) ва «Ҳабиб ус-сияр» («Дўстлар сийрати», 1515 – 1523) асарларида Ҳусайн Бойқаронинг Ҳурросон таҳтига ўтириши ва Алишер Навоийнинг Ҳиротга қайтишидан бошлаб улуғ шоирнинг вафот этишигача бўлган давр оралиғидаги воқеалар баён қилинади. Тарихчининг «Макорим ул-ахлоқ» асари эса Навоийнинг юксак ахлоқига бағишланган маҳсус рисола бўлиб, шоир таржимаи ҳолига доир муҳим фактик маълумотларнинг келтирилганлиги билан аҳамиятлидир.

Зайниддин Восифий қаламига мансуб «Бадоеъ ул-вақоеъ» («Гўзал воқеалар») хотиралар тўпламининг тўрт боби (XIV – XVII) Алишер Навоий шахсиятига бағишланган. Унда ҳазратнинг феъли-сажиаси, замондошлари билан ижодий мулоқотлари, Навоий билан боғлиқ турли қизиқарли воқеалар ҳақида сўз боради.

Шунингдек, Абдуллоҳ Ҳотифийнинг «Лайли ва Мажнун», Ҳусайн Воиз Кошифийнинг «Жавоҳир ут-тафсир» («Тафсир жавоҳиротлари», 1493 – 1494), Атоуллоҳ Асилийнинг «Равзат ул-ахбоб» («Дўстлик боғи»), Атоуллоҳ Маҳмуд Ҳусайнийнинг «Бадоеъ ус-саноеъ» («Бадиий санъатлар»). Шамсиддин Мұхаммад Бадахшийнинг

«Рисолай муаммо», Ҳусайн бин Мұхаммад Ҳусайнийнинг «Рисолай муаммо» (1499), Аҳлий Шерозийнинг «Күллиёти Аҳлий Шерозий»даги мувашшаҳ-қасида маңынуси ва бошқа күплаб асарларда ҳам Алишер Навоийнинг ҳәёти, ижоди ва ижтимоий фаолияти ҳақида мұхим маълумотлар көлтирилган.

3. XVI – XIX асрлардаги тазкира, луғат, тарихий ва бадиий асарлар.

Алишер Навоий ҳақидаги маълумотлар XV асрдан кейинги тазкира, тарихий ва бадиий асарларда ҳам көлтириб үтилади. Ҳусусан, Ҳасанхожа Нисорийнинг «Музаккири аҳбоб» тазкираси Навоийнинг «Мажолис ун-нафоис» тазкираси асосида яратилған бўлиб, тазкиранинг биринчи боб тўртинчи фаслида «Амир Ҳайдар Алишернинг муқаддас ёди» сарлавҳаси остида буюк шоирнинг «Хамса»си ва туркий ғазалларининг умумий ҳажми, форсий тилдаги шеърларидан парча көлтирилади.¹

Фахрий Ҳиротийнинг «Латоифнома» асари Алишер Навоийнинг форсигүй халқлар орасида машҳур бўлишида мұхим аҳамиятга эга бўлиб, мазкур асар, аслида, «Мажолис ун-нафоис»нинг форс тилига қилинган таржимасиdir. Асарнинг муаллиф томонидан кўшимча тарзда киритилған 9-мажлиси бевосита ҳазрат Навоийнинг ҳәёти ва ижодига бағишланған. «Латоифнома»да буюк шоирнинг ота-боболари, сulton Ҳусайн Бойқаро билан болалиқдан давом этиб келган дўстлик ришталари, Навоийнинг Самарқанддаги ҳәёти, давлат арбоби сифатидаги фаолияти, мол-давлати ҳажми, вафоти тафсилотлари билан боғлиқ мұхим маълумотлар көлтирилган. Фахрий буюк шоир асарларидан 14 таси номини ҳам сабаб ўтади.

Захириддин Мұхаммад Бобурнинг «Бобурнома» асари Алишер Навоий шахсияти ва ижодига берилган баҳонинг ўзгачалиги билан алоҳида ажралиб туради. Асада Навоийнинг сulton Ҳусайн

¹ Ҳасанхожа Нисорий ҳазрат Навоийни тушида кўриш шарафига мұяссар бўлганлигини ва Навоийнинг «Бизнинг ашъоримиздан бирор нарса ёд билур-мисан?» – деган саволига жавобан кўйидаги мақтауни ўқиганини айтади:

Эй Навоий, сен киму меҳробу масжид истамак

Қайдаким, хўблар аёгин қўйса, сен бошингни қўй!

«Ҳазойин ул-маоний» куплиётига киритилған шеърлар орасида мазкур мақтаъ билан якунланған ғазал учрамайди.

Бойқаро билан ҳаммактаб бўлгани. султон Абу Сайд мирзо томонидан сургун қилингани, Самарқандда Аҳмад Ҳожибек ҳомийлиги остида яшагани, табъи нозиклиги, олти маснавий («Хамса» ва «Лисон ут-тайр»), тўрт девон («Хазойин ул-маоний») тартиб бергани, «Муншаот»ни тузгани ҳақида маълумотлар келтирилиши асносида шоирнинг «Мезон ул-авзон» ва «Девони Фоний» асарлари хусусида баъзи танқидий фикрлар ҳам билдирилади.²

Мирзо Ҳайдар Дўғлотнинг «Тарихи Рашидий» асари икки жилдан иборат бўлиб, асосан, 1541 – 1545 йиллар оралиғида ёзил тугалланган. Асарда ҳазрат Навоийнинг султон Ҳусайн билан болалиқдан дўст экани, кейинчалик унинг саройида хизмат қилгани, фазлу ҳунар ахлига ҳомий бўлгани, кўплаб иморату бинолар, масжидлар қургани, табъи нозиклиги билан боғлиқ фикрлар бошқа тарихий манбалардаги маълумотларга мос келгани ҳолда, шоирнинг отаси уйғур бахши (котиб)ларидан эканлиги ва оддий одам бўлгани ҳақидаги қарашлар тарихий асосга эга эмас деб айтиш мумкин.³

Лутф Алибек Озарнинг «Оташкадаи Озарий», Сом Мирзо Сафавийнинг «Тухфаи Сомий», Ризоқулихон Ҳидоятнинг «Мажмуъа ул-фусаҳо» («Гўзал сўз эгаларининг тўплами») каби асарларида ҳам ҳазрат Навоий ҳаёти ва ижодий фаолияти билан боғлиқ фикрлар муайян даражада баён қилиб берилган.

Бу даврда Алишер Навоий асарларини чуқурроқ ўрганиш учун маҳсус луғатлар ҳам тузила бошланди. Навоий ҳаётининг сўнг-

² Заҳириддин Муҳаммад Бобур «Мезон ул-авzon»нинг рубоий вазнига бағишлиланган қисмида 4 ўринда хато бор деб ҳисоблайди. Арузшунос олимлар А.Ҳожиаҳмедов, С.Ҳасановлар мазкур хатолар Алишер Навоий эмас, балки асарни оққа кўчирган хаттонинг хатоси эканлигини таъкидлайдилар. Дарҳақиқат, вазнларга мисол тариқасида келтирилган рубоий мисраларидағи сўзларнинг ўрни алмашгани, рукнлар номининг чалкаш келтирилганини ҳисобга олсан, олимларимизнинг қарашлари тўғри экани маълум бўлади.

³ Ш.Сирохиддиновнинг «Алишер Навоий: манбаларнинг қиёсий типологик, текстологик таҳлили» китобида ёзилишича. Мирзо Ҳайдар Навоий вафотидан сал илгарироқ – 1499/1500 йилда Тошкентда туғилган. Умрининг асосий қисми Кошғар ва Ҳиндистонда ўтгани учун, унда Навоий ҳақидаги маълумотларни улуғ шоирни шахсан таниган кишилардан олиш ва ўз маълумотларни текшириб кўриш имконияти йўқ эди. Шу сабабли асар муаллифи ўзи фикр юритаётган мавзу бўйича баъзан ёзма манбаларга эмас, балки оғзаки, тасдиғини топмаган маълумотларга таянган бўлиши мумкин.

ги йилларида унинг асарлари асосида «Бадоэй ул-луғат» (тузувчи Толеъ ал-Иймоний ал-Харавий), бир оз кейинроқ «Луғати Навоий» яратилади. 1560 йилда Алойи бинни Муҳибий «Ал-луғат ун-Навоият вал-истишҳодат ул-чиғатоият» («Навоий луғати ва чиғатои тили далиллари») луғатини тузади. Шунингдек, бу даврда Навоий асарларида кўпгина сўзларни усмонли турк тилида тушунтириш мақсадида «Абушқа» луғати ҳам яратилади. XVIII асрда Мирзо Маҳдийхон тузган «Мабон ул-луғат» («Луғат пой-девори»), XIX асрда Фатҳ Али Кожарийнинг «Луғоти атрокия» («Турклар луғати»), Муҳаммад Ҳоккор томонидан 1798 йилда тузиленган «Мунтаҳаб ул-луғат» («Танланган луғатлар») ҳамда Шайх Сулаймон Бухорийнинг «Луғати чиғатои ва турки усмоний» каби асарларида ҳам Алишер Навоий ижодидан олинган парчаларга кенг ўрин ажратилади.

4. Навоий ижодининг илмий мезонлар асосида ўрганилиши.

Ўтган асрнинг 20 – 30-йилларидан бошлаб юртимизда Алишер Навоий ижодини чинакам илмий мезонлар асосида ўрганишга киришилди. Бу соҳадаги дастлабки қадам сифатида Абдурауф Фитратнинг «Навоийнинг форсий шоирлиги ҳам унинг форсий девони тўғрисида» («Маориф ва ўқитгучи» журн., 1925) ва «Фарҳоду Ширин» достони тўғрисида» («Аланга» журн., 1930) мақолалари ни кўрсатиш мумкин.

Бутун собиқ Шўролар Иттилоғи миқёсида Навоий таваллудининг 500 йиллигини кенг нишонлаш ҳақида қарор қабул қилиниши муносабати билан «Ҳамса»нинг қисқартирилган варианти (Садриддин Айний, 1939), «Чор девон», «Муҳокамат ул-луғатайн», «Маҳбуб ул-қулюб» асарлари нашр этилди, турли тадқиқот ва монографиялар яратилди, шоир асарлари рус, украин, тоҷик, озарбайжон ва бошқа кўплаб тилларга таржима қилинди. Олим Шарафиддинов («Алишер Навоий», 1939), М.Шайхзода («Гениал шоир», 1940), В.Абдуллаев («Навоийнинг Самарқанддаги ҳаётни ва фаолияти ҳақида», 1940) каби олимларнинг тадқиқотлари яратилди; А.Боровков, Е.Э.Бертельс, Ҳ.Олимжон, Ҳ.Зариф, О.Усмонов, М.Шайхзода ҳамда бошқа ижодкор ва олимларнинг илмий мақолаларини ўз ичига олган «Родонаачальник узбекской литературы» («Ўзбек адабиётининг асосчиси», 1940) тўплами эълон қилинди.

Собиқ Иттифоқ ҳудудида 1941 йилда II жаҳон уруши бошлангани сабабли, Алишер Навоий юбилейи 1948 йил май ойида нишонланди ва шу муносабат билан Е.Э.Бертельс («Навои. Опыт творческой биографии»), О.Шарафиддинов («Алишер Навоий. Ҳаёти ва ижодиёти»), С.Айний («Алишер Навоий»)ларнинг илмий рисолалари эълон қилинди.

ХХ асрнинг 60-йилларидан бошлаб навоийшунослик янада сермаҳсул ишларни амалга оширди. «Ҳамса»нинг мукаммал нашри (Порсо Шамсиев, 1960), «Ҳазойин ул-маоний»нинг академик нашри (Ҳамид Сулаймонов, 1959 – 1960) ва Алишер Навоий «Асарлар»и 15 томлигининг эълон қилиниши навоийшуносликдаги муҳим воқеалардан бўлди. Ўтган асрнинг 90-йилларигача Навоий ҳаёти ва ижодий фаолиятига бағишлиланган тадқиқотлар рўйхатининг ўзи алоҳида бир китобни ташкил қиласди (Алишер Навоий: 1441 – 1501 йил. Адабиётлар кўрсаткичи, 1991). 1987 – 2003 йиллар давомида Ўзбекистон Республикаси Фанлар академияси Алишер Навоийномидаги Тил ва адабиёт институти ҳамда Ҳ.С.Сулаймонов номидаги Қўлёзмалар институти томонидан Алишер Навоийнинг 20 жилдлик «Мукаммал асарлар тўплами» эълон қилинди.⁴ П.Шамсиев, Н.Маллаев, В.Зоҳидов, И.Султон, Ҳ.Сулаймонов, А.Қаюмов, С.Ғаниева, А.Рустамов, А.Ҳайитметов, А.Абдуғафуров, С.Эркинов, Б.Валихўжаев, Ё.Исҳоқов, Н.Комилов, Р.Воҳидов, М.Ҳакимов, Л.Зоҳидов каби олимлар навоийшунослик тараққиётига алоҳида ҳисса қўшдилар.

Мустақиллик йилларидан Алишер Навоий ижодини янгича та-мойиллар асосида ўрганиш бошланди. И.Ҳаққуловнинг «Тасаввуф ва шеърият» (1991), «Навоийга қайтиш» (2007), С.Ҳасановнинг «Навоийнинг етти тухфаси» (1991), М.Мухиддиновнинг «Икки олам ёғдуси» (1991), Ҳ.Қурдатуллаевнинг «Алишер Навоийнинг адабий-эстетик қарашлари» (1991), А.Ҳайитметовнинг «Навоийхонлик сұхбатлари» (1993), «Темурийлар даври ўзбек адабиёти» (1996), А.Абдуғафуровнинг «Буюк бешлик сабоқлари» (1995). Р.Воҳидовнинг «Алишер Навоийнинг ижод мактаби» (1994), «Алишер Навоий ва илоҳиёт» (1994), Н.Комиловнинг «Тасаввуф» (1996 – 1999, 2009), С.Олимовнинг «Ишқ, ошиқ ва маъшуқ» (1992), «Нақшбанд ва Навоий» (1996), Н.Жумаевнинг «Сатрлар силсила-

⁴Мукаммал асарлар тўпламининг таркиби 1-иловада келтирилган.

сидаги сеҳр» (1996), А.Хожиаҳмедовнинг «Навоий арузи нафосати» (2006), А.Қаюмовнинг ўн икки жилдлик «Асарлар» (2010), «Дилкушо тақорлар ва руҳафзо ашъорлар» (2011), Алибек Рустамовнинг «Ҳазрати Навоийнинг эътиқоди» (2010), Ш.Сироҗиддиновнинг «Алишер Навоий: манбаларнинг қиёсий типологик, текстологик таҳлили» (2011), Н.Комиловнинг «Маънолар оламига сафар» (Алишер Навоий ғазалларига шарҳлар, 2012) каби тадқиқотлари; М.Ҳамидованинг «Алишер Навоий «Садди Искандарий» достонининг илмий-танқидий матни ва матний тадқиқи» (1994), М.Муҳиддиновнинг «Алишер Навоий ва унинг салафлари ижодида инсон концепцияси» («Ҳамса»ларнинг биринчи достони асосида, 1995), Қ.Эргашевнинг «Ўзбек насрода иншо» (Навоийнинг «Муншаот»и мисолида, 1996), М.Акбарованинг «Алишер Навоий ғазалларида қофия» (1997), Ш.Сироҗиддиновнинг «Алишер Навоий ҳаёти ва фаолиятига оид XV – XIX асрларда яратилган форс-тожик манбалари» (қиёсий-типологик, текстологик таҳлил, 1998), А.Эркиновнинг «Алишер Навоий «Ҳамса»си талқинининг XV – XX аср манбалари» (1998), К.Муллахўжаеванинг «Алишер Навоий ғазалиётida тасаввуфий тимсол ва бадиий санъатлар уйғунлиги: («Бадоеъ ул-бидоя» девони мисолида, 2005), С.Ўтанованинг «Алишер Навоий ғазалиётida ранг символикаси» (2007), З.Мамадалиеванинг «Алишер Навоийнинг «Лисон ут-тайр» достонидаги рамзий образлар тизими» (2011) каби диссертацион ишлари шулар жумласидандир.

Алишер Навоий «Ҳамса»си таркибига киравчи беш достон 2006 йилда асл матни ва мукаммал насрый баёни билан Ғафур Ғулом номидаги нашриёт-матбаа ижодий уйи томонидан лотин ёзувида нашр этилди.

Алишер Навоий таваллудининг 570 йиллиги муносабати билан шоир асарларининг 10 жилдлиги эълон қилинди.⁵ Шунингдек, «Ҳазойин ул-маоний» куллиёти таркибига киравчи 4 девон ҳам нашрдан чиқди.

5. Навоий ижодининг Ғарбда ўрганилиши.

Навоий асарлари XVI асрлардаёқ Европада маълум эди. 1557 йилда итальян тилида Венецияда нашр этилган табризлик арман

⁵ 10 жилдлик таркиби 2-иловада келтирилган.

ёзувчиси Христофор Табризийнинг «Сарандиб шоҳининг уч ёш ўғлони зиёрати» асарининг иккинчи қисмида Навоийнинг «Сабъаи сайёр» достонидан олинган Баҳром ва Дилором саргузашти баён қилинади. Шунингдек, XVII аср грузин шоири Цицишвили Навоийнинг «Сабъаи сайёр» достонини ижодий таржима қилиб, «Етти гузал» достонини яратади.

1697 йилда француз олимни Артолеме д'Эрбело «Шарқ кутубхонаси» номли энциклопедияда Навоий таржимаи ҳоли ва асарлари номини келтирса, шарқшунос Сильвестре де Саси (1758 – 1838) ўз тадқиқотларида Алишер Навоийнинг шоир ва давлат арбоби сифатидаги фаолиятига тўхталиб ўтади.

XIX асрга келиб Европада Алишер Навоий асарлари ва улар асосида тузилган лугатларни нашр этиш ишлари бошланади. Француз шарқшуноси Катрмер 1841 йилда Парижда Навоийнинг «Муҳокамат ул-лугатайн» ва «Тарихи мулуки ажам» асарларини нашр эттиради. Рус олимни И.Н.Берёзин ўзининг «Турк хрестоматияси» номли китобига шоир асарларидан парчалар киритади.

Рус шарқшуноси В.В.Вельяминов 1868 йилда Алойи бинни Муҳибийнинг «Ал-лугат ун-Навоият вал-истишҳодат ул-чиғатояят» («Навоий лугати ва чигатой тили далиллари») лугатини Санкт-Петербургда нашр эттиради. Француз шарқшуноси Паве де Куртейл эса Навоий асарларидан фойдаланиб луғат тузади.

Фарбда Алишер Навоийнинг ҳаёти ва ижодий фаолиятини илмий аспектда ўрганиш XIX асрдан бошланган деб айтиш мумкин. 1818 йилда немис олимни Х.Пургшталл «Навоийга оид битиклар» асарини яратиб, унда Алишер Навоийнинг насл-насаби, шоирлик, давлат арбоби ва бунёдкорлик ишларига тўхталиб ўтади. Рус шарқшуноси П.Савельев 1835 йилда шоир ижодига бағишилаб маҳсус «Алишер Навоий» номли мақола ёзади.

1856 йилда М.Никитскийнинг «Эмиръ Низам-Эд-Динъ-Али Ширъ. Государственном и литературном его значении» («Амир Низомиддин Алишер: давлат арбоби ва шоир сифатида») номли шоир ижодига бағишиланган илк магистрлик диссертацияси вужудга келади. М.Никитский Навоийнинг ҳаёти ва фаолиятини анча тўлиқ ўргангани, унинг шоир, олим ва давлат арбоби сифатидаги фаолиятига юқори баҳо бергани ҳолда Шарқ мумтоз адабиётидаги ижодий анъаналарни англаб етмагани учун Алишер Навоийни «форс-тоҷик адабиётининг таржимони» деб эълон қиласди.

Айнан шу тарздаги ғайриилмий қараашлар француз шарқшунослари М.Белен («Алишер Навоий», 1868), Э.Блоше («Миллий кутубхонада сақланаётган туркий кўлёзмалар каталоги»), Л.Бува («Темурийлар даври цивилизациясидан лавҳалар», 1926; «Мўғул империяси», 1927), инглиз шарқшуноси Э.Браун («Татар хонликлари давридаги форс адабиёти тарихи», 1920), рус шарқшуноси В.Бартольдларнинг тадқиқот ва илмий мақолаларида давом эттирилди. Хусусан, В.Бартольд ўзининг «Мир-Али-Шир и политическая жизнь» («Мир Али Шер ва сиёсий ҳаёт») мақоласида Навоийнинг давлат арбоби сифатидаги фаолиятига ижобий баҳо беради, лекин унинг адабий мероси моҳиятини англаб етмайди. Олим мазкур мақолада: «Алишер Навоий ўзининг девонларида ва бошқа кўплаб бадиий асарларида фақатгина форсий шоирларнинг тақлидчиси сифатида намоён бўлади». – деб ёзар экан, масалага адабиётшунос эмас, балки тарихчининг нигоҳи билан ёндашади ва ҳар бир деталда аниқлик, мантиқ, реаллик ва конкрет воқеликни кўрмоқчи бўлади.⁶

Аслида, мусулмон Шарқида ижодкорнинг салоҳияти, Фарб адабиётидагидан фарқли равишда, янги сюжет яратишига қараб эмас, балки анъанавий воқелик, мавзу, қаҳрамонлар доирасида янги фикр айта олиш иқтидорига қараб белгиланган. Айнан мана шу анъанавийликни англай олмаслик юқоридаги олимларнинг Алишер Навоий ижодига нохолис баҳо беришларига олиб келган.

Ниҳоят, шарқшунос олим Е.Э.Бертельс Алишер Навоий ва Фаридиддин Аттор достонларини қиёсий ўрганиш орқали («Навои и Аттар») ҳазрат Навоийнинг оригинал шоир эканлигини исботлайди. Шу тариқа Алишер Навоий ижодини хорижда кенг илмий аспектда холис ўрганиш ишлари бошлаб юборилади.

Немис олими А.Курелланинг «Буюк шоирнинг қайта кашф қилинishi» номли тадқиқоти Фарб навоийшунослигига янги босқични бошлаб берди. Ушбу тадқиқотдан сўнг Фарбда Навоий шахсияти энди икки йўналишда – ҳам буюк ижодкор, ҳам давлат арбоби сифатида тадқиқ қилина бошланди. Инглиззабон олимлардан М.Сабтелни,

⁶ Бу ҳақда тўлиқроқ маълумот олиш учун қаранг: Эркинов А.С. Подражательность или оригинальность: оценка В.В.Бартольдом узбекской классической литературы // Русская диаспора в Узбекистане: время, события, люди. Материалы научной конференции. – Ташкент, 2009. – С.72 – 78.

В.Фельдмен, Д.Генчтурк, Д.Девин, К.Адахл, Г.Дикнинг илмий изла-нишлари ва таржима борасидаги фаолиятлари, Берлин шаҳрида Алишер Навоий ижодига бағишиланган симпозиумнинг ташкил қилиниши ва унда навоийшунос олимлар ҳамда шоир асарлари таржи-монлари: Б.Ҳайнкеле, К.Шунинг, Ю.Пауль, М.Кирхнер, З.Клайнмиҳел, Э.Таубе ва бошқаларнинг турли мавзулардаги маърузалари Ғарб навоийшунослигининг тобора ривожланиб бораётганидан далолат-дир.⁷ Буларнинг барчаси буғунги глобаллашув жараёнида Алишер Навоий ижоди ва шахсига бутун дунёда қизиқиш ҳамда эҳтиёжнинг ортиб бораётганини кўрсатади.

Таянч тушунчалар

- навоийшунослик
- анъанавийлик
- равза
- тазкира
- рисола
- қасидаи маснуъ
- мувашиш
- академик нашр
- мукаммал асарлар тўплами
- илмий-танқидий матн

Савол ва топшириқлар:

1. Алишер Навоий ижодига унинг ҳаётлик чогидаёқ қизиқиши пайдо бўлганинг сабаби нимада деб ўйлайсиз?
2. Навоийшуносликнинг тадрижий тараққиётини қандай босқичларга бўлиб ўрганиш мумкин?
3. Ҳазрат Навоийнинг қайси асарларида ўзи билан боғлиқ маълумотлар баён этилган?
4. Навоий ҳақида замондошлари томонидан ёзилган ёки зикр этилган асарлар номларини айтинг.
5. Ғарб адабиётшунослари Навоийни дастаевал таржи-

⁷ Алишер Навоий ижодининг хорижда ўрганилиши билан боғлиқ маълумотлар М.Холбеков, А.Абдуазизов, Р.Абдуллаева, Г.Халиева, З.Мирзаева каби олимларнинг тадқиқот ва мақолаларида келтирилган.

мон-шиоир сифатида тушунгандари сабабини қандай изоҳлаш мумкин?

6. Замонавий Ғарб навоий шуносларидан кимларни биласиз?

Адабиётлар:

1. Самарқандий Давлатшоҳ. Шоирлар бўстони («Тазкират уш-шуаро»дан). – Тошкент: Адабиёт ва санъат, 1967.
2. Хондамир Фиёсиддин бинни Ҳумомиддин. Макорим ул-аҳлоқ (Яхши хулқлар) / Форсчадан М.Фахриддинов, П.Шамсиев тарж. – Тошкент: Бадиий адабиёт, 1967.
3. Бобур Заҳириддин. Бобурнома / Ҳозирги ўзбек тилига Ваҳоб Раҳмонов ва Каромат Муллаҳўжаева табдили. – Тошкент: O'qituvchi, 2008.
4. Бойқаро Ҳусайн. Рисола: Девон. – Тошкент: Шарқ, 1995.
5. Аёзий Мирзо Муҳаммад Ҳайдар. Тарихи Рашидий. – Тошкент: O'zbekiston, 2011.
6. Восифий Зайниддин. Бадоеъул вақоєъ – Нодир воқеалар / Форсийдан Н.Норқулов таржимаси. – Тошкент: Адабиёт ва санъат, 1979.
7. Навоий замондошлари хотирасида. – Тошкент: Адабиёт ва санъат, 1985.
8. Сироҗиддинов Шуҳрат. Алишер Навоий: манбаларнинг қиёсий-типологик, текстологик таҳлили. – Тошкент: Akademnashr, 2011.
9. Алишер Навоий ижодий ва маънавий меросининг оламшумул аҳамияти (халқаро илмий-назарий анжуман материаллари). – Тошкент: O'zbekiston, 2011.
10. Vohidov R., Eshonqulov H. O'zbek mumtoz adabiyoti tarixi. – Тошкент: O'zYU Adabiyot jamg'armasi nashriyoti, 2006.
11. Ҳайитметов А. Темурийлар даври адабиёти. – Тошкент: Фан, 1996.
12. Алишер Навоий: 1441 – 1501 йил. Адабиётлар кўрсаткичи / Туз. З.Бердиева, А.Туропова. – Тошкент, 1991.

<http://www.referun.com/n/issledovanie-zhizni-i-tvorchestva-alisher-navoi-v-zapadnoevropeyskom-vostokovedenii#ixzz2HOWXH4iO>

<http://www.payam-aftab.com/en/news/309/Al-Shir-Nava%27i>

Nizomiy nomli

T D P U

taʼtibxonasi

У - 7668/3

АЛИШЕР НАВОИЙ ҲАСБИ ҲОЛИ МАСАЛАЛАРИ. ҲАЁТИГА ДОИР МУҲИМ МАҶЛУМОТЛАР

РЕЖА:

- 1. Алишер Навоий ҳаётини ўрганиши манбалари.**
- 2. Шоирнинг болалик ва йигитлик йиллари.**
- 3. Давлат арбоби сифатидаги фаолияти.**
- 4. Ҳаётининг сўнгги йиллари.**

Алишер Навоийнинг ҳасби ҳоли билан боғлиқ масалалар, аввало, шоирнинг ўз асарларида, шунингдек, замондошлари Абдураззоқ Самарқандийнинг «Матлаъи саъдайн ва мажмаи баҳрайн», Мирхонднинг «Равзат ус-сафо», Хондамирнинг «Хулосат ул-ахбор», «Макорим ул-ахлоқ», «Ҳабиб ус-сияр», Зайниддин Восифийнинг «Бадоеъ ул-вақоеъ». Давлатшоҳ Самарқандийнинг «Тазкират уш-шуаро», Муъиниддин Муҳаммад ал-Замжий ал-Исфизорийнинг «Равзат ул-жиннот», Абдураҳмон Жомийнинг «Баҳористон», Захириддин Муҳаммад Бобурнинг «Бобурнома» каби тарихий ва тазкира асарларида учрайди.

Алишер Навоий 1441 йил 9 февралда Амир Темурнинг ўғли Шоҳруҳ мирзо ҳукмронлиги даврида Ҳиротда туғилди. Хондамирнинг «Макорим ул-ахлоқ» асарида маълумот берилишича, шоирнинг туғилган санаси ҳижрий 844 йил рамазон ойининг 17-кунида бўлиб, товуқ йилига тўғри келади. Унинг отаси Фиёсиддин Муҳаммад (уни Фиёсиддин Кичкина деб ҳам аташган)⁸ темурийлар саройининг амалдорларидан, онаси (исми маълум эмас) Кобул амирзодаларидан Шайх Абу Сайд Чангнинг қизи бўлган. Абдураззоқ Самарқандийнинг «Матлаъи саъдайн» ва Мирхонднинг «Равзат ус-сафо» асарларида келтирилишича, Алишернинг бобоси Амир Темурнинг ўғли Умаршайх билан эмиқдош (кўкалдош) бўлган. Навоий «Вақфия» асарида ўз ота-боболарининг темурийлар саройида юқори мавқеда бўлганликлари ҳақида шундай ёзади: «...бу хокисорнинг ота-бо-

⁸ Амир Темурнинг Умаршайх исмли ўғлига набира бўлган шаҳзода Фиёсиддин (султон Ҳусайн Бойқаронинг отаси)дан фарқлаш учун Алишернинг отасини Фиёсиддин Кичкина деб атаганлар.

боси ул ҳазрат (султон Ҳусайн Бойқаро – Д.Ю.)нинг бобо ва аждоди хизматларида... улуғ маротибқа сазовор ва бийик маносибқа комгор бўлғон эрдилар».⁹

Алишернинг тоғалари Мирсаид Кобулий ва Мұхаммад Али Фарибийлар ҳам шоир булишган. Бўлажак шоир ана шундай муҳитда, алоҳида тарбия ва назоратда ўсади. Кичиклик чогидан ўз даврининг машҳур олиму фозиллари даврасида бўлади. Учтўрт ёшларида машҳур шоир Қосим Анворнинг:

*Риндему ошиқему чаҳонсўзу чома чок,
Бо давлати ғами ту зи фикри чаҳон чи бок, –*

(Мазмуни: Риндмиз, ошиқмиз, жаҳон ўртовчи ва ёқавайронлармиз, сенинг ғаминг турганда дунё фикридан не фойда) байтини ёд айтиб, меҳмонларни ҳайратга солади. Бу ҳақда кейинчалик «Мажолис ун-нафоис»нинг биринчи мажлисида эслаб ўтади. Бир йилдан сўнг, яъни 1445 йилда мактабга боради ва ёш Ҳусайн билан бирга ўқииди.

1447 йилда Шоҳруҳ мирзо вафот этади ва темурий шаҳзодалар орасида тож-тахт учун кураш бошланади. Ҳиротда рўй берган нотинчлик сабабли Алишерлар оиласи Ироқقا йўл олади. Йўлда, Тафт шаҳрида ёш Алишер замонасининг машҳур тарихчиси, «Зафарнома»нинг муаллифи Шарафиддин Али Яздий билан учрашади ва улуғ тарихчи б ёшли Алишернинг ҳаққига дуо ўқииди. Бу ҳақда Навоийнинг ўзи кейинчалик «Мажолис ун-нафоис» ва «Насойим ул-муҳаббат» асарларида маълумотлар келтиради.

1451 йилда Хурсон анча тинчиди, Алишерлар хонадони Ҳиротга қайтади. Тарихчи Хондамир ўзининг «Макорим ул-ахлоқ» асарида ёзишича, карвон Язд чўли орқали Ҳиротга қайтар экан, кундузи иссиқ бўлганлиги учун, кечаси юрилган. Тунги юришлардан бирида

⁹ Алишер Навоий ўзининг бирор асарида ота-онаси ҳақида аниқ маълумот келтирмайди. Навоий даврида яратилган манбаларда ҳам улуғ шоирнинг ота-онаси билан боғлиқ етарли маълумот учрамаслигини кузатиш мумкин. Ш.Сирожиддиновнинг ёзишича, ҳазрат Навоий ғоят камтарлик юзасидан ўз аждоди борасидаги тафсилотларнинг келтирилишини лозим топмаган ва замондошларининг ҳам бу масалада шундай йўл тутишларини истаган. Алишер Навоий вафотидан сўнг яратилган манбаларда бу маълумотлар адади бир оз кенгаяди.

Алишер эгар устидан ерга тушиб қолади ва уйқу зўридан бехабар ётаверади. Қуёш еру қўкни ёритгандан кейингина уйғониб, узоқда кўринган бир қора нуқтани излаб йўлга чиқади. Бўлажак шоирнинг йўқолиб қолганини бир оз вақт ўтгач билган ота-она бир мулозими ни Язд томонга жўнатадилар ва болани топиб оладилар.

1452 йилда Абулқосим Бобур мирзо Хурросон тахтига ўтиради ва нотинчилклар анча босилади. Абулқосим Бобур маърифатли ҳукмдор бўлиб, тасаввуф илмидан хабардор, табъи назмга мояил шахс эди. Навоий бу ҳақда кейинчалик ўз тазкирасида шундай маълумот беради: «Бобир мирзо – дарвешваш ва фонийисифат ва каримул-ахлоқ киши эрди. Ҳиммати олида олтуннинг дағи кумушнинг тош ва туфроғча ҳисоби йўқ эрди. Тасаввуф рисолаларидин «Ламаъот» била «Гулшани роз»ға кўп машъуф эрди. Табъи дағи назмга мулойим эрди...»

Абулқосим Бобур Алишернинг отаси Ғиёсиддин Муҳаммадни Сабзаворга ҳоким қилиб тайинлайди, Ғиёсиддин Муҳаммад ўз оиласи билан шу шаҳарга кўчиб ўтади ва Алишер ўқишини давом эттиради. Алишер Сабзаворда ўз даврининг шоиру фозиллари Хожа Аҳмад Муставфий, Мавлоно Яхё Себак, Дарвеш Мансур, Хофиз Али Жомий, Хожа Маҳмуд. Мавлоно Номийлар билан танишади, Дарвеш Мансурдан аруз илмини ўрганади. Саъдий Шерозийнинг «Гулистон», «Бўстон» асарларини ўқийди, Фаридиддин Атторнинг «Мантиқ ут-тайр» достонини ёд олади. Бу ҳақда кейинчалик «Лисон ут-тайр» достонида шундай ёзади:

Истабон ташхиси хотир устод,
 Назм ўқутурким равон бўлсун савод.
 Насрдин баъзи ўқур ҳам достон,
 Бу «Гулистон» янглиғ-у, ул «Бўстон».
 Менга ул ҳолатда табъи булҳавас
 «Мантиқ ут-тайр» айлаб эрди мултамас.
 Топти сокин-сокин ул тақрордин,
 Сода кўнглум баҳра ул гуфтордин.

1453 йилда Алишер мактабдош дўсти Ҳусайн билан Абулқосим Бобур хизматига киради. Аввал Сабзаворда, сўнг Машҳадда яшайди. Бу йилларда ҳам ёш Алишер ўқиш ва илм ўрганишда давом этади.

1457 йилда Абулқосим Бобур мирзо вафот этади. Хурросон таҳтини Абу Сайд мирзо эгаллайди. Ҳусайн Бойқаро таҳт учун курашга киришиб кетади. Алишер Навоий эса Машҳад мадрасаларида ўқиши давом эттиради. Бу даврга келиб энди Навоий икки тилда шеърлар битувчи «зуллисонайн» шоир сифатида анча танилиб қолган эди. Ҳондамирнинг маълумот беришича, бир куни Алишер Навоий Лутфий ҳузурига борганида, «малик ул-калом» ундан янги ёзилган бир ғазалини ўқиб беришни сўрайди. Навоий ўзининг:

Оразин ёпқоч кўзимдин сочилур ҳар лаҳза ёш,
Бўйлаким, пайдо бўлур юлдуз, ниҳон бўлғоч қуёш, –

матлаъси билан бошланувчи ғазалини ўқииди. Шунда Лутфий, агар имкони бўлганида, ўзининг 10 – 12 минг форсий ва туркий тилда битилган байтларини шу ғазалга алмаштиришини айтиб шоирнинг истеъодига юксак баҳо беради.

Шоир Машҳад мадрасаларида ўқиб юрган пайтида бир муддат хасталаниб қолади. У талабалар учун ажратилган ҳужрада касал бўлип ётган ҳолатини «Мажолис ун-нафоис»да шундай эслайди:

«...Султон Абу Сайд мирзо замонида Машҳадда ғариб ва хаста бир буқъада йиқилиб эрдим. Курбон вақфаси бўлди, оламнинг ақсо билодидин ҳалқ имом равзаси тавофиға юз қўйдилар. Расмдурким, мусоғирлар муттәйин буқъа гаштига ҳам борурлар, ул буқъадаким, фақир йиқилиб эрдим, жамоати маволиваш эл саир қилиб, деборда битилган абётни ўқиб, бир байт устида баҳсга туштилар. Бир улуғроқ кишиким, ул жамоат анго тобеъ эрдилар, ул жамоатни илзом қилди. Фақир заъф ҳолида ул жамоат жонибидин сўз айттим. Анга дедиларким: бу бемор йигит ҳам бир сўз айтадур. Ул улуғроқ киши худ Шайх Камол эрмишким, зиёратга келган эрмиш! Бошим устига келиб, мабҳасни орага солди. Фақир жавоб бергач, ўз сўзидан қайтиб, таҳсиллар қилиб, ҳолимни тафаххус қилди. Эрса ул ҳам фақирни эшишган экандур ва кўрар ҳаваси бор экандур». Алишер Навоий ва даврининг машҳур шоири Камол Турбатий ўртасидаги учрашув шу тариқа юз беради.

Алишер Навоий 1460 йилларнинг бошларида Ҳиротга қайтади. Бу даврда Алишернинг тогалари Мирсаид Кобулий ва Муҳаммад Али Ғарибийлар Ҳусайн Бойқаронинг сипоҳийлари сифатида Султон Абу Сайд мирзога қарши жангда ҳалок бўлган

эдилар. Шоир Ҳиротда узоқ қололмайди ва Самарқандга йўл олади.¹⁰ Абдураззок Самарқандий, Мирхонд ва Хондамир шоирнинг Самарқандга бориш сабабларини илм ўрганишга интилиш билан боғласалар, Заҳириддин Муҳаммад Бобур «ихрож» (сургун) деб атайди. Алишер Навоийнинг ўзи Сайид Ҳасан Ардашерга ёзган «Маснавий» мактубида Самарқандга кетишининг бир неча сабабларини кўрсатади:

*Бир улким, чу сўздиндир инсон шариф,
Чу ҳайвонга сўз ўйқдур, улдур касиф...
Мен ул менки, то турк бедодидур,
Бу тил бирла то назм бунёдидур.
Фалак кўрмади мен киби нодире,
Низомий киби назм аро қодире...
Етар тенгридин онча қувват манга
Ки, бўлмас битирига фурсат манга.
Бу майдонда Фирдавсий ул гурд эрур
Ки, гар келса Рустам жавобин берур.
Рақам қилди фарҳунда «Шаҳнома»е
Ки, синди жавобида ҳар хомае
Ки, ҳар неча нутқ ўлса коҳилсарой,
Битигаймен ўттуз йилин ўттуз ой.
Не «Шаҳнома»ким, «Ҳамса»га урсам эл,
Анинг панжаси сори еткурсам эл.
Ўтуз илки они Низомий демиши.
Қошимда эрур икки-уч ишллик иш...*

¹⁰ Ш.Сирожиддинов Навоий Самарқандга айнан Ҳиротдан йўл олганлиги масаласига шубҳа билан қарайди. Олимнинг фикрича, Навоий ҳақидаги манбаларнинг бирортасида ҳам шоирнинг айнан Ҳиротдан Самарқандга сафар қилганлиги ҳақидаги маълумот келтирилмайди, балки «Хурросондан Самарқандга» йўл олганлиги айтилади. Машҳад ҳам Хурросон таркибида эканлиги ҳисобга олинса, Навоий Самарқандга Машҳаддан борган бўлиши ҳам мумкин (Сирожиддинов Ш. Алишер Навоий: манбаларнинг қиёсий типологик, текстологик таҳлили. – Б.45 – 48).

Навоийшунос олим Қ.Эргашев ҳам улуғ шоир ҳаётининг айнан шу даври навоийшунослиқда яхши ўрганилмаганлигига эътибор қаратади (Эргашев Қ. Алишер Навоий ҳаёти ва ижодий биографиясига доир // Халқаро илмий-назарий анжуман материаллари. – Б.35 – 36)

Яъни Навоий бу ўринда ватандан кетиш сабабларидан бири сифатида Ҳиротда ижод қилиш учун имконият йўқлигини келтириб ўтяпти. Назмда қобилият жиҳатидан Низомийга тенг эканлиги, Фирдавсий ва Низомийлар 30 йил вақт сарфлаб ёзган «Шоҳнома»ю «Ҳамса»ни 30 ойда ёза олишга ўзида қувват сезаётганлиги-ю, лекин бунинг учун шароит ва фурсат йўқлигини таъкидляяпти.

Яна бир буқим, зоҳир ўлмиш манго
Ки, чиқмиш Хуросон элидин вафо...
Вафо ерида зоҳир ўлмиш нифоқ,
Сахо ўрнида бухл туттимиш висоқ...
Ҳам эл манзилин шаҳ катакдек бузуб,
Товуғ ўрнига чўғд ўлтурғузуб.
Элида кишиликдин осор йўқ.
Шароратдин ўзга падидор йўқ...
Не бир ҳужраким, ком топқай кўнгул,
Даме анда ором топқай кўнгул.
Не бир шўх васлиға ул моядаст
Ки, азмим аёғига бергай шикаст.
Не ёреки, ранжимни қилғай қабул.
Не зореки, ҳажримдин ўлғай малул.

Алишер Навоийнинг мамлакатни ташлаб кетишга мажбур бўлганининг яна бир сабаби юртдаги нотинчлиқдир. Одамларда бир-бирига вафо йўқ. Вафонинг ўрнини нифоқ, саховатнинг ўрнини баҳиллик эгаллаган. Мамлакат шоҳи ҳалқ уйини катақдек бузиб, товуқ ўрнига бойўғини ўтказиб қўйган. Одамларда кишиликдан нишона йўқ, ҳамма жойда ёмонлик ҳукмрон. Кўнгил ором топадиган бир ҳужра йўқ. Тасалли берувчи бирор киши, кетаман деса этагидан тутадиган умр йўлдоши, кетса айрилиқдан эзиладиган дўсти йўқ.

Самарқандга кетишнинг яна бир сабаби илим эгаллашга бўлган эҳтиёждир. Зоро, Навоийнинг фикрича, «ҳақ сиррининг маҳрами» қилиб яратилган инсон Аллоҳни маърифат орқали таниши керак:

Учинч улки, чун холиқи зулжалол
Ки, ҳам ламязал келди. ҳам лоязол.

*Чу лаөхү вужуд узра тортыб қалам,
Ики кавн тарҳига урди рақам...
Эмас эрди мақсұд жуз одамий
Ки, ҳақ сиррининг бўлғай ул маҳрами.
Баридин гараз гарчи инсон эди,
Анга дағи мақсұд ирфон эди.*

Тасаввуф таълимотига кўра, Аллоҳни таниш 2 йўл орқали амалга оширилади:

1. Ҳақдан жазба етиши, яъни Аллоҳ ёди билан ўзлигидан бехабар бўлиб юриш, мақомларни эгалламасдан туриб ҳол мартабасига эришиш. Бу йўлни Навоий «мажзуби солик» йўли деб атайди.

2. Пирга қўл бериб, унинг иродаси билан риёзат чекиш ва шундан сўнггина жазба етиши, бунда аввал тариқатдаги мақомларни босиб ўтгандан кейингина ҳол мартабасига эришилади. Бу йўлни Навоий «солики мажзуб» деб атайди. Навоий биринчи йўлга эришиш муяссар бўлмагач, пири комил топиб, ўзини унга топширишга қарор қиласади:

*Бурун муршиди комил истай юруб,
Ани топқач ўзин анга топшуруб...
Чу аввалғи иш бўлмади дастгир,
Икинчисидин хўб эмастур гузир.*

Шу тариқа Алишер Навоий 1465 – 1469 йилларда Самарқандда яшайди. Шоир Самарқандда дастлаб моддий қийинчилиқда ҳаёт кечиради. Кейинроқ унга шаҳар ҳокими Аҳмад Ҳожибек ҳомийлик кўрсатади. Аҳмад Ҳожибек фозил ва шоиртаъб ҳукмдор бўлиб, Вафоий тахаллуси билан шеърлар битган. Навоий «Мажолис ун-нафоис»нинг 6-мажлисини айнан шу ижодкор-ҳукмдор таърифидан бошлайди: «Сурати хуш ва сийрати дилкаш, ахлоқи ҳамида ва автори писандида йигитдор. Хуросонда тарбият топти. Ҳирот дор ус-салтанатида ўн ўилга яқин ҳукумат қилди. Самарқанд маҳфузасида ҳам муддате ҳоким эрди... Ва табъи бағоят хуб воқеъ бўлубтур ва назмға кўп илтифот қилур».

Алишер Навоий Самарқандда машҳур олим Ҳожа Фазлуллоҳ Абулрайс ҳузурида фикҳ илмидан сабоқ олади. Бу ҳақда кейинчалик «Мажолис ун-нафоис»да шундай ёзади: «Фақир икки ийл

аларнинг қошида сабақ ўқуб эрдим, анча илтифотлари бор эрдиким, «фарзанд» дер эрдилар».

Алишер Навоий Самарқандда Мавлоно Улойи Шоший, Хожа Хурд, Мавлоно Мұхаммад Олим, Мавлоно Сойилий, Дарвеш Аҳмад Самарқандий, Мирзобек, Юсуфшоҳ Сафоий каби олим ва шоирлар билан танишади. Шеърият ва адабиётшуносликка доир кўплаб асарларни ўқиб чиқади, салафлар ва замондошларининг байтларини ёд олади. «Муҳокамат ул-луғатайн»да бу ҳақда шундай маълумот берилади: «Йигитлигим замони ва шабоб айёми авонида кўпроқ шеърда сеҳрсоз ва назмда фусунпардоз шуаронинг ширин ашъори ва рангин абётидин эзлик мингдин ортуқ ёд тутубмен ва алар завқ ва хушҳоллигидин ўзумни овутупмен».

Алишер Навоий шу йиллари шоир сифатида катта шуҳрат қозонади. 1465 – 1466 йилларда муҳлислари унинг шеърларини тўплаб Машҳадда «Девон» тузадилар ва уни оққа кўчиришни машҳур хаттот Султонали Машҳадийга топширадилар. Бу девон буғун фанда «Илк девон» номи билан машҳурдир.

Алишер Навоий шеърларининг довруғи Шерозу Табризга ҳам ёйилади. «Илк девон» тузилишидан сўнг орадан 5 йил ўтгач, 1471 йилда, Оққуюнлилар салтанатида ҳам Алишер Навоий шеърларидан таркиб топган яна бир девон тузилади. Мазкур девон оққуюнлилар саройида фаолият юритган машҳур хаттот ва шоир Абдураҳим ибн Абдураҳмон Хоразмий (тажаллуси Анисий) томонидан кўчирилади. Демак, шоирнинг ўзи ҳали расмий девон тартиб беришга ултурмай, унинг шеърлари киритилган икки девон: бири Машҳадда, иккинчиси Шерозда кўчирилиб, Навоий ихлосманларининг эҳтиёжини қондиришга хизмат қиласади.

1468 йили Хурсон ҳукмдори Абу Сайд мирзо Эрон учун жангда ҳалок бўлади ва 1469 йилнинг бошида Ҳусайн Бойқаро таҳтни эгаллайди. У Самарқандга мактуб йўллаб Навоийни ўз ёнига чақиради ва Навоий Ҳиротга қайтади. Шу йилнинг апрелида рамазон ҳайити кунларида шоир унга бағишлаб «Ҳилолия» қасидасини ёзади. У Ҳусайн Бойқаронинг таҳтга чиқишини янги ой – ҳилолга қиёс қиласади:

Янги ойу ийд ики қуллуғчинг ўлсун, айлаган
Сен ҳилол аниг отин, байрам бу ернинг кунятин.

Хусайн Бойқаро Навоийни давлат ишларига жалб қиласы. Шоир дастлаб 1469 – 1472 йилларда муҳрдор, 1472 – 1476 йилларда эса амир (вазир) лавозимларида хизмат қиласы. Тарихчи Мирхонд унинг бу даврдаги фаолияти ҳақида «Равзат ус-сафо» асарида шундай ёзади: «...амир бир неча вақт муҳрдорлик лавозимида қойым туриб, хизматкорлик поясини юқори осмондан ҳам ўтказди. Бир неча вақтдан кейин бу мансабни тарк этиш бобида илтимос қилиб, бу лавозимга амир Аҳмад Сүҳайлийни тайин қилишни илтимос қилди. Хоқони Мансур унинг бу илтимосини қабул қилди, лекин ҳижрий 876 йили шаъбон ойида (1472 йил январь) банданавоз подшоҳ ул вожиб ул-атоб амирни аморат мансаби билан сарафroz қилмоқчи бўлди... хоқони Мансурнинг поки-за кўнгли шу эдикни, амир Алишер вожиб ул-изъон фармонга кўра бошқа амирлардан юқори муҳр босса, лекин ул жанобнинг қўлига маълум соатда муҳр боссин учун нишон берганларида, нафси синиқ бўлганидан ва бағоят улуғ тавозуълилигидан, нишоннинг шундай жойига муҳр босдиким. ундан тубанроққа муҳр босишга жой қолмади...»

Алишер Навоий вазир лавозимида ишлаб юрган пайтларида ўзининг бутун куч-куватини мамлакат ободончилиги, эл фаронлиги учун сарф қиласы:

Ким бор эди бошима кўп меҳнатим,
Йўқ эди бош қошиғали фурсатим
(«Ҳайрат ул-аброр»дан).

Мамлакатда зулм ва ҳақсизликка чек қўяди, илм ва санъат аҳлига раҳнамолик қиласы, бунёдкорлик ва ободончилик ишларига кенг эътибор қаратади. «Амири кабир» ва «амир ул-муқарраб» унвонларига сазовор бўлади.

Алишер Навоийнинг мамлакатдаги катта ҳукуқлари ҳамда эл орасидаги юксак эътибори сарой амалдорлари, айниқса, Мажидиддин ва унинг тарафдорларининг кескин норозилигига сабаб бўлади, саройда фисқ-фасод кучая боради. 1476 йилда Навоий вазирлик лавозимидан истеъло беради ва бадиий ижод билан шуғулланади.

Алишер Навоий вазирлик лавозимидан кетгандан сўнг ҳам сulton Ҳусайн саройида энг нуфузли сиёсий арбоб бўлиб қолаверади.

Ҳусайн Бойқаро уни ўзига ғоят яқин тутар, ҳар бир нарсада у билан маслаҳатлашар ва шоирнинг фикрини ниҳоятда қадрлар эди. Бу ҳолат улуғ шоир ва сарой амалдорлари орасидаги низонинг ошишига олиб келади. Ҳусайн Бойқаро Навоийни Астрободга ҳоким қилиб юбориш билан саройдаги низоларга чек қўймоқчи бўлади.

Алишер Навоий 1487 – 1488 йилларда Астрободда ҳокимлик қилади. Мирхондинг ёзишича, «Астробод гулшани адолат хислатлик амирнинг келиши билан Эрам гулистонининг ғайратини келтирадиган бўлиб, Журжоннинг саййидлари, уламоси, эътиборли кишилари, фозиллари ул мақтовга муносаб сифатли амирнинг лутфу марҳаматлари билан фаҳр ва қувонч топдилар. Яна раъияти унинг адолату инсофининг баракоти билан зулму бедодлик зулматидан нажот топиб, тинчлик ва омонлик, фарогат ва осудаликка эришдилар».

1489 йилда Алишер Навоий Ҳиротга қайтгач, ўрнига Астробод ҳокими қилиб шаҳзода Бадиuzzамон тайинланган эди. Бу орада Балҳда Дарвешали кўзғолони бошланади. Ҳусайн Бойқаро Навоийни олиб Балҳга жўнайди. Дарвешали билан сулҳ тузилади, лекин Ҳисорда Абу Сайднинг ўғли Султон Маҳмуд Ҳусайн Бойқарога қарши кураш бошлайди. Шоҳ Навоийни Балҳда қолдириб, ўғли Бадиuzzамонни олиб Ҳисорга отланади. У билан ҳам муросага келиб орқага қайтади ва Балҳни Бадиuzzамон тасаруфига беради. Бадиuzzамон ўн уч ёшли ўғли Мўмин мирзо ни Астрободда қолдириб, Балҳга келади. Ҳусайн Бойқаронинг суюкли аёли Ҳадичабегим билан Мажидиддиннинг ўрнига вазир қилиб тайинланган Низомулмулк Астрободга Музaffer мирзо ни ҳоким қилиб тайинлашга эришадилар. Ҳадичабегим шоҳнинг мастлик чоғида Мўмин мирзони ўлдириш ҳақидаги фармонга имзо қўйдириб, унинг зудлик билан ижро қилинишига эришади. Ҳусайн Бойқаро ҳушига келиб, янги фармон жўнатади. Лекин вақт ўтиб бўлган эди.

Бу ҳодиса Алишер Навоийга қаттиқ таъсир кўрсатади ва кўпдан буён орзу қилгани ҳаж сафарига тайёргарлик кўра бошлайди. Шоҳдан ижозат олиб йўлга отланади. 1499 йилда Марвда Ҳусайн Бойқаронинг яна бир ўғли Абулмуҳсин отасига қарши бош кўтаради. Шоҳ исённи бартараф қилиш учун қўшин билан Марвга отланади. Мирхондинг хабар беришича, «Марв қамали уч-тўрт ойга

чўзилиб, фатҳу зафар шоҳиди мурод кўзгусида кўринмагани учун, хоқони Мансур сулҳга майл қилди. Абулмуҳсин мирзо ҳам қалъа-дорликнинг чўзилиб кетганидан ғам чекиб, отаси қошига чопар юборди ва амир Алишерни талаб қилдиким, то ул жанобнинг воситачилиги билан сулҳ иши воқе бўлсин». Шоҳ Машҳад остоналарига етиб қолган Алишер Навоийга тез чопар юборади. Алишер Навоий Машҳад улуғлари ва ҳамроҳлари билан маслаҳатлашади. Улар мамлакатнинг тинчлиги ҳар нарсадан устун эканлигини айтиб, ҳажга боришни кечикиришни маслаҳат берадилар. Алишер Навоий ортга қайтади ва ота-ӯғил орасида сулҳ имзоланади.

1500 йил декабрининг охирларида Ҳусайн Бойқаро Астробод юришидан қайтади. Анъанага кўра, саройнинг барча эътиборли кишилари шоҳни кутиб олиш учун йўлга чиқадилар. Улар орасида ҳазрат Навоий ҳам бор эди. Соғлиғи жуда ёмонлашганига қарамай, шоир сафардан қайтган сulton ҳузурига етиб келади ва ҳамроҳлари ёрдамида унинг кўксига бош қўйиб ҳушидан кетади. Бу ҳолат «Макорим ул-ахлоқ»да шундай тасвирланади: «Бир фарсаҳга яқин юрганда соҳибқироннинг дабдабали ва кўркам муҳафаси кўринди. Шу вақт Ҳудонинг инояти билан ул зотнинг муборак боши айланиб қолди. Олижаноб амир Ҳожа Шихобуддин Абдуллани ҳузурига чақириб: «Мени эҳтиёт қилишдан гоғил бўлманг, аҳволим ўзгариб қолди», – деди. Шу пайт аъло ҳазратнинг қўлини ўпишга етишмок учун отдан тушди. Тўсатдан етишган касалликнинг оғирлиги сўнгги ҳаддига бориб қолгани ва юришга мадори қолмаганидан, мазкур амир ва Мавлоно Жалолуддин Қосим унинг қўлтиқларига кириб, улуг Амир бошини баланд мартабали подшоҳнинг қучогига кўя олди. Аъло ҳазрат ул буюклик ва дабдаба доираси марказининг аҳволида ўзгариш кўриб гоятда қайғуга ботди, ғамгин бўлди». Шоирни оғир аҳволда уйга олиб келадилар. Уч кун ҳушсиз ётган Алишер Навоий 1501 йилнинг 3 январида сакта касаллиги туфайли вафот этади.

Таянч тушунчалар

- кўкалдош
- жазба
- мақом
- ҳол

- *солики мажзуб*
- *мажзуби солик*
- *ирфон*
- *амири кабир*
- *амирулмуқарраб*
- *муҳрдор*
- *фиқҳ илми*

Савол ва топшириқлар:

1. Алишер Навоийнинг болалик йиллари ҳақида сўзлаб беринг.
2. Алишер Навоий ҳаёти ва фаолиятига доир маълумотлар берувчи қандай асарларни биласиз?
3. Самарқандга кетар чогида Алишер Навоий Сайид Ҳасан Ардашерга ёзган маснавийсида «Хамса»ни ўттиз ойда ёза олишини айтади. Бу ҳолатни қандай баҳолаган бўлардингиз? Навоий бундай даъво қилишига ҳақли эдими?
4. Сайид Ҳасан Ардашерга ёзилган маснавий матнига таяниб Алишер Навоийнинг Самарқандга кетиши сабабларини айтиб беринг.
5. Алишер Навоийнинг давлат арбоби сифатида амалга оширган ишларига тўхталинг.
6. Ҳазрат Навоийнинг ҳаж сафаридан қолишига қайси воқеялар сабаб бўлади?

Адабиётлар:

1. Навоий замондошлари хотирасида. – Тошкент: Адабиёт ва санъат, 1985.
2. Сирожиддинов Ш. Навоий замондошлари эътирофида. – Самарқанд: Зарафшон, 1996.
3. Сирожиддинов Ш. Алишер Навоий: манбаларнинг қиёсий типологик, текстологик таҳлили. – Тошкент: Akademnashr, 2011.
4. Алишер Навоий ижодий ва маънавий меросининг оламшумул аҳамияти (халқаро илмий-назарий анжуман материаллари). – Тошкент: O'zbekiston, 2011.
5. Султон Иззат. Навоийнинг қалб дафтари. – Тошкент: Адабиёт ва санъат, 1973.

6. Комилов Н. Тасаввуб. – Тошкент: Movarounnahr – O'zbekiston, 2009.
7. Vohidov R., Eshonqulov H. O'zbek mumtoz adabiyoti tarixi. – Тошкент: O'zYU Adabiyot jamg'armasi nashriyoti, 2006.
8. Ўзбек адабиёти тарихи. Беш жилдлик. 2-жилд (XV асрнинг иккинчи ярми). – Тошкент: Фан, 1977.

АЛИШЕР НАВОИЙ ЛИРИКАСИ. ДЕВОНЛАРИ

РЕЖА:

1. «Илк девон»га тавсиф.
2. Оқкуюнлилар саройи девони ҳақида.
3. Дастрлабки расмий девонлар. «Бадоеъ ул-бидоя» дебо-часида девон тартиб бериш масалалари.
4. «Хазойин ул-маоний» куллиётининг яратилиши тарихи.
5. «Хазойин ул-маоний»га кирмай қолган шеърлар.
6. Навоийнинг форсий шеърлари ҳақида умумий маълумот.

Мусулмон Шарқи шеърияти тарихини Алишер Навоий лирика-сисиз тасаввур этиб бўлмайди. Унинг лирик мероси ўзигача яратилган форс-тожик ва туркий шеъриятнинг давоми бўлиш билан бирга барча замонлардаги ўзбек шеъриятининг энг юксак чўқиси ҳамdir. Ҳар иккала тилда юксак бадиий асарлар яратади олиш қобилиятига эга бўлган ҳассос шоир 45 минг мисрага яқин туркий тилдаги шеърлари ва 12 минг мисрадан ортиқ форс-тожик тилидаги назмий мероси билан ўша давр шеърияти ривожига катта хисса кўшди.

Алишер Навоий болалик йиллариданоқ бадиий ижод билан шуғуллана бошлаган. «Уч ёш била тўрт ёшининг орасида» форсигўй адаб Қосим Анворнинг байтини ёд ўқиб йиғилганларни ҳайратда қолдирган («Мажолис ун-нафоис») Алишер 15 ёшларида «малик ул-калом» Лутфийнинг таҳсинига сазовор бўлади. Адабиёт ихлосмандлари ундан девон тузишни илтимос қилганларида, у ғоят камтарлик юзасидан девон тузиш учун ҳали вақт эрта деб ҳисоблайди. Шунда шоирнинг муҳлислари 1465 – 1466 йилларда унинг шеърларини тўплаб девон тузадилар ва бу девон ўз даврида «хаттотлар сultonи» номи билан машҳур бўлган Султонали Машҳадий томонидан настаълик ҳатида кўчирилади. Навоийнинг ўзи «Бадоеъ ул-бидоя»га ёзган дебочасида: «...аммо ҳалойиқ аросида минг байт-икки минг байт ортуғроқ, ўксуқрак-ким ўзлари жамъ қилиб эрдилар, бағоят машҳур бўлуб эрди», – деб ёзади. Девон уни нашрга тайёрлаган адабиётшунос олим Ҳамид Сулаймонов томонидан шартли равишда «Илк девон» деб

номланган бўлиб, 391 ғазал, 41 рубоий, 1 мустазод, 1 мухаммас – жами 434 шеърдан ташкил топган.

Девонга шоирнинг 1466 йилдан аввал ёзилган асарлари киргани учун, ундаги шеърларнинг ёзилиш санасини нисбатан аниқ деб ҳисоблаш мумкин, шу сабабли бу девон шоирнинг ўспирийлик ва йигитлик давридаги ижоди ҳамда таржимаи ҳоли ҳақида муайян тасаввур берувчи манба сифатида юксак қийматга эга. Девондаги ғазалларни кузатар эканмиз, бугунги кунда халқ орасида машхур бўлган қўйидаги ғазаллар айнан шоир ижодининг илк даврида яратилганлигига гувоҳ бўламиз:

*Кеча келгумдур дебон ул сарви гулрў келмади.
Кўзларимға кеча тонг отқунча уйқу келмади...*

*Кўргали ҳуснунгни зору мубтalo бўлдум санго.
Не балолиғ кун эдиким, ошно бўлдум санго...*

Навоий фалсафий тафаккурида муҳим қийматга эга бўлган «Анго» радифли ғазалнинг ҳам айнан шу девондан ўрин олгани шоирнинг ўша даврдаги юксак салоҳиятидан дарак беради. Ғазал матлаъсини келтирамиз:

*Ҳар гадоким, бўриёйи фақр эрур кисват анго,
Салтанат зарбофтидин ҳожат эмас хилъат анго.*

«Илк девон»даги барча шеърларнинг кейинчалик «Хазойин ул-маоний»га кирилганлиги уларнинг Алишер Навоий учун ҳам қадрли бўлганини кўрсатади.

Навоийшунос олим, филология фанлари доктори Афтондил Эркинов жаҳон қўлёзма фондларида сақланаётган нусхаларни ўрганиш асносида Алишер Навоийнинг ихлосмандлари томонидан тузилган яна бир девони қўлёзмасини аниқлаб, 2012 йилда фанга маълум қилди. Мазкур девон шоирнинг оққуюнлилар сулоласи (Озарбайжон ва Ғарбий Эрон ҳудудида 1378 – 1508 йилларда ҳукмронлик қилган ўғуз турклари) ҳукмронлиги ҳудудидаги мухлислари томонидан тузилган бўлиб, ҳозирча фанда шартли равишда «Оққуюнлилар девони» номи билан юритилмоқда.

Девон 1471 йил 25 декабрда Анисий тахаллуси билан шеърлар ёзган шоир ва хаттот Абдураҳим ибн Абдураҳмон Ҳоразмий томонидан Оққуюнлилар салтанатининг марказларидан бири бўлган Шероз шаҳрида кўчирилган. Девонда жами 229 та шеър бор: 224 ғазал, 1 мустазод, 3 муҳаммас ва 1 таржиъбанд. Бу мажмуадаги 224 ғазалдан 217 таси «Бадоеъ ул-бидоя»га ва фақат биттасигина «Наводир ун-ниҳоя»га ўтган. Девондаги 90% ғазал «Илк девон»да учрамайди. Бу ҳолат мазкур ғазалларнинг катта қисми 1466 йилдан кейинги 5 йил орасида (1471 йилгача) яратилганлигини кўрсатади. Авваллари Алишер Навоийнинг туркий тилдаги шеърияти 4 босқичда: «Илк девон», «Бадоеъ ул-бидоя», «Наводир ун-ниҳоя», «Хазойин ул-маоний» тарзида ўрганиб келинарди. Эндилиқда, мазкур девон топилгандан сўнг, Алишер Навоий шеъриятини беш босқичда ўрганишга зарурат сезилади. Буни қуидаги жадвалда кўриш мумкин:

Босқичлар	Навоий девонлари	Тузилиш муддати
I	Илк девон	1465 – 1466
II	Оққуюнлилар девони	1471
III	Бадоеъ ул-бидоя	1470 – 1480
IV	Наводир ун-ниҳоя	1480 – 1487
V	Хазойин ул-маоний	1492 – 1498

Оққуюнлилар салтанатининг асосий аҳолиси ўғуз турклари бўлгани учун, мазкур қўлёзмада Алишер Навоий шеърлари ўғуз лаҳжасига мослаштириб кўчирилган. Масалан, Навоийнинг машҳур ғазали матлаъси ушбу девонда қуидаги ҳолатда учрайди:

*Мехр чўх кўрсатдим, аммо меҳрибоне допмадим,
Жон басе қилдим фидо, ороми жоне допмадим.*

Оққуюнлилар девони ҳозирда Қоҳира шаҳрида сақланмоқда.

Алишер Навоий, Ҳусайн Бойқаро тахтга чиққанидан кейин, унинг топшириғи билан ўзининг биринчи расмий девони – «Бадоеъ ул-бидоя» («Бадийликнинг бошланиши»)ни тартиб беради. Девоннинг Алишер Навоий ҳаётлик даврида (1480, 1482 ва 1486 йиллар-

да) күчирилгандар нусхалари Париж Миллий кутубхонасида (1480 йил, инв. №746), Британия музейида (1482 йил. инв. №401) ва Тошкент шаҳрида (1486 йил. инв. №216. асос нусха) сақланади. Девон мазкур нусхалар асосида филология фанлари номзодлари Ш.Шарипов ва М.Раҳматуллаевалар томонидан нашрга тайёрланган (МАТ, 1-жилд).

Шоир бу девони учун маҳсус дебоча ҳам ёзиб, унда девон тартиб бериш масалаларига тўхталади ва қуийдаги хусусиятларни алоҳида кўрсатиб ўтади:

1. «*Аеввал бўдурким, ҳар кишиким девон тартиб қилибдурур, ўттиз икки ҳарфдинки, халойик иборатида воқиъдурур ва улус китобатида шойиъ, тўрт ҳарфга таарруз қилмайдурурлар...*

2. Яна буким, ҳар ҳарф ғазалиётининг аввал битиган ғазал била ўзга ғазаллар орасида услуб хайсиятидин тафовут риоят қилмайдурурлар. Муқаррардурким, ҳар амрда бир лаҳза ҳақ субҳонаҳу ва таоло ҳамдидин ё расул алаиҳиссалом наътидин. ё бу икки ишга далолат қилурдек бир амрдин ғофил бўлмамоглиқ авлодур...

3. Яна буким, гўйиё баъзи эл ашъор таҳсилидин ва девон тақмилидин ғараз мажозий ҳусну жамол таесифи ва мақсуд зоҳирий ҳатту хол таърифидин ўзга нима англамайдурурлар. Девон топилғайким, анда маърифатомиз бир ғазал топилмағай ва ғазал бўлғайким, анда маъвъизатангиш бир байт бўлмағай...

4. Яна буким, соири давовинда расмий ғазал услубидинким, шойиъдурур, тажовуз қилиб, маҳсус навъларда сўз арусининг жилвасиға намойиш ва жамолиға ороиш бермайдурурлар. Ва агар аҳёнан матлаъе маҳсус навъда воқиъ бўлғон бўлса, ҳамул матлаъ услуги била иттом хилъатин ва анжом кисватин кийдурмайдурурлар. балки тугангунча агар бир байт мазмуни висол баҳорида гулоройлиқ қилса, яна бири фироқ ҳазонида хорнамойлиқ қилибдурур... Ул жиҳатдин саъӣ қилиндиким, ҳар мазмунда матлаъе воқиъ бўлса, аксар андоғ бўлғайким, мақтаъгача сурат хайсиятидин мувофиқ ва маъни жонибидин мутобиқ тушкай».

Алишер Навоий бу ўринда девонни ғазаллар билан бошлиш, ғазалларни 28 ҳарф эмас, балки 32 ҳарф (Ҷ – чим, Џ – же, Ҷ – гоф ва Ҳ – лом-алифни ҳам қўшган ҳолда) билан тугаллаш зарурлиги, девонга даставвал Аллоҳга ҳамд ёки пайғамбарга наът мавзусидаги ғазалларни жойлаштириш. ғазалларга маънифат ва мавъиза

мавзуларига доир байтлар киритиш, ғазал матлаъсида келтирилган фикрни мақтаъгача ривожлантириб бориш ва, албатта, девонга жанр жиҳатдан ранг-баранг шеърларни киритишини назарда тутади.

Алишер Навоийнинг мазкур девони айнан юқоридаги қонун-қодаларга амал қилинган ҳолда тартиб берилган бўлиб, унда 11 жанрга оид жами 1046 та шеър мавжуд. Девонга шеърлар қуидаги тартибда жойлаштирилган: ғазал – 777 та, мустазод – 3 та, мухаммас – 5 та, мусаддас – 2 та, таржиъбанд – 3 та, қитъа – 46 та, рубоий – 85 та, луғз – 10 та, муаммо – 52 та, туюқ – 10 та, фард – 53 та.

Алишер Навоий тартиб берган иккинчи расмий девон «Наводир ун-нихоя» («Беҳад нодирликлар») деб аталиб, 1480 – 1487 йиллар оралиғида тузилган. Девоннинг 1487 йилда Ҳиротда машҳур хаттот Абдужамил котиб томонидан кўчирилган нодир кўлёзма нусхаси ҳозирда ЎзРФА Абу Райҳон Беруний номидаги Шарқшунослик институтида (инв. №11675, асос нусха) сақланмоқда. Шунингдек, девоннинг яна бир нисбатан тўлиқ нусхаси Султон Али Машҳадий томонидан Ҳиротда кўчирилган бўлиб, бу нусха ҳам ҳозирда ЎзРФА Абу Райҳон Беруний номидаги Шарқшунослик институтида (инв. №1995) сақланади. «Наводир ун-нихоя» девони матни мазкур нусхалар асосида филология фанлари номзоди М.Рахматуллаева томонидан нашрга тайёрланган бўлиб, унда 862 шеър бор (МАТ, 2-жилд). Мазкур нашрдан ўрин олган шеърларнинг барчаси ғазал жанрига оид. Ушбу девондаги 64 ғазал «Ғаройиб ус-сиғар»га, 331 ғазал «Наводир уш-шабоб»га, 213 ғазал «Бадоеъ ул-васат»га ва 196 ғазал «Фавойид ул-кибар»га киритилган. Ҳазрат Навоий «Наводир ун-нихоя»даги ғазалларни кейинчалик «Хазойин ул-маоний»га киритганда кўпинча уларни таҳrir қилган, баъзи ғазалларнинг фақат матлаъсини сақлаб қолиб, қолган байтларини бутунлай ўзgartирган.¹¹

Девон Навоийнинг ҳамд мазмунидаги машҳур ғазали билан бошланади:

¹¹ 80-йиллар охирида адабиётшунос олима Суйима Фаниева ушбу девоннинг Навоий муҳри босилган нотугал сурат – нусхасини Эрон Ислом Республикасидан олиб келди. Бу нусха «Навоий дастхати» номи билан 1991 йилда эълон қилинди.

Зиҳи зуҳури жамолинг қуёш киби пайдо.
Юзунг қуёшиға зарроти қавн ўлуб шайдо.

Алишер Навоий 1492 – 1498 йилларда Ҳусайн Бойқаронинг тақлифи билан ўзининг барча шеърлари, жумладан, аввалги расмий девонларига кирган шеърларини ҳам тўплаб «Ҳазойин ул-маоний» («Маънолар хазинаси») номли ийрик куллиёт яратади. Куллиёт тўрт девонни ўз ичига олганлиги учун, «Чор девон» деб ҳам юритилади. Куллиётнинг Санкт-Петербург (1498 – 1499, инв. Хаников-55; 1592-1596, инв. Дорн-558), Истанбул (1495 – 1497, хаттот Дарвеш Муҳаммад Тоқий кўчирган, инв. №808), Париж (1525 – 1527, котиб ал-Ҳижроний кўчирган, инв. №316 – 317) нусхалари мавжуд бўлиб, улар асосида профессор Ҳ.Сулаймонов куллиётнинг илмий-танқидий матнини яратди (1959 – 1960). Мазкур матн МАТнинг 3 – 6-жилдларини ташкил этувчи девонлар учун асос бўлган.

Алишер Навоий тўрт девоннинг ҳар бирига инсон умрининг фаслларига мослаб ном берди. Шу маънода 7 – 8 ёшдан 20 ёшгача бўлган даврни инсон умрининг баҳори деб атади ва куллиётнинг биринчи девонини «Ғаройиб ус-сифар» («Болалик ғаройиботлари») деб номлади. 20 ёшдан 35 ёшгача бўлган даврни инсон умрининг ёзи деб белгилади ва «Наводир уш-шабоб» («Йигитлик но-дирликлари») деб атади. 35 – 45 ёшни умрининг кузига қиёс этди ва «Бадоев ул-васат» («Ўрта ёш гўзапликлари») деб номлади. 45 – 60 ёшини умрининг қишига ўхшатиб, «Фавойид ул-кибар» («Кексалик фойдалари») деб атади. Ҳар бир девонга 650 тадан ғазал киритди, шунга мувофиқ бошка шеърий жанрларга ҳам жой ажратди.

Олим Ҳ.Сулаймоновнинг изланишлари шуни кўрсатадики, Навоий «Ҳазойин ул-маоний» куллиётини тузиш устида бир неча йил тинимсиз меҳнат қилган ва 1498 йилдагина уни ҳозирги ҳолатда тугал тарзда якунлаган. Навоий куллиёт девонларини ўзаро ички мустаҳкам боғлиқ ҳолда ва қатъий мутаносиблиқда тузадики, уларга кейинчалик бирорта ғазал киритиш ёки девонлар таркибидан тушириб қолдириш, ҳатто ички ўрнини алмаштириш ҳам мумкин бўлмаган.

«Ҳазойин ул-маоний» куллиётининг ички тузилиши жаҳатидан ниҳоятда мустаҳкам тарзда тартиб берилганлигини шундан тасаввур қилиш мумкинки, Алишер Навоий ундаги тўрт девоннинг ҳар бирига тенг миқдорда 650 тадан ғазал жойлаштирганинга

эмас, балки шу ғазалларнинг қофияланишига кўра ҳам ҳар бир девонда ўзаро тенг ва қатъий мутаносиб бўлишига жиддий аҳамият берган. Яъни «алиф» ҳарфи билан тугалланувчи қофия ва радифли ғазаллар тўртала девонда ҳам 39 тадан, «бе» ҳарфи билан тугалланувчи қофия ва радифли ғазаллар 27 тадан ва ҳ.к. тенг тарзда учрайди.

Ёки яна бир мисол. «Хазойин ул-маоний» куллиётида ҳаммаси бўлиб «Анго» радифли 12 ғазал мавжуд. Бу ғазаллар тўртала девонга учтадан тенг тарзда тақсимланган. Шунингдек, улар ҳар бир девонда бир ўринда, яъни 8-, 9-, 10-ўринларда жойлаштирилган. Буларнинг барчаси куллиётнинг ниҳоятда мустаҳкам тартибда ўзаро мутаносиб ҳолатда тузилганлигини кўрсатади.

Алишер Навоий «Хазойин ул-маоний» куллиёти такмилини 1498 йилда тугатгандан сўнг бу санадан кейинги йилларда ҳам юксак ижодий суръат билан ишлашда давом этган. Шоирнинг ўзи куллиёт дебочасида гувоҳлик беришича, бир кунда бир-икки, баъзан уч-тўрт ғазал ёзган пайтлари ҳам бўлган:

*Кун бор эдики бир ғазалу икки ғазал,
Бал уч ғазалу тўрт ғазал баъзи маҳал...*

Навоийшунос А.Абдуғафуровнинг ёзишича, Навоий ҳаётининг сўнгги йилларида ҳам ана шундай катта илҳом ва жиддий суръат билан баракали қалам тебратган ҳамда кейинги икки йилдан ортиқ вақт давомида кўплаб ғазал, қитъа, робоий, мухаммас ва бошқа лирик жанрларда асарлар яратган.¹² Олим бу лирик шеърлар ўрин олган бир неча манбаларни келтиради:

1. «Мұҳокамат ул-луғатайн»да шоир ўзбек адабиёти ҳамда жонли сўзлашув тилининг кўрсатиш мақсадида кўплаб сўз ва ибораларнинг ёзма адабиётда ишлатилишига мисол тариқасида ўз шеъриятидан байтлар келтиради. Келтирилган байт-

¹² Адабиётшунос Ф.Сулаймонова Алишер Навоийнинг «Хазойин ул-маоний» куллиётига кирмаган шеърларини тўплаб «Айёми висол ўлди яна» номи билан нашр эттиради. Мазкур тўпламга Алишер Навоийнинг 61 ғазали, 2 робоийси, 7 қитъаси ва 4 фарди киритилган. МАТнинг 20-жилдига илова тарзида киритилган қисмда Алишер Навоийнинг ушбу шеърларидан ташқари Ҳусайний ғазалига тахмиси ва турли манбаларда учрайдиган шеърий парча ҳамда байтлари келтирилган.

ларнинг аксарияти тахаллус билан якунланувчи мақтаъ эканлиги ҳазрат Навоийнинг мазкур ғазали тугал ҳолда мавжуд бўлганлигини кўрсатади.

2. Баъзи тазкиралар, хусусан, Ҳасанхожа Нисорийнинг «Музаккири аҳбоб» тазкирасида келтирилган мақтаъ байт Навоий девонларининг ҳеч бирида учрамайди.

3. Заҳириддин Муҳаммад Бобурнинг «Рисолаи аруз» асарида Навоий ижодидан рамал баҳри учун мисол тариқасида келтирилган қирқ олти ғазал матлаъларининг биттаси куллиёт таркибига кирмаганигининг гувоҳи бўламиз.

4. Алишер Навоий асарларига XV – XVIII асрларда тузилган луғатлар, хусусан, «Бадоеъ ул-луғат», «Абушқа», «Санглоҳ» луғатларида кўплаб сўзларнинг изоҳи учун келтирилган айрим мисол байтлар ҳам «Хазойин ул-маоний»да учрамайди.

5. Алишер Навоий ғазалларига битилган кўплаб тахмислар таркибидаги шоир қаламига мансуб байтлар ажратиб олинганда уларнинг баъзилари «Хазойин ул-маоний» куллиётида мавжуд эмаслиги маълум бўлади.¹³

Буларнинг барчаси Алишер Навоий умрининг сўнгги йилларида ҳам ижод қилишдан бирлаҳза тўхтамаганигини кўрсатади.

Алишер Навоий форсий тилда битган шеърларини ҳам йиғиб «Девони Фоний» номли тўплам тузди. Бизгача девоннинг бир неча қўлёзма нусхалари етиб келган. Булардан 2 таси Париж (инв. №285, 1345), 2 таси Туркия (инв. №3850, 1952) ва бир нусха Техрон (инв. №15002) кутубхоналарида сақланади. Бу нусхалар орасида Париждаги 285- рақамли қўлёзма нисбатан мукаммал ҳисобланади.¹⁴ Академик Б. Валихўжаев «Девони Фоний» нусхаларини ўрганиб чиқиб, улардаги шеърий жанрлар миқдорини қуйидагича деб кўрсатади: 10 қасида, 554 ғазал, 1 мусаддас, 1 марсия, 72 қитъа, 73 рубойй, 16 таърих, 373 муаммо, 9 луғз. Олим уларнинг миқдорини 1109 та деб белгилаб, умумий ҳажми 6179 байт эканлигини таъкидлайди.

¹³ Адабиётшунос олим А. Эркиновнинг таъкидлашича, Алишер Навоийнинг муҳлислари томонидан тузилган «Оққюнлилар девони» таркибида ҳам «Хазойин ул-маоний» куллиётига кирмаган 2 ғазал мавжуд.

¹⁴ Профессор Х. Сулаймон «Девони Фоний» нусхаларини ўрганиш асносида шундай хуносага келган.

Кўринганидек, Алишер Навоийнинг барча шеърий мероси 9 девонда жам бўлган, уларнинг иккитаси ихлосмандлари томонидан тузилганлиги Навоий шеърларига ҳамма даврларда, хусусан, ўз даврида ҳам юқори даражада эҳтиёж бўлганлигидан дарак беради.

Таянч тушунчалар

- дебоча
- девон тартиб бериши шартлари
- Навоий дастхати
- настаълиқ хати
- расмий девон
- куллиёт
- тўрт девон
- лирик жанр
- жанрий хусусиятлар

Савол ва топшириқлар:

1. Шоир сифатида анча танилиб қолган бўлса-да, Алишер Навоий йигитлик даврида нима учун девон тартиб беришга рағбат кўрсатмаган деб ўйлайсиз?
2. Алишер Навоийгача ва Алишер Навоийдан кейин муҳлислари томонидан девони тузилган яна қайси шоирни биласиз?
3. Алишер Навоийнинг муҳлислари тузган девонлари ҳақида айтиб беринг.
4. Алишер Навоийнинг мукаммал шеърий девон учун қўйган талабларини шарҳлаб беринг.
5. «Ҳазойин ул-маоний» куллиётининг яратилиши тарихи ҳақида нималарни биласиз?
6. «Ҳазойин ул-маоний»даги шеърларнинг аниқ математик тартибда жойлаштирилганлигидан қандай хуносага келиш мумкин?
7. Мазкур куллиётнинг ўзбек шеърияти тараққиётига кўрсатган ижобий таъсирни ҳақида қандай тасаввурга эгасиз?

Адабиётлар:

1. Навоий Алишер. Муқаммал асарлар тўплами. 20 жилдлик. – Тошкент: Фан, 1987 – 1988. 1 – 2-жилдлар.
2. Навоий Алишер. Муқаммал асарлар тўплами. 20 жилдлик. – Тошкент: Фан, 1988 – 1990. 3 – 6-жилдлар.
3. Навоий Алишер. Муқаммал асарлар тўплами. 20 жилдлик. – Тошкент: Фан, 2003. 20-жилд.
4. Навоий Алишер. Айёми висол ўлди яна: Янги топилган ғазаллар / Нашрга тайёрловчи Ф.Сулаймонова. – Тошкент: Адабиёт ва санъат, 1995.
5. Навоий Алишер. Хазойинул маоний / Илмий-танқидий текст асосида нашрга тайёрловчи Ҳ.Сулаймонов. 4 жилдлик. 1 – 4-жилдлар. – Тошкент: Фан, 1959 – 1960.
6. Исҳоқов Ё. Алишер Навоийнинг илк лирикаси: Филол. фан. номз... дисс. – Тошкент, 1963.
7. Абдугафуров А. «Хазойин ул-маоний»дан четда қолган ғазаллар // Навоийнинг ижод олами (мақолалар тўплами). – Тошкент: Фан, 2001.
8. Эркинов А. Навоийнинг муҳлислари томонидан тузилган яна бир девони // Ўзбек тили ва адабиёти. – Тошкент: Фан, 2012. – №1.
9. Ўзбек адабиёти тарихи. Беш жилдлик. 2-жилд (XV асрнинг иккинчя ярми). – Тошкент: Фан, 1977.

«ХАЗОЙИН УЛ-МАОННИЙ» КУЛЛИЁТИДАГИ ЛИРИК ЖАНРЛАР ТАВСИФИ

РЕЖА:

- 1. Газал ва мустазод жанрларига таесиф.*
- 2. Мусамматларнинг ғоявий-бадиий хусусиятлари.*
- 3. Таркиббанд, таржиъбанд ва маснавий жанрлари.*
- 4. Қасида ва соқийнома жанрларининг ғоявий-бадиий хусусиятлари.*
- 5. Куллиётдаги кичик лирик жанрлар.*

«Хазойин ул-маонний» куллиёти туркий шеъриятнинг гултохи бўлиб, жами 16 лирик жанрни ўз ичига олади. Мазкур шеърий жанрлар ҳар бир девонга муайян тартиб билан жойлаштирилган ва бу жанрларга оид шеърларнинг умумий сони 3132 га teng. «Хазойин ул-маонний» куллиёти таркибига кирувчи девонларнинг жанр хусусиятларини кузатадиган бўлсак, улар орасида ўзаро мутаносиблик борлигини кўрамиз. Хусусан, «Гаройиб ус-сигар» ва «Наводир уш-шабоб» девонларига 8 тадан, «Бадоев ул-васат» ва «Фавойид ул-кибар» девонларига 9 тадан жанр киритилган ва девонларнинг ҳажми ҳам бир-биридан унчалик фарқ қилмайди: «Гаройиб ус-сигар»да 840 та шеър (5718,5 байт), «Наводир уш-шабоб» девонида 759 та шеър (5423,5 байт), «Бадоев ул-васат»да 740 та шеър (5420 байт) ва «Фавойид ул-кибар»да 793 та шеър (5888,5 байт) мавжуд. Бу жанрлардан ғазал, мустазод, мусаддас, таржиъбанд барча девонларга ўзаро teng нисбатда жойлаштирилган. Мазкур жанрларнинг куллиётдаги тартиби ва ўзаро нисбатини Ҳ.Сулаймонов тузган қуйидаги жадвалда кўриш мумкин:

№	Навоий фойдаланган лирик жанрлар	«Гаройиб ус-сигар» девонида	«Наводир уш-шабоб» девонида	«Бадоев ул-васат» девонида	«Фавойид ул-кибар» девонида	Жами тўрт девонда
1	Ғазал	650 та (4975 байт)	650 та (4998 байт)	650 та (5001 байт)	650 та (5029 та)	2600 та (20003 байт)
2	Мустазод	1 та (7 байт)	1 та (7 байт)	1 та (7 байт)	1 та (7 байт)	4 та (28 байт)

3	Мухаммас	3 та (57,5 байт)	3 та (52,5 байт)	2 та (30 байт)	2 та (37,5 байт)	10 та (177,5 байт)
4	Мусаддас	1 та (27 байт)	1 та (27 байт)	2 та (42 байт)	1 та (21 байт)	5 та (117 байт)
5	Мусамман				1 та (28 байт)	1 та (28 байт)
6	Таржиъбанд	1 та (100 байт)	1 та (103 байт)	1 та (56 байт)	1 та (110 байт)	4 та (369 байт)
7	Таркиббанд		1 та (56 байт)			1 та (56 байт)
8	Маснавий	1 та (148 байт)				1 та (148 байт)
9	Қасида			1 та (91 байт)		1 та (91 байт)
10	Соқийнома				1 та (458 байт)	1 та (458 байт)
11	Қитъа	50 та (138 байт)	50 та (126 байт)	60 та (127 байт)	50 та (112 байт)	210 та (503 байт)
12	Рубоий	133 та (266 байт)				133 та (266 байт)
13	Муаммо		52 та (54 байт)			52 та (54 байт)
14	Луғз			10 та (40 байт)		10 та (40 байт)
15	Туюқ			13 та (26 байт)		13 та (26 байт)
16	Фард				86 та (86 байт)	86 та (86 байт)
Жами		840 та (5718,5 б.)	759 та (5423,5 б.)	740 та (5420 б.)	793 та (5888,5 б.)	3132 та (22450,5 б.)

«Хазойин ул-маоний» куллиётида энг кўп қўлланган жанр, шубҳасиз, ғазалдир. Маълумки, ғазал арабча «ошиқона сўз», «ишқ изҳор қилиш» маъноларини билдириб, а-а, б-а, в-а, г-а... тарзида қофияланувчи, 3 байтдан 19 байтгача ҳажмда бўлган байтли шеър шаклидир. Ўзбек адабиётида 5 – 10 байтли ғазаллар кўп учрайди. Навоий ғазаллари эса, асосан, 7 байтдан 13 байтгача ҳажмда бўлиб, бу ҳақда шоирнинг ўзи «Бадоеъ ул-васат» девонига киритилган қитъасида шундай маълумот беради:

*Навоий шеъри тўйқуз байту ўн бир байт, ўн уч байт
Ки, лавҳ узра қалам зийнат берур ул дурри макнундин.
Буким, албатта, етти байтдин ўксук эмас, яъни
Таназзул айлай олмас рутба ичра етти гардундин.*

Профессор Ҳамид Сулаймонов Алишер Навоийнинг «Ҳазойин ул-маоний» куллиётидаги ғазаллар ҳажмини қуидаги жадвалда акс эттирган:

Байтлар сони	«Фаройиб ус-сигар» девонида	«Наводир уш-шабоб» девонида	«Бадоеъ ул-васат» девонида	«Фавойид уп-кибар» девонида	Ҳаммаси
5	2	-	-	-	2
6	1	3	1	-	5
7	434	446	437	430	1747
8	30	8	8	12	58
9	163	162	187	183	695
10	8	7	1	3	19
11	11	23	14	20	69
12	-	-	1	-	1
13	1	1	1	2	5
	650	650	650	650	2600

Ғазалнинг биринчи байти матлаъ ёки мабдаъ, охирги байти эса мақтаъ деб аталади ва мақтаъда шоир тахаллуси қўлланилади. Агар иккинчи байт ҳам матлаъ сингари қофияланса, яъни ғазал қўш матлаъга эга бўлса, «ҳусни матлаъ» ёки «зеби матлаъ»ли ғазал деб аталади.

Ғазалнинг дастлабки намуналари VIII – IX асрларда араб адабиётида пайдо бўлган, форс-тоҷик адабиётида илк ғазал ёзган шоир сифатида Рудакий тилга олинади. Ўзбек адабиётида эса дастлабки ғазал Рабғузийнинг «Қисаси Рабғузий» асарида (XIV аср) учрайди. Ғазалнинг достонлар таркибида учраши илк бор Хоразмийнинг «Муҳаббатнома»сидан (1353 – 1354) бошланади.

Алишер Навоий ўзининг қитъаларидан бирида ғазалдаги устозлари сифатида форс-тоҷик шоирлари Ҳусрав Дехлавий, Абдураҳмон Жомий ва Ҳофиз Шерозийни келтириб ўтади.

Навоий ғазалларини мавзусига құра шартли равишда қуидада-
гича тасниф қилиш мүмкін:

1. Ишқий мавзудаги ғазаллар.
2. Тасаввуфий-фалсафий мавзудаги ғазаллар.
3. Ижтимоий мавзудаги ғазаллар.
4. Табиат тасвири акс эттан ғазаллар.
5. Ҳажвий мавзудаги ғазаллар.

Аслида, бу тасниф нисбий бўлиб, баъзан Алишер Навоийнинг ишқий мавзудаги ғазаллари таркибида (кўпинча бегона байтда) ижтимоий масалалар билан боғлиқ байтлар, табиат тасвири акс этган ғазалларида ёр тасвири ва ҳ.к. мазмунидаги байтларни кузатиш мүмкін.

Ҳазрат Навоий ғазалиётида ишқ мавзуси асосий ўринни эгал-
лайди. Бу мавзу, умуман, мусулмон Шарқи шеъриятида ҳам етак-
чи ўринда бўлиб, Алишер Навоий унга ижодининг деярли барча
босқичларида мурожаат қилган:

*Эй Навоий, ишқ авторини ҳифз айлай деган
Барча ишни тарк этиб, қилсун бизинг девонни ҳифз.*

Алишер Навоий «Маҳбуб ул-улуб»да ишқни 3 даражага ажра-
тади:

- 1) авом ишқи;
- 2) хослар ишқи (мажозий ишқ);
- 3) сиддиқлар ишқи (ҳақиқий ишқ).

Алишер Навоий ижодида мажозий ишқ ҳақиқий ишққа қара-
ма-қарши қўйилмайди, балки мажозий ишқ ҳақиқий ишқ учун кўп-
рик деган ғоя илгари сурилади:

*Мажоздин манга мақсуд эрур ҳақиқий ишқ.
Нединки ахлу ҳақиқатқа бу тариқат эрур.
Мажоздин чу ҳақиқатқа йўл топар ошик,
Қилур мажозни нафий улки, беҳақиқат эрур
(«Фавойид ул-кибар», 5-қитъа).*

Алишер Навоийнинг ишқий мавзудаги ғазалларидан бирини
кўриб чиқсанак:

Тун оқшом бўлди-ю, келмас менинг шамъи шабистоним,
Бу андуҳ ўтидин ҳар дам куяр парвонадек жоним.

Не ғам кўргузса кўксум порасин чоки гирибоним,
Кўрунмас бўлса кўксум ёрасидин доги пинҳоним.

Ғамидин дурри макнундек, сиришким оқти Жайхундек,
Музайян қилди гардундек жаҳонни ашки ғалтоним.

Фалак ҳам тўйлди қавқабдин, қуёш ҳам тушти ашҳабдин,
Келиб тушмас бу марқабдин менинг хуршиди рахшоним.

Жаҳонни зулмат этти чаҳ, бу зулмат ичра ўлгум, вах,
Манга бўлсанг не Хизри раҳ, етиб, эй оби ҳайвоним.

Дема кўктин қуёш кетмиш, фалакка тийралик етмиш,
Ул ой ҳажрида тор этмиш фалакни дуди афғоним.

Навоий киби ҳижрондин, бу оқшом ўлдум афғондин,
Ғамим йўқ бўйла юз жондин, етиб гар келса жононим.

Ғазал 7 байтдан иборат бўлиб, «Ғаройиб ус-сиғар» девонидан ўрин олган. Қофияланиш тизимиға кўра қўш матлаъли, яъни газали ҳусни матлаъ. Шунингдек, ғазалнинг ритмик таъсирчанлигини оширадиган яна бир ҳодиса унинг мусажжаъ (ички қофия) санъати асосида яратилганлигидир. Бу санъатга кўра, матлаъдан кейинги байтлар тўрт бўлакка ажратилиб, дастлабки уч бўлак ўзаро мустақил тарзда қофияланади, тўртинчи бўлак эса асосий қофияга оҳангдош бўлади.

Ғазалда ошиқнинг ҳижрону айрилиқ дамларида чеккан соғинч изтироблари, дардли кечинмалари тасвирланган бўлиб, бу тасвирнинг фалак, яъни осмон ҳодисалари билан уйғун тарзда баён қилинганлигини кўрамиз. Ғазал тун – оқшом бошланса ҳам, ёр, яъни ушбу тунни ёритувчи шам келмаганлиги, бу қайғу оташидан ошиқнинг жони парвонадай куиши тасвири билан бошланади. Байтда қўлланилган таносуб (тун, оқшом, шабистон, шам, парвона), ташбех, тавзев (оқшом, шам, шабистон) каби санъатлар матлаъдаёт ғазалнинг таъсирчан чиқишига замин ҳозирлаган.

Кейинги байтларда ушбу тасвир янада кучайтирилади.

Иккинчи байт:

Агар қўксимнинг ярасидан яширин ғамим кўринмаса, не ғам?!
Чунки қўксимнинг пора бўлганлигини либосим ёқасидаги чок кўрсатиб турибди.

Ҳусни таълил (чиройли далиллаш) ва ташбех санъатларининг уйғунлиги байтнинг таъсирчанлигини оширган.

Учинчи байт:

Ёримнинг ғамидан яширин дурдек кўз ёшим Жайхун дарёсидек
окди, бу кўз ёшимнинг дона-дона томчилари жаҳонни худди юлдузли осмондек безади.

Айни шу байтдан бошлаб мусажжаъ санъати (макнундек, Жайхундек, гардундек) оҳангдорликни кучайтиради ва бу оҳангдорлик ғазал охиригача давом этади.

Тўртинчи байт:

Осмон юлдузлар билан тўлди, қуёш ҳам ўз отидан тушди, яъни
ботди, лекин менинг қуёшим, яъни ёрим Раҳш отидан тушшиб, хув
зумримга келмайдими?

Байтда Алишер Навоий бадиий маҳорати ва сўз бойлигининг яна бир намойишига гувоҳ бўламиз: офтоб тушунчasi З хил сўз воситасида: қуёш, хуршид, раҳшон ва от тушунчasi ашҳаб ва маркаб сўzlари воситасида ифодалаб бериляпти.

Бешинчи байт:

Зулмат жаҳонни қудукка айлантирди, энди бу зулмат ичиди ўл-
моғим тайиндир. Канийди менинг оби хайвон (тириклик суви)дек
ёрим етиб келиб. Хизр каби йўлбошли бўлиб, мени куткарса.

Маълумки, мумтоз адабиётда Хизр оби ҳаётни ичган тимсол сифатида келиб, байтда бу номнинг қўлланилиши талмех санъатини вужудга келтиряпти.

Олтинчи байт:

Осмондан қуёш кетди, атроф коронғиликка чўмди деб ўйлама.
Аслида, бу менинг ойдек ёрим хажридан чеккан фифонларим ту-
тунидир.

Байтда истиора ва муболага санъатларининг бетакрор намуналарига гувоҳ бўламиз.

Еттинчи байт:

Ёрим ғамида менинг бу пинхон ёнишимдан қуёш кочиб, юзини
яшириди; шафак оташга тушшиб куйди, осмоннинг юзига эса доғлар
тушди.

Байтда ҳусни таълил санъати ва таносуб санъатлари қўлла-
нилган.

Ғазал ёр висолига илинж ва умидворлик туйғулари билан якун-
ланади:

Айрилик изтироблари ичida Навоий каби бу оқшом фифон че-
киб ўлмоқдаман, лекин менга жон кайғуси бегона, факат жононим
етиб келса бўлгани.

Байтда «жон» ва «жонон» сўзлари воситасида вужудга келти-
рилган ишитиқоқ санъати байтнинг писоний жозибасини оширган.

Ғазал аruz тизимининг сокин ва ҳазин оҳангга эга вазнларидан
бири бўлган ҳазажи мусаммани солим (рукнлари ва тақтиъи: ма-
фойилун мафойилун мафойилун V--- / V--- / V--
-- / V---) вазнида яратилган. Бу бежиз эмас, чунки мусажожаъ
ғазал шартлари (байтларнинг ўзаро тенг тўрт бўлакка бўлиниши)
шуни тақозо этади.

«Хазойин ул-маоний» куллиётига ғазалдан кейин тартиб бўйи-
ча **мустазод** жанри киритилган бўлиб, куллиётда мустазодлар
сони тўртта, яъни ҳар бир девонга тенг тарзда жойлаштирилган.
Мустазод арабча «орттирилган», «зиёда қилинган» маънолари-
ни билдириб, ҳар мисраси 1,5 қатордан иборат шеър шаклидир.
Мустазод учун ғазал асос – замин вазифасини ўтайди. Иккала
жанрнинг қофияланиш тизими, байтлар сони, матлаъ ва мақтаъ,
таяхалпсунинг мавжудлиги бу фикрни исботлайди. Лекин ғазал аruz
тизимининг барча баҳрларида яратилгани ҳолда мустазод фақат
ҳазаж баҳрининг ҳазажи мусаммани ахраби макфуфи маҳзуфи
мустазод (рукнлари ва тақтиъи: мафъулу мафойилу мафойилу
фаувлун мафъулу фаувлун -- V / V--- V / V--- V / V--- / -- V /
V---) вазнида ёзилади.

Туркий адабиётда Алишер Навоийгача мустазод жанри Ҳофиз
Хоразмий ижодида учрайди. Унинг девонида ҳар бири 7 байтдан
иборат иккита мустазод мавжуд.

Алишер Навоий «Мезон ул-авzon» асарида мустазод жанрига
аплоҳида таъриф бериб, унинг оҳангси суруд нағамоти (куй оҳангси)га
мос келишини айтади: «...ҳалқ орасида бир суруд бор экандур-
ким, ҳазажи мусаммани ахраби макфуфи маҳзуф вазнида анга
байт бошлаб битиб, аниң мисраидин сўнгра ҳамул баҳрнинг
икки рукни била адо қилиб, суруд нағамотига рост келтурурлар
эрмиш ва ани «мустазод» дерлар эрмиш...»

Навоийнинг ўз даврида ниҳоятда машҳур бўлган мустазодларидан бири «Наводир уш-шабоб» девонига киритилган бўлиб, шундай бошланади:

Дин оғати бир муғбачаи моҳилиқодур,
майхораву бебок
Ким, ишқидин онинг ватанум дайри фанодур,
сармасту яқом чок.
Ҳам туррасининг дуду вараъ белига зуннор.
мен кофири ишқи
Ҳам юзи мажус ўти киби шуълафизодур,
мен ўртанибон пок...

Алишер Навоийнинг замондоши тарихчи Зайниддин Восифийнинг «Бадоъе ул-вақоеъ» асарида кептирилишича, бу мустазодга ўз даврининг машҳур бастакори Ҳожа Абдулло Марворид куй басталаган. Қўшиқ шунчалик шуҳрат қозонганди, Ҳиротда бу қўшиқни тингламайдиган хонадон бўлмаган. Ҳатто бир базмда мустазоднинг «сармасту яқом чок» сатри куйланаётганда, мажлис аҳли ўз ёқаларини йиртганлар ва бу ҳолни бир тасодиф туфайли туйнуқдан қараётган ҳазрат Навоийнинг ўзи ҳам кўрган. Алишер Навоий кейинчалик «Ҳайрат ул-аброр»да бу ҳодисани шундай тасвирлайди:

Базмда ул лаҳза аполони кўр,
Кўйи ҳаробот ароғавони кўр.
Кўрки, нечукдур яқо чок айламак,
Ўзни фиғон бирла ҳалок айламак.

Куллиётдаги учинчи жанр **мухаммас** бўлиб, «Ҳазойин ул-маоний»да мухаммасларнинг сони 10 та. Мухаммас арабча «бешлик» маъносини билдириб, ҳар банди 5 мисрадан иборат шеър ҳисобланади ва а-а-а-а-а, б-б-б-б-а, в-в-в-в-а тарзida қофияланади. Мухаммас мусаммат (бандли шеър)нинг бир тури бўлиб, яратилиш хусусиятига кўра икки хил:

- 1) табъи худ (мустақил);
- 2) тахмис (ғазални бешлантириш асосида яратилган).

Табъи худ мухаммасда шоир ўзга шоир шеърини асос қилиб олмасдан, ўзи мустақил равишда бешлик яратади. Тахмисда эса

муаллиф ўзга шоир ёки баъзида (жуда кам ҳолларда) ўз ғазалини асос – замин қилиб олиб, шу мавзуни давом эттиргани ҳолда, вазн, қофия ва радифни сақлаб қолиб бешлик яратади. Бунда асос қилиб олинган ғазалдаги ҳар байтнинг юқори қисмига уч мисра қўшилади. Мақтаъ бандда тахмис боғлаётган шоирнинг тахаллуси ҳам келтирилади.

Қизиғи шундаки. Алишер Навоийнинг «Ҳазойин ул-маоний»га киритилган 10 та мухаммасидан 3 таси «малик ул-калом» Лутфийга, қолган 7 таси эса ўзининг машҳур ғазалларига битилган тахмисдир. Мумтоз адабиётимиз тарихида ижодкорнинг ўз ғазалига тахмис битиш ҳодисаси жуда кам учрайди. Навоий тахмислари эса шоирнинг ўз ғазалларини бешлантириш асосида вужудга келганини кўриш мумкин. Демак, айтиш мумкинки, ҳазрат Навоий музайян мавзуга доир ғазал ёзар экан, орадан вақт ўтиб шу мавзуга қайтишга эҳтиёж сезган ва шу тариқа ўз ғазалларини мухаммас ҳолига келтирган бўлиши мумкин. Мазкур ҳолатни қўйидаги жадвалда кўриш мумкин:

Ўз ғазалларига тахмис		
Лутфийга тахмиснинг 1-мисраси ва у киритилган девон	Мухаммаснинг 1-мисраси ва у киритилган девон	Мухаммасга асос бўлган ғазалнинг 1-мисраси ва у киритилган девон
Ҳалқайи зулфунгда кўнглум бўлгалиғам маҳрами («Фаройиб ус- сифар», 1-мухаммас)	Оҳқим, волиҳ мен ул сарви хиромондин жудо («Наводир уш-шабоб», 2-мухаммас)	Не наво соз айлагай булбул гулистондин жудо («Фаройиб ус-сифар», 38-ғазал)
Маснади хусн узра токим кўрмишам ул шоҳни («Наводир уш- шабоб», 1-мухаммас)	Бўлмағай эрди жамолинг мунча зебо кошки («Наводир уш- шабоб», 3-мухаммас)	Очмағай эрдинг жамоли олам оро кошки («Наводир уш-шабоб», 625-ғазал)
Шарбати юҳийл изом эрни майи нобиндадур («Бадоеъ ул-васат», 1-мухаммас)	Неча, эй ой, мендин айру айлагай даврон сени («Бадоеъ ул- васат», 2-мухаммас)	Келгил, эй ороми жонимким, тилайдур жон сени («Фавойид ул- кибар», 618-ғазал)
	Оҳқим, тарки мухаббат қилди жонон оқибат («Фаройиб ус-сифар», 2-мухаммас)	Ёшурун дардимни зоҳир қилди афғон оқибат («Наводир уш-шабоб», 72-ғазал)

	Жилва қилди даҳр аро кўп ҳусни беҳамто йигит («Фавойид ул-кибар», 1-мухаммас)	Кўнглум олди бир парийпайкар малак-сиймо йигит («Гаройиб ус-сиғар», 80-ғазал)
	Ишқ утидин жисми зори нотавоним ўртадинг («Гаройиб ус-сиғар», 3-мухаммас)	Ваҳки, ўтлуқ чехра очиб хонумоним ўртадинг («Наводир уш-шабоб», 354-ғазал)
	Кўргузуб юз, кунглума юз минг жағому қилмадинг («Фавойид ул-кибар», 2-мухаммас)	Ишқ утидин қисматим дарду балому қилмадинг («Бадоеъ ул-васат», 356-ғазал)

«Хазойин ул-маоний»га **мусаддас** («олтилик») жанри ҳам киритилган бўлиб, куллиётдан 5 та мусаддас ўрин олган. Мусаддас ҳам мухаммас сингари икки турга бўлинади:

1) табъи худ (мустақил):

2) тасдис (ғазални олтилантириш асосида яратилган).

Куллиётдаги 5 та мусаддасдан 2 таси Лутфийга, биттаси Ҳусайнийга тасдис бўлса, биттаси шоирнинг ўз ғазалига тасдис ва биттаси шоирнинг ўз табъидан яратилган мусаддасdir.

Бу ҳодисани ҳам жадвалда кузатиш аниқроқ тасаввур беради:

Табъи худ мусаддас	Лутфийга тасдис	Ҳусайнийга тасдис	Ўз ғазалларига тасдис	
			Тасдисга асос бўлган ғазал	Тасдис
«Даҳр аро чун қайғусиз йўқ ҳеч ишрат, эй рафиқ» («Наводир уш-шабоб», 1-мухаддас)	«Жоним ўртарга ул ўтлуқ чехра гулзори Халил» («Бадоеъ ул-васат», 1-мухаддас)	«Ишқ зор этти ҳалойик ибтиносидин мени» («Бадоеъ ул-васат», 2-мухаддас)	«Субҳидам махмурлуктинг тортибон дарди саре» («Гаройиб ус-сиғар», 1-мухаддас)	«Ваҳки, диним кишварин торож қилди кофире» («Наводир уш-шабоб», 580-ғазал)
	«Зулфу сиймин жисминг афъи ганжи Қорун устина» («Фавойид ул-кибар», 1-мухаддас)			

Навбатдагижанр мусамман дебаталиб, «саккизлик» маъноси ни билдиради. Алишер Навоийгача туркий шеъриятда мусамман жанри учрамайди. Куллиётда битта мусамман бўлиб, у «Фавойид ул-кибар» девонига киритилган. Мусамман а-а-а-а-а-а-а, б-б-б-б-б-б-а, в-в-в-в-в-в-в-а тарзида қофияланниб, 7 банддан – жами 56 мисрадан иборат. Шеър мураддаф (радифли) бўлиб, «эй кўнгул» жумласи радиф бўлиб келган. Мусамман ишқий мавзуда: ошиқнинг ёр озоридан шикоят қилиб, кўнгилга мурожаати тарзида яратилган. Мусамман қуидаги банд билан бошланади:

Ҳар тараф азм айлаб ул шўхи сутамгор, эй кўнгул,
Тиги ҳажридин неча бўлғайбиз афгор, эй кўнгул,
Чун сафар айлаб эди бир қатла дилдор, эй кўнгул,
Дарди ҳажриға бўлуб эрдук гирифтор, эй кўнгул,
Бўйлаким, таъриф этиб ғурбатни бисёр, эй кўнгул,
Шаҳру кишвардин малолат айлаб изҳор, эй кўнгул,
Англадинг ё йўқмуким, айлар сафар ёр, эй кўнгул,
Ваҳки, бўлдуқ яна ҳажри илгидин зор, эй кўнгул...

«Хазойин ул-маоний»да таржиъбанд жанри ҳам алоҳида ўрин тутади. Маълумки, таржиъбанд арабча «такрорлаб боғламоқ» маъносини билдиради. Адабий истилоҳ сифатида эса бир неча банддан иборат бўлиб, ғазал сингари қофияланадиган, биринчи банднинг мақтаъси қолган бандларнинг сўнгига ҳам такрорланадиган шеър турини англатади. Бунда мақтаъ мисралари ўзаро қофияланган бўлади.

Туркий адабиётда таржиъбанднинг илк намуналари Ҳофиз Хоразмий ижодида учрайди. Унинг девонига 3 та таржиъбанд киритилган.

«Хазойин ул-маоний» куллиётида 4 та таржиъбанд бўлиб, ҳар бир девонга биттадан жойлаштирилган. Таржиъбандларнинг иккитаси тасаввуфий-фалсафий, иккитаси ишқий мавзуда. Улардан «Эй кирпики нешу кўзи хунхор» деб бошланадиган таржиъбандни кўриб чиқсан. Таржиъбанд 7 банддан иборат бўлиб, ҳар бир банд 8 байтни ўз ичига олади. Унинг умумий ҳажми 56 байт – 112 мисра.

Таржиъбанд ишқиј мавзуда бўлиб, қуидаги банд билан бошланади:

*Эй кирпики нешу кўзи хунхор,
Жонимни неча қилурсан афгор.*

*Лаълинг ғамидин кўнгулда эрди.
Ҳар қонки сиришким этти изҳор.*

*Ҳайҳотки, ҳажринг илгидиндур
Жонимда алам, танимда озор.*

*Юзунгни кўруб мени рамида,
Ишқ ўтиға бўлгали гирифтор.*

*Сен эрдинг мажлисум ҳарифи
Ким, еди ҳасад сипеҳри ғаддор.*

*Юз ҳасрат ила мени айрди
Васлингдин. аё, хужаста дийдор.*

*Эмдики фироқ аро тушубмен,
Топқунча яна ҳариф. ё ёр.*

***Ёдингни қиласай ҳарифи мажлис,
Фикрингни этай кўнгулга мунис...***

Кўринадики, банд охиридаги байт ўзаро мустақил қофияланган мисралардан ташкил топган. Бу мисралар қолган бандлар сўнгиди ҳам такрорланади. Таржиъбандда бир пайтлар ёри билан ҳамнафас, улфат бўлган, эндиликда ғаддор тақдирнинг зулми билан севгилисисдан айрилган ошиқнинг руҳий кечинмалари баён қилинади. Академик А.Қаюмов ушбу таржиъбандни «Севгинома» деб атайди. Таржиъбанд ҳазаж баҳрининг хушоҳанг ва ўйноқи вазнларидан бири – ҳазажи мусаддаси ахраби мақбузи мақсур вазнида (рукнлари ва тақтизи: мафъулу мафоилун мафоийл – – V / V – V – / V – ~) ёзилган.

«Хазойин ул-маоний»да битта **таркиббанд** ҳам мавжуд. Таркиббанд «бириктириб боғламоқ» маъносини билдириб, қоғияланиш тизими ва ҳажмига кўра таржиъбандга яқин туради. Фақат, ундан фарқли ўлароқ, таркиббандда ҳар банднинг мақтаъси ўзаро қофияланувчи ва бир-бирини тақрорламайдиган мустақил байтлардан иборат бўлади. Алишер Навоийнинг таркиббанди марсия йўналишида бўлиб, устози ва дўсти Сайид Ҳасан Ардашер хотирасига бағишланган. Таркиббандда шоирнинг азиз инсонидан айрилиши туфайли вужудга келган қалб оғриқлари, дардли ҳиссиётлари, аламу изтироблари баён қилинади. Шоир, айниқса, Сайид Ҳасан Ардашер вафот этган вақтда Ҳиротдан узоқда бўлгани, у билан видолаша олмаганидан чексиз изтироб чекади. Мазкур таркиббанд «Наводир уш-шабоб» девонидан ўрин олган бўлиб, ҳажман 56 байтдан иборат.

Таркиббанд қўйидаги банд билан бошланади:

*Даҳр боғики жафо шориидур ҳар чамани.
Жуз вафо аҳлиға сончилмади аниң тикани.*

*Кимдаким дого вафо кўрса шаҳид айламаса,
Лоласининг не учун қонға бўялмиш кафани.*

*Поймол этмаса андинки келур меҳр иси,
Оёғ остида недин қолди гиёҳи дамани.*

*Сафҳаи хотири пок ўлмаса барбод андин,
Бас, не соврулмоқ эрурким кўрар анинг самани.*

*Ростлар бўлса анинг арсасида бархўрдор,
Жаврдин, бас, нега бебарлик эрур сарви фани.*

*Гар яқин аҳлини Мансур кеби қатл этмас,
Бас нединидур шажару сунбули дору расани.*

*В-ар камол аҳли жалои жати ватан эрмас андин,
Нега туфроғдор ул аkmали даврон ватани.*

*Баҳри урфон дури Сайийид Ҳасан улким афлок,
Етти дуржи аро бир кўрмади андоқ дури пок.*

Таркиббанд рамал баҳрининг рамали мусаммани солими маҳбуни маҳзуф вазнида (рукнлари ва тақтизи: фоилотун фаилотун фаилотун – V – / V V – / V V – / V V –) ёзилган.

«Хазойин ул-маоний»дан ўрин олган битта **маснавий** ҳам Сайийид Ҳасан Ардашер номи билан боғлиқ. Маълумки, маснавий арабча «иккилик» маъносини билдириб, ҳар банди икки мисрадан таркиб топувчи ва а-а, б-б, в-в... тарзида қофияланувчи шеър туридир. Навоий ўзининг «Сабъаи сайёр» достонида бу жанрни алоҳида тавсифлаб, уни «васиъ» – кенг майдон деб атайди:

*Маснавийким. бурун дедим они.
Сўзда келди васиъ майдони.*

Мумтоз адабиётимиз тарихида яратилган маснавийларни шартли равишда икки турга ажратиш мумкин:

1) лирик маснавий (шоирнинг лирик кечинмалари, ҳис-туйгула-ри ифода этиладиган шеър шакли);

2) эпик маснавий ёки достон (сюжет асосига қуриладиган катта ҳажмли асар).

«Хазойин ул-маоний» куллиётидан ўрин олган маснавий лирик маснавий бўлиб, «Ғаройиб ус-сиғар» девонига киритилган. Маснавий шеърий мактуб тарзида ёзилган. Маснавийда Аллоҳ ҳамди ва пайғамбар наътидан сунг Сайийид Ҳасан Ардашер шахсига таърифу таҳсинлар айтилади:

*Вафо анга пеша. сахо анга фан,
Вафову сахо кони Сайийид Ҳасан.*

Унда, шунингдек, сўз таърифи. шеър ва шоирлик, бадиий ижод билан боғлиқ масалалар ҳам қаламга олинган.

«Хазойин ул-маоний» куллиётидаги навбатдаги жанр **қасида**-дир. Қасида арабча «мақсад», «ният» маъноларини билдириб, бирор тарихий шахс ёки воқеага бағишлаб ёзиладиган катта ҳажмли шеър тури ҳисобланади. Қасидалар ҳажман 12 байтдан бир неча юз байтгача бўлиши мумкин.

Қасида ғазал сингари а-а, б-а, в-а, г-а ... тарзида қофияланади. Айрим ҳолларда маснавий сингари қофияланиси ҳам мумкин. Қасида тузилишига кўра 2 хил бўлади:

1. *Қасидаи том* (тўлиқ қасида) – бунда қасида тўрт қисмдан таркиб топади:

- а) насиб – лирик кириш (табиат тасвири);
- б) гуризгоҳ – насиб билан мадҳни боғловчи, 4 – 5 байтдан ташкил топувчи қисм;
- в) мадҳ – асосий қисм;
- г) қасд – мамдуҳ (мадҳ этилаётган шахс)га ният ва истаклар билдирилаган қисм.

2. *Қасидаи мужаррада* (чала қасида) – бунда фақат мадҳ келтирилади.

Қасидалар мавзусига кўра өасф, мадҳ, ҳажве, марсия, муножот ва фалсафий турларга бўлинади. Туркий адабиётдаги илк қасида «Девону луготит турк»да «қўнуғ» шаклида учрайди.

Алишер Навоийнинг мазкур куллиётга кирган қасидаси «Ҳилолия» бўлиб, учинчи девон – «Бадоеъ ул-васат»дан ўрин олган. Қасида тузилишига кўра тўлиқ, мавзусига кўра эса мадҳ қасида ҳисобланади. Ҳажман 91 байтдан иборат. Қасида замона ҳукмдори сulton Ҳусайн Бойқаронинг Хуросон таҳтига ўтириши муносабати билан ёзилган бўлиб, қуйидаги байт билан бошланади:

Чун ниҳон қилди турунжи меҳр раҳшон талъатин,
Ошкор этти фалак бир тавқи ғабғаб ҳайъатин.

Мазкур қасида рамал баҳрининг рамали мусаммани маҳзуф (руқнлари ва тақтиси: фоилотун фоилотун фоилотун фоилун, – V – / – V – / – V – / – V –) вазнида яратилган.

«Ҳазойин ул-маоний»да катта ҳажмли шеърлардан **соқийнома** ҳам учрайди. Маълумки, соқийнома соқий (май қуювчи)га муружаат қилиб ёзилган, маснавий шаклида қофияланадиган катта ҳажмли шеър бўлиб, бир неча бандни ўз ичига олади. «Ҳазойин ул-маоний» куллиётида битта соқийнома мавжуд бўлиб, «Фавойид ул-кибар» девони таркибиға киритилган. Алишер Навоий соқийномаси турли ҳажмдаги 32 қисм (банд)дан иборат. Жами 458 байтни ўз ичига олади. Биринчи банд ҳажман анча катта (41 байт) бўлиб, қуйидаги байт билан бошланади:

*Соқиё, тут қадаҳи шоҳона.
Қатраси лаъл, вале якдона...*

Ушбу банд дунёning фонийлиги, фалакнинг бевафолиги тасвирига багишиланган. Кейинги бандлар Ҳусайн Бойқаро ва шаҳзодалар таърифи ҳақида. 21-бандга келиб Алишер Навоий ўзининг марҳум икки ҳабиби – Мирзобек ва Мир Дарвешни изтироб билан ёдга олади:

*Бури ҳам ёр манга. ҳам фарзанд,
Жонга орому юракка пайванд.
Бури ҳамсүҳбату ҳамдарду рафиқ,
Түкқанимдин доги юз қатла шафиқ.*

22 – 23-бандларда Навоийнинг ижодкор дўсти Шайхим Суҳайлӣ ва у яратган қасидалар. 25-бандда Абдураҳмон Жомий, 26-бандда Сайид Ҳасан Ардашер. 27-бандда Паҳлавон Муҳаммад ҳақида сўз боради. 28-банд ишқ таърифига багишиланган.¹⁵ 29-банд эса вафо таърифи ҳақида бўлиб, шоир олам аҳлида вафо йўқлиги тўғрисида шундай ёзади:

*Оlam аҳлида чу йўқ аҳли вафо.
Айларам мен дағи жонимга жафо.*

30 – 31-бандлар Алишер Навоийнинг дўстлари: пири Муаммоий, Ҳожа Камол, Мир Садр, Ёр Танбал, олим Сабзорий, Мир Атойи, Фаноий, Осафий Ҳиравий, Биноий, Султонали Машҳадий, Котибийлар таърифига багишиланган, Алишер Навоий қолган дўстларини «Мажолис ун-нафоис»да зикр этиб ўтганлигини таъ- кидлайди:

*Ўзгасин қилмадим андин мазкур
Ки. «Мажолис»да эрурлар мастур.*

Соқийноманинг сўнгги 32-банди ҳазрат Навоийнинг соқийига му- рожаат этиб, уни риндлар базмига киритишини сўраб қилган ис- тақ, илтижоси билан бошланиб, риндлар шоҳи сulton Абулғозий

¹⁵ Академик Азиз Қаюмов ушбу бандни «Севгинома II» деб атайди.

Ҳусайн Бойқаро таърифи ва унга умрбоқийлик тилагини билдириш билан якунланади.

Соқийнома рамал баҳрининг рамали мусаддаси солими маҳбуни мақтуу ёки маҳзуф (рукнлари ва тақтиши: фоилотун фаилотун фаълун ёки фаилун – V – / V V – / – ёки VV –) вазнида яратилган.¹⁶

«Хазойин ул-маоний» куллиётидаги қитъя жанри ҳам етакчи ўринни эгаллади. Қитъя (ар. «парча», «бўлак», «қисм») 2 байтдан бир неча байтгача ҳажмда бўлган. фақат жуфт мисралари қофияланадиган (ба, ва, га...) байтли шеър шакли ҳисобланади. Туркий адабиётда қитъанинг илк намуналари Носируддин Рабғузийнинг «Қисаси Рабғузий» асарида учрайди.¹⁷

Қитъя, асосан, фалсафий, ижтимоий ва ахлоқ-одоб билан боғлиқ мавзуларда яратилган. Шунингдек, қитъя насрый асарларда маълум бир масала ҳақидаги фикр-мулоҳазаларга якун сифатида «қиссадан ҳисса» тарзида келтирилган.

Алишер Навоий қитъаларини мавзусига кўра шартли равишда икки гурӯҳга ажратиш мумкин:

1) ижтимоий ҳаёт масалалари акс этган фалсафий-ахлоқий мазмундаги қитъалар:

*Қулоқда асра гаронмоя сўзни-ю, фикр эт
Ки, дурсиз ўлса, не бўлгусидур садаф ҳоли.
Сўзунгни даги кўнгул ичра асрағилким, ҳайф
Ким. ўйла дуржни гуҳардин эткасен ҳолий.
Бу дуржу икки садафни тўла дур этканга,
Зиҳе улувви гуҳар, балки гаевҳари олий.*

¹⁶ Аспида, рамали маҳбун вазни саккизта ритмик вариациядан иборат бўлиб, бу ритмик вариациялар соқийнома мисраларида ўзаро алмашиниб қўлланилган. Ритмик вариациялар таркибидаги ўзгаришлар, асосан, биринчи ва учинчи рукнларни ўзгаришсиз қолаверади. Бунда биринчи рукн фоилотун ёки фаилотун, учинчи рукн эса фаилун, фаилон, фаълун, фаълон тарзида ўзаро алмашиниб қўлланавериши мумкин.

¹⁷ Адабиётшунослиқда туркий адабиётдаги илк қитъя Хоразмий «Мухаббатнома»сида учрайди деган караш бор. «Қисаси Рабғузий»даги шеърий парчаларнинг жанр хусусиятларини ўрганиш натижалари асарда қитъя жанрига мос келувчи шеър мавжудлигини кўрсатди.

2) муайян давр воқеа-ҳодисалари ҳамда у ёки бу гурүх вакиллари фаолияти ҳақидалар қитъалар:

Фалон котиб ар хатни мундоқ ёзар,
Бу мансабдин ани қўпармоқ керак.
Юзин номасидек қора айлабон,
Қаламдек бошин дағи ёрмоқ керак.

Қитъа баъзан аа, бб, вв тарзида ҳам қофияланиши мумкин. «Ҳазойин ул-маоний»га киритилган 210 қитъадан 6 таси айнан шу тарзда қофияланган («Ғаройиб ус-сиғар»даги 41-қитъа; «Бадоев ул-васат»даги 3-, 18-, 52-қитъалар, «Фавойид ул-кибар»даги 42-, 44-қитъалар). Мумтоз адабиётимиз тарихида қитъаларнинг бундай қофияланиш ҳодисаси деярли учрамайди.

«Бадоев ул-васат»даги 18-қитъанинг қофияланишини кўриб чиқсан:

Бийик ҳимматлик элга арзи ҳол эт,	а
Замири нурпош элдин савол эт	а
Ки, бор абри баҳоре гаөҳарафшон .	б
Чоқин ҳам олам аҳлиға зарафшон .	б

«Ҳазойин ул-маоний»да **рубоий** жанрининг ҳам ўзига хос ўрни бор. Рубоий (ар. «тўртлик») икки байтдан иборат мустақил шеър бўлиб, дастлаб форс-тожик шеъриятида, Абу Абдуллоҳ Рудакий ижодида пайдо бўлган.

Рубоийнинг 2 хил тури бор:

1) **хосий рубоий ёки рубоийи хоса** (қофияланиши: а-а, б-а):

Сен борғали ортмиш кўнгул зорлиғи,
Оҳ ўқларидин ҳар нафас афгорлиғи.
Билман унутулғанму экандур манга ҳажр,
Ё кўпрак эрур бу қатла душворлиғи:

2) **таронаиий рубоий ёки рубоия** (қофияланиши: а-а, а-а):

Оллимда табиби чорасозим ҳам йўқ,
Ёнимда рафиқи дилнавозим ҳам йўқ.

*Теграмда аниси жонгудозим ҳам йўқ,
Бошимда шаҳи банданавозим ҳам йўқ.*

«Хазойин ул-маоний»даги 133 та рубоидан 116 таси таронайи рубоий ҳисобланади.

Рубоий муайян композицияга эга. Мумтоз рубоий талабларига кўра, унда тўрт унсур мавжуд бўлади. Мазкур унсурлар тўрт мисрада айтилмоқчи бўлган фалсафий, ахлоқий ёки дидактик фикрнинг маълум бир яхлитликка эришишини таъминлайди. Шу маънода тўрт мисрани қўйидаги унсурларга тақсимлаш мумкин:

1) *тезис* – унда рубоийда айтилмоқчи бўлган фикр, бошқача айтганда, рубоий мавзуси баён қилинган бўлади;

2) *антитетис* – бунда биринчи мисрага қарама-қарши фикр айтилади;

3) *моддаи рубоий* – тўртинчи мисрада айтилмоқчи бўлган фикр учун кўпrik вазифасини ўтайди;

4) *синтез* – хулоса.

Лекин бу унсурларнинг доимий мавжуд бўлиш талаби нисбий бўлиб, кўпинча тезис ва антитетиснинг ўрнига фақат моддаи рубоий ва синтезнинг қўлланилганлигини кузатиш мумкин. Юқорида келтирилган рубоийда ҳам ошиқ кечинмалари, асосан, моддаи рубоий тарзида берилган.

Рубоий ўзига хос маҳсус вазнда ёзилади. Бу ҳазаж баҳрининг ахраб ва ахрам шажарасидир. Бу ҳақда Навоий «Мезон ул-авзон» асарида шундай ёзади:

«Рубоий вазниким, они «дубайтий» ва «тарона» ҳам дерлар, ҳазаж баҳрининг «ахрам» ва «ахраб»идин истихроj қилибдурлар ва ул вазнедур асрุ хушоянда ва вазнедур бағоят рабоянда». Ҳазаж баҳрининг ахраб шажараси 12 вазнни, ахрам шажараси яна 12 вазнни ўз ичига олади ва ушбу жами 24 вазн рубоий вазнлари ҳисобланади. Рубоийнинг шеърий ўлчови билан боғлиқ мухим хусусият шундаки, бошқа шеърий жанрлардан фарқли ўлароқ, рубоийнинг тўрт мисраси мазкур шажараларга мансуб 4 вазнда ёзилиши мумкин. Масалан, Алишер Навоийнинг «Ғаройиб ус-сиғар» девонидаги 45-рубоийни тақтиъи билан бирга кўрсак:

*Олам бор эмиш. Навоийё шўрангиз,
-- V / V - V - / V --- / ~*

Оламдаги эл боштин аёғ рангомиз.

-- V / V -- V / V --- / ~

Ишқ истар эмиш сени адам Мисри сари,

-- V / V - V - / V -- V / V -

Борғилки, эрүр эл тилаган ерда азиз.

-- V / V -- V / V -- V / V ~

Юқоридаги чизмадан маълум бўляптики, мазкур рубоийнинг ҳар бир мисраси алоҳида вазнда ёзилган экан.

Туркий адабиётда рубоий жанрининг дастлабки намуналари Ҳофиз Ҳоразмий девонида учрайди. Унинг жами 12 та рубоийси мавжуд бўлиб, улар, асосан, рубоийи хоса шаклида яратилган. Демак, туркий адабиётда таронайи рубоийнинг илк бор қўлланилиши Алишер Навоий номи билан боғлиқ деб айтиш мумкин.

Муаммо (ар. «қўр қилинган», «беркитилган») бир, баъзан эса икки байтдан иборат мустақил шеър бўлиб, а-а ёки а-б тарзида қофияланади. Муаммода бирор исм ёки нарса-буюм номи беркитилади. Беркитилган сўз шоирнинг турли-туман ишоралари : маънодош ёки шаклдош сўзларни топиш, бир тилдаги сўзнинг иккинчи бир тилдаги муодили (эквиваленти)ни қўллаш, сўзлардаги маълум бир ҳарфларни тизиб, янги сўз ясаш, баъзан эса абжад ҳисобини ишлатиб, рақамлар асосида сўз тузиш ва бошқалар асосида топилади. Муаммони ечиш учун даставвал асосий эътиборни матнда ишора қилинган калит сўзга қаратиш лозим бўлади.

Туркий адабиётда муаммо жанри Алишер Навоий ижодидан бошланган. Унинг «Хазойин ул-маоний» куллиётида 52 та муаммо мавжуд бўлиб, уларнинг барчаси кулиётдаги иккинчи девон – «Наводир уш-шабоб»га киритилган. Алишер Навоий муаммолари, асосан, бир байтли бўлиб, фақат «Қосим» исмига битилган муаммогина 2 байтдан иборат.

Навоийнинг баъзи муаммоларини кўриб чиқсан:

Қасди жонимга чу мужгонинг икки **саф** тузди,
Бири қош ёси, бири ғамзанг ўқин кўргузди.

Бу муаммода калит сўз «صف» – «саф» жумласи орқали кўрсатилган, матнда бу сўз «икки» сўзи билан келтирилиши унинг ечиими ҳам иккита эканлигига ишора қиласи. Биринчи «саф»га қош

ёси, яъни «ى» «йой» (и) ҳарфи, иккинчисига ғамза ўқи, яъни «ا» «алиф» (о) ҳарфи қўшилади, натижада «صنى» – «Сафи» ва «صنا» – «Сафо» сўзлари келиб чиқади.

*Қилур эсанг манга **сомон**, аё рафиқ, ҳавас,
Анинг аёғига еткур менинг бошимнию бас.*

Бу муаммода асосий эътибор «سامان» – «сомон» (осойиштапик) сўзига қаратилган. Иккинчи мисрадаги «анинг аёғига бошимни еткур» жумласидаги ишорага кўра, «ا» – «алиф» (о)нинг оёғи, яъни пастки кисмига «م» – «мим» (м)нинг бошини етказиш талаб қилинади, натижада «ا» – «алиф» ҳарфи «ل» – «лом» ҳарфига айланаб, «م» – «мим»га қўшилади ва «سلمان» – «Салмон» сўзи келиб чиқади.

Алишер Навоийнинг мазкур жанр назариясига бағишланган маҳсус асари ҳам мавжуд бўлиб, форс-тожик тилида ёзилган. Асар «Муфрадот» ёки «Рисолаи муаммо» деб аталади.

«Хазойин ул-маоний» куллиётида навбатдаги жанр **луғз** бўлиб, арабча «топишмоқ», «сир» маъноларини англатади. Луғз форс-тожик адабиётида *чистон* (форсча «нима у») деб ҳам юритилади. Луғз бирор предмет ёки ҳодисанинг характер ва белгиларини таърифу тавсиф этиш орқали китобхонни ўша предмет ёки ҳодисани топишга ундейдиган шеър туридир. Луғз даставвал ҳалқ оғзаки ижодида вужудга келган бўлиб, X – XII асрлардан форс-тожик шеъриятида истифода этила бошлаган. Луғзлар ғазал, рубоий ва туюқ каби ҳажм, қофия ва бошқа шаклий жиҳатлардан қатъий қонуниятга эга эмас. Улар фард, рубоий, қитъа ва баъзан ғазал сингари қофияланиши мумкин.

Туркий адабиётда луғзнинг илк намуналари Алишер Навоий ижодида учрайди. Шоирнинг «Хазойин ул-маоний» куллиётида жами 10 та луғз мавжуд бўлиб, барчаси «Бадоев ул-васат» девонига киритилган. Мазкур жанрдаги шеърларида Навоий ўз атрофими ўраб турган предметларни ижтимоий муносабатлар ва турмуш ҳодисалари билан боғлиқ ҳолда нозик юмор билан тасвиirlайди. Навоий луғзлари, асосан, қитъа (8 таси) ва рубоий (2 таси) сингари қофияланган. Масалан, унинг «парвона» тасвирига бағишланган луғзи таронайи рубоий шаклидадир:

Ул қүшки, таашшуқдуур андиша анга,
 Бир нахлғаким шомдадур беша анга,
 Шохи учидин аён бўлуб решаша анга,
 Гул очмақ ўшул решасидин пеша анга.

Туюқ (турк. «хис қилмоқ», «туймоқ») – тўрт мисрадан иборат мустақил шеър шакли бўлиб, фақат туркий халқлар шеъриятида қўлланилган. Туюқ, асосан, рубоий сингари қофияланади, лекин баъзан ба, ва тарзида ҳам қофияланishi мумкин. Рубоийдан фарқли ўлароқ, туюқда қофиянинг ўрнида, асосан, тажнис (шаклдош сўзлар) қўлланилади. Алишер Навоий «Мезон ул-авзон»да мазкур жанрнинг хусусиятлари ҳақида шундай ёзади: «...Бириси «туюғ»дурким, икки байтқа муқаррардур ва саъй қилурларким, тажнис айтилғай ва ул вазн рамали мусаддаси мақсурдур, мундоқким (туюғ):

Ё раб, ул шаҳду шакар ё лаб мудур?
 Ё магар шаҳду шакар ёлабмудур?
 (Фоилотун фоилотун фоилон)
 Жонима пайваста новак отқоли.
 Гамза ўқин қошиға ёлабмудур?
 (Фоилотун фоилотун фсилон)

Бу ўринда Алишер Навоий туюқнинг уч жиҳатига: икки байтли бўлиши, тажнисга асосланиши ва маҳсус вазнда – рамали мусаддаси мақсур (маҳзуф)да ёзилишига диққат қаратяпти. Бобур «Мұхтасар»да туюқнинг навълари ҳақида гапириб, тажнисиз туюқ ҳам мавжуд бўлишини айтади.

Навоийнинг «Хазойин ул-маоний» куллиётида жами 13 туюқ мавжуд бўлиб, 11 таси аа ба, 2 таси ба ва тарзида қофияланган. Барча туюқлар «Бадоеъ ул-васат» девонига киритилган.

Туркий адабиётдаги дастлабки туюқ Лутфий девонида учрайди, лекин Н.Маллаевнинг ёзишича, туркий адабиётда туюқнинг илк намуналари Бурхониддин Сивосий томонидан яратилган.

«Хазойин ул-маоний»ни якунловчи жанр **фард** бўлиб (ар. «якка», «ёлғиз»), бир байтдангина иборат энг кичик мустақил шеър шакли ҳисобланади. Фард а-а ёки а-б тарзида қофияланади. Фард бир байтдангина иборат эса-да. унда муҳим фалсафий-ахлоқий

масала қаламга олиниб, ихчам поэтик хулоса ифодаланади. Шу маънода фардлар кўпинча афоризм характерига эга бўлади:

*Гоғил ўлма, назардин итса аду,
Шамъ ўчурганда, ел кўринурму...*

*Киши айбинг деса дам урматилким, ул эрур кўзгу,
Чу кўзгу тийра бўлди, ўзга айбинг зоҳир айларму?*

Алишер Навоийнинг «Хазойин ул-маоний»сида 86 та фард мавжуд бўлиб, 83 таси қофияли, 3 таси эса қофиясиздир. Фардларнинг барчаси «Фавойид ул-кибар» девонига киритилган.

Туркий адабиётда фарднинг илк намунаси Хоразмийнинг «Муҳаббатнома» асарида учрайди.

Таянч тушунчалар

- байтли шеър шакли
- ғазал
- бегона байт
- мусажжаъ
- мураддаф ғазал
- мустазод
- рубоий
- рубоийи хосий
- таронайи рубоий
- туюқ
- қитъа
- қасида
- қасидаи мужаррада
- қасидаи том
- мухаммас
- табъи худ мухаммас
- ўз ғазалига тахмис
- тахмис
- мусаддас
- тасдис
- соқийнома

- *таркиббанд*
- *таржиъбанд*
- *маснавий*
- *луғз*
- *қитъа*
- *муаммо*
- *фард*

Савол ва топшириқлар:

1. «Хазойин ул-маоний»да мавжуд жанрларни шарҳлашга ҳаракат қилинг.
2. Алишер Навоийгача бўлган шоирлар ижодида қайси жанрлар мавжуд эди?
3. Алишер Навоий яратган ғазалларни маъно жиҳатдан қандай гурухларга бўлиш мумкин?
4. Таркиббанд ва таржиъбанд жанрларини қайси жанрий белгиларга кўра фарқлаш мумкин?
5. Маснавий жанр ва шакл сифатида намоён бўлганда, уларни қандай белгилар билан фарқлаш мумкин деб ўйлайсиз?
6. Куллиётдаги кичик лирик жанрларга тавсиф беринг.
7. Девондан ўзингизга ёқсан бирор ғазални ёд олинг ва уни гоявий-бадиий жиҳатдан шарҳланг.

Адабиётлар:

1. Навоий Алишер. Мұкаммал асарлар тўплами. 20 жилдлик. – Тошкент: Фан, 1988 – 1990. 3 – 6-жилдлар.
2. Исҳоқов Ё. Навоий поэтикаси. – Тошкент: Фан, 1983.
3. Носиров О. ва бошқалар. Ўзбек классик шеърияти жанрлари. – Тошкент: Ўқитувчи, 1979.
4. Абдуғафуров А. «Хазойин ул-маоний» жумбоқлари // Ўзбек тили ва адабиёти. – Тошкент, 1994. – №4 – 6; 1998. – №6; 2000. – №5.
5. Орзивеков Р. Лирикада кичик жанрлар. – Тошкент: Адабиёт ва санъат нашриёти, 1976.
6. Навоийнинг ижод олами (мақолалар тўплами). – Тошкент: Фан, 2001.

7. Ҳожиаҳмедов А. Мумтоз бадиият малоҳати. – Тошкент: Шарқ, 1999.
8. Алишер Навоий. Ғазаллар. Шарҳлар. – Тошкент: Камалак, 1991.
9. Жумахўжа Н. Сатрлар силсиласидаги сөхр. – Тошкент: Ўқитувчи, 1996.
10. Қаюмов А. Дилкушо тақрорлар ва руҳафзо ашъорлар. – Тошкент: MUMTOZ SO'Z, 2011.
11. Комилов Н. Маънолар оламига сафар. – Тошкент: TAMAD-DUN, 2012.

«ДЕВОНИ ФОНИЙ»НИНГ ЖАНРЛАР КҮЛАМИ, ГОЯВИЙ-БАДИЙ ХУСУСИЯТЛАРИ

РЕЖА:

- 1. Ғазалларнинг яратилиши хусусиятлари.*
- 2. Мусаддас, таркиббанд ва қасидаларнинг ғоявий-бадиий хусусиятлари.*
- 3. Кичик лирик жанрлар.*

Алишер Навоийнинг форсий шеърияти бадииятда туркий шеърларидан қолишимайди. Унинг форсий назми ҳақидаги тўлароқ маълумот «Муҳокамат ул-луғатайн» асарида учрайди. Ҳазрат Навоий бу асарида форсий тилда яратган шеърлари ҳақида гапирав экан, уларнинг жанрий жиҳатларига алоҳида тўхталади, яратилиш хусусиятларига бирма-бир шарҳ беради. Хусусан, муайян шеърларини яратишда қайси форсигўй адиларнинг асарларидан илҳомлангани, қайси шеъри нима муносабат билан ёзилганлигига маҳсус тўхталиб, ҳатто баъзи жанрларнинг миқдорини ҳам кўрсатиб ўтади.

Муқаммал асарлар тўпламиининг 18-, 19- ва 20-жилдлари «Девони Фоний»ни ўз ичига олади. Мазкур нашрда 552 ғазал. 1 мусаддас. 1 таркиббанд – марсия, 64 қитъа, 72 рубой, 16 таърих, 266 муаммо, 10 қасида, 9 луғз каби жанрлардан ташкил топган 991 шеър мавжуд. Биз жанрлар тавсифини беришда мазкур нашрга суюндики.

Шарқ мумтоз адабиётида тартиб берилган барча девонлар сингари «Девони Фоний»да ҳам марказий ўринни ғазал жанри эгаллайди. Девондаги ғазаллар мухтараъ татаббубъ ва тавр тарзида яратилган. Мухтараъ арабча сўз бўлиб, «кашф этилган», «ихтиро қилинган» маъноларини англатади. Бу ўринда Навоий – Фонийнинг ўзга шоирлардан таъсирланмасдан, бевосита ўзи мустақил тарзда яратган ғазаллари назарда тутилади. Девонда улар мухтараъ ва ихтироъ сарлавҳаси остида келтирилган.

*Оламе хоҳам, ки набвад мардуми олам дар ў,
К-аз ҷафои мардуми олам набошад ғам дар ў.*

Таржимаси:

*Олам истарманки, унда аҳли олам бўлмасин,
Унда олам аҳлининг бедодидин ғам бўлмасин.*¹⁸

Мазкур ғазал аруз тизими ning рамали мусаммани маҳзуф (рукнлари ва тақтиши: фоилотун фоилотун фоилотун фоилун – V-- i – V – – / – V – – / – V –) вазнида ёзилган.

Татаббуъ арабча «бирор нарсанинг кетидан тушиш», «изидан бориш» маъноларини билдириб, адабий истилоҳ сифатида бирор шеърдан таъсирланиб, ундаги вазн, қофия ва радифни сақлаган ҳолда асар яратишни англатади. Бундай шеърлар назира, ўхшатма, жавобия деб ҳам юритилади. Таер арабча «бирор нарса атрофида айланиш», «тарз», «йўсин», «услуб» маъноларини билдиради. Бундай шеърларда вазн, қофия ва радиф мезон қилиб олинмайди, балки ўзга шеърдаги услугуб ва мазмундаги шеърий талқинга риоя этилади. Девондаги аксарият ғазаллар Алишер Навоийнинг буюк форсий салафлари: Амир Хусрав Деҳлавий (32 татаббуъ, 1 таврида), Ҳожа Ҳофиз Шерозий (211 татаббуъ, 20 таврида), Шайх Муслиҳиддин Саъдий Шерозий (22 татаббуъ, 2 таврида), Котибий (1 татаббуъ), Ҳожа Салмон Соважий (2 татаббуъ), Ҳожа Камол Ҳўжандий (4 татаббуъ), Ҳожа Ҳасан Деҳлавий (2 татаббуъ), халафлари: Абдураҳмон Жомий (31 татаббуъ, 8 таврида), Амир Шайхим Суҳайлий (3 татаббуъ), Аҳмад Ҳожибек Вафой (2 татаббуъ), Шоҳий Сабзаворий (3 татаббуъ), Соҳиб Балхий (1 татаббуъ), Сайфий Бухорий (1 татаббуъ), Исмат Бухорий (1 татаббуъ), Нажмиддин Муҳаммад Коҳий Миёнколий (1 татаббуъ), Ҳусайнний (2 татаббуъ) каби ижодкорларнинг ғазалларидан таъсирланиб яратилган.

Девондаги энг кўп татаббуъ Ҳофиз Шерозий ғазалларига битилганлигини кузатиш мумкин. Шероз Ҳофизининг ўзбек китобхонларига яхши таниш бўлган:

*Агар он турки Шерози ба даст орад дили моро,
Ба холи ҳиндуюш бахшам Самарқанду Бухороро, –*

деб бошланувчи ғазалига Навоий қўйидагича татаббуъ боғлаган:

¹⁸ Жамол Камол таржимаси («Фоний гулшани». – Б.15).

*Гар он турки Хитой нүш созад жоми саҳборо,
Нахуст орад сўи мо турктози қатлу яғморо.*

Таржимаси:

*Ўшал турки хитой жуфт айласа гар жоми саҳбони,
Чу биздин бошлагай турктозини ул қатлу яғмони.¹⁹*

Мазкур ғазал аruz тизимининг ҳазажи мусаммани солим (рукнлари ва тақтиши: мафоийлун мафоийлун мафоийлун мафоийлун V --- / V --- / V --- / V ---) вазнида ёзилган.

Ғазал мақтаъсида Навоий камтарлик билан ўзига мурожаат қилиб: «Хофиз ғазалларига татаббуъ битиб, унинг жаҳонни безаган назмидан сен ҳам тиланиб, татиб кўр», – деб ёзади:

*Ғазал гуфтан мусаллам шуд ба Ҳофиз, шояд, эй Фоний,
Намой чошний дарюза з-он назми жаҳоноро.*

«Девони Фоний»даги ғазаллар билан танишар эканмиз, Навоий кашф этган янги бир усулга ҳам гувоҳ бўламиз. Яъни шоир баъзан бир ғазалнинг ўзида икки шоирдан ижодий таъсирланади ва бундай ғазалларга қуидагича сарлавҳалар қўяди: Татаббуъи Мир дар таври Хожа (Хожа Ҳофиз Шерозий услубида Амир Ҳусрав Деҳлавийга жавоб), Татаббуъи Шайх дар таври Маҳдум (Абдураҳмон Жомий услубида Шайх Саъдийга жавоб) ва ҳ.к.

«Девони Фоний»дан бир мусаддас ўрин олган бўлиб, «кошки» радифи асосида яратилган. Мазкур мусаддас Абдураҳмон Жомий ғазалига боғланган бўлиб, яратилиш хусусиятига кўра тасдис ҳисобланади. Мусаддас 9 банддан иборат бўлиб, жами 54 мисрани ўз ичига олади. Мусаддас ёр (дўст) дийдори таранумига бағишлиланган. У қуидаги банд билан бошланади:

*Кардаме дар хоки кўи дўст маъво кошкӣ,
Судаме рухсори худ бар хоки он по кошкӣ,
Омадӣ берун зи кўи сарви боло кошкӣ,*

¹⁹ Жамол Камол таржимаси («Фоний гулшани», – Б.92).

*Бурқаъ афкандй зи рӯи оламоро кошкӣ,
Дидаме дидори он дилдори раъно кошкӣ,
Дида равшан кардаме з-он рӯи зебо кошкӣ.*

(Мазмуни:

Кошки, дўст кўйи (кўчаси) тупроғидан жой олсам эди,
Кошки, унинг оёғи тупроғи (изи)га юзларимни суртсам эди,
Кошки, у сарвқомат кўчасидан чиқиб келса эди,
Кошки, оламни безовчи юзидан пардасини олса эди,
Кошки, у раъно дилдорнинг дийдорини кўрсам эди,
Кошки, кўзимни у зебо юз билан равшан қилсам эди).

Мазкур мусаддас аруз тизимининг рамали мусаммани маҳзуф (рукнлари ва тақтиъи: фоилотун фоилотун фоилотун фоилун – V – – / V – – / V – – / V –) вазнида ёзилган.

Девонда келтирилган **марсия-таркибанд** шоирнинг устози ва пири Абдураҳмон Жомий вафоти муносабати билан яратилган бўлиб, шеърга «Марсия ҳазрати Маҳдум» деб ном қўйилган. Навоий устози вафотига бир йил тўлганда унинг қабри устига катта мақбара қурдириб, маросим уюштиради ва ушбу воқеа муносабати билан марсия ёzáди. Маросимда мазкур марсияни ўз даврининг машхур олимларидан бири Ҳусайн Воиз Кошифий ўқиб беради. Бу ҳақда Абулвосеъ Низомийнинг «Мақомоти Мавлавий Жомий» асарида маълумот келтирилади. Марсия 7 бандли бўлиб, ҳар бир банд 10 байтни ўз ичига олади (жами 140 мисра). Бу марсия «Хамсат ул-мутаҳайирин»нинг хотимасига ҳам киритилган. У қуйидаги байт билан бошланади:

*Ҳар дам аз анҷумани чарх чафое дигар аст.
Ҳар як аз анҷуми у доги балое дигар аст.*

(Мазмуни:

Ҳар дам осмон анжуманидан янги бир жафо келади,
Унинг ҳар бир юлдузи янги бир балонинг догоидир).

Ушбу таркибанд-марсия аруз тизимининг рамали мусаммани солими маҳбуни мақсур (рукнлари ва тақтиъи: фоилотун фаилотун фаилотун фаилон – V – – / V V – – / V V – – / V V~) вазнида ёзилган.

«Девони Фоний»да қитъа жанри ҳам алоҳида ўрин эгаллайди. Девонда жами 64 қитъа мавжуд бўлиб, шундан 44 таси 2 байтли, 13 таси 3 байтли, 5 таси 4 байтли ва 2 таси 5 байтли қитъалардир. Уларда шоирнинг маънавий-ахлоқий қарашлари, шахсий кузатишлари билан бир қаторда шеър ва шоирлик ҳақидаги фикрлари ҳам ўз ифодасини топган.

*Зи сар то по набошад шеъри кас хуб.
Ки ин мумкин набошад ҳеч касро.
Баду нек ар баробар ҳаст, бад нест.
Басе доранд ин неку ҳавасро.
Зи бад гар неки ў бошад зиёда,
Надид аз сад яке ин дастрасро.
Каломи Ҳақ наёмад жумла яксон,
Чи бошад нукта мушти хору хасро.*

(Мазмуни:

Ҳеч кимнинг шеъри бошдан бир хилда яхши бўлмайди,
Бу деярли мумкин эмас.
Агар яхшию ёмони баробар бўлса, бу – ёмон эмас.
Буни кўпчилик орзу қиласи.
Ёмонидан яхшисининг кўп бўлиши
Юздан бир шоирга ҳам мусаддаси бўлган эмас.
Ҳақнингки барча сўзи бир хил бўлмагандан кейин,
Биздек хору хасларга (тengлекни) ким қўйибди?)

Ушбу қитъа аruz тизимининг рамали мусаддаси маҳзуф (рукнлари ва тақтиъи: фоилотун фоилотун фоилун – V – – / – V – – / – V –) вазнида ёзилган.

«Девони Фоний»дан 72 рубоий ўрин олган. Диққатга сазовор томони, рубоийларнинг барчаси тўрт мисраси ҳам ўзаро қофияланувчи таронайи рубоийлардир.

*Чонам ба ду лаъли чонғизои ту фидо,
Рұҳам ба насими атроси ту фидо.
Ошуфта дилам ба ишваҳои ту фидо,
Фарсуда танам ба хоки пои ту фидо.*

(Мазмуни:

Жоним сенинг жон бағишлиовчи икки лабингга фидо,
Рұхим сен томондан эсадиган мұаттар насимга фидо,
Ошиқ күнглим сенинг ишваларингга фидо,
Хаста жисмим оёғинг тупроғига фидо).

Девонда **таърих** жанрига оид шеърлар ҳам мавжуд бўлиб, уларнинг сони 16 та. Таърих бу муайян воқеа-ходиса ёки инсон ҳаёти билан боғлиқ бирор санани очиқ айтилмай, араб алифбосидаги ҳарфлар воситаси, яъни абжад усули асосида кўрсатишидир. Шеършунослик илмида таърихга алоҳида шеърий жанр сифатида ҳам, бадиий санъат сифатида ҳам қараш мавжуд. Бу иккала қараш ҳам муайян асосга эга. Агар таърих усули катта ҳажмдаги асарлар: достонлар, манзумалар таркибида ва кўпинча асарларнинг охирида келса, бу алоҳида жанр бўлмасдан, бадиий санъат ҳисобланади («Юсуф ва Зулайҳо», «Ҳайрат ул-аброр» достонларида каби).

Девонлар ичидаги алоҳида мустақил шеър шакли сифатида келтирилган таърихларни жанр сифатида талқин қилиш мумкин. Шу маънода «Девони Фоний» таркибига кирувчи 16 та таърих алоҳида жанр бўлиб, улар қитъа, рубоий ва тўртликлар шаклида яратилган.

Таърихлар мавзусига кўра кишилар таваллуди ёки вафотига доир; муайян биноларнинг қурилишига оид; таҳтга чиқиш, фатҳ ва бирор воқеа-ходиса содир бўлган санага бағишилаб яратилиши мумкин. Алишер Навоий таърихлари, асосан, кишилар вафотига оид (мутаваффиёт) йўналишида бўлиб, ҳазрат Навоийнинг устозлари ва дўстлари: Абдураҳмон Жомий, Паҳлавон Муҳаммад, Сайид Ҳасан Ардашер, Хожа Убайдуллоҳ Аҳрор, Султон Маҳмуд каби шахсларнинг вафот санасига бағишиланган. Масалан, Абдураҳмон Жомий вафотига бағишиланган таърихда «Ҳудо биёмуззад» – «Худо биёмуззад» жумласи таърих санаси сифатида келтирилди:

*Сарви чамани ҳаёт Абдураҳмон,
К ў рафт аз ин дайри фано сўи жинон.
Таърихи чунин воқеағ ғуссарасон,
Гар меҳонй: «Ҳудо биёмуззад» хон.*

(Мазмуни:

Ҳаёт чаманининг сарви – Абдураҳмон.

бу фоний дунёдан (руҳи) жаннатга кетди.

Ғам-ғусса етказувчи шундай воқеаларнинг таърихини ўқига-нингда: «Худо биёмурзад», – деб ўқи).

Мазкур таъриҳдаги «خدا بیامر زد» – «Худо биёмурзад» жумласидаги ҳарфлар абжад ҳисобига кўра белгиланганда ҳижрий 989, милодий 1492 йил келиб чиқади. Ушбу таърих рубоий шаклида ёзилган.

«Девони Фоний»дан **муаммо** жанри ҳам ўрин олган. Муаммоларнинг аксарияти бир байтли, фақат 14-муаммо икки байтдан иборат. Муаммолар девонга муаммонинг жавоби бошланган ҳарфларнинг араб алифбосидаги тартиби асосида жойлаштирилган. Яъни дастлаб ечими «ا» – «алиф» ҳарфи билан бошланувчи исм ёки номлар келтирилади. Масалан, Одам, Амин, Омир ва б. Шу тарзда ечими «ب» – «бе», «ت» – «те» ва бошқа ҳарфлар билан бошланувчи муаммолар бериб борилади. «Хазойин ул-маоний»даги тартибга асосан муаммонинг жавоби сарлавҳа сифатида матн бошида келтирилади. Девонда жавоби «алиф» билан бошланувчи муаммолар энг катта кўрсаткични ташкил қиласиди. Уларнинг сони 78 та. «Бе» билан тугалланувчи муаммолар миқдори эса 46 та. Девонда баъзи ҳарфлар билан бошланадиган муаммолар учрамайди. «Девони Фоний»даги тартибга эътибор қаратиш шуни кўрсатадики, аслида, шоир ҳар бир ҳарфга мос ҳолда муаммо яратган-у, лекин улар бизгача етиб келмаган ёки жорий нашрлардан ўрин олмаган. Чунки Навоийнинг ўзи «Мұҳокамат ул-луғатайн» асарида форсий тилдаги муаммолари сонини 500 га яқин деб кўрсатиб, уларнинг аксарияти Абдураҳмон Жомий назарига тушганини айтади. Бу маълумот «Девони Фоний» нусхаларининг ҳеч бири ҳали тўлиқ мукаммал эмаслигини кўрсатади.

«Девони Фоний»да муҳим ўрин тутувчи жанрлардан яна бири **қасидалардир**. Уларнинг сони 10 та бўлиб, икки туркумни: «Ситтаи зарурия» («Олти зарурат») ва «Фусули арбаа» («Тўрт фасл») қасидалар мажмуасини ўз ичига олади. «Ситтаи зарурия» олти қасидадан иборат бўлиб, Алишер Навоий уларнинг мавзуси ҳақида «Мұҳокамат ул-луғатайн»да шундай ёзади: «Бу олти қасида ҳамд ва наът ва сано ва мавъизотдур ва аҳли та-

саввөф ва ҳақиқат тили била маърифат». Мазкур мажмуага 1497 йилда тартиб берилган бўлиб, уни тузишга Навоийни аввал устози Жомий, унинг вафотидан сўнг эса сulton Ҳусайн Бойқаро илҳомлантирган. Бу ҳақда мажмуага ёзилган дебочада маълумот келтириб ўтилади.

Мажмуадаги биринчи қасида «Рух ул-кудс» («Муқаддас рух») деб аталиб, 132 байтни ўз ичига олади. Қасиданинг ёзилган санаси матн таркибида таърих ўйли билан ҳижрий 895, милодий 1491 йил деб кўрсатиб ўтилган. Қасидада илоҳий тавҳид: оламнинг ягоналиги, ягона абадий ва азалий борлиқ, Яратганинг қудрат ва азимати, заррадан коинотгача унинг измида эканлиги мадҳ этилади. Қасида қуйидаги байт билан бошланади:

*Зиҳӣ ба хомаи қудрат мусаввири ашё,
Ҳазор нақши ачиб ҳар замон аз ў пайдо.*

(Мазмуни:

Ашёларга сурат берувчи (Аллоҳнинг) қудратига тасанноким,
Ҳар замон ундан минглаб ажойиб нақшлар пайдо бўлгай).

Ушбу қасида аруз тизимининг мужтасси мусаммани маҳбуни мақтуъ (рунклари ва тақтиъи мафоилун фаилотун мафоилун фаълун $V - V - / V V - - / V - V - - -$) вазнида ёзилган.

Мажмуадаги иккинчи қасида ҳажман 106 байт бўлиб, «Айн ул-ҳаёт» («Ҳаёт чашмаси») деб аталади. Қасиданинг яратилган йили номаълум. «Айн ул-ҳаёт» опам сарвари, пайғамбаримиз Муҳаммад (с.а.в.)нинг муборак меърожлари, уларнинг дийдорларига барча сайёрапар, ойу қуёш, аршу курси, фаришталар мунтазир эканлиги, пайғамбаримизнинг Парвардигор билан мулоқотлари тасвирига багишланган. Қасида шундай бошланади:

*Ҳожибони шаб чу шодурвони савдо афгананд,
Чилва дар хайли бутони моҳсимо афгананд.*

(Мазмуни:

Тун пардадорлари қора чодирларини ёйган чоғларида
Ой юзли бутлар тўдаси (юлдузлар)га жилва қиласидилар).

Ушбу қасида аруз тизимининг рамали мусаддаси мақсур (рукнлари ва тақтиши: фоилотун фоилотун фоilon – V – / – V – / – V~) вазнида ёзилган.

Учинчи қасида «Тұхфат ул-афкор» («Фикрлар совғаси») деб номланиб, ҳажман 99 байтни үз ичига олади. Шоирнинг «Ситтай зарурия» дебочасидаги ишоралари ва қасида матнидаги таърихдан унинг барча қасидалардан олдин, яъни 1476 йилда яратилғанлыги маълум бўлади. Қасиданинг яратилиш тарихи ҳақида «Хамсат ул-мутахаййирин»да батафсил маълумот келтирилган. У Хусрав Дехлавийнинг «Дарёи аброр» ва Абдураҳмон Жомийнинг «Лужжат ул-асрор» қасидаларига жавобан ёзилган бўлиб, дарвешликнинг олий рутбаси – фақр тавсифига бағишлиланган. Бунда фақр мақоми комилликнинг олий намунаси сифатида мансабдор шахслар, хусусан, шоҳлар ахлоқига қарама-қарши қўйилади. Қасидада ушбу ғоянинг тамсил ва китобат санъатлари воситасида баён қилиниши унинг бадиий жиҳатдан етуклигини таъминлаган. Қасида қўйидаги байт билан бошланади:

*Оташин лаълеъ, ки точи хусравонро зевар аст,
Ахгаре баҳри хаёли ҳом пухтан дар сар аст.*

(Мазмуни:

Подшоҳлар тожидаги қип-қизил лаъл – бошда ҳомхаёл пиширувчи (етилтирувчи) бир чўғдир).

Ушбу қасида татаббуъ тарзида ёзилғанлиги учун, унда салафлар қасидаларида қўлланилган рамали мусаддаси мақсур (рукнлари ва тақтиши: фоилотун фоилотун фоilon – V – / – V – / – V~) вазни сақланган.

Мажмуадаги тўртинчи қасида «Қут ул-қулуб» («Қалблар қуввати») деб аталади. Қасида ҳажман 120 байтдан иборат бўлиб, XII аср форс-тожик адабиётининг иирик намояндларидан бири Авҳадиддин Анварий (1105 – 1187) қасидасига татаббуъ тарзида яратилган. Унда дунёнинг бебақо ва бевафолиги, фалакнинг золимлиги айтилиб, инсонларнинг ана шу ўткинчи, фоний дунёга меҳр қўймай, охират қунини ўйлашлари. руҳий-маънавий юксаси

лишга эътибор қаратишлари зарурлиги уқтирилади. Қасиданинг биринчи байти қуйидагича:

*Чаҳонки, марҳалаи танги шоҳроҳи фаност,
Дар ўмачӯй иқомат. ки роҳи шоҳу гадост.*

(Мазмуни:

Жаҳонким, фанонинг бепоён йўлининг тор бир йўлакчасидир,
Унда абадий яшамоқни ўйламаким, бу – шоҳу гадонинг (ўтар-ке-
тар) йўлидир).

Қасида Анварий қасидасида қўлланилган мужтасси мусам-
мани маҳбуни мақсур (руқнлари ва тақтизи: мафоилун фаилотун
мафоилун фаилон $V - V - / V V - - / V - V - / V V \sim$) вазнида яра-
тилган.

Бешинчи қасида «Минҳож ун-нажот» («Нажот йўли») 138 байт-
дан иборат. Сарлавҳада келтирилган номлардан мълум бўлади-
ки, у икки форсигўй адаб – Анварий ва озарбайжон шоири Хоқоний
Шервоний (1120 – 1199) қасидаларига татаббуъ тарзида яра-
тилган. Қасидада Инсон ва Шайтон муносабатлари, яхшилик ва
ёмонлик тасвирлари берилади, жаннатдан бадарға бўлган Одам
Ато фарзандлари ва бани башарнинг комил инсонга хос бўлмаган
нохушу номуносиб ахлоқий белгилари танқид қилинади. Қасида
қуйидаги байт билан бошланади:

*Зиҳӣ аз шамъи рӯят чаши мардум гашта нуронӣ,
Чаҳонро мардуми чашим омадӣ аз айни инсонӣ.*

(Мазмуни:

Қандай яхшики, юзингнинг шамъи (нури)дан инсонларнинг кўзи
ёриди. Инсонликнинг жавҳари бўлганинг учун жаҳон одамлари-
нинг кўз қорачигига айландинг).

Қасида салафлар қасидалари сингари ҳазажи мусаммани со-
лим (руқнлари ва тақтизи: мафоийлун мафоийлун мафоийлун
мафоийлун $V - - - / V - - - / V - - - / V - - -$) вазнида ёзилган.

Мажмуанинг сўнгги қасидаси «Насим ул-хулд» («Жаннат шамо-
ли») Хоқоний Шервоний, Амир Хусрав Дехлавий ва Абдураҳмон
Жомий қасидаларига татаббуъ тарзида вужудга келган бўлиб,

129 байтни ўз ичига олади. Қасидада инсон покланиши ва комилликка эришиши учун нималар қилиши лозимлиги, тариқат одоби ва усуулари, муршид ва мурид муносабатлари, Ҳақ йўлига кирган солик олдига қўйиладиган талаблар бирма-бир баён этилади. Бошқача қилиб айтганда, Навоийнинг нақшбандия тариқати, тасаввуф ҳақидаги қарашлари яхлит бир тизимда ифодалаб берилади. Шу маънода қасидани нақшбандия тариқатининг ўзига хос дастури, шеърий баённомаси деб айтиш мумкин.

Қасиданинг биринчи байти қўйидагича:

*Муаллим ишқу пири ақл шуд тифли дабистонаш,
Фалак дон, баҳри таъдиби вай инак чархи гардонаш.*

(Мазмуни:

Муаллим ишқ-у, унинг мактабининг талабаси ақл пиридир,
Фалакни унга адаб ўргатиш учун айланиб турувчи чарх деб бил).

Бу қасида ҳам ҳазажи мусаммани солим (рукнлари ва тақтиъи: мафойлун мафойлун мафойлун мафойлун V— — / V— — / V— — / V— —) вазнида яратилган.

«Девони Фоний»дан ўрин олган иккинчи қасидалар мажмуаси «Фусули арбаа» («Тўрт фасл») деб аталади. Қасида 4 қисмдан иборат бўлиб, ийл фаслларининг гўзал манзараси тасвирига бағишлиланган. Шоир табиатни тасвирилаш орқали асл мақсадига эришади: замона сultonи Ҳусайн Бойқарони мадҳ этади. Навоий ҳар бир фасл ва ундаги тасвир усуулларини эътиборга олган ҳолда уларда турли вазнларни қўллади. Ҳусусан, ёз фаслига бағишлиланган «Саратон» деб номланган қасида 71 байтдан иборат бўлиб, шундай бошланади:

*Боз отashi хўр соҳт самандар саратонро,
Афрӯҳт чу оташкада гулзори жаҳонро.*

(Мазмуни:

Қуёш отashi саратонни яна самандарга айлантирди.
Жаҳон гулзорини оташкада каби ловиллатди).

Қасида ҳазаж баҳрининг энг ўйноқи вазни ҳисобланган ҳазажи мусаммани ахраби макфуфи маҳзуф вазни (рукнлари ва тақтиъи: мафъулу мафоийлу мафоийлу фаявлун — — V / V — — V / V — — V / V — —)да ёзилган. Бу вазн руҳият тасвири баёнидан кўра кўпроқ жисмоний: енгил ва шаҳдам ҳаракат, шўхчан кайфият баёнига мос келади. Ҳар икки чўзиқ бўғиндан кейин икки қисқа бўғиннинг ёнма-ён келиши ритмга ўйноқилик бағишлайди. Шунга мос ҳолда мазкур қасидада ёзниң инсонга кўпроқ жисмоний таъсири кўрсатилганлигини, ҳар бир байтда саратон жазирамаси айнан инсон аъзои баданига (руҳиятига эмас) таъсир қилаётганини кузатиш мумкин.

Қасидада 27-байтдан султон Ҳусайн Бойқаро таърифи бошланиди ва «ёзниң иссиғидан паноҳ изловчи кишилар учун Ҳусайн Бойқаро туғи сояси макондир» деган фикр илгари сурилади:

*З-ин гармии хуршед бираст, он, ки, панаҳ соҳт,
Зилли шарафи рояти Ҷамшеди замонро.*

(Мазмуни:

Қуёшниң тафтидан паноҳ изловчи киши (уни) замона Жамшиди туғи соясининг шарофатидан топқусидир).

Мажмуада «Хазон» («Куз») фасли таърифи бошланиши билан ундаги шеърий ўлчов ҳам ўзгаради:

*Дигар шуд баҳри санжидан баробар адли давронро,
Зи кофўри зи мушк рӯзу шаб ду палла мезонро.*

(Мазмуни:

Даврон адолатини ўлчаш мезонлари ўзгарди, тарозунинг бир палласида (кундузниң рамзи) кофур, иккинчи сида (кечанинг тимсоли) мушк тортиладиган бўлди).

«Саратон»да қўлланилган ўйноқи вазннинг ўрнини энди салобатли ва сокин оҳангга эга бўлган ҳазажи мусаммани солим вазни (рукнлари ва тақтиъи: мафоийлун мафоийлун мафоийлун V — — / V — — / V — — / V — —) эгаллайди. Чўзиқ бўғинлар

нисбатининг қисқа бўғинлардан З баравар кўплиги оҳангнинг вазмин чиқишини таъминлайди. Айнан шунга мос ҳолда 33 байтдан иборат бу қасидада руҳият тасвири, таъбир жоиз бўлса, кузга хос ўйчанлик, маҳзунлик етакчилик қиласди.

Мажмуага «Баҳор» кириб келиши билан, унга хос яратувчалик, янгиланиш кайфияти ҳам пайдо бўлади:

*Вазад боди баҳор иҳъёи амвоти гулистонро,
Зи анфоси Масеҳо тоза созад олами жонро.*

(Мазмуни:

Баҳор шамолининг эсиши, гулистон гулларига янгидан ҳаёт бағишлайди, гўё Масихо нафасидан жонлар оламини янгилайди).

Қасидада баҳорнинг яратувчаник хусусияти энди бевосита замон ҳукмдори Ҳусайн Бойқаро таърифи келтирилган ўринларга кўчади:

*Чу андар ҳикмати асрори хилқат фикр бигморад.
Биёбад ончи, маҳфий монда Афлотуну Юнонро...*

(Мазмуни:

Яратилиш сирру асрори ҳикмати ҳақида фикрлагандан, Юнон Афлотуни учун ҳам маҳфий қолган сирларни топади). Нихоят, мажмуа йил фаслларининг охри бўлган «Дай» («Қишиш») тасвири билан якун топади. Навоий таъбири билан инсон умрининг поёнига ўҳшатилган бу фасл «кишининг ҳам қад била адам йўлиға кириб, замон аҳли билан хайирбод қилиш» («Хазойин ул-маоний»даги таъбир) даври бўлиб, қасидада Фоний тахаллусининг қўлланилиши шунга ишорадир:

*Ба бўи васл ниҳад рў ба даргахат. Фоний,
Чунон ки аҳли ибодат ба гўшаи меҳроб.*

(Мазмуни:

Васлинг бўйи умидида. Фоний даргоҳингга юзини қўяди, бу ибодат аҳлининг меҳроб гўшасига бош қўйишидекдир).

Қасидада фалсафий мушоҳадакорлик билан боғлиқ туйғуларни беришга ниҳоятда мос бўлган мужтасс бахри (руқнлари ва тақтиси: мафоилун фаилотун мафоилун фаълун $V - V - / V V -- / V -- V - / -$)нинг қўлланилганлиги шоирнинг юксак бадиий салоҳиятини кўрсатувчи яна бир омилdir.

*Зи даргаҳи фалак оташ нуҳуфт дуди саҳоб,
Даро ба хиргаҳу оташ фурӯз аз маи ноб.*

(Мазмуни:

Фалак чодиридан кўринаётган оташни булутлар пардаси тўсди, чодирга киргину тиник, қизил май оташига зўр бер).

«Девони Фоний» **луғз** (чистон) жанри билан якун топади. Девонда жами 9 луғз келтирилган бўлиб, улар маснавий, қитъа ва рубоий тарзида қофияланган. Луғзлар шамъ, микроз (қайчи), парвона, тиргаз (ўқ), тахтиравон, кема каби нарса-ҳодисаларга бағишлиланган. Масалан, шамъга бағишлиланган луғз қитъа шаклида ёзилган:

*Чист он нахле, ки баргаш нест, аммо ҳаст гул,
Лек, он гулро бувад андар назар андому барг.
Гарча набвад абр, лекин абрасон шуд қатрапрез,
Қатра аз вай чун чудо, афтоð бандад чун тагарг.
Ҳам кушанду ҳам бимирад турфа бошад, лек он-к,
Куштанаш набвад зи қатлу мурданаш набвад зи марг.*

(Мазмуни:

У қандай дараҳтдурки, барги йўғ-у, гули бор,
Лекин у гулга назар қилсанг, қоматию барги бор.
Булут бўлмаса ҳам, булутдек қатралар тўқади,
Қатралар тушиб дўлдек қотиб қолади.
Қизиқ, уни ҳам ўлдирадилар, ҳам ўзи ўлади,
Ўлдирилиши қатлдан-у, ўлими эса ажалдан эмас).

Чистон рамал баҳрининг рамали мусаммани мақсур (рукнлари ва тақтиъи: фоилотун фоилотун фоилотун фоilon – V – – / – V – – / – V – / – V ~) вазнида яратилган.

Таянч тушунчалар

- *мухтараъ*
- *тавр*
- *татаббуъ*
- *марсия-таркиббанд*
- *таърих*
- *қасидалар мажмуаси*

Савол ва топшириқлар:

1. Алишер Навоий ўзининг форсий шеърлари ҳақида қайси асарида кенгрок маълумот берган?
2. «Девони Фоний»нинг жанрий таркибини шарҳлашга ҳарамат қилинг.
3. Алишер Навоий ўз форсий девонида қандай адабий янгилик яратди?
4. «Девони Фоний»даги қасидалар ва уларнинг моҳияти ҳақида фикр юритинг.
5. «Девони Фоний»да ритм ва мазмуннинг бадиий мутаносиблиги кўпроқ қайси жанрда намоён бўлади деб ўйлайсиз?

Адабиётлар:

1. Навоий Алишер. Девони Фоний. Мукаммал асарлар тўпами. 20 жилдлик. – Тошкент: Фан, 2000 – 2003. 18 – 20-жиллар.
2. Навоий Мир Алишер. Фоний гулшани / Форсийдан Ж.Камол таржимаси. – Тошкент: MERIYUS, 2011.
3. Комилов Н. Фақр нури порлаган қалб (Алишер Навоийнинг форсий қасидалари). – Тошкент: Маънавият, 2001.
4. Шодиев Э. Навоий татаббуларига оид баъзи мулоҳазалар:

«Девони Фоний» ҳақида // Ўзбек тили ва адабиёти. – Тошкент, 1997. – №2.

5. Зоҳидов Л. «Дёвони Фоний» бадииятига доир мулоҳазалар // Адабиёт кўзгуси. – Тошкент, 2010. – №10.

6. Юсупова Д., Қуронов С. Навоийнинг форсий қасидалари // Жаҳон адабиёти. – Тошкент, 2011. – №10.

7. Ўзбек адабиёти тарихи. Беш жилдлик. 2-жилд (ХV асрнинг иккинчи ярми). – Тошкент: Фан, 1977.

ХАМСАНАВИСЛИК АНЪНАСИ ВА АЛИШЕР НАВОИЙ «ХАМСА»СИ

РЕЖА:

1. *Хамсачилик тарихи.*
2. *Ҳирот адабий мұхити хамсанавислиги.*
3. *Абдураҳмон Жомий «Хамса»сининг ғоявий-бадиий хусусиятлари.*
4. *Алишер Навоий «Хамса»сига умумий тавсиф.*

Мусулмон Шарқи эпик поэзияси тарихи хамсачилик анъанаси билан чамбарчас боғлиқ. Даставвал XII асрда вужудга келган хамса жанри саккыз асрға яқын вақт давомида юзлаб жавоб дос-тонларга эга бўлди. Шарқ адабиётида биринчи бўлиб «Хамса» ёзган шахс буюк озарбайжон шоири Низомий Ганжавийдир. У 1170 – 1204 йиллар оралиғида бирин-кетин 5 та достон яратди, бу достонлар шоир вафотидан сўнг яхлит бир тўпламга бирлаштирилиб, «Панж ганж» («Беш хазина») деб атала бошланди ва кейинчалик хамса номи билан машҳур бўлди.

Низомий бешлигидаги биринчи достон «Махзан ул-асрор» («Сирлар хазинаси») деб аталиб, 1170 йилда яратилган. Низомий бу достонини ғазнавийлар ҳукмдори Баҳромшоҳ (XII аср)га бағишлади. «Махзан ул-асрор»нинг вужудга келишида XII аср классиги Ҳаким Саноий «Хадиқат ул-ҳақойиқ» («Ҳақиқатлар боғи») достонининг таъсири бор. Умуман, мусулмон Шарқида фалсафий-дидактик йўналишдаги достонларнинг ибтидоси ҳам бевосита шу достон билан боғланади.

Низомий бешлигидаги иккинчи достон «Хусрав ва Ширин» деб аталиб, таҳминан 1181 йилда ёзиб тугалланган. Шоир бу достонини салжуқий ҳукмдор Тўғрул II (1174 – 1194) топшириғига кўра яратади. «Лайли ва Мажнун» достони эса 1188 – 1189 йилларда Ширвоншоҳ Аҳситан II топшириғига кўра яратилади.

Низомий бешлигидаги тўртинчи достон «Ҳафт пайкар» («Етти гўзап») 1196 йилда ёзиб тугалланади. Достон 4600 байтдан иборат бўлиб, ҳукмдор Алоуддин Кўрпа Арслон (1174 – 1207) топшириғи билан яратилган. «Ҳафт пайкар» асосий воқеа ва унга илова қилинган 7 та қолипловчи ҳикоятлардан иборат.

Низомий бешлигидаги сўнгги – бешинчи достон «Искандарнома» деб аталиб, икки қисм: «Шарафнома» ва «Иқболнома»дан иборат. Достон ҳажми 10000 байтдан ортикроқ. Достоннинг аниқ қайси йилда яратилганлиги маълум эмас, адабиётларда унинг 1197 йилдан кейин ёзилганлиги ҳақида баъзи қайдлар учрайди.

Низомий бешлиги яратилгандан кейин орадан бир аср вақт ўтиб Хусрав Дехлавий (1253 – 1325) унга жавоб ёзди ва шу билан хамсанавислик анъанасини бошлаб берди. У 1299 – 1301 йилларда «Матлаъ ул-анвор» («Нурларнинг бошланмаси»), «Ширин ва Хусрав», «Мажнун ва Лайли», «Ҳашт беҳишт» («Саккиз жаннат»), «Ойинайи Искандарий» («Искандар ойнаси») достонларини яратиб, Низомий ишини давом эттирди, натижада адабиётда хамсанавислик анъанаси пайдо бўлди.

Дехлавийдан кейин бу анъана бутун Шарқ дунёсига тарқалди ва жуда кўп халқларда Низомий достонлари мавзуси ҳамда сюжети асосида асарлар пайдо бўлди. Озарбайжон олими Ф.Алиев жаҳон кутубхоналарида сақланаётган қўллэзма ва манбаларни ўрганиб чиқиш асосида Низомий бешлигига муайян тарзда жавоб ёзган 300 га яқин ижодкорни аниқлади ва улар ҳақидаги маълумотларни умумлаштириб «Темы и сюжеты Низами в литературах народов Востока» номли монографиясини яратди.

Хамсанавислик тарихида XV аср Ҳирот адабий муҳити алоҳида ўрин эгаллайди. Изланишлардан маълум бўлдикки, айнан шу давр ва шу муҳитнинг ўзида 20 га яқин ижодкор хамсанавислика ўз кучини синаб кўрган. Гарчи бу ижодкорларнинг барчаси тўлиқ «Хамса» яратмаган бўлсалар-да, лекин бешликнинг у ёки бу достонига жавоб ёзиш билан мазкур анъанага ўз муносабатларини билдирганлар.

Бу даврдаги Низомий мавзуларига мурожаат қилган ижодкорлар ҳақида Алишер Навоийнинг «Мажолис ун-нафоис» (1498), Давлатшоҳ Самарқандийнинг «Тазкират уш-шуаро» (1486), Ҳумомиддин Хондамирнинг «Макорим ул-ахлоқ» асарларида маълумотлар учрайди.

Ижодкорларни хамсанависликка билдирган муносабатига кўра шартли равишда уч гурухга ажратиш мумкин:

1. Тўлиқ «Хамса» муаллифлари.
2. «Хамса»нинг баъзи достонларига жавоб ёзган ижодкорлар.
3. Битта достонга жавоб ёзган ижодкорлар.

Тұлиқ «Хамса» мұаллифлари

Жамолий

Темур ва Шоҳрух замонида яшаган бу ижодкорнинг таваллуду вафот йиллари ҳақида аниқ маълумот йўқ. Фақат F. Алиев ўзининг «Темы и сюжеты Низами в литературах народов Востока» номли монографиясида унинг бешлиги 1402 – 1417 йиллар оралиғида яратилган деган фикрни билдиради.

Жамолий «Хамса»си қуйидаги достонлардан иборат:

1. «Түхфат ул-аброр» («Махзан ул-асрор»га жавоб).
2. «Мөхру Ниғор» («Хусрав ва Ширин»га татаббуъ).
3. «Маҳзун ва Маҳбуб» («Лайли ва Мажнун»га татаббуъ).
4. «Ҳафт авранг» («Ҳафт пайкар»га татаббуъ).

5. Достон номи аниқ эмас. Лекин воқеалар мазмуни ва қўлланилган вазн Низомий «Искандарнома»сини эслатгани учун, уни Низомий бешлигидаги сўнгги достонга жавоб тарзида ёзилган деб ҳисоблаш мумкин.

Ашраф Мароғий

Шоҳрух замонида яшагани ва 1450 йилда вафот этгани маълум. Унинг бешлиги 1428 – 1444 йиллар оралиғида яратилган бўлиб, қуйидаги достонлардан иборат:

1. «Минҳож ул-аброр» («Яхши кишиларнинг йўли») 1428 йилда яратилган. Низомий достонидан бир оз фарқланиб, 21 мақолатдан иборат ва уларнинг ҳар бирига иккитадан ҳикоят илова қилинади.
2. «Риёз ул-ошиқин» («Севишганлар боғи», 1432). Баъзи манбаларда «Хусрав ва Ширин» номи билан кўрсатилади.
3. «Ишқнома» («Лайли ва Мажнун»га татаббуъ, 1438).
4. «Ҳафт авранг» («Етти таҳт», 1440).

5. «Зафарнома» 1444 йилда яратилган. Номланишдаги ўзгачаликка қарамай, воқеалар баёни ҳам, қўлланилган вазн ҳам «Искандарнома»ни эслатади.

Мазкур гуруҳдаги яна икки ижодкор – Алишер Навоий ва Абдураҳмон Жомий «Хамса»лари ҳақида мавзу сўнгидаги батафсилроқ фикр юритганимиз сабабли бу ўринда уларга тўхталиб ўтиrmаймиз.

«Хамса»нинг баъзи достонларига жавоб ёзган ижодкорлар

Котиби Туршизий

Бу ижодкорнинг Нишопурдан келганлиги ва 1434/1436 йилда Астрободда вафот этгани ҳақида Е.Э.Бертельс ўзининг «Навои и Джами» тадқиқотида маълумот келтиради.

Туршизий 10 га яқин маснавий-достонлар муаллифи, улардан фақат учтаси «Хамса» достонларига татаббуъ тарзида вужудга келди:

1. «Гулшан ул-аброр» («Яхши кишиларнинг гулшани»).
2. «Лайли ва Мажнун».
3. «Баҳром ва Гуландом».

Абдуллоҳ Ҳотифий

1445/1450 – 1521 йиллар оралиғида яшаган. Манбаларда Абдураҳмон Жомийнинг жияни сифатида тилга олинади.

«Хамса»нинг қўйидаги достонларига жавоб ёзганлиги маълум:

1. «Лайли ва Мажнун».
2. «Ширин ва Хусрав» (1490).
3. «Ҳафт манзар» («Етти манзара»), «Ҳафт пайкар»га татаббуъ тарзида яратилган.
4. «Темурнома». «Искандарнома» вазнида битилган бу достон Амир Темурнинг зафарли юришларига бағишланган.

Қўринадики, Ҳотифий достонлари орасида фақат «Махзан ул-асрор»га жавоб тарзида ёзилган достон учрамайди.

Бадриддин Ҳилолий

Асли астрободлик бўлган бу ижодкор XV асрнинг 70-йилларида туғилган. 1529 йилда қатл этилган. «Хамса» достонларига жавобан ёзилган 2 та достони бор:

1. «Сифат ул-ошиқин» («Махзан ул-асрор»га жавоб).
2. «Лайли ва Мажнун».

Шаҳобиддин Жомий

Бу ижодкорнинг туғилган ва вафот этган йиллари ҳақида аниқ маълумот йўқ. Фақат Хондамирнинг «Макорим ул-ахлоқ»ида

Шаҳобиддин Жомийнинг Алишер Навоий маслаҳатига кўра «Лайли ва Мажнун» ва «Хусрав ва Ширин» достонларини ёзганлиги ҳақидаги маълумотига таянсак, муаллиф XV асрнинг иккинчи ярмида яшаганлиги маълум бўлади. Шаҳобиддин Жомийнинг бу икки достони бизгача етиб келмаган ёки ҳалига-ча топилмаган.

Битта достонга жавоб ёзган муаллифлар²⁰

Бу гурӯҳни ғоявий йўналишига қараб иккига ажратиш мумкин:

1. «Махзан ул-асрор» типида достон ёзган муаллифлар:

Осафий Ҳиравий, Наргисий, Фиёсиддин Сабзаворий, Фосих Румий, Сайийд Қосимий.

2. «Лайли ва Мажнун» типида достон ёзган муаллифлар:

Шайхим Сұҳайлий, Али Оҳий, Ҳожа Имод Лорий, Ҳожа Ҳасан Хизршоҳ, Заве Қозиси.

Ҳамсачилик тарихида форс-тожик адабиётининг йирик намояндапаридан бири Абдураҳмон Жомий (1414 – 1492) бешлиги алоҳида ўрин тутади. Жомий ижодкор бўлиш билан бирга сўфий ҳам эди, бу ҳолат у яратган асарларда ҳам намоён бўлади. Шарқшунос олим Конраднинг таъбири билан айтганда, «у – шоир, у – файласуф, у – филолог, у – мусиқашунос. Лекин, шу билан бир қаторда, у кўпроқ сўфий. Унинг учун борлиқни англашнинг икки кўриниши мавжуд – борлиқ сирлари ва ижод сирлари» (Конрад Н.И. Запад и Восток. – С.276).

Адабиётшунослиқда Жомийнинг «Ҳамса» ёзган-ёзмаганлиги билан боғлиқ баҳсли фикрлар мавжуд. Айрим адабиётшунослар Жомий достонларига «Ҳамса» тарзида эмас, балки етилиқ – «Ҳафт авранг» шаклида («Саломон ва Абсол» ҳамда «Силсилат уз-заҳаб» достонларини ҳам қўшган ҳолда) қараш зарурлигини таъкидлайдилар. Лекин Жомийнинг ўзи «Хирадномаи Искандарий» хотимасида ўз асарини «Панж ганж» деб атагани учун, Жомийни «Ҳамса» яратган ижодкорлар қаторига киритиш тўғрироқ бўлади.

²⁰ Аслида, бундай номланиш ҳам нисбий бўлиб, бу ўринда факат бизгача етиб келган достонлар ва улар ҳақидаги адабиётшунослиқда мавжуд маълумотларга таянипди.

Абдураҳмон Жомий «Хамса»сининг биринчи достони «Тұхфат ул-аҳрор» 1481 йилда яратилган. Фалсафий-аҳлоқий масалаларга бағишланган бу достон Низомий «Махзан ул-асрор»ига жавоб тарзида вужудга келди. Достонлар номланишидаги оҳангдошлиқ, композицион қурилишдаги ўхшашлик ва қўлланилган шеърий ўлчов бу фикрни тасдиқлайди.

1482 – 1483 йилларда «Хамса»нинг иккинчи достони «Субҳат ул-аброр» («Яхши кишиларнинг тасбеҳи») майдонга келди. Анъанага мувофиқ, «Хамса»нинг иккинчи достони ишқий мавзуга бағищланиши керак эди. Жомий бу ўринда анъанадан бутунлай чекиниб, фалсафий йўналишдаги яна бир достон яратади. Лекин у биринчи достон каби 20 та мақолатдан эмас, балки 40 та бўлим – «икд» (тасбеҳ донаси)дан иборат бўлиб, ҳар бир назарий қисмдан кейин алоҳида ҳикоят ва муножот илова қилиб борилади.

Абдураҳмон Жомий бешлигидаги учинчи достон «Юсуф ва Зулайҳо» деб аталиб, 1483 йилда яратилган. Низомий бешлигига бундай мавзу ва сюжетдаги достон учрамайди. Жомий «Хусрав ва Ширин» мавзусидаги анъанавий достон яратишдан воз кечиб. Қуръонда «аҳсан ул-қисас» – «қиссаларнинг сараси» деб таърифланган Юсуф қиссаси баёнига бағишланган «Юсуф ва Зулайҳо» достонини яратади.

Абдураҳмон Жомий «Хамса»сидаги тўртинчи достон «Лайли ва Мажнун» мавзусига бағишланган бўлиб, 1483 йилда яратилган. «Хамса»даги сўнгги – бешинчи достон «Хирадномаи Искандарий» ҳам Жомийнинг анъанага риоя этиши билан характерланади. Қўринадики, Абдураҳмон Жомий яратган маснавий-достонлар орасида фалсафий йўналишдаги достонлар етакчи ўринда туриши билан характерланар экан.

Форс адабиётида Низомий бешлигига биринчи жавоб битган ижодкор Хусрав Деҳлавий бўлса, Навоий бу вазифани туркий тилда адо этди. Навоий бешлигига хамсанависликнинг барча шартларига қатъий амал қилинганини кўрамиз. Чунки хамсанавислик анъанасидан бир оз бўлса-да чекиниш туркий тилда «Хамса»дек буюк асарни ёзиб бўлмайди деган фикрга олиб келиши мумкин эди. Навоий ўз «Хамса»си мисолида анъанавий шакл доирасида ҳам янги фикр айти олиш имкониятини, белгиланган шаклларни жилвалантириш усуллари мавжудлигини кўрсатиб берди ва унинг бу асари умумжаҳон адабиётининг юксак чўққиси бўлиб қолди.

Навоий «Хамса»си ажододларимиз маънавий ҳолатининг кўзгуси бўлиб, унда ўтмиш давр ижтимоий турмуши, халқ ҳаёти, урфодатлари, дин-диёнат, ахлоқ-одоб ҳақидаги қарашлар ўз аксини топган. Навоий «Хамса»си бир-бири билан ич-ичидан мустаҳкам боғланган бешта достонни ўз ичига олувчи яхлит асаддир. Буюк шоир унда замонасининг барча долзарб масалаларини қаламга олади. Мундарижавий достон бўлмиш «Ҳайрат ул-аброр»да шоир умр, унинг мазмуни, табиат, жамият ва инсон муносабатларига доир саволларни қўйса, кейинги достонларда муайян тақдирлар, воқеалар мисолида уларга жавоб беришга ҳаракат қиласди. «Хамса» достонларидағи муқаддималар достонлар воқелиигига шунчаки анъанавий кириш қисми бўлмай, балки достонлар мундарижаси учун очиқ вазифасини ҳам ўтайди. Шу маънода муқаддималарда келтирилган фикрларга алоҳида эътибор бериш достонлар тагзаминида яширган рамзий маъноларни очишга ёрдам беради. Айнан муқаддимада буюк мутафаккирнинг олам ва одам, табиат, кишилик жамияти, умр ва унинг мазмуни ҳақидаги фалсафий-ахлоқий қарашлари, ижодкор сифатидаги буюк салоҳияти у қўллаган бадиий тимсоллар, ташбеҳу тамсиллар воситасида бутун бўй-басти билан намоён бўлади.

Ўзбек мумтоз адабиётининг чўққиси бўлган Алишер Навоий «Хамса»си жаҳон адабиётининг ноёб ва ўлмас дурданасидир.

Таянч тушунчалар

- хамса
- хамсанавислик
- хамсанавислик шартлари
- Ҳирот адабий муҳити
- тўлиқ бешлик муаллифлари
- баъзи достонларга жавоб ёзганлар
- бир достонга жавоб ёзганлар

Савол ва топшириқлар:

1. Хамсанавислик анъанасига асос соглан деб қайси шоирни кўрсатиш мумкин деб ўйлайсиз: *Низомий Ганжавий ёки Ҳусрав Дехлавий? Қайси асосларга кўра?*

2. «Хамса» яратган ижодкорларни шартли равишда қай шаклда гурухлаш мумкин?
3. Нима учун Ҳусрав Дәхлавий ҳамда Навоий хамсачиликнинг барча шартларига амал қилишган?
4. Абдураҳмон Жомийнинг «Хамса» яратган ёки яратмагани түғрисида нима учун яқдил фикр йўқ?
5. Сизнингча, нима учун Абдураҳмон Жомий «Ҳусрав ва Ширин» маевузисида достон ёзишдан воз кечган?
6. Алишер Навоий «Хамса»сининг адабиётимизда тутган ўрни ҳақида қандай мустақил хуносаларингиз бор?

Адабиётлар:

1. Абдуғафуров А. Буюк бешлик сабоқлари. – Тошкент: Адабиёт ва санъат, 1995.
2. Ҳайитметов А. Темурйлар даври адабиёти. – Тошкент: Фан, 1996.
3. Исҳоқов Ё. «Хамса» поэтикасига доир // Ўзбек тили ва адабиёти. – 1986. – №1.
4. Алиев Г.Ю. Темы и сюжеты Низами в литературах народов Востока. – М.: Наука, 1985.
5. Валихўжаев Б. «Хамса» ёзиш анъанасига Алишер Навоийнинг муносабати // Ўзбек тили ва адабиёти. – 1990. – №1.
6. Эркинов А.С. Алишер Навоий «Хамса»си талқинининг XV – XX аср манбалари: Филол. фан. докт... дисс. – Тошкент, 1998.
7. Юсупова Д. Алишер Навоий «Хамса»сида мазмун ва ритмнинг бадиий уйғунлиги. – Тошкент: МУМТОЗ Сўз, 2011.
8. Навоийнинг ижод олами (мақолалар тўплами). – Тошкент: Фан, 2001.

«ҲАЙРАТ УЛ-АБРОР» ДОСТОНИНИНГ ҒОЯВИЙ-БАДИЙИХУСУСИЯТЛАРИ

РЕЖА:

1. «Ҳайрат ул-аброр» достонининг таркибий тузилиши.
2. Достон муқаддимасига умумий тавсиф.
2. Достондаги мақолатлар.
3. Достондаги ҳикоятлар.

Алишер Навоий «Ҳамса»сидаги биринчи достон – «Ҳайрат ул-аброр» («Яхши кишиларнинг ҳайратланиши») 1483 йилда яратилган эди. Достон 3988 байтдан иборат бўлиб, 63 боб, 20 мақолат ва 20 ҳикоятдан ташкил топган. Шундан КИРИШ (муқаддима) 21 бобни ўз ичига олади.

Достоннинг биринчи боби Қуръони Каримдаги бош илоҳий жумла «Бисмиллоҳир раҳмонир раҳим» («Мехрибон ва раҳмли Аллоҳ номи билан бошлайман»)нинг поэтик шарҳига бағишиланган. Бу боб нафақат «Ҳайрат ул-аброр» учун, балки, умуман, «Ҳамса» учун ҳам кириш вазифасини ўтайди, чунки кейинги достонларда биз бу илоҳий жумлани учратмаймиз. Ҳазрат Навоий бу жумлани икки нуқтаи назардан таҳлил қиласиди: қабул қилувчилар ва рад этувчилар. Бунда ушбу жумладаги ҳар бир ҳарфга алоҳида маъно юқлатилади. Дастреб рад этувчиларга тўхталинар экан, жумладаги ҳар бир ҳарфнинг бу тоифа кишиларини жазолантиришга хизмат қилдирилганини кўрамиз. Хусусан, «س» – «син» ҳарфи ҳақида гапирилганда унинг шакли наҳанг балигининг умуртқа суюгидаги аррадек бўлиб, рад этувчилар учун оғнатдек; «م» – «мим» ҳарфи илон нафасидек ўт сочиб, йўл бошида оғзини очган ҳолда ётади деган ташбеҳлардан фойдаланилади. Шу тариқа Навоий жумладаги қолган ҳарфларни ҳам бу мақсаддага хизмат қилдиради ва китобат (ҳарф) санъатининг бетакрор намунасини яратади.

Иккинчи тоифа, яъни қабул қилувчиларга тўхталинганда энди бу ҳарфларнинг ижобий маъно касб этишини кузатамиз. Хусусан, «س» – «син» ҳарфи энди саломатлик йўлининг зинасига ўҳшатилса, «م» – «мим» ҳарфининг мақсад манзилидаги булоқ бошига нисбат берилганлигини кўрамиз. Буларнинг барчасида Навоийнинг юксак бадиий салоҳияти намоён бўлади.

Достоннинг иккинчи боби Холик, яъни Аллоҳ ҳамдига бағишланади. Мазкур бобда шоир ҳамма нарсани яратган Холикнинг осмон ва қўёшдан тортиб ҳар бир заррани, бутун ўсимликлар ва ҳайвонот оламини, кишилик жамиятини бир-бирига боғлаб ҳаракатлантириб туришини чексиз ҳайрат билан тасвирлайди. Алишер Навоий «Унинг зоти лутф ва сафодан иборат, лекин вафо иси унга бегона» деган фикрларни илгари сурар экан, бу ўринда тасаввуф таълимоти асосида фикр юритилаётгани маълум бўлади.

Достоннинг 3 – 6-боблари (тўрт боб) муножотларни ўз ичига олади. Муножотларда дунёдаги барча мавжудотлар ўз яратганига доим сажда қилиши зарур, Худонинг қаҳри келса, «кўк бир этак кул» каби совурилиб кетиши ҳеч гап эмаслиги таъкидланади. Шунинг учун инсонлар ўйлаб иш тутиши, гуноҳ қилишга йўл қўймаслиги, қиёмат кунини унумаслиги, ҳар бир гуноҳ учун қиёмат куни жазо олажагини эсда сақлаши, ислом дини қоидаларига тўла риоя қилиши зарурлиги уқтирилади. Навоий охирги муножотда Худога мурожаат этиб гуноҳларини кечиришини сўрайди:

*Гарчи гунаҳнинг ҳаду поёни ўйқ.
Айламассанг раҳм ҳам имкони ўйқ.*

Адабий анъанага кўра муножотдан сўнг пайғамбар мадҳига, яъни наътга ўтилади. Достонда 5 та наът келтирилган. Биринчи наътда тасаввуф таълимотидаги «Нури Муҳаммадия» назариясига тўхталинар экан, ушбу назариядаги «Одам Ато унга ҳам ўғил, ҳам ота» деган тушунча таърифи берилади. «Нури Муҳаммадия»га кура, Аллоҳ барча оламларни яратишдан олдин Муҳаммад нурини яратган бўлиб, шу нур туфайли оламни ва одамни яратган. Демак, Одам Ато ҳам Муҳаммад нуридан бино қилинган. Шунинг учун ҳазрати Муҳаммад (с.а.в.) Одам Атога ҳам ота, ҳам ўғилдир:

*Бўлди санга Одами сабқатнамо,
Аевал ўғул, сўнгра гар ўлса Ато.*

Кейинги наътларда пайғамбарнинг болалиги, пайғамбарлик давридаги фаолияти, ноёб инсоний хусусиятлари, меъроҳ туни таърифлари келтирилади.

Достоннинг 12-боби улуғ салафлар – Низомий Ганжавий ва Амир Хусрав Дехлавий мадҳига бағишлиланган. Дастреб Низомийга таъриф берилар экан, унинг исмидаги ҳарфлар абжад ҳисобига кўра 1001 сонига тенг келиши жиҳатидан Худонинг 1001 исмига ҳамоҳанг эканлиги айтилади. Иштиқоқ (ўзакдош сўзларни келтириш) ва ийҳом (байтни икки хил маънони қўллаш) санъатлари воситасида у яратган хазина («Хамса»)га таъриф берилади:

*Ганжа ватан. қўнгли анинг ганжхез,
Хотири ганжуру тили ганжрез.*

Хусрав Дехлавий мадҳи келтирилганда эса унинг исмидаги «хусрав» сўзининг подшо маъносини билдириши Дехлавийнинг сўз подшоси сифатида Ҳинд мулкини обод қилганлиги, унинг ҳар бир достони Ҳинди斯顿нинг бир ўлкасига тенг эканлиги билан изоҳланади:

*Назми саводи аро ҳар достон,
Ўйлаки, бир кишвари Ҳиндустан.*

13-боб Нуриддин Абдураҳмон Жомий мадҳини ўз ичига олади. Навоий Низомий ва Дехлавийни бир бобда таърифлагани ҳолда, устози ва дўсти Абдураҳмон Жомийга алоҳида боб бағишлиайди. Уни ўша даврнинг «қутби тариқати» деб атар экан, ўзининг унга нисбатан ожиз ва муҳтоҷлигини ғоят камтарлик билан баён қилса, Жомийнинг янги ёзган бирор асарини ўзидан олдин ҳеч ким кўрмаслигини фахр билан келтириб ўтади:

*Номағакум роқум этиб хомасин,
Қўрмади мен кўрмайин эл номасин.*

«Ҳайрат ул-аброр» достонининг ёзилишига айнан Жомийнинг «Туҳфат ул-аҳрор» достони туртқи бўлганлиги айтилади:

*Боштин-аёқ гавҳари шаҳвор эди,
Қайси гуҳар, «Туҳфат ул-аҳрор» эди...
Чун ўқимоқ замзамаси бўлди бас,
Кўнглум аро дағдаға солди ҳавас*

*Ким, бу йўл ичраки алар солди гом,
Бир неча гом ўлса манга ҳам хиром.*

Достоннинг 14 – 15-боблари сўз таърифига бағишланган. Ҳазрат Навоий сўзнинг буюклигини «кун» (ярал) сўзининг олам ва одамни яратишида восита бўлганлиги билан далиллайди:

*Даҳр муқайяд била озодаси,
Борча эрур «коф» ила «нун» зодаси.
Зодасидин зода бўлуб беадад,
Зодага ҳам волид ўлуб, ҳам валад.*

Алишер Навоий бу ўринда сўзнинг маҳсулни бўлган адабий турлар ҳақида ҳам тўхталар экан, назм ва насрга алоҳида таъриф беради, назмни насрдан устун қўйиб, гулшанда гулларнинг саф тортиб туришини назмга, сочилиб, тўкилиб ерда ётишини насрга ўҳшатади. Шоирнинг эътирофича, назм бу қадар эъзозланмаса, Тангри сўзида шеър бўлмас эди:

*Бўлмаса эъжоз мақомида назм,
Бўлмас эди Тенгри каломида назм.*

Шунингдек, Навоий ушбу бобда туркий тилда шеър айтишга кучли иштиёқ сезишини ва бу йўлда анча юқори даражага эришганини фаҳр билан баён қиласди.

Достоннинг 16-боби замона сultonни Ҳусайн Бойқаро мадҳини ўз ичига олади. Алишер Навоий бу бобда талмеҳ санъати воситасида Ҳусайн Бойқарони куч-қудратда Фирдавсий қаҳрамони Рустамга, адолат ва фазлу камолда Эроннинг афсонавий подшоси Жамшидга ўҳшатади.

17-боб «Қўнгул таърифида» деб номланади. Бу бобда Навоий қудратли Дехқон (Худо) илк тонгда инсонни яратгандан кейин унга қўнгул ато этганини баён қиласар экан, қўнгулни юрак билан адаштирасликка чақиради. Шоирнинг фикрича, юрак савдогарда ҳам бор, лекин унинг бутун фикри-ёди савдода. Яратганинг ёди билан яшайдиган инсондагина ҳакиқий қўнгул бўлади ва угина «аҳли дил» саналиши мумкин. Шунингдек, Навоий қўнгулни олами кубро, Каъбадан-да улуғ жой деб атайди.

Муқаддиманинг қолган уч боби (18 – 20-боблар) ҳайрат таърифига бағишланган. Бу бобларда Хожа, яъни кўнгулнинг аввал мулк (нарсалар) оламига, кейин малакут (фаришталар) оламига ва, ниҳоят, сўнгида «ажойиб бир шаҳар» (инсон танаси)га саёҳати баёни келтирилади ҳамда бу саёҳат кўнгулнинг ўзлигини таниб, инсон танасига киргани тасвири билан якунланади. Алишер Навоий бу ўринда «ўзлигини билган Худони ҳам билади» ғоясини илгари суради:

*Нафсга чун ориф ўлуб мў-бамў
Фойиз ўлуб «қад арафа раббаҳу».*

Муқаддиманинг сўнгги 21-боби Хожа Баҳоуддин Нақшбанд ва унинг халифаси Хожа Убайдуллоҳ Аҳрор мадҳига бағишланган. Алишер Навоийнинг муқаддимадаги сўнгги бобни айнан шу шайхларга бағишлиши шоирнинг нақшбандия сулуки вакили эканлигига ишора эди. Боб ўз ичида икки қисмга ажратилади, биринчи қисм 15 байтдан иборат бўлиб, унинг деярли ҳар бир байтида нақш сўзининг турли ҳолат ва шаклларда иштиқоқ (ўзакдош сўзларни келтириш) ва таносуб (маъно ва моҳият жихатидан бир-бирига яқин сўзларни келтириш) санъатлари воситасида қўлланилганлигини кўрамиз. Навоий Баҳоуддин Нақшбандни юксак мартабали наққошга, унинг таълимотини муҳташам ва дилкаш нақшга ўхшатади:

*Хожаки наққоши сипеҳри баланд,
Бўлғали ҳар сағҳасиға нақшбанд.
Айлади авроқ мұнаққаш басе,
Нақш рақам айлади дилкаш басе.*

Бобнинг иккинчи қисми нақшбандия тариқатининг ўша даврдаги машҳур пирларидан бири Хожа Убайдуллоҳ Аҳрор мадҳига бағишланган. Навоий уни муршиди оғоқ (йўлбошловчи пир) деб улуғлар экан, шоҳлар унга қўллук қилишга ўзлари келадилар, ҳатто ҳақиқат сирларидан огоҳлар ҳам унинг ҳузурида ҳушларидан жудо бўладилар деб ёзади:

*Юз қўюбон қўллугига шоҳлар.
Базмida бехуд ўлуб огоҳлар.*

Алишер Навоий бобни улуғ шайх фаолиятига юксаклик тилаш ва унинг ҳимматидан баҳрамандлик умиди билан якунлайди. Бу умид бевосита муқаддимага ҳам якун ясайди:

*Қўймасун айвони жаҳонни тиҳи,
Дабдабаи кўси Убайдуллаҳи.
Ҳимматидин бизни ҳам этсун Худой,
Фақр йўлида ғани, имонға бой.*

Достоннинг 22-бобидан асосий қисм бошланади. Асосий қисм мақолат ва ҳикоятлардан ташкил топган 40 бобни ўз ичига олади. Мақолатлар муайян бир ахлоқий-фалсафий мавзуга бағишлиланган бўлиб, шоир дастлаб ушбу мавзуга муносабат билдиради, мавзу юзасидан ўз фикр-мулоҳазаларини баён қилади, сўнгра шу мавзуга мос ибратли ҳикоя келтиради. Шу тариқа асосий қисм 20 мақолат ва унга илова тарзида кептирилган ҳикоятлар баёни тарзида давом этади. Буни қуйидаги жадвалда кўриш мумкин:

Мақолат номи	Ҳикоят
Иймон шарҳида	Шайх Боязид Бистомий ва унинг муриди ҳақидаги ҳикоят
Ислом бобида	Иброҳим Адҳам ва Робия Адвия ҳақидаги ҳикоят
Салотин (султонлар) зикрида	Шоҳ Фозий ҳикояти
Хирқа кийган риёкор шайхлар хусусида	Абдулла Ансорий ҳақидаги ҳикоят
Карам (хайру эҳсон) васфида	Ҳотами Тойи ҳикояти
Адаблилик тўғрисида	Нӯширавон ва Наргис ҳақидаги ҳикоят
Қаноат бобида	Қаноатли ва қаноатсиз икки дўст ҳақидаги ҳикоят
Вафо бобида	Икки вафоли ёр ҳикояти
Ишқ ўти таърифида	Шайх Ироқий ҳақидаги ҳикоят
Ростлиқ таърифида	Шер билан Дуррорж ҳикояти
Илм осмонининг юлдузлардек баланд мартабалилиги ҳақида	Имом Розий ва Хоразмшоҳ ҳақидаги ҳикоят
Қалам ва қалам аҳллари ҳақида	Ёкут ҳақидаги ҳикоят

Булатдек фойда келтирувчи одамлар ҳақида	Айюб ва ўғри ҳақидаги ҳикоят
Осмон тузилишидан шикоят	Искандар ҳақидаги ҳикоят
Жаҳолат майининг қўйқасини ичадиганлар ҳақида	Исройлий ринд ҳақидаги ҳикоят
Хунасасифат олифталар ҳақида	Абдуллоҳ Муборак ҳақидаги ҳикоят
Баҳор йигитлигининг соғлиги ҳақида	Зайнобиддин ва унинг ўғли ҳақидаги ҳикоят
Фалак ғамхонаси ҳақида	Гўзал малика ва унинг ошиғи ҳақидаги ҳикоят
Хуросоннинг мисли йўқ вилояти баёнида	Баҳром ва боғ ҳақидаги ҳикоят
Мақсаднинг ўталгани ҳақида	Хожа Муҳаммад Порсо ҳақидаги ҳикоят

Энг аввалги мақолат иймон шарҳига бағишлиланади. Бу бежиз эмас, зеро, достоннинг бош ғояси комил инсон тимсолини васф этишдир, комилликнинг бош белгиси эса иймон:

*Кимки жаҳон аҳлида инсон эзур.
Билки, нишони анга иймон эзур.*

Алишер Навоий: «Кимдаки иймоннинг уч белгиси бўлса, у ҳақиқий инсондир», – дейди ва бу белгилар сифатида сабр, шукр ва ҳаёни кўрсатиб ўтади:

*Бас, ани инсон атагил бериё
Ким, ишиудур сабр ила шукру ҳаё.*

Комил инсон таърифидан кейин иймон шарҳига тўхтаб ўтилади. Ҳазрат Навоий иймоннинг б шарти сифатида қўйидагиларни келтиради:

- 1) Ҳақнинг борлигига иймон келтириш;
- 2) фаришталарга иймон;
- 3) Аллоҳнинг сўзлари бўлган муқаддас китобларга иймон;
- 4) пайғамбарларга иймон;
- 5) қиёмат кунига иймон;
- 6) тақдирни азалга иймон.

Ушбу фикрлардан сўнг Шайх Боязид Бистомий ва унинг муриди ҳақидаги ҳикоят келтирилади. Ҳикоятда бир куни Шайх Боязид Бистомийдан ғамгинлик сабабини сўраган муридига шайх бу дунёда ҳақиқий инсонлар камайиб кетганлигидан хафаман деб жавоб беради. Шунда муриди шайхни ҳақиқий инсонлар сафида деб ҳисоблашини айтганида, шайх ўзини ҳам юз минг сарсон-саргардонлар қаторида санашини, агар бу дунёдан иймон билан кетмас экан, инсон саналмаслигини айтади. Ҳикоятда диний мазмундан ташқари тасаввуфий қараашлар ҳам мавжуд бўлиб, бунда тариқатдаги хавф мақоми ҳақида сўз боради деб айтиш мумкин. Н.Комиловнинг «Тасаввуф» китобида ёзилишича, хавф тариқатнинг 6-мақоми бўлиб, бунда соликнинг нафс макридан қўрқиши, шайтон найрангининг кўнгилга хавф солиши назарда тутилади. Нафс шундай кучли душманки, солик тариқатдаги тавба, вараъ, зуҳд, фақр, сабр каби мақомларни эгаллаган бўлишига қарамай, нафснинг иймонга дахл қилиши мумкинлигидан доим хавфда бўлади.

Алишер Навоий кейинги мақолатларда ҳам биринчи мақолатда келтирилган бош мавзу – комил инсонга хос сифатлар баёнини давом эттиради. Хусусан, 5-мақслат қарам ва саховат, 6-мақолат адаб, 7-мақолат қаноат, 8-мақолат вафо, 10-мақолат ростгўйлик таърифидадир. Бу мақолатлар орасида 7-мақолат бадиий тимсолларга бойлиги билан алоҳида ажралиб туради. Навоийнинг фикрича, кимки қаноатни ўзига касб қилган бўлса, у энг бой инсондир. Олтин, кумуш ва зебу зийнатларни бойлик деб билмаслик керак, балки ҳақиқий бойлик қаноатидир:

Кимгаки иш бўлди қаноат фани.
Билки, ани қилди қаноат фани.
Ганжи тажаммулни ғино билмагил.
Балки ғино ганжи қаноатни бил.

Мазкур мақолатда қаноат тушунчаси чиройли ташбеҳлар ва тамсиллар воситасида ифодалаб берилганлигини қўрамиз. Масалан, осмон қанчалик катта бўлмасин, у битта кулча, яъни қўёш билан кун кечиради. Кўз доим шунинг учун равшанки, у меҳроб остида туриб иккита бодом билан озиқланади. Шундай экан, инсонлар қаноат бобида осмон ва кўз сингари бўлишлари

кәрак. Мақолатда китобат (ҳарф) санъатининг ҳам етакчилик қилишини кузатиш мумкин:

*Қушлар аро шоҳки. анқо дуурп.
Нуктае бу амрда пайдо дуурп.
Бордур агар фикр ила топсанг вукуф.
Қонињю анқоға мувофиқ ҳуруф.*

Қушларнинг ичидаги анқо шоҳ ҳисобланади. Бунда маълум бир маъно бор. Агар фикр билан воқиф бўлишни истасанг, «қонињ» ва «канқо» сўзларининг ёзилишида ҳарфлар бир-бирига мувофиқдир. Ёки:

*Шоҳ бошининг шарафи тож эмас,
Англа ани шоҳки. муҳтож эмас.
Шоҳ агар ул бўлсаки, муҳтождур.
Ҳарф ила муҳтожда ҳам тождур.*

Шоҳ бошининг шарофати тождан эмас, кимки муҳтож бўлмаса, ўшани шоҳ деб тушун. Муҳтожни ҳам шоҳ деб аташ мумкин бўлса, ҳарф нуқтаи назаридан «муҳтож» сўзида ҳам «тож» бор-ку!

Мақолатга «Қаноатли ва қаноатсиз икки дўст» ҳақидаги ҳикоят илова тарзида келтирилган. Ҳикоятда келтирилишича, икки дўст Форс мулкидан Чин мамлакати томон йўлга тушадилар. Бири тақдир берганига қаноатли инсон бўлиб, иккинчиси очкўз, тамағир эди. Йўлда кетаётib бир тошга кўзлари тушади. Унинг ярми ер остида бўлиб. ярми ер юзасига чиқиб туради. Тош устида: «Кимки мөхнат қилиб тошни айлантириб қўйса, остидаги афсона-да вайронга тагида беркитиб қўйилган хазина ҳақида ёзиб қўйилган. Кимки бу машаққат, азоб-үқубатларни хоҳламаса, унинг учун сабру қаноат ҳаммасидан яхшироқдир», – деган ёзув битилган эди. Очкўз йигит ёзувни ўқигач хазина илинжида тош остини қазишига тушиб кетади. Қаноатли одам эса бепарво тарзда шаҳар томон йўл олади. Шаҳарга кирадиган бир неча дарвоза бўлиб, у биринчи бўлиб киради. Шаҳар аҳолисининг одатига кўра, мамлакат подшо-си қазо қиласа, дарвозадан биринчи кирган одамни подшоҳ қилиб кўтарар эканлар. Шу тариқа бу дўст ўз қаноати туфайли мамла-катга подшоҳ бўлади. Унинг тош остини қазиётган дўсти эса оғир

мехнатни бажариб бўлгач тошни ағдариб қараса, «Хомтама бу дунёда алам чекади» деб ёзиб қўйилган экан. Хулоса шуки, қаноатли инсон ўз сабру қаноати туфайли шоҳ мартабасига эришади, қаноатсиз инсон эса тама илинжида хору зор бўлади.

«Ҳайрат ул-аброр» достонида хотима ҳам ўзига хос ўринга эга. Достоннинг 62 – 63-боблари ҳазрат Навоийнинг хулоса ва якуний фикрларини ўз ичига олади. 62-бобда Навоий достонни яратиш орзусидан бошлаб уни тутатгунича бўлган жараён ҳақида ёзар экан, достонни ёзиш хаёли унга тинчлик бермагани, элу юрт хизмати, ҳалқ арз-додини тинглаш уни асосий мақсаддан чалғитса-да, Худонинг ўзи унга марҳамат кўрсатиб, ниҳоят, бу улуғ муддаони поёнига етказганини бетакрор ташбеҳлар воситасида баён қилиб беради. Боб сўнгида Навоий ғоят назокат ва камтарлик билан агар ёзганлари элга манзур бўлмаса, уни афв этишларини сўраб Аллоҳга илтижо қиласди:

Жилва бер эл кўзига ҳам хўб ани.
Қилғил улус кўнглига марғуб ани.
Ҳар нечакум, журмум эрур печ-печ,
Лекин эрур раҳматинг олинда ҳеч.

63-бобда оёғи тойиб кетиб, косадаги ошни шоҳнинг бошига тўкиб юборган ва олижаноб шоҳнинг хижолатдан ўлар ҳолатга етган қўлни афв этгани ҳақидағи ҳикоят берилади. Ҳикоят бевосита 62-бобга ҳамоҳанг тарзда, унга иловадек келтирилади. Навоий Аллоҳни олижаноб шоҳга, ўзини оёғи тойиб кетган қўлга ўхшатар экан, шундай ёзади:

Ҳар неча кўп бўлса гуноҳим менинг,
Шукрки, бор сендек илоҳим менинг.
Хижлат ила қолмади худ жом манга,
Ери дурур айласанг эҳсон манга.

«Ҳайрат ул-аброр» достонида кун тартибиға қўйилган масалалар бевосита «Хамса»нинг кейинги достонларида ҳам давом этади, хусусан, комил инсонга хос адаб, қаноат, карам ва саховат, футувват, ростлик, вафо каби хислатлар билан боғлиқ масалалар «Фарҳод ва Ширин» достони, «Сабъаи сайёр» таркибидағи ҳико-

ятлар, «Садди Искандарий» достонларида янгича талқын топған-лигини күрамиз.

Достон аруз тизимининг сариъ баҳри – сариъи мусаддаси матвийи макшуф (рукнлари ва тақтиғи: муфтаилун муфтаилун фоилун – VV – / – VV – / – V –) вазнида ёзилган. Бу вазн панду насиҳат мазмунидаги фикрларни баён этишга ниҳоятда қулай бўлгани сабабли достон учун асосий шеърий ўлчов вазифасини ўтаган.

Таянч тушунчалар

- *муқаддима*
- *ҳамд*
- *наът*
- *муножот*
- *меъроҳ*
- *мақолат*
- *ҳикоят*
- *хотима*

Савол ва топшириқлар:

1. «Ҳайрат ул-абброр» типида ёзилган бошқа яна қандай достонлар номларини айти оласиз?
2. «Ҳайрат ул-абброр» умумий «Хамса» учун кириш вазифасини ўташини достондаги қайси хусусият орқали билиш мумкин?
3. Достоннинг кириш қисмида Навоий қандай фикр ва гояларни илгари сурган?
4. Достондаги мақолат ва ҳикоятларнинг ўзаро боғлиқлигини аниқ мисоллар билан асосланг.
5. Достонга танланган вазннинг хос хусусиятлари ҳақида нималар деба оласиз?

Адабиётлар:

1. Навоий Алишер. Ҳайрат ул-абброр. МАТ. 20 жилдлик. – Тошкент: Фан, 1991. 7-жилд.
2. Navoiy Alisher. Hayrat ul-abror. – Тошкент: G'.G'ulom, 2006.
3. Навоий Алишер. Ҳайрат ул-абброр (насрый баёни билан) /

Таҳрир ҳайъати А.Қаюмов ва бошқ. – Тошкент: Адабиёт ва санъат, 1989.

4. Муҳиддинов М. Комил инсон – адабиёт идеали. – Тошкент: Маънавият, 2005.

5. Рустамов А. Навоийнинг бадиий маҳорати. – Тошкент: Адабиёт ва санъат, 1979.

6. Қаюмов А. «Ҳайрат ул-аброр» талқини. – Тошкент: Адабиёт ва санъат, 1985.

7. Vohidov R., Eshonqulov H. O'zbek mumtoz adabiyoti tarixi. – Тошкент: O'zYU Adabiyot jamg'armasi nashriyoti, 2006.

«ФАРҲОД ВА ШИРИН» ДОСТОНИНИНГ ТИМСОЛЛАР ОЛАМИ

РЕЖА:

- 1. Достоннинг яратилиш тарихи.*
- 2. Фарҳод – илоҳий ишқ ўйлига кирган солик образи.*
- 3. Достондаги рамзий тимсоллар.*
- 4. Достоннинг бадиий хусусиятлари.*

Алишер Навоий «Хамса»сидаги иккинчи достон «Фарҳод ва Ширин» деб аталиб, 1484 йилда ёзиб тугалланган. Навоийгача бу мавзуу «Хусрав ва Ширин» шаклида машҳур эди. Афсонанинг бош қаҳрамони Хусрав Парвез, аслида, тарихий шахс бўлиб, милодий 590 йилда таҳтга чиқиб, 628 йилда ўз ўғли Шеруянинг буйруғи билан ўлдирилган Эрон шоҳидир. Унинг оромий ёки арман қизи Ширинга бўлган муҳаббати кўпгина тарихий асарларда қайд этилган. Хусусан, Алишер Навоийнинг ўзи ҳам «Тарихи мулукки Ажам» асарининг сосонийлар тарихига бағишланган қисмида Хусрав Парвез ҳақида маълумот беради. Бадиий адабиётда Хусрав ва Ширин муҳаббати ҳақида биринчи бўлиб Фирдавсий ўзининг «Шоҳнома» достонида ёзиб қолдиради, Низомий эса уни алоҳида ишқий-саргузашт достон ҳолига келтиради. Низомийнинг «Хусрав ва Ширин» достони 1340 йилда Қутб Хоразмий томонидан туркӣ тилга таржима қилинган.

Алишер Навоий бу мавзудаги достони учун аввалги достонларда иккинчи даражали тимсол тарзида талқин қилинган Фарҳодни бош қаҳрамон қилиб олади. Аслида, Фарҳоднинг бош қаҳрамон қилиб олиниши адабиётда илк бор XIV асрда Озарбайжонда яшаб фаолият юритган Ориф Ардабилийнинг «Фарҳоднома» (1369) номли форс-тожик тилида ёзилган достони билан бошланади. Лекин унда тасвирланган воқеалар Навоий достонидан бутунлай фарқ қиласи. Навоий «Фарҳод ва Ширин» достонида бу мавзууда қалам тебратган ижодкорлар сифатида Низомий, Деҳлавий, Ашраф Марғийларни эслаб ўтар экан, яна бир номаълум ижодкорга ҳам ишора қиласи:

*Яна бўлғон экан бу нома марқум,
Вале роқим эмастур яхши маълум.*

Адабиётшунослиқда ушбу номаълум ижодкор айнан Ориф Ардабилий бўлиши мумкин деган фикр мавжуд.

Навоийнинг «Фарҳод ва Ширин» достони 54 боб, 5782 байтдан иборат. Шундан муқаддима 11 бобни ўз ичига олади. Достон анъ-анавий ҳамд – Аллоҳнинг мақтови билан бошланади. Достонда иккита ҳамд мавжуд. Биринчи ҳамдда Алишер Навоий яратувчнинг құдратини таърифлаб, унинг иродаси билан қаламга олмоқчи бўлган ғоявий нияти ҳақида сўз юритар экан, биринчи мисрани арабча калима билан бошлайди:

*Биҳамдик фатҳ абвоб ул маоний,
Насиб эт қўнглума фатҳ ўлмак они.*

(Мазмуни: маънолар эшикларининг очилиши сенинг мақтовинг билан ва қўнглумга уларни забт этишни насиб қил).

Кейинги байтларда Навоий маънолар хазинаси құлғига қўли-нинг калит бўлишини, шу восита билан барча умидларига етишишни тилайди, ана шу маънолар хазинасидан олам аҳлини баҳраманд этишни умид қиласди.

Иккинчи ҳамдда шоир ёзишга киришаётгани «Фарҳод ва Ширин» достонининг умумий талқини, ундаги қаҳрамонларнинг мухтасар тавсифини беради, «дард боғи» деб таърифланган ишқ билан алоқадор барча ҳаяжон ва изтироблар ҳақида ёзади. Шоир Холиқ мақтовига киришар экан, энг аввало, у инсон қўнглини ишқ гулшани, бу гулшанда эса ишқни хазинага айлантирганлигини мадҳ этади:

*Ки инсон қўнглини этти гулшани ишқ,
Бу гулшаннинг ҳаримин маҳзани ишқ.*

А.Рустамовнинг «Навоийнинг бадиий маҳорати» китобида ёзилишича. Навоий қазони Фарҳодга, осмонни Фарҳодга алоқадор Бесутун тогига, ақлни Чин хоқонининг вазири Мулкорога ва донишманд Сукротга, тунни Хусрав Парвезнинг оти Шабдезга, қадарни Фарҳоднинг дўсти Шопурга, ажални отасини ўлдирган Парвезнинг ўғли Шеруяга, замонни Парвезнинг созандаси Нигисога ўхшатган ҳолда «ширин», «тилисм» сўзларини, Бесутун. Хусрав ва унинг ашулачиси Борбад номларини тилга

олиб, муқаддимани достоннинг мундарижасига уйғуллаштирган. Шу билан бирга, бу ўхшатишлар замирида шоир достон мундарижасида қаҳрамон ва тимсоллар фаолияти қайси кўламда ке-чиши, улар достонда қандай роль йўнаши билан ҳам китобхонни таништиради.

Муножот (3-боб)да Алишер Навоий инсоннинг йўқлиқдаги ҳолати, дунёга келиши, гўдаклиги, ҳаёти тўғрисида баён қиласи. «Лавҳул маҳфуз» (кишиларнинг яхши ва ёмон амаллари, тақдири азалдан битиб қўйилган тахта) ҳақида фикр юритар экан, инсон азалий қисмат ижрочиси экан, бунга уни гуноҳкор қилишни қандай изоҳлаш мумкин деган фикрларни айтади:

*Ва гар ул лаөҳ уза бўлса муҳаррар,
Азал тақсимидин бўлди муҳаррар.
Не дерсен бас бу жамъи бенавоға.
Гуноҳе қилмайин қолғон балоға?*

Кейинги байтлардаёқ Навоий бу фикрларни бехуда даъво деб ҳисоблаб ружуъ санъати воситасида бу даъвони инкор қиласи ва Аллоҳдан унга марҳамат қилишини сўрайди:

*Жунундин сўзга бир дам бўлмай огоҳ,
Гар ортук сўз дедим, астағфируллоҳ.
Илоҳий, боқмагил мажнунлуғумға,
Карамдин чора қил маҳзунлуғумға.*

Достоннинг тўртинчи боби Муҳаммад пайғамбар (с.а.в.) мадҳига бағишланган. Боб пайғамбарнинг муборак чеҳраси тавсифи билан бошланиб, унинг ўқиш ва ёзиш билан шугулланмаганилиги ажойиб бадиий санъатлар воситасида баён қилиб берилади. Хусусан, қалам пайғамбар унга майл кўрсатмаганидан, яъни уни қўлида тутмаганлигидан кейин ёқасини чок қилиб, кўз ёшлигини тўкиб, афғон қилганлиги, унинг қўлини ўпайин деб қанча оғзини очмасин, унинг орзуси амалга ошмаганилиги ҳусни таълил санъати асосида келтирилганлигини қўрамиз:

*Неча чоки гирибон қилди хома,
Тўкуб ашкини афғон қилди хома*

Очиб оғзин қиласай деб дастбўси,
Муяссар бўлмайин бу орзуси.

Бобда «инсонлар пайғамбар белгилаб берган шариат қоидала-ри асосида яшасаларгина ҳақиқий саодатга эришадилар» деган ғоя илгари сурилади.

5-боб меъроj туни таърифига бағишланган бўлиб, пайғам-барнинг Буроқ оти ёрдамида Аллоҳ ҳузурига йўл олиши тасвири берилади. Бунда пайғамбарнинг 12 бурж ва 7 сайёralарни ошиб ўтиб Ломаконга кўтарилганлиги, «қоба қавсайн» (икки ёй оралиғи) даражасида Аллоҳга яқинлашгани ва фоний бўлганлиги ҳақидаги фикрлар баён қилинади:

Анга бу сурма бўлғоч қурратул айн,
Насиб ўлди мақоми «қоба қавсайн».
Ўзин гум айлабон, лекин топиб ҳақ,
Кўринмай кимса ҳақдин айру мутлақ.

Достоннинг 6-боби қалам таърифи ҳамда улуғ салафлар – Низомий ва Дехлавий мадҳини ўз ичига олади. Навоий дастлаб қаламга таъриф берар экан, уни Хусрав Парвезнинг тез учар қора оти – Шабдезга, қаламни тутивчи бармоқларни шу от устидаги чавандозга, бармоқ бўғинларини чавандознинг белбоғига, тир-ноқларни эса унинг юзига ўхшатади:

Қаламким, раҳнаеварди тезтакдур.
Азалдин манзили фавқул фалакдур.
Магар ваҳм адҳамидур тез рафтор,
Не адҳам, жардаи Шабдез рафтор.
Чиқиб устига бармоқ шаҳсуори,
Бўғун белбоғию тирноқ узори.

Ҳазрат Навоий Низомийни хазинадорга, унинг маъноларга тўла асарларини хазиналарга ўхшатиб таърифлайди. Хусрав Дехлавийни у яшаган Ҳиндистон билан боғлиқ ҳолда ҳинду, тўти, булбул, қақнус, мушк ҳидли булатуга ўхшатади. «Ҳамса» ёзиш анъ-анасини кураш майдонига ўхшатиб, ўзининг бугунги кунда ниҳоят-да машхур байтларини ёзади:

Эмас осон бу майдон ичра турмоқ,
 Низомий панжасиға панжа урмоқ.
 Тутайким қилди ўз чангини ранжа,
 Некум урди аниңг чангига панжа
 Керак шер оллида ҳам шери жангы,
 Агар шер ўлмаса, бори паланги.

Айнан шу бобдан бошлаб 2 – 3 байтли соқийномалар беріб борилади. Күпинча бу соқийномаларда шоир кейинги бобда қаламга олинадиган воқеа ёки масалаларга ишора қилинади:

*Кел, эй соқийки, тушмиш жонима жүш,
 Кетур бу икки ёди бирла бир қүш.
 Алар ишқида нұш айлаб ики жом,
 Тутай Жомий майи мадхин саранжом.*

7-боб «ҳазрати шайх ул-исломий мавлоно Нуриддин Абдурахмон Жомий» мадхидадир. Алишер Навоий Низомий ва Дехлавийни иккита филга ўхшатгани ҳолда, Жомийни юз филга ўхшатади. Сүз үйини воситасида уни XI – XII асрларда яшаган машхур сүфий Зиндапили Жомийга қиёслайды, «фано тимсоли», «жақони бегарон» (чексиз жақон), «олами кубро» (улуғ олам) деб атайды. Боб Жомий құлидан бир жом ичиш умиди билан яқунлады:

*Кетурғил, соқий, ул жоми киромий
 Ки, тұтсун риндлар сархайли Жомий.
 Чу пири дайр май қилди ҳавола,
 Ичармен гар эрур гардун пиёла.*

Навбатдаги боб достоннинг ёзилиш сабаби ҳақида. Бу бобда шоир достонни яратиш орзуси пайдо бўлгач, бепоён дурру гавҳарлар дengiziga чўмганини, яъни кўп мутолаа қилганини, тинмай ўйлаганини айтади. Достонни ёзишга ундан сабаблардан бири ўзининг муҳаббати. бу ишқнинг алам ва изтироблари эканини айтиб, у туфайли ўзига етишган азобу уқубатларни баён қилади. Шунда унга ғойибдан нидо келиб, ҳотиф (ғойибдан оқ фотиҳа берувчи) уни янги бир асарни ёзишга илҳомлантирганини, кейин

Жомийнинг олдига борганида у ҳам шоирни дуо қилиб, бу ишда унга оқ йўл тилаганини ёзади.

9-боб асар режасини тушиб олгани, турли афсоналар, тарихий манбаларни кўриб чиққани, шу мавзуда ёзилган достонларда йўл қўйилган хатоларни тузатиб, ўз ғояларини қай тарзда ифода этмоқни ният қилгани баёнидадир. Бунда Навоий ёзилажак асари янги бўлиши лозимлигини, аввал шу мавзуда яратилган достонларни такрорламаслик кераклигини таъкидлайди:

Ани назм этки, тархинг тоза бўлғай,
Улусқа майли беандоза бўлғай.
Йўқ эрса назм қулғонни халойиқ,
Мукаррап айламак сендин не лойиқ.
Хуш эрмас эл сўнгинча рахш сурмак,
Йўликим, эл югурмиштур югурмак.

Достоннинг 10-боби султон Ҳусайн Бойқаро таърифига бағишлиланган. Навоий уни султонлар ичida Шоҳ Фозий, ғазот майдонида Али ибн Абу Толиб, шариат ривожида пайғамбар сингариидир деб улуғлайди ва уни адолатли, саховатли ҳукмдор сифатида мадҳ қиласди.

11-боб шаҳзода Бадиuzzамон Баҳодир мадҳига бағишлиланган. Навоий уни «Бади уд-даҳру Дорои замон» деб атаб, унинг исми ни китобот (ҳарф) санъати асосида шарҳлаб ўтади. Шаҳзоданинг исми 10 ҳарфдан иборат бўлиб, Навоий унинг ҳар бир ҳарфига апоҳида маъно юклайди:

«**ب**» – «бе» эҳсонда бирлик, ягоналикнинг далилидир, «**د**» – «дол» давлатдан нишона бўлиб, дину диёнат ундан иқбол топади. «**ئ**» – «йо» ҳарфи йумн (баҳт, омад)дан дарак бериб, унинг қадами билан замона тинчиди. Тўртинчи ҳарф «**خ**» – «айн» бўлиб, адолатдан олингандир. «**ڭ**» – «алиф» ҳарфи ўз шакли билан унинг тўғрилиги, ростгуйлигини билдиради. «**ڭ**» – «лом» ҳарфи лутфдан воқиғ этиб, латофат гулшанидан баҳраманд этади. «**ڙ**» – «зе» ҳарфи аблжад ҳисобига кўра 7 рақамини англатади, бу Аллоҳ унга 7 иқлимни насиб айлашига ишорадир. «**ڦ**» – «мим» ҳарфи миллат кироми, мусулмонлик низоми ундан эканини англатади. «**ا**» – «алиф» ҳарфи Аллоҳ унинг ёри эканига далолат бўлса, сўнгги ҳарф «**ڻ**» – «нун» наср (мадад) Аллоҳдандир деган маънони билдиради.

Навоий юқорида достонни яратишдан мақсад «ишқ, яъни илоҳий ишқ дардини куйлаш» эканини айтib ўтган эди:

*Бу рангин саҳфа билким, дард боди.
Аён ҳар лоласида ишқ доди.*

Бундан англашиладики, достондан бош мақсад илоҳий ишқ дардига мубтало бўлган солик (тариқат йўлига кирган ошиқ)нинг саргузаштларини тасвирлашдир.

Достоннинг асосий қисми 12-бобдан бошланади. Воқеалар Чин хоқонининг фарзандсизлиги ва унинг изтироблари тасвири билан ибтидо топади. Ниҳоят, унинг илтижолари қабул бўлиб, Тангри унга бир ўғил инъом этади. Навоий гўдакнинг туғилишидан тортиб улғайишигача бўлган ҳар бир жараённи алоҳида тасвирлайди, ҳатто гўдакка қўйилган исмга ҳам алоҳида маъно юклайди:

*Анга фарзона Фарҳод исм қўйди,
Хуруфи маъхазин беш қисм қўйди.
Фироқу рашку ҳажру оҳ ила дард.
Бирор ҳарф ибтидодин айлабон фард.*

Фарҳод болалигидан фавқулодда хислатлари билан атрофдагиларни ҳайратта солади. Ўн яшарлигига:

*Жаҳонда қолмади ул етмаган илм.
Билиб таҳқиқини касб этмаган илм.*

Асарда Фарҳод ҳам чексиз жисмоний қуд-рат, беназир истеъ-дод эгаси, ҳам юксак фазилатлар соҳиби сифатида тасвирланади.

Фарҳод ёши улғайгани сари ҳазин ва хастадил бўлиб боради. Хоқон Фарҳоднинг кўнглини очиш, ҳазин кайфиятини кўтариш учун йилнинг тўрт фаслига мослаб тўрт қаср қурдиради. Шу аснонда Фарҳод Қорандан тош йўниш. Бонийдан меъморлик, Монийдан наққошлик сирларини ўрганади. Лекин у эгаллаган билимлар, ўрганган ҳунарлар зоҳирий (дунёвий) билимлар бўлиб, илоҳий сиру асрорни очишга кифоя қилмайди. Энди у пири комил таълимини олиши керак эди.

Фарҳоддаги ҳазинликнинг тарқамаганини кўрган хоқон унга таҳтни таклиф қиласди ва шу билан гўёки ўғлининг дардига даво топмоқчи бўлади. Аслида, Фарҳоддаги бу ҳолат заминий, дунёвий бўлмай, илоҳий ишқнинг нишонаси эди. Шу ўринда Навоий илоҳий ишқ дардида ёнган инсон билан бундай саодатдан маҳрум фоний дунё кишилари орасидаги фарқни кўрсатиб беради. Фарҳод отасининг таҳтни эгаллаш ҳақидаги таклифини салтанат ишларини ўрганиш, тажриба орттиришга ижозат сўраш баҳонасида ортга суради ва хоқон ҳазинасидаги беҳисоб бойликлар билан таниша бошлайди. Натижада яширин парда ортидаги хонада сақланаётган сирли сандик ва ундаги тилсимли кўзгуни кўриб қолади. Фарҳод ушбу кўзгунинг сехрини очолмай, Юнонистон сафарига, Суқрот ҳузурига отланади.

Суқротнинг ҳузурига бориш йўлини унга Суҳайло исмли ҳаким (денишманд) ўргатади. Н.Комиловнинг «Тасаввуф» номли китобида ёзишича. Суҳайло Фарҳоднинг тариқат йўлидаги биринчи пири. У Фарҳод енгиб ўтиши керак бўлган тўсиқлар: аждарҳо ва девдан хабар беради. Тасаввуфда аждарҳо – нафс тимсоли, дев – салтанат тимсоли ҳисобланади. Суҳайло Фарҳодга аждарҳони енгиш учун самандарнинг ёғини беради. Самандар – олов ичидаги яшайдиган жонивор. У ишқ рамзи. Фарҳод баданига самандар ёғини сурганда, аждарҳонинг ўти унга кор қилмайди, яъни ишқ оташи нафс ўтини сўндиради. Шунингдек, Фарҳодга кейинги манзилларда учрайдиган шер ва темир пайкарнинг ҳам рамзий маъноси бор. Шер – ғазаб тимсоли, илоҳий ишқ йўлига кираётган соликда эса ғазаб бўлмаслиги керак. Темир пайкар – рӯё, ёлгон дунё рамзи. Солик дунё мўъжизаларига чалғимаслиги, уларга кўнгил қўймаслиги керак. Фарҳод темир пайкарни ҳам енгиб, ниҳоят, Суқрот даргоҳига кириб боради.

Аслида, Суқрот тимсолининг асар таркибига киритилиши тасодифий бўлмай, бош мақсадни очиб бериш йўлидаги муҳим восита-дир. Н.Комиловнинг ёзишича. Суқрот пири комил тимсоли бўлиб, усиз Фарҳоднинг ўз мақсадига эришиши мумкин эмас эди. Навоий Суқротни қуёш каби порлоқ сиймо, жисми пок руҳ каби, шахси ақлнинг ҳайкали деб таърифлайди. У камолот чўққисини эгаллаган комил инсон, ўзи бир жойда ўтиrsa ҳам, руҳи бутун дунёни кезиб чиқади. Жамшид жоми, Искандар кўзгуси ҳам унинг кўнгил кўзгуси олдида хира. У Фарҳод билан яккама-якка суҳбатлашиб, уни ўз

фарзандидай эъзозлайди. Чунки бу йигит сиймосида у ўз сулук (йўл)ининг давомини кўрган эди. У Фарҳодга шундай дейди:

*Муни билким, жаҳон фонийдур асрү,
Ҳақиқат аҳли зинданийдур асрү.
Агар топса Сикандар мулки зотинг,
Гар ўлса Нуҳ умрича ҳаётинг.*

Бу байтда Навоий Суқрот тилидан тасаввуфнинг муҳим ғояси-ни баён этади. Яъни бу дунё ўткинчи, фонийдур, шу сабабли унга кўнгил боғлаш тўғри эмас.

*Чу маҳбуби ҳақиқий улдурур ул,
Анинг васли сори қатъ айламак йўл...
Бу йўл ичраки беҳад дарду ғамдур,
Узоқ тортар, өале икки қадамдур
Ким, ул икки қадамнинг қатъи минг йил,
Киши урса қадам мумкин эмас бил.
Бири ўзлукни қилмоқ бўлди фоний,
Яна бир доғи топмоқ бўлди они.*

Ҳаққа етишиш йўли икки қадам масофадек гап, лекин бу икки қадамни босиб ўтиш учун минг йиллик машаққат сарфланиши керак. Бу икки қадамнинг бири ўзлиқдан воз кечиш, иккинчиси ўзлиқни топиш, яъни ўзлиқдан воз кечмай туриб чин илоҳий ўзлиқни топиш мумкин эмас.

Инсон ўзлиқдан қутулмас, Илоҳга етолмас экан, демак, уни тезлаштирувчи чора – восита керак. Достонда мажозий ишқ тонг ёруғига, ҳақиқий ишқ қуёшга ўхшатилади:

*Бу ўзлукдин қутулмоқ чорасози,
Нима йўқ, ўйлаким ишқи мажозий...
Мажозий ишқ бўлди субҳи анвар.
Ҳақиқий ишқ анга хуршиди ховар.*

Фарҳод шу тариқа Суқрот ҳузурига борар йўлда тариқат мақомларини босиб ўтади, пири комил суҳбатидан баҳраманд булиб, илоҳий ишқнинг моҳиятини англай бошлайди. Чин мамлакатига

қайтиб бориб, кўзгуда энди нафақат Ширинни, балки ўзини ва ўзи келгусида бошдан кечириши керак бўлган воқеаларни кўра бошлиайди. Чунки кўзгу бу ўринда комил инсон – Суқротнинг қалбидир.

Достонда илоҳий ишқдан бебаҳра фоний дунё кишиларидан бири Хусравдир. Муаллиф бу икки қаҳрамоннинг мунозарасини тасвирлар экан, икки хил ишқ – авом ишқи ва илоҳий ишқ ўтрасидаги тафовутни кўрсатиб беради. Жами 25 байтдан иборат бу мунозарада деярли ҳар бир байтда муайян бадиий санъатнинг етакчилик қилишини кузатиш мумкин. Хусусан:

*Дедиким: ишқ ўтидин де фасона!
Деди: куймай киши топмас нишона, –*

байтида «ўт» ва «куймоқ» сўзлари асосида таносуб санъати ясалганини кўрсак, кейинги байтда «а» унлисининг тақрорланиши асосида вужудга келган ассонанс бадиий воситасини қўлланганининг гувоҳи бўламиз.

*Дедиким: куймагингни айла маълум,
Деди: андин эрур жоҳ аҳли маҳрум...*

Хусрав савол-жавобда ҳам, жисмоний ҳаракатларда ҳам Фарҳодни енга олмайди, чунки дунёвий куч илоҳий қудратни енгиши мумкин эмас эди. Шунда у маккорлик йўлига ўтади: ёсуман кампир воситасида Фарҳоднинг ўлимига эришади.

Навоий тилидан Фарҳоднинг ўлими муносабати билан айтилган:

*Вужудин ўртаб ул сўзу гудози,
Ҳақиқатқа бадал бўлди мажози, –*

деган иқрорини Аллоҳ жамолига етишган ишқ аҳли ҳақидаги маънавий хулоса дейиш мумкин. Қуйидаги мисраларда шоир фикрини янада кучайтирганини, Фарҳод тимсолида илгари сурилган қарашларини ойдинлаштирганини кўриш мумкин:

*Бақо шаҳрида сultonлиққа етти,
Ҳақиқат мулкида хонпиққа етти.*

Достон хотимаси икки боб (53 – 54)дан иборат бўлиб, 53-боб сulton Ҳусайн Бойқаронинг ўғли шаҳзода Абулфаворис Шоҳғариф мирзо мадҳи ва унга бағишланган бир неча насиҳатни ўз ичига олади. Навоий Шоҳғариф мирзога камолотга эришиш йўллари ҳақида гапирав экан, шаҳзодага Искандар Зулқарнайн, Мирзо Улуғбек каби ҳукмдорларни ибрат қилиб кўрсатади. Энг муҳим илмлар сифатида фиқҳ, ҳадис ва тафсирни эгаллаш зарурлигини уқтиради, шунингдек, тиббиёт ва ҳикмат илмини ҳам ўрганишни тавсия этади:

*Шаҳ улдурким шиори илми диндур,
Нединким илми дин илм ул-яқиндур...
Бу дин илмики хомам қилди таҳрир,
Эрур фиқҳу ҳадису сўнгра тафсир...
Валекин тиббу ҳикмат ҳам эрур хўб
Ки, сиҳҳатдур киши жисмида маттуб.*

Якуний бобда Навоий Фарҳод тимсолини ўз замонасидаги барча шаҳзодаларга ибрат ҳамда ўрнак қилиб кўрсатади.

«Фарҳод ва Ширин» ишқий саргузашт достонлар учун мўлжалланган ҳазажи мусаддаси маҳзуф вазни (рукнлари ва тақтиъи: мафойилун мафойилун фаувлун *V— — / V— — / V— —*)да ёзилган.

Таянч тушунчалар

- соқийнома
- солик
- солики мажзуб
- ишқи мажозий
- ишқи ҳақиқий
- рамзий тимсоллар
- ҳазажи мусаддаси маҳзуф

Савол ва топшириқлар:

1. «Хамса»даги иккинчи достон Навоийгача қандай шаклда қайси манбаларда учрар эди?
2. Навоий «Фарҳод ва Ширин»нинг кириш қисмида ишққа

алоқадор ҳаяжонларни тасвиirlар экан, қазони, ақлни ва ҳоказоларни достондаги қайси қаҳрамонларга қиёслайди?

3. Фарҳод қўлга киритиши керак бўлган Жамшид жоми, Искандар кўзгуси ва бу йўлда унга тўсиқ бўлган аждаҳо, шер, темир пайкар қандай маъноларни ифодалайди?

4. Достондаги Суҳайло ҳаким ва Суқрот образлари Фарҳод фолиятида қандай ўрин тутади?

5. Достон хотимаси неча бобдан иборат ва унинг мазмуни нималарни ифодалайди?

Адабиётлар:

1. Навоий Алишер. Фарҳод ва Ширин. Муқаммал асарлар тўплами. 20 жилдлик. – Тошкент: Фан, 1991. 8-жилд.
2. Navoiy Alisher. Farhod va Shirin. – Тошкент: G'.G'ulom, 2006.
3. Навоий Алишер. Фарҳод ва Ширин (насрый баёни билан) / Тахрир ҳайъати А.Қаюмов ва бошқ. – Тошкент: Адабиёт ва санъат, 1989.
4. Комилов Н. Тасаввубуф. – Тошкент: Movarounnahr – O'zbekiston, 2009.
5. Эркинов С. Навоий «Фарҳод ва Ширин»и ва унинг қиёсий таҳлили. – Тошкент: Фан, 1971.
6. Эркинов С. Шарқ адабиётида Фарҳод қиссаси. – Тошкент: Фан, 1985.
7. Қаюмов А. «Фарҳод ва Ширин» сирлари. – Тошкент, 1979.
8. Рустамов А. Навоийнинг бадиий маҳорати. – Тошкент: Адабиёт ва санъат, 1979.
9. Юсупова Д. Алишер Навоий «Хамса»сида мазмун ва ритмнинг бадиий уйғунлиги. – Тошкент: МУМТОЗ СЎЗ, 2011.

«ЛАЙЛИ ВА МАЖНУН» ДОСТОНИНИНГ ГОЯВИЙ-БАДИЙИХ ХУСУСИЯТЛАРИ

РЕЖА:

1. *Достоннинг яратилиш тарихи.*
2. *Достоннинг таркибий тузилиши.*
3. *Мажнун – мажзуби солик тимсоли, Лайли – илоҳий мазхар.*
4. *Достон бадиияти.*

Яқин ва Ўрта Шарқ халқлари адабиётида «Лайли ва Мажнун» мавзуси каби кенг тарқалган бошқа бир ишқ қиссасини топиш қишин. Мана ўн уч асрдирки ушбу мавзуда адабиёт оламида шеър ва достонлар битиб келинади. Ушбу қиссанинг келиб чиқиш манбаи қадим араблар ҳаёти билан боғлиқ воқеаларга бориб тақалади. Айрим араб манбаларининг маълумот беришича, Мажнун Шимолий Арабистондаги бани омир қабиласига мансуб тарихий шахс бўлган. Унинг исми манбаларда Қайс ибн Мулавваҳ, Маҳдий ибн Муод, Ал-Ақра ва баъзан Ал-Бухтурий ибн ал-Жаъд тарзида келтирилади. Мажнун ўз қабиласидан Лайли исмли қизни севиб, унга бағишилаб ажойиб шеърлар тўқиган. Унинг шеърлари қабила дошлари ва бошқа қабила кишилари орасида кенг тарқалганлиги ҳақида Ибн Қутайбанинг «Китоб уш-шеър ва-ш-шуаро» асарида маълумотлар келтирилади. Шу билан бирга, айрим тарихчилар Мажнун тарихий шахс эмас, унинг номи мажозий, мавжуд шеърлар ўз амакисининг қизини севиб қолган умавий бир йигитга тегишли, у Мажнун тахаллусини қўллаган деб айтадилар. Нима бўлганда ҳам, VII асрнинг иккинчи ярмидан бошлаб араб шеъриятида Мажнун тахаллуси билан ишқ мавзусида ёзилган ғамгин шеърлар пайдо бўлган.

Бадиий адабиётда бу қисса достон шаклида илк бор Низомий Ганжавий томонидан вужудга келтирилди. Кейинчалик форсий тилда Амир Хусрав Дехлавий, Ашраф Мароғий, Абдураҳмон Жомий, Амир Шайхим Суҳайлий, туркий тилда Гулшаҳрий, Ошиқ Пошшо, Шаҳидий, Фузулий каби шоирлар бу достонга жавоб ёздилар.

Алишер Навоийнинг «Лайли ва Мажнун» достони 38 боб, 3623 байтдан иборат. Шундан муқаддима 9 бобни ўз ичига олади.

Достон анъанавий ҳамд – Аллоҳнинг мадҳи билан бошланади. Унда шоир оламнинг яратилиши, тун, кун, ой, қуёш, юлдузларнинг, йил фасллари ва улардаги табиатнинг ўзига хос жилолари, инсоннинг табиат ичидаги яратилиши, йўқдан бор, бордан йўқ бўлиши – буларнинг ҳаммаси Аллоҳнинг беқиёс қудрати ва улуғлиги ифодаси эканини таъкидлаб, унга ҳамду санолар ўқийди. Навоий бобда ғоят усталик билан Аллоҳнинг ердаги тажаллиси тасвирини ушбу ёзилаётган достони ғояси билан боғлиқ ҳолда баён қиласи. Яратувчининг ҳар ердаги тажаллиси жаҳонда Лайли бўлиб кўринади, жилва қиласи, унинг бу хусусияти эса яратилганларни Мажнун қилишдан иборатдир:

Эй, ҳар сориким қилиб тажалли,
Ул мазҳар ўлуб жаҳонда Лайли.
Эй, оники Лайли айлаб отин,
Мажнун қилмоқ қилиб сифотин.

Иккинчи боб муножотни ўз ичига олади. Мазкур бобда Навоий Аллоҳга мурожаат қилиб, уни борлиқни яратган ягона ва олий зот деб деб атайди ҳамда ўз гуноҳларини, хатоларини кечиришни илтижо қиласи. Шоир достонни ёзишга киришар экан, Худодан ўзига мадад ва кўмак сўрайди:

Ё Раб, эшигингда ул гадомен
Ким, боштин аёққача хатомен.
Мушкум бу хатода бўлди кофур,
Кофур ила мушкум ўлди бенур...
Боқ дарду малолатимға, ё Раб,
Раҳм айла бу ҳолатимға, ё Раб...
Шукрунгға тилимни қойил айла,
Саждангга бошимни мойил айла...
Бўл роҳнамун манго ул ишга
Ким, бўлса санга ризо ул ишга...

Достоннинг З-боби Муҳаммад пайғамбар (с.а.в.) мадҳига бағишланган. Бу бобда Навоий Муҳаммад пайғамбар (с.а.в.)ни рисолат сипехри (пайғамбарлик осмони)нинг қуёши деб атаб, Одам Атони унинг дарахтидаги мевага ўхшатади. Китобат санъати воситасида

пайғамбарлик муҳри – хотамнинг «!¹» – «алиф» ва «²» – «те»сида унинг оти яшириганини айтади:

*Ул муҳри хутути васфи зотинг.
Хотам «алиф»иу «те»си отинг.*

Навоий наътни пайғамбар ва унинг оиласига юз минг салавоту васфлар айтиш билан якунлайди.

4-боб меъроj туни таърифига бағишланган. Навоий меъроj тунини таърифлар экан, бу туннинг рангини тоза мушк рангига ўxшатиб, унинг ҳар бир юлдузига қүёш рашк этади деб ёзади:

*Ким ранги эди чу мушки ноби,
Ҳар юлдузи рашки офтоби.*

Навоий Мұхаммад пайғамбар (с.а.в.)нинг Буроқ отига миниб күкка күтарилишини ташхис санъати воситасида баён қилар экан, сайёралар, юлдузлар, ўн икки буржларнинг номларинигина эмас, уларнинг хусусиятларини ҳам кўзда тутиб меъроj туннинг мӯжизавий ҳолатини тасвирлайди. Шоирнинг ёзишича, пайғамбар Аллоҳнинг ҳузурига ой бўлиб бориб, қўёш бўлиб қайтди, гавҳар бўлиб бориб, Уммон денгизига айланиб келди:

*Ой борди-ю, келди меҳри раҳшон.
Дур борди-ю, келди баҳри Уммон.*

Достоннинг 5-боби сўз таърифи, Низомий Ганжавий ва Амир Хусрав Дехлавий мадҳини ўз ичига олади. Навоий дастлаб сўзга таъриф берар экан, уни энг ажойиб гавҳар, мавж урган денгизга ўxшатади:

*Эй сўз, не бало ажаб гуҳарсен,
Гавҳар неки, баҳри мавжваарсен...
Айтуб совумас тарона сен-сен,
Олиб қурумас хизона сен-сен.*

Низомий Ганжавий мадҳида талмех санъатининг етакчилик қилишини кузатиш мумкин. У фазилатда Турдаги Мусо, қаноатда Қофдаги Анқога ўxшатилади:

*Ҳам Тури фазилат узра Мусо,
Ҳам Қофи қаноат узра Анқо.*

У Ганжада ганж (хазина)дек яшириниб, беш ганж («Хамса»)ни нишон қилиб кетди:

*Ул Ганжада ганждек ниҳони,
Беш ганж қўйуб вале нишони.*

Бобда Дехлавий соҳири ҳинд (ҳинд сеҳргари) таърифи остида келтирилиб, у яратган асарлар фитнагарликда Кашмир ўлкасиdek бўлди дейилади:

*Кўргач бу тилсим соҳири ҳинд,
Жодулиғ ишида моҳири ҳинд...
Ҳар сафҳаи назми гоҳи таҳрир.
Фитна аро бир саводи Кашмир.*

6-боб мавлоно Нуриддин Абдураҳмон Жомий мадҳидадир. Навоий Жомий исмидаги «нур» сўзига алоҳида ургу бериб, унинг оти ҳам, зоти ҳам «нурун ало-нур»дир дейди:

*Сочиб лақаби жаҳон аро нур,
Зоти била нурун ало-нур.*

Навоий бу ўринда Жомий ҳали «Хамса»ни тўлиқ яратмаган бўлса-да (Жомий бешлиги 1481 – 1485 йилларда яратилган, бу вақтга келиб Жомий бешлигидаги фақат 3 достон ёзиб тугалланган эди), лекин ўзининг беш хазинаси, яъни «Силсилат уз-заҳаб», «Тухфат ул-аҳрор», «Субҳат ул-абброр», «Аҳсан ул-қисас» («Юсуф ва Зулайҳо») достонлари ва «Девон»и билан беш хазинага муносиб жавоб айтганини таъкидлайди.

Достоннинг 7-боби замона хукмдори султон Ҳусайн Бойқарога бағишланган. Навоий Ҳусайн Бойқарони шариатнинг ҳимоячиси, адолатпарвар, саховатпеша, бунёдкор шоҳ, фикр илмида Абу Ҳанифа сингари юксак даражага эга шахс сифатида мадҳ қиласида. Шоирнинг ёзишича, у қиличи билан шерни маҳв этишдек қурдатга эга бўлса-да, чумолига шикаст етса кўз

ёшини тиёлмайдиган, шоҳлар орасидаги ўрни фалак юксаклигига бўлгани ҳолда, дарвешлар олдида тупроқдек хокисор подшоҳдир:

*Шер узра қиличи барқ чоқиб.
Мўр ўлса шикаста ёши оқиб.
Дарвеш десам улус уза шоҳ,
Шоҳи дарвеш боракаллоҳ.*

8-боб шаҳзода Бадиuzzамон таърифидадир. Навоий шаҳзоданинг исми «замонасининг гўзали, нодири» эканига ишора қилиб шундай ёзади:

*Гар оти ўлуб замон бадиъи,
Зоти келиб инсу жон бадиъи.
Аллоҳ, Аллоҳ, не от эрур бу,
Не поку хужаста зот эрур бу.*

Бобда Бадиuzzамоннинг адолати, саховати билан бирга қаҳрига ҳам алоҳида таъриф берилади:

*Адли ёрутуб жаҳонни жовид,
Ул адл бошида айни хуршед.
Чун қаҳри шарори кўкка рожиъ,
Ул шин уза нуқта Насри воқиъ.*

Достоннинг 9-боби тун таърифига бағишлиланган. Боб муайян маънода муқаддима билан асосий қисмни боғловчи кўпrik воситасини ўтайди. Бобда шоирнинг қоронғи тунда хаёл отига миниб сайдига чиқиши тасвири берилган. Ишқ водийсига етганда от оқсоқланиб, йўлда давом этолмай қолади. Ёмғир, бўрон аралаш момақалдироқ гулдураб, чақин чақади. Чашин ёруғида шоир саксовулдай тахланиб ётган инсон суюклари, ваҳшний ҳайвонларни кўради. Н.Комиловнинг «Тасаввуф» китобида ёзилишича, бу тасвиirlарнинг ҳаммасида муайян рамз бор. Бу тун ҳажр туни, бу водий эса ишқ водийси, ваҳшний ҳайвонлар ошиқка хуруж этган бало-офатлар, суюклар ишқ қурбонларидан нишона. Ўз, асли, Илоҳдан ажралган мусофири. Гариб руҳ Мажнун шу водийда

якка ўзи бошини эгиб ўтирибди. Шу ўринда иккита ташбех қўлланилганини кўрамиз. Қоронғи тунда бирин-кетин чақмоқ чақиб, унинг ёруғида қабилалар кўзга ташланади, шунда шоир тунни Лайлиниң сочига, чақмоқни эса Лайли юзининг очилишига ўхшатади:

*Андоқки қилиб карашма майли,
Зулф ичра жамолин очса Лайли.*

Лайли юзи бу ўринда илоҳий нур манбаи, узун соchlари – моддий дунё, фироқ тузоқлари («лайли» сўзининг ўзи ҳам тун маъносини билдиради), ана шу нур манбаининг чақмоқлари Мажнун қалби ва вужудидан жой олган. Иккинчи ташбех: Навоий ишқ водийсида «нори айман» (шохлари шуълаланиб турган дараҳт)ни кўради. Қисса бошланиб, Лайли ва Мажнуннинг биринчи учрашуви тасвирангандага шоир шу ташбехни такрорлаб, Мажнунни худди шу шуълали дараҳт қиёфасида чизади, яъни Лайли юзининг шуъласидан Мажнун қалби алангланиб кетади. «Нори айман», аслида, Қуръондаги Мусо ҳикоясига ишорадир. Мусо алайҳиссалом Аллоҳга юзингни кўрсат деб илтижо қилганларида, Аллоҳ бир учқунни Тур тоғи томон йўналтиради. Тур тоғи парчаланиб, қум ҳолига келади, Айман водийси эса ёришиб кетиб, ундаги дараҳтлар машъаладай порлайди. Аллоҳ ишқи мана шундай қудратга эга.

10-бобдан достоннинг асосий қисми бошланади. Бани омир қабиласида узоқ кутилган фарзанд – Қайс дунёга келади. Қайнинг туғилиши, ўсиши тасвирида ҳам илоҳий тақдир сезилиб туради. Туғилгандан ишқ олови билан йўғрилган Қайс ўтга талпинади:

*Ўт кўрсаки майл этиб ниҳоний,
Ишқ ўти тасаввур айлаб они.*

Уни 4 – 5 ёшларидага Лайли қабиласига ўқишига берадилар. Баҳор кунларининг бирида Лайли билан боф сайрида учрашиб қолган Қайс уни кўриб хушини йўқотади. Навоий бу ўринда Лайлиниң ҳусни гулзорни чароғон қилиб юборди ва гулзордаги бир ниҳол (Қайс)ни хазон этди деб ёзади:

Шод ўлди жамолидин дабистон,
Андоқку баҳордин гулистон
Лекин бу баҳори зиндагоний
Бир нахлни айлади хазоний.

Тасаввуф таълимотига кўра, гулистон дарвешнинг руҳияти, уни Ҳақ ишқи эгаллаб олади ва у бетоқатланиб, ҳушини йўқотади. Шу тарзда мажзуби солик (Ҳақдан жазба етган, устози ҳам, пири ҳам ишқ бўлган, мақомларни эгалламасдан туриб ҳол мартабасига эришган ошиқ)нинг саргузаштлари бошланади. Қайс шу тариқа Лайлини ҳар кўрганида ҳушидан кетади. Халқ орасида Мажнун лақаби билан овоза бўлади:

«Лайли, Лайли!» – дебон чекиб ун.
Эл деб: «Мажнундур. ушбу мажнун!»

Мажнуннинг ота-онаси уни Лайлига уйлантириш учун совчи юборадилар. Лекин Лайлининг отаси қизини ақл-хушдан бегона бир «девона»га беришдан ор қиласи ва Мажнуннинг Лайли қабиласига келишини тақиқлаб қўяди. Мажнуннинг отаси қабиладошлиари билан маслаҳатлашиб Қайсни занжирбанд қиласи. Лекин ишқ оташи таъсиридан занжир узилиб, Мажнун уйидан чиқиб кетади. У бедард қабиладошлиарини ҳам, яқинларини ҳам, умуман, жамиятни унутиш даражасига боради, зеро. бу ҳолат ҳақиқий ошиқ учун хос хусусиятдир:

Ўз отию қавму хайли оти
Йўқ ёдіда, гайри Лайли оти.

Тасаввуфда бу ҳолат «тафрид» (ёлғизланиш) деб аталади. Ошиқ шундай бир ҳол мартабасини эгаллайдики, яқинларидан, умуман, инсонлардан безор бўлади; яккаликни, ёлғизликни кўмсайди. Ёлғизланиш дилнинг Ҳаққа юзланиши учун имкон яратади.

Қайснинг отаси ўғлининг дардига шифо бўлади деган умидда ҳажмуносабати билан Каъбазиёратига олиб боради. Қариндошлар Қайс Каъбани тавоф этса, аҳволи яхшиланади деб умид қиласидар. Лекин Мажнун Аллоҳга муножот қилиб Лайли ишқини кўнгли-

га мустаҳкамроқ жо этишини сўрайди. Мазкур лавҳа достоннинг энг таъсирчан ўринларидан бири бўлиб, қирқ уч байтдан иборат. Бу ўзига хос «муножотнома»да йигирма тўрт ўринда «ишқ» сўзидан фойдаланилган. Бу тасодифий эмас, албатта. Навоий ушбу сўзни турли поэтик унсурлар ва ритмик воситалар билан уйғунликда қўллаб оҳангнинг турли-туман жилваланишларига эришади.

Дастлаб ишқ ўти билан жаҳонни ёндирган «ҳакими доно»га соқин мурожаат билан бошланган мазкур муножот аста-секин тантанавор оҳанг касб эта боради ва бунда «ишқ» сўзининг ритмик зарб (мантиқий ургу асосига қурилган, ижодкор айтмоқчи бўлган фикр ёки ифодаламоқчи бўлган кучли ҳис-туйғуни ўзида акс эттирувчи ритмик бирлиқ) даражасига кўтарилгани муҳим омил бўлиб хизмат қиласди:

Чек айнума ишқ тўтиёсин.
Ур қалбима ишқ кимиёсин!

Мазкур байтда «ишқ» сўзи ҳожиб вазифасида келган бўлиб, байт мисраларидағи ҳар бир сўзниң ўзаро тенг устунлар асосида жойлашиши ва бунинг натижасида муайян ритмик паузанинг қўлтанилгани оҳангнинг жозибадорлигини таъминлаган.

Кейинги байтда «ишқ» сўзи «эт» кўмакчи феъли билан бири-киб радиф вазифасида келган ва энди ритмик зарб радиф билан бирлиқ касб этган:

Қўнглумга фазо ҳарими ишқ эт,
Жонимға гизо насими ишқ эт!

Мажнун ўз муножотида ишқни шу тариқа улуғлар экан, ундан ишқ ва Лайлини унутишни сўраган кишиларга нисбатан ачиниш ҳисларини намоён қиласди ва ҳатто тангридан уларни афв этишини сўрайди:

Аллоҳ-Аллоҳ, бу не сўз ўлғай,
Ул қавмға тенгри узр қўлғай.

«Тасаввуф» китобида келтирилишича, Каъба зиёрати лавҳаси тасаввуф аҳлининг ҳар қандай суратлар, тимсолларга сифиниши

инкор этишларига ишорадир. Яъни Илоҳнинг ўзига ошиқ бўлган, фақат Уни деб ёнган кишига бу ишлар ортиқадир.

Мажнуннинг отаси ўғлини уйга қайтариб олиб келади ва у яна саҳрода чиқиб кетади. Саҳрода у овга чиққан лашкарбоши Навфални кўриб қолади. Навфал ҳам бир вақтлар ишқ дардига учрагани учун Мажнуннинг қалбини тушунади, унга раҳми келади:

*Навфал дағи ишқ кўрган эрди.
Ғам дашти аро югурган эрди.*

Навфал ишқ дардидан хабардор бўлса-да, лекин Мажнун даржасига кўтарила олмаган, унинг сулуқдаги мақоми маълум бир босқичга етгандан кейин тўхтаб қолган эди. Шу сабабли у Мажнунни Лайлига уйлантириш билан унинг дардига малҳам топиш мумкин деб ўйлайди ва Лайлига совчи юборади. Лекин Лайлининг отаси рози бўлмагач, уруш очади. Лайлининг отаси урушда ёнгилишини сезиб қизини ўлдиришга қасд қиласди. Бу ҳолат Мажнунга туш орқали аён бўлгач, Навфалдан урушни тўхташини сўрайди. Навфал Мажнун учун яна бир чора воситаси сифатида ўз қизини Мажнунга беришга қарор қиласди. Лайлини эса бани асад қабиласининг бошлиғи Ибн Саломга унаштирадилар. Навфалнинг қизи бошқа инсонни севишини айтиб Мажнунга ака-сингил бўлишни таклиф қиласди. Ибн Саломнинг эса қуянчик (тутқаноқ) касали қўзғаб, беҳуш ийқилади. Лайли ва Мажнун ишқ даштида учрашадилар.

Лайли бу дунёдан кетиш фурсати яқинлашганини сезиб онасиға, Мажнун келса, уни ҳузурига киритишлиарини васият қиласди. Мажнун Лайлининг бу дунёдан кетаётганини илоҳий бир куч билан сезиб унинг қабиласи томон келади:

*Юз урди қабила сори холи.
Оғзида тараннуми висоли.*

Шу тариқа умр бўйи бир-бирининг ишқида куйган, висолига интилганлар Руҳи мутлақ томон равона бўладилар.

Достон хотимаси уч боб (36 – 38)ни ўз ичига олади. 36-боб «Ишқ таърифи»га бағишлиланган бўлиб, бунда Навоий ишқни кимёга ва оламни кўрсатувчи кўзгуга ўхшатади:

Эй ишқ, ғариб кимиёсен,
Бал ойинайи жаҳоннамосен.

Ривоятларга кўра, қадимда кимёгарлар мис ва бошқа маъданларни юқори ҳарорат таъсирида олтинга айлантириш мумкин деб ҳисоблаганлар. Навоий бу ўринда шу афсонага ишора қилиб, одам, аслида, тупроқдан яралган, аммо ишқ оловининг «кимё»лиги уни олтинга айлантиради, яъни ишқ инсон вужудини турли хил чиқиндилар: жисмоний талаблар ва нафсоний истаклардан поклайдиган оташдир деган фикрни келтиради:

Чун холису поку беғаш ўлди,
Олтин неки кимиёваш ўлди.

Покланиш, яъни «кимё»ланиш ишқи мажозий бўлиб, ундан «олтин»га айланиб чиққан ошиқ энди ўзлигидан қутулади ва қаёққа қараса ҳақиқий Ёр (Ҳақ)ни кўради:

Чун боққали ихтиёр топти,
Ҳар сорики боқти ёр топти.
Ҳам нақши вужудин этти фони,
Ҳам топти бақойи жовидони.

Бу эса қалбнинг кўзгуга, яъни «ойинаи жаҳоннамо»га айланиши, бошқача айтганда, ишқи ҳақиқийга молик бўлишдир.

Достоннинг 37-боби султон Ҳусайн Бойқаро акасининг ўғли шаҳзода султон Увайс баҳодир мадҳига бағишлиланган. Навоий шаҳзодани таърифу тавсиф қилиш асносида ғоят усталик билан унга шариат, адлу ҳиммат бобида насиҳатлар ҳам қиласиди ва замона султони Ҳусайн Бойқарони унга ибрат қилиб кўрсатади.

Достоннинг сўнгги боби «дард навҳаси» (йигиси)нинг якуни ҳақида бўлиб, шоир бунда достонни тугаллагани учун Аллоҳга шукроня келтиради. Навоийнинг достон моҳияти ҳақида айтган энг муҳим фикрлари айнан шу бобда тажассум топган:

Сүгін нечаким узоттим охир.
 Йиғлай-йиғлай тұгаттим охир...
 Ізмоқта бу ишқи жовидона,
 Мақсұдым әмас әди фасона.
 Мазмұниға бўлди рух майли.
 Афсона әди аниң туфайли...
 Мен туркча бошлабон ривоят.
 Құлдым бу фасонаны ҳикоят
 Ким, шұхрати чун жаҳонға тұлғай.
 Турк әлига доги баҳра бўлғай...

«Лайли ва Мажнун» достонидан келиб чиқадиган хулоса шуки, бу дунёда яшовчи ҳар бир инсон ошиқлик йўлини тутиб, ўзини ўлимга әмас, балки васл майини ичишга тайёрлаши керак, зоро. бу дунёнинг бирдан-бир мазмуни ҳам шу. Рухи мутлақни тасаввур қилишда инсон ақли ва онги ожизлик қиласы, шу сабабли Навоий уни мазҳар – Лайли тимсолида яратади.

Достон ҳазаж баҳрининг ҳазажи мусаддаси ахраби мақбузи маҳзуф (рукнлари ва тақтии: мағфұлу мағоилун фаявлун – – V / V – V – / V – –) вазнида ёзилган. Лекин достонда мазкур вазн билан бирга қўшимча тарзда ҳазажи мусаддаси ахрами аштари маҳзуф (рукнлари ва тақтии: мағфұлу фоилун фаявлун – – – / – V – / V –) вазнининг ҳам қўлланилганини кузатиш мумкин. Бу ҳолат тасодифий бўлмай, достон мазмуни ва гояси билан чамбар-час боғлиқ. Достондаги 3623 байтдан 240 мисра айнан мана шу ритмик вариация (бир вазннинг ички имкониятлар асосида янги вариантларга эга бўлиши) да яратилган бўлиб, достондаги зиддиятли воқеалар, асар қаҳрамонларининг чуқур руҳий изтироблари тасвири, қаҳрамонлар руҳиятининг табиат тасвири билан боғлиқ баёни, қаҳрамонлар ҳайрати акс этган мисралар, лирик чекиниш пайтида мазкур вариацияга мурожаат қилинганини қўрамиз.

Таянч тушунчалар

- тажаллий
- мажзуби солик
- тафрид

- кимёланиш
- ойинаи жаҳоннамо
- ритмик зарб
- ритмик вариация
- ҳазажи мусаддаси ахраби мақбузи маҳзуф
- ҳазажи мусаддаси ахрами аштари маҳзуф

Савол ва топшириқлар:

1. Нума деб ўйлайсиз, нега *Лайли ва Мажнун* мавзусидаги достонлар мусулмон Шарқи адабиётида бунчалик кенг тар-
қалган?

2. Бадиий адабиётда *Лайли ва Мажнун* мавзусидаги қисса достон шаклида биринчи марта ким томонидан яратилди?

3. Навоий «*Лайли ва Мажнун*» достони муқаддимасида қайси масалаларга тўхтатланган?

4. Достон моҳиятнан қандай ишқни улуғлайди?

5. Мажнун ва Фарҳод севгисининг муштарак ва фарқли жиҳатлари нимада деб ўйлайсиз?

6. Навоий талқин қилган «мажзуби солик» ва «солики мажзуб» йўлларининг «*Лайли ва Мажнун*» ҳамда «*Фарҳод ва Ширин*» достонларига алоқадорлик жиҳати борми?

7. Достонда қўлланган ритмик вариациялар ҳақида фикр юритинг.

Адабиётлар:

1. Навоий Алишер. *Лайли ва Мажнун*. Мукаммал асарлар тўп-
лами. 20 жилдлик. – Тошкент: Фан, 1992. 9-жилд.
2. Navoiy Alisher. *Layli va Majnun*. – Тошкент: G'ulom, 2006.
3. Навоий Алишер. *Лайли ва Мажнун* / Насрий баён муваллифи В.Раҳмонов, Н.Норқулов. – Тошкент: Адабиёт ва санъат, 1990.
4. Комилов Н. Тасаввубуф. – Тошкент: Movarounnahr – O'zbekiston, 2009.
5. Аҳмедов Т. Алишер Навоийнинг «*Лайли ва Мажнун*» досто-
ни. – Тошкент: Фан, 1970.

6. Назруллаева С. Тема «Лейли и Меджнун» в истории литературы народов Советского Востока. – Ташкент: Фан, 1983.
7. Қаюмов А. Ишқ водийси чечаклари. – Тошкент: Адабиёт ва санъат, 1985.
8. Юсупова Д. Алишер Навоий «Хамса»сида мазмун ва ритм-нинг бадиий уйғунлиги. – Тошкент: МУМТОЗ СҮЗ, 2011.

«САБЬАИ САЙЁР» ДОСТОНИНИНГ ТУЗИЛИШИ, ҲИКОЯТЛАР ТАХЛИЛИ

РЕЖА:

1. «Сабъаи сайёр» достонининг маркибий тузилиши.
2. Баҳром ва Диlorом тимсоллари.
3. Етти қасрдаги етти мусоғир ҳикоятлари.
4. Достоннинг бадиий хусусиятлари.

Алишер Навоий «Хамса»сининг тўртинчи достони «Сабъаи сайёр» деб аталиб, 1484 йилда ёзиб тугалланган. Асарнинг бош қаҳрамони Баҳром бўлиб, тарихий шахс сифатида Эроннинг сосоний ҳукмдори Вараҳран V (420 – 438 йилларда подшолик қилган) билан боғлиқ. Бу ҳукмдор қулон (ёввойи кийик)ни овлашга ниҳоятда ўч бўлгани учун, халқ орасида Баҳром Гўр (қулон) лақаби билан шуҳрат топган. Шарқ мамлакатларида Марс (Миррих) юлдузи Баҳром деб аталиб, жанг жадаллар ҳомийси сифатида тасвирланади.

Баҳром тимсоли дастлаб форсий адабиётда Абулқосим Фирдавсийнинг «Шоҳнома»сида тасвирланган. «Шоҳнома»да Баҳром Гўр ҳақидаги воқеа достоннинг фақат бир фаслини ташкил этиб, унда Баҳромнинг туғилиши, таҳтга чиқиши, мамлакатни идора қилиш тадбирлари, ов вақтида ўз канизаги Озода билан тўқнашувига доир воқеалар тасвирланган.

«Шоҳнома»даги Баҳром Гўр ва унинг канизаги орасидаги бу тўқнашув лавҳаси Низомий томонидан қайта ишланиб, машҳур «Ҳафт пайкар» достони вужудга келади. Низомий Баҳромнинг канизак билан боғлиқ ҳикоясини қолипловчи ҳикоя қилиб олиб, унга 7 ҳикоят киритади.

200 йил ўтгач Хусрав Дехлавий унга жавоб тарзида «Ҳашт беҳишт» достонини яратиб, 7 ҳикоятни ҳинд эпосидан олади.

Туркий тилда биринчи бўлиб бу мавзуни Алишер Навоий қаламга олади ва ўз достонини «Сабъаи сайёр» деб атайди. «Сабъаи сайёр» достони 38 боб, 5009 байтдан иборат, шундан 11 бобни муқаддима ташкил қиласи.

Достон муқаддимаси анъанавий ҳамд билан бошланади. Навоий Аллоҳни оламнинг яратувчиси сифатида мадҳ этар экан,

достоннинг мазмуни тақозоси билан биринчи бобдаёт етти рақамига алоҳида эътиборни қаратиб, илтизом (бир сўзни бирор парчанинг барча мисра ёки байтларида қўллаб, шу сўзнинг муҳимлигини таъкидлаш) бадиий санъати воситасида фалакнинг етти қават эканлиги, етти гумбаздан ташкил топгани, ер юзи етти иқлимга бўлингани, етти кўк, етти юлдуз кабилар ҳақида фикр юритади. Шунингдек, Баҳром ва Дилором сўзларини асл ва мажозий маъноларда қўллаб, сайёralар олами. дунёнинг яратилиши ҳақида ўз фалсафий қарашларини баён қиласди, оламнинг яратилишини тасаввудаги ваҳдат ул-вужуд фалсафаси асосида баён этади:

*Ишқ сенсен доғию ошиқсен,
Яна маъшуқлуққа лойиқсен.
Айни маъшуқлуқда жилваи зот.
Ўзини кўргали тилаб миръот.
Хуснунга ҳар дам ўзга сурат ўлуб.
Кўзгу тақрори ҳам зарурат ўлуб.
Неча хусн ичра жилва зоҳир анга,
Кўзгулук айлабон мазоҳир анга...
Сенсену сендин ўзга худ нима йўқ,
Гар кўрунса сен ўлғунг ул нима ўқ.*

Достоннинг 2-боби муножот бўлиб, бунда буюк шоирнинг яратувчига мурожаати, нажот умиди, тавба ва илтижолари ўз ифодасини топган:

*Қодиро, ул заифу осиймен
Ки, бошимдин-аёқ маосиймен.*

Навоий ташбех санъати воситасида ўзини тоат вақтида хаста чумолига, исён вақтида ваҳший шерга, нафсини баҳайбат филга, кўнглини нимжон пашшага ўхшатади:

*Toat айларда мўри хаста барин,
Лек исён маҳали шери арин.
Нимжон пашша қўнглум айла гумон,
Зўри нафсим нечукки пили дамон.*

Шунингдек, муножотда яратилаётган асарнинг шуҳратини оламга ёйишни сўраб қилинган илтижо ҳам мавжудлигини кўрамиз:

*Шуҳратин олам ичра пайдо қил,
Олам аҳлин аларга шайдо қил.*

Навбатдаги боб Мұхаммад (с.а.в.) мадҳига бағишлиданади. Пайғамбарнинг асли қурайший, ери абтаҳи, мазҳаби ҳошимий, манзили Ясриб эканлиги айтилгач, унинг нури «Лот» билан «Уззо»ни шикастлагани, исмининг ҳарфлари ечишганда иккита «мим» ҳарфининг этаклари осилиб, куфр эли мотамининг зулматига, дин элининг эса улуғворлигига айланиши айтилади.

4-боб меъроj туни таърифига бағишлиданади. Бунда пайғамбаримиз ҳузурига элчи (Жаброил) келиб, Ҳақнинг саломини етказгани ва ошиқ ўз маҳбубининг висолига эришмоқ ниятида эканини хабар қилгани, пайғамбаримиз яратувчининг ҳузурига борганларида умматларининг гуноҳини кечиришни илтимос қилганлари ва барча истаклари бирма-бир қабул қилингани ҳақида сўз боради.

5-боб сўз таърифида. Навоий бу бобда сўзга юксак баҳо берар экан, шундай ёзади:

*Сўз келиб аввалу жаҳон сўнгра,
Не жаҳон, кавн ила макон сўнгра...
Аллоҳ. Аллоҳ. не сўздурур бу сўз,
Мундин ортуқ яна бўлурму сўз.
Жисм бўстониға шажар сўздур.
Руҳ ашжориға самар сўздур.*

6-боб улуғ салафлар – Низомий ва Дехлавий мадҳига бағишлиланган. Шоир дастлаб бадиий адабиётдаги икки адабий тур, яъни назм ва наср таърифига тўхталиб, уларни бир-бирига қиёслайди ва назмнинг насрдан устунлигини исботлар экан, шеърий асарларда чиройли, таъсирли избора ҳамда бадиий санъатларни қўплаб қўллаш, инжуни ипга тергандек мисралар тизиш мумкин, наср эса сочиб юборилган жавоҳирдек гўзалликдан маҳрум деб ёзади. Шунингдек, назм шакллари орасида маснавийга алоҳида тўхталиб, уни «васиъ майдон» (кенг майдон) деб атайди:

*Маснавийким. бурун дебим они,
Сўзда келди васиъ майдони.*

Низомий хақида сўз юритар экан, у бу майдондан тўпни олиб чиқиб кетди, яъни гўй ва чавгон ўйинида ютди: маснавий яратишда биринчи бўлди дейди:

*Қойили хуш каломи зебогўй
Ким. бу майдон элидин элитти гўй...
Аҳли назм афсаҳул каломи ул.
«Хамса»нинг нозими Низомий ул.*

Хусрав Дехлавийни Низомий бешлигига жавоб ёзган ижодкор сифатида таърифлар экан, уни «ҳинд сеҳргари, қаро бало, оғати Худо» каби ташбеҳлар билан мадҳ қилади. Шунингдек, Навоий бу икки хамсанависни шатранж ўйинидаги оқ оту (Низомий) қора филга (Дехлавий), ўзини оддий пиёдага нисбат беради:

*Чекса шатранж ики саф оқу қаро.
Хас не қилғай. чу тушса арса аро.
Ўзни топқай бисот аро пайваст,
От ила пил аёғи остида паст.*

Достоннинг 7-боби «ҳазрат шайхулислом мавлоно Нуриддин Абдураҳмон Жомий» мадҳига бағишланган. Навоий уни фазл конию илм дарёси деб атар экан, устозини араб тилидаги билимдонлиги жиҳатидан «Кофия» асарининг муаллифи Ибн Ҳожибга, тафсир илмида юзта Ибн Ҳожарга, фикҳ илмида Имоми Аъзамга ўхшатади. Жомийнинг бу соҳаларда яратган асарлари, девонлари ва достонларининг номларини келтиради.

8-боб салафларнинг нуқсонлари ҳақида бўлиб, шоир боб сарлавҳасида устозлар асарларига мулоҳаза билдираётгани учун узр сўрайди. Навоий бу бобда достон яратишдан олдин туш кўрганини, тушида 7 гумбаз, 7 гумбаз ичида 7 хил рангдаги мутасаддийни кўрганини, шу ерда 7 кун юриб 7 афсона тинглаганини, бир мўйсафид унга аввалги достонлардаги қусурларни тузатишни сўраганини, уйқудан уйғонгач муаббир (туш таъбирчиси) айтган далиллардан сўнг достон ёзишга киришганини айтади. Шундан кейин

ўзигача ёэилган Баҳром ҳақидаги достонларни синчиклаб ўқиб чиқанини таъкидлаб, устозларнинг ҳурматини ўз ўрнига қўйган ҳолда уларга учта эътиroz билдиради:

*Бири буким, йўқ анда мояйи дард,
Қилдилар ишқ сўзидин ани фард.*

Шоир фикрича, олдинги хамсанависларнинг биринчи айби дарду ғамга етарлича аҳамият бермасдан, уни ишқдан холи тасвирлаганликларидаидир.

*Яна бири буким, анда баъзи иш
Зоҳирлан номуносабат тушмиш:
Бўйла түхматки, айш учун Баҳром
Ясади етти қаср сургали ком.
Етти иқлим шоҳидин ети қиз,
Ҳар бири лутфу ҳусни ғоятсиз...
Үйқу комин олурға мастона,
Шўхларға буюрди афсона...
Анга худ ғафлат ўлди даъбу сифат,
Үйқусиға фасона не ҳожат?*

Баҳромнинг айши учун еттита қаср қурилиши, етти маликанинг ўзи мастиликдан ғафлат ҳолатига етган шоҳни ухлатиш учун афсоналар айтишлари асосиз дейди Навоий. Бунинг устига, агар афсона айтиш зарур бўлса, улардан бошқа қиссаҳон йўқими迪 деган савонни ҳам қўяди.

Салафларнинг учинчи камчиликлари дардсиз ва нодон кишининг саргузаштларини кўрсатишни мақсад қилиб олганларида эди:

*Бўйла нодон учун ёзиб авсоф,
Анга қилгайлар ўзларин вассоф.*

Боб сўнгидаги Навоий ғоят камтарлик билан ўзини салафларнинг фақир шогирди атаб, мен гўё пашшадек бўлиб фил ишини қилмоқчиман, осмон томига нарвон, қуёшга шамдон ясамоқчиман, ўргимчак ипидан каманд қилиб аждаҳони тутмоқчиман дейди ва Алллоҳдан достон ёзишда мадад сўрайди.

9-боб султон Ҳусайн Бойқаро мадҳи ҳақидадир. Бу бобда Навоий фалақдаги барча сайёralарга бирма-бир мурожаат қилиб уларни ўз ҳунарларидан бир оз тинмоқقا чақиради, шоҳ мадҳида қалам сурмоқчилигини айтади. Шоҳнинг икки томонлама хон авлоди бўлиб, улуғ отаси Чингизхон, онаси Алланқуво эканини айтади. Навоий Ҳусайн Бойқарони чексиз саховат, чумолига ҳам марҳаматли адолат эгаси дея таърифлаб, адолат бобида ҳатто Анушервон ҳам унинг олдида хижолат чекади деб ёзади:

*Анда Нуширвон керак боққай.
Бошини эргатиб овуч қоққай.
Чун қилиб ёд ўз адолатидин,
Мутагаййир бўлуб хижолатидин.*

10-боб – Билқиси Соний – Хадичабегим мадҳига бағишлиланган бўлиб, Навоий талмех санъати воситасида Хадичабегимни пайғамбарлар аёллари – Сораи Узмо (Иброҳим пайғамбарнинг рафиқалари) ва Хадичаи Кубро (Муҳаммад (с.а.в.)нинг аёллари)га ўхшатади. Навоийнинг ёзишича, унинг гузаллигидан сунбул ва нарғис гуллари ташвишу уятда. Шунингдек, Навоий Хадичабегимнинг икки фарзанди – Музаффар мирзо ва Шоҳ Фарид мирзо (шоир Фаридий) ҳақида ҳам тўхталиб ўтиб, уларни икки саодатли юлдуз, уларнинг онасини ойу қўёшга ўхшатади:

*Ойу кун йўқ агарчи монандинг,
Икки саъд ахтар икки фарзандинг.*

11-боб Баҳром тарихи ҳақидадир. Навоий Баҳромни сосонийлар ҳукмдори Яздижурднинг ўғли бўлса-да, отасидан фарқли равишда, эзгу ишлар билан шуғулланди, отаси нимани бузган бўлса, у барчасин қайтадан тузди дейди:

*Ҳар не ул бузди, бу борин тузди.
Бу борин тузди, ҳар не ул бузди.
Кимни ўлтурди ул қилиб мажруҳ.
Бу қўйуб марҳам, ўлди жисмиға руҳ.*

Навоий салафлар бўйича шоҳ Баҳром тарихини қисқача баён этиб, энди мен айтадиган қисса аввалгиларидан фарқ қиласди дейди ва Аллоҳга шуқрона келтириб Баҳром қиссасини бошлайди.

Асосий воқеалар ўн иккинчи бобдан ибтидо топади. Етти иқлим шоҳи бўлган Баҳром ов қилиб юриб рассом Монийни учратиб қолади. Моний Чинда тенги йўқ бир гўзал Дилором ҳақида хабар берид, унинг ўзи чизган суратини шоҳга тақдим этади. Шоҳ суратни кўриши билан Дилоромга ошиқ бўлиб қолади ва Чин мамлакатининг бир йиллик хирожини тўлаб қизни саройга келтиради. Шундан кейин Баҳром қизга бутунлай маҳлиё бўлиб, давлат, мамлакат ишларини унугтади. Фирдавсий «Шоҳнома»сида тасвиirlанганидек, овда кийик ҳодисаси юз беради. Дилором Баҳромнинг мерғанлик маҳоратини «машқнинг натижаси» деб баҳолайди. Шоҳ мастликда қизнинг оёқ-қўлини ўз соchlари билан боғлаб биёбонга ташлаб келишни буюради. Эртаси ғазаб ва мастлик тарқаб, аф-сусланганидан кейин уни ўзи бориб излайди, лекин топа олмайди. Ҳижрон азобидан ўзини бутунлай йўқотади:

*Жони икки бало аросинда,
Мўр икки аждаҳо аросинда.
Не ўлук эрди, не тирик сони,
Бўлмас эрди тирик демак они.*

Шоҳнинг аҳволи оғирлаша боради. Навоий бу ўринда шоҳ Баҳромда энди чин маънода ошиқлик сифатлари пайдо бўлаётганига эътибор қаратади, зеро, руҳий изтироблар ва ҳижрон дарди ишқнинг ортишига сабаб бўлади. Изтиробдан ўзини бутунлай йўқотган Баҳромнинг аввал фалакка, сўнг ҳалқи ва қўшинига муружаат қилиб нотавон жонини бу азоблардан қутқаришини сўраб чеккан фарёдлари достоннинг 16- ва 17-бобларида ниҳоятда таъсирли тарзда ифодаланганини кўрамиз:

*Манга не қилдинг, эй сипеҳр, охир,
Йўқ эмиш сенда зарра меҳр, охир!
Меҳрисизлик ишим аро қилдинг,
Рўзгорим юзин қаро қилдинг...
Найлайн бу жаҳонни жонсиз мен?
Бал жаҳон бирла жонни онсиз мен?*

*Жонни олғилки, түймишам, биллох!
 Күнгүл ўлмакка қўймишам, биллоҳ!
 Ёрлиқ қайда кетти, ёронлар?
 Йўқ мусулмонлик, эй мусулмонлар!
 Ўлтурууб ғаврима етинг охир!
 Минг ўлумдин халос этинг охир!*

Сарой ахли ташвишга тушадилар. 400 ҳаким ва табиб тўпланиб, икки йил давомида шоҳни даволайдилар. Шоҳ бир оз ўзига келгандай бўлади. Маслаҳат билан етти иқлим шоҳи етти қаср қурадилар. Бу етти қаср етти шоҳнинг мамлакатига олиб борадиган йўл устида барпо этилади. Рассом Моний унинг ҳар бирини алоҳида бир ранг билан безайди. Баҳром уларни томоша қилар экан, касали тузала бошлияди. Етти рангдаги етти қаср битгач, етти иқлим шоҳининг етти қизи Баҳром билан никоҳланади. Етти қасрнинг ҳар бири етти сайёрадан бирининг рангига мос бўлиб, ҳафтанинг шу сайёра ҳомий ҳисобланган кунига хос эди. Етти қаср тасвирини ўқир эканмиз, Навоий ҳар бир қасрдаги шоҳ, малика ва мусофир ҳамда жиҳозлар тасвирини беришда рангларнинг турфа хил номланишларидан усталик билан фойдаланганига гувоҳ бўламиз.

Шанба куни учун шу куннинг ҳомийси Зуҳал (Сатурн) сайёрасининг рангига мос қора – мушкфом қасрда шоҳ Баҳром ҳиндистонлик сайёхнинг Фаррух ва Ахий ҳақидаги ҳикоятини тинглайди. Унга кўра, Ҳинд мамлакати подшоси Жасратхоннинг ақлу ҳуснда тенгсиз ўғли шаҳзода Фаррух тушида бир паривашни қўриб севиб қолади. Ўша санамга етишиш ишқида сафарга чиққан шаҳзода Ҳалаб шаҳрида тушида кўрган маҳвашни учратиб ҳушидан айрилади ва тақдир тақозоси билан биргина палосга ўраниб, оғир аҳволда қолганида, унга саховати билан ном қозонган Ахий ёрдам кўрсатади. У билан сұхбатда бўлган Ахий Фаррухнинг заковатига қойил қолади ва шаҳзоданинг дардига даво топишни чин дилдан хоҳлайди. Ниҳоят, Фаррухнинг ишқи тушган гўзал ўз аёли эканини билиб олади ва жуфтни ҳалолини талоқ қилиб, Фаррухга никоҳлаб беради. Фаррух ўз юртига қайтади, отаси вафот этгани учун, тахтга ўтиради. Бу орада Ахийнинг ишлари орқага кетади, тухматга учрайди, ўз юритидан қочиб, жон сақлаб қолади. Фаррух уйлангач Ахийнинг мардлигидан ҳайратга тушади, аёлни ўзига сингил каби тутади ва дўстини излайди. Ахий эса Ҳинд мулкига бориб қолади,

шу ерда икки дўст топишади, Фаррух синглим дея Ахийга ўз аёлни катта тўй билан никоҳлаб беради. Шу тариқа улар чин дўст сифатида бир-биридан ёрдам ва меҳрини аямай узоқ умр кечира-дилар. Мазкур ҳикоят якунида сайёҳ шоҳ Баҳромга ўзининг Ахий авлодидан эканини маълум қиласи. Шоҳ уни сийлаб саройда олиб қолади.

Якшанба куни унинг ҳомийси Қуёш сайёрасининг рангига мос сариқ қасрда шоҳ Баҳром румлик сайёҳнинг Зайд Захҳоб ҳақида-ги ҳикоятини тинглайди. Унга кўра, жуда ўткир билим эгаси бўлган Зайд Захҳоб исмли заргар Рум мамлакати подшосининг энг яқин дўсти эди. У шоҳнинг ишончини қозонган бўлиб, ҳукмдор у билан ҳар бир ишда маслаҳатлашарди. Бир куни Зайд Захҳоб шоҳга олтин таҳт ясад беришни таклиф қиласи. Шоҳ кўнади ва хазинадан икки минг ботмон олтинни заргарга олиб беради. Зайд Захҳоб сирти олтин билан қопланган, лекин ички томони кумуш билан тўлдирилган таҳт ясайди. Қолган олтинларни эса ўзлаштириб юборади. Шоҳ бундан бехабар мазкур ҳашаматли таҳтга чиқиб қойил қиласи. Зайд Захҳобнинг душманлари шоҳга унинг фири-бини маълум қиласидилар. Шоҳ Зайд Захҳобни зинданга ташлайди. Зайд зиндандан қочиб, Қустантанияга бориб, бутхонада роҳиблик қила бошлайди. У ерда ҳаммани ўзига муҳлис қилиб, бутхонанинг олтиндан ясалган барча буюмларини шиша ва бошқа металлар билан алмаштириб қўяди. Кейин ўз муҳлисларига бу юртни тарк этишини айтганда, ҳамма уни йиғлаб кузатади, Зайд кета туриб уларга бир хат қолдиргани ҳақида маълум қиласи. «Роҳиб» кет-гач, муҳлислари унинг хатини топиб кўзга сурисб ўқисалар, унда Зайднинг ҳамма кирдикорлари битилган бўлади. Бутпастлар оҳ-воҳ қилиб қолаверадилар. Зайд эса Румга қайтиб, бемор бў-либ қолган шоҳни даволайди, қайтадан унинг ишончига кириб, душманларини жазолайди. Ҳикоя якунлангач, сайёҳ ўзининг Рум мамлакатидан, Зайд Захҳобнинг авлодларидан бири эканлигини айтади. Шоҳ Баҳром бу сайёҳга ҳам мурувват қўрсатиб саройда олиб қолади.

Душанба куни шу кун ҳомийси Ой сайёрасининг рангига мос яшил қасрда шоҳ Баҳром шаҳрисабзлик сайёҳдан Саъд ҳақида-ги ҳикоятини тинглайди. Унга кўра, мисрлик бой хожанинг камолга етган ўғли Саъд отаси каби мусофиirlарни меҳмон қилишни хуш кўрар эди. Бир куни унинг даргоҳига шаҳрисабзлик икки сайёҳ ке-

либ, ўз юртларидаги ғаройиб хусусиятли дайр – бутхона ҳақида айтиб берадилар. Мазкур бутхонанинг ўзига хос томони шунда эдики, кимки у ерда бир кун тунаса, туш кўрарди ва туши, албатта, ўнг келарди. Саъд шу бутхонага бориш ишқига тушади ва отасининг розилигини олиб сафарга отланади. Унга шаҳрисабзлик икки мусофири ҳамроҳлик қиласидилар. Дайрга етиб борган Саъд туш кўради. Туш таъсирида хаёлга ботиб ўтиrsa, эшиқдан бир мўйсафид кириб келади. Мўйсафид унга ўз тақдирини айтиб беради ва Саъдни анча вактдан буён кутаётганини маълум қиласиди. Саъд бу донишманд мўйсафиднинг маслаҳат ва кўрсатмалари билан ҳаракат қиласиди. Узоқ саргузаштларни, синовларни бошдан кечириб, Гулруҳ исмли гўзалнинг васлига етишади. Сайёҳ ҳикоятни якунлагач ўзининг Шаҳрисабздан, Саъд авлодларидан бири эканини маълум қиласиди. Шоҳ Баҳром сайёҳни Шаҳрисабзга волий этиб тайинлайди. Умуман олганда, ҳикоятнинг бош қахрамони Саъдининг саргузаштлари Навоийнинг «Фарҳод ва Ширин» достонидаги Фарҳод билан боғлиқ воқеаларни ёдга солади.

Ҳомийси Мирриҳ (Марс) бўлган сесанба кунида Мирриҳ рангига мос қизил қасрда шоҳ Баҳром навбатдаги сайёҳдан шоҳ Жуна ва унинг дўсти Масъуд ҳақидаги қиссани тинглайди. Ровий шоҳга Деҳлида сultonлик қилган Жунанинг саҳовати чексиз эканини ҳикоя қилиш билан ўз қиссанини бошлайди. Сulton Жуна шу қадар саҳоватли бўлиб, саҳиyllиги чегара билмасди. Бир куни бир мусофири унинг меҳмони бўлиб, кўзгу совға қиласди. Кўзгу рост гапирган одамнинг юзини оқ, ёлғончининг юзини қора кўрсатар эди. Шоҳ Жуна мусофири сийлаб, ундан мендан ҳам ўтадиган саҳий борми дея сўрайди. Йўқ деб жавоб берган сайёҳнинг юзи кўзгуда қора бўлиб кўринади. Ниҳоят, уялиб сиздан ҳам саҳийроқ одам бор, бу гўзал Тароз ўлкасида яшовчи Масъуддир дейди. Шоҳ эса ҳаммага рухсат бериб, пайт топиб Тарозга жўнайди. У ерда Масъуд билан учрашиб дўст тутинади. Масъуднинг фасоҳатидан ҳайратда қолади. Масъуд унга ўзи учун энг азиз нимаики бўлса, ҳаммасини иккиланмай ҳадя қилиб юборади: куй ва қўшиқда моҳир севимли канизагини, майи тугамайдиган жомини, Гулгун лақабли отини. Бундан таъсирланган шоҳ Масъудни Тарозга ҳоким қилиб тайинлаш тўғрисида фармон беради. Тароз ҳокими Жайпур эса бундан безовта бўлиб, Баллу деган қаттол вазири билан маслаҳатлашиб. Масъудни йўқ қилиш режасини тузади. Унга кўра. Жайпур Масъуд

билан дўст тутинади, бир куни Масъудни маст қилиб, бир чоҳга ташлатади. Сўнг қайғурган бўлиб йиғлайди, бошқаларни ҳам ишонтиради ва Масъуд учун мотам ҳам очтиради. Баллу эса Масъудни азоблай бошлайди. Жайпурнинг бир гўзал қизи бўлиб, Масъудга ошиқ эди. Қиз Масъуд ҳақида билиб қолади ва икки содик канизи ёрдамида уни кутқариб даволайди ҳамда отасининг саройидан Масъуд билан қочиб кетади. Жайпур уларга етолмай доғда қолади. Икки севишган йўлда кўп қийинчилик билан Дехлига бориб қоладилар. Масъуд ўзи меҳмон қилган Жунанинг шоҳ эканини билмасди, шунинг учун пул топиш илинжида шоҳ саройига борганда сеҳрли жомини, куй чалиб, қўшиқ айтаётган канизини, Гулгун отини кўриб аввал ҳайрон бўлади, кейин шоҳнинг ҳам Жуна эканини билиб қолади. Масъуд таниган бошқа маҳрамлар бу ҳақда Жунага айтадилар. Дўстини йўқотиб ҳажр азобида қолган шоҳ бундан бағоят шодланиб, дўстига меҳрибонлик кўрсатади, унинг ёрини ҳам олиб келтиради, Жайпур ва Баллуни эса жазолайди.

Ҳикоясини шу тариқа якунлаган сайёҳ шоҳ Баҳромга ўзининг Тароздан, Масъуд авлодларидан бири эканини айтади. Баҳром уни Тарозга ҳоким қилиб тайинлайди.

Чоршанба куни учун унинг ҳомийси Уторуд (Меркурий) рангига мос мовий қасрда Баҳром навбатдаги жаҳонгаштадан Мехр ва Суҳайл ҳақидаги ҳикояни тинглайди. Унга кўра, Адан деган жойда бир оролни ўз маконига айлантириб, денгизда қароқчилик қилишни касб қилган Жобир деган йўлтусар Беҳишли саро шаҳрининг гўзал маликаси сайр қилиб чиқкан қайиқни қўлга киритади. Лекин Мехр шу қадар гўзал эдики, Жобир уни кўриб ҳушини йўқотарди. Шунинг учун қизга яқинлаша олмай, ўзининг баланд деворлар билан ӯралган боғида яшашига руҳсат беради. Меҳрнинг отаси Навдар шоҳ Яман мамлакати шоҳи Нўъмоннинг ўғли Суҳайлга қизини бермоқчи эди. Шунинг учун шоҳ Нўъмон ўғлини кемага чиқариб Навдарнинг мамлакатига юборади. Суҳайл денгизда Жобирга йўлиқади ва жангда енгилиб қолади. Суҳайлнинг жанг қилишига, жасоратига қойил қолган Жобир уни ўлдирмасдан ўз боғидаги бир чоҳга ташлатади. Шоҳ Навдар ва Нўъмон ўзаро хат ёзишиб биргалиқда Жобирга хужум қилишга келишадилар. Навдар шоҳ қуруқлиқдан, Нўъмон шоҳ денгиздан Жобир устига қўшин тортишга қарор қиласдилар. Қуруқлиқдан келаётган Навдар аскарларидан ажраб, овга

берилиб, Жобир құлига асир тушади. Денгизда эса Нұғыншы шоҳ ҳам енгилиб, дөнгиз қароқчисига тутқун бүлади.

Меҳр висолига етишолмаган Жобир эса ичкиликка зұр беради. Меҳр боғда айланиб юриб қоҳда ётган Сұхайлни билиб қолиб қутқаради, сұнг Сұхайл Жобир билан жаңғ қилиб, уни енгади ва тутқунликдагилар озодліккә эришиб, муроду мақсадға етадилар.

Мазкур ҳикоя поён топғач, шоҳ Баҳром ровийни муносиб тақдирлаб үйқуга кетади.

Пайшанба куни шу күн ҳомииси Мұштарий (Юпитер) рангиға мос сандал қасрда шоҳ Баҳром Мұқбил ва Мудбир ҳақидаги қиссаны тинглайди. Унға күра, Мұқбил ва Мудбир Бөхтар деган жойдан Ховарга йўл оладилар. Мұқбил ибодатли, ростгүй бўлиб, Мудбир кассоб ва пасткаш эди. Улар қайноқ водийи ҳамимдан бирга ўтадилар. Мудбирнинг аҳмоқона гапларидан Мұқбил кўп озор чекиб, ундан воз кечмоқчи бўлса, Мудбир ялиниб тавба қиласди. Улар шу тариқа сафарда давом этадилар. Денгиз соҳиliga бориб, бир кемага чиқадилар. Мұқбил, одатдагидек, ибодат қилиб, тасбих ўғириб ўтираса, Мудбир Худога ширк келтириб валдираи бошлайди. Шунда тўфон келиб, уларнинг кемасини ғарқ қиласди. Бу иккиси тақдир тақозоси билан қутулиб қоладилар ва қирғоққа чиқиб ўрмонга дуч келадилар. Шу ердаги бир дараҳт кавагида булоқ бўлиб, у ерда бунинг сувини ичган одам мутлақо очиқмаслиги, сувсамаслиги ва ёлғон гапирса ёрилиб ўлиши ёзилган бўлади. Мұқбил ва Мудбир бу сувдан тўйиб ичиб олганлари учун ёзувни ўқисалар, булоқ сувида боши билан шўнғиб чўмилган одам ғаройиб воқеаларни кўриши айтилган экан. Фақат ростгүй одам чўмилиши мумкин, ёлғончи эса куяр экан. Натижада сувга Мудбир тушолмайди, Мұқбил булоққа шўнғиб қасрға дуч келади, у ерда бир маҳвашга ошиқ бўлиб қолади... Ҳушига келиб сувдан чиққач ўша гўзал ишқида ўзини йўқотиб бехуд бўлади. Мұқбил ва Мудбир қирғоққа бориб бир кемага дуч келадилар. Кема сандал дараҳти ёғочи билан тўла бўлиб, одамлари ўлиб ётардилар. Гап шундаки, Ховар мамлакати шохининг қизи касалга чалинган, табиблар унға сандал дараҳтидан ясалган қасрда яшаш даво дегани учун, кўплаб савдогарлар шу дараҳт ёғочларини олиб келаётганларида денизда пўртанага тушиб чиқолмай очдан ўлган эдилар. Улар қирғоққа борганларида Ховар шоҳига дуч келадилар. Мудбир ўзини савдогар, кема згаси, Мұқбилни қулим деб

таништиради ва шу заҳоти ёрилиб ӯлади. Муқбил эса бор гапни яширмай айтиб беради. Шоҳ уни ўзига куёв қилишини истайди ва тўй беради. Маликанинг қасрига борган Муқбил худди булоқда кўрган ҳолатига дуч келади: сандал қаср, гўзал қизлар ва... ўша у севиб қолган маҳваш. Кейин маълум бўладики, бу гўзал Ховар шоҳининг қизи бўлиб, унга жинлар шоҳи ошиқ бўлган экан. Лекин қизга етишолмаган жинлар шоҳи ўша оролда ўсиб ётган дараҳт кавагидаги булоқда қизнинг сувратини, қасрнинг нусхасини пайдо қилиб, ўзини овутиб ўтиаркан. Муқбил ўша тасвирга дуч келган экан. Шу тариқа Ховар шоҳининг гўзал қизи ва ростгўй Муқбил васлга эришадилар.

Ҳикоя якунлангач, хушнуд бўлган шоҳ Баҳром уйқуга кетади.

Жума учун унинг ҳомийси Зуҳра (Венера) рангига мос оқ қаср барпо қилинган эди. Ниҳоят, муборак жума (одина) куни Баҳром оппоқ – кофурний кийимда оқ қаср ичиди фил суюгидан ясалган тахт устида ўтириб оқ кийимпи гўзал билан биллур жомда оқ май ичади ва Чин гўзали қошида хоразмлик мусофирилнинг ҳикоясини тинглайди. Мусофирир ўзининг Хоразмдан эканини, соз чалишини, иклиздаги барча устозлар унинг шогирдлари эканини, кутилмагандага бир чинлик савдогарнинг гўзал канизаги Хоразмга келгач, унинг иши касодга учраганини, канизак ҳузурига бориб арз қилганини, унинг созини тинглаб тарихи билан қизиққанини ва канизак унга бошидан ўтганларни сўзлаб берганини айтади. Шоҳ Баҳром айтилганлардан бу канизак Дилором эканини билиб, уни олиб келиш учун Хоразмга сипоҳларини жўнатади.

Қўринганидек, Баҳром биринчи ҳикояни ўз руҳий ҳолати каби қора қасрда, қора либосда тинглаган эди, чунки у ўз Дилоромидан айрилган, ҳижрон зулматига гирифторм бўлган эди. Еттинчи ҳикояни эса оқ қасрда оқ либосда тинглайди ва бу ҳикоят унга висол умидидан дарак беради, унинг қалбига ёруғлик олиб киради. Лекин Баҳром Дилоромни топгач яна овга, айш-ишратга берилади. Бир куни у сарой аҳли, сонсиз қўшин ва Дилором билан катта овга чиққанида, ёмғир ёғади ва эски ботқоқнинг оғзи очилиб, Баҳромни Дилором ва бутун аркони давлати билан бирга ер ютади.

Баҳром бўлиб ўтган воқеалардан ва тинглаган ҳикоятларидан хулоса чиқармайди: ошиқлик ва шоҳликни бир қиёфада олиб бормоқчи бўлади, аслида, чин ошиқлик тожу тахт ва бойлик билан мувофиқ кепмайди:

Ишқ ила шоҳлиғ мувофиқ эмас.

Ишқ лофида шоҳ содиқ эмас.

Шу билан бирга, шоҳ Баҳромнинг ҳалокатини тасаввуф таълимотига кўра яна шундай изоҳлаш мумкин. Бутун жонзотлар, табиат, ҳайвонот ва наботот олами Аллоҳнинг зуҳуридир. Уларнинг барчасини Аллоҳ яратган экан, уларга зарар етказиш Яратган иродасига қарши бориш билан тенгдир. Шу маънода шоҳ Баҳромнинг табиатга етказган жабр-зулми унинг ҳалокатига олиб келди.

Шоир Баҳром тимсоли муносабати билан ўз давридаги баъзи долзарб масалаларга ҳам ишора қилиб ўтган. Ҳусусан, ҳақиқий ҳукмдор ҳар қандай иллатлардан холи бўлиши зарурлиги, ҳалқ аҳволидан ғоғиллик ҳамда айш-ишратга берилиш охир-оқибат шоҳни ва мамлакатни таназзулга олиб бориши мумкинлиги шоир айтмоқчи бўлган мұхим ғоялардан биридир.

Шу маънода Навоий достоннинг ўттизинчи бобида туш кўрганинги айтади. Тушида шоирни шоҳ Баҳром йўқлаб, уни назм мулкида соҳибқирон деб атаб, ёзган достонига юқори баҳо беради ва фарзанди қаторида саналмиш султон Ҳусайн Бойқарони огоҳлантиришини илтимос қиласди. Унга қўйидаги сўзларни етказишини айтади:

*Ки жаҳон кимсага вафо қилмас,
Шоҳлиғ таркига киро қилмас.
Шаҳки, минг йил онинг ҳаётидур,
Ғараз – ўлганда яхши отидур.*

«Сабъайи сайёр»да Навоий даҳосининг қудрати шоирнинг ўз тилидан айтилган ўринларда ҳам намоён бўлади. Жумладан, достон якунига яқинлашганда шоир асарнинг ёзилиш муддатига тұхталиб дейди:

*Бўлди чун бу рақам иши тайёр,
Қўйдум отини «Сабъайи сайёр».
Тортқонда бу турфа савти маддин,
Байти беш мингга тортти аддин.
Манга айёми гарчи ёд эрмас.
Лек тўрт ойдин зиёд эрмас.*

*Бўлсан ўзга умурдин эмин,
Бор эди тўрт ҳафта ҳам мумкин...
Гарчи тарихи эрди секкиз юз,
Сексон ўтмиш эди яна тўқкуз.
Ойи унинг жумодиуссоний,
Панжшанба ёэилди унвони.*

Достон хаифи баҳрининг хафиғи мусаддаси солими маҳбуни маҳзуф (руқнлари ва тақтиъи: фоилотун мафоилун фаилун – V – / V – V – / VV –) вазнида ёзилган. Аслида, мазкур вазн 8 та ритмик вариацияга эга бўлиб, бу ритмик вариациялар достон мисрапарида ўзаро алмашиниб қўлланаверади ва достон матни билан муносабатга киришади. Ритмик вариациялар таркибидаги ўзгаришлар, асосан, биринчи ва учинчи руқндаги бўғинлар сифатини ўзгаририш ҳисобига рўй бериб, иккинчи руқн ўзгаришсиз қолаверади. Бунда биринчи руқн фоилотун ёки фаилотун, учинчи руқн эса фаилун, файлон, фаълун, фаълон тарзида ўзаро алмашиниб ҳам қўлланавериши мумкин. Мазкур ритмик вариацияларнинг достон таркибида ўзаро алмашиниб қўлланилиши тасодифий бўлмай, достондаги воқеалар, қаҳрамонларнинг руҳий ҳолати, бир ҳикоятдан бошқасига ўтиш пайтлари, сюжет чизиқларининг ўзгаришига кўп жиҳатдан боғлиқ. Масалан, шанба куни Баҳромнинг ҳикоятини тинглаш арафасидаги ҳолати акс этган қўйидаги парчага диққат қаратсак:

*Субҳи шанбаки, шоми дайжурий, (3)
Юзига ҳулла ёпти кофурий. (3)*

*Қасри мушкинга қўйди юз Баҳром, (4)
Ичгали мушкбў ғазол ила жом. (2)*

*Луъбати ҳиндзоду чинийваш. (3)
ЛАъли жонбахшу сунбули дилкаш. (3)*

*Хулласин ойдек айлабон шабгуни, (3)
Дурлар ул хулла узра каёкабгуни. (3)*

Тахту рахтини айлабон мушкин, (3)
Мушк уза ер тутуб ғазолаи Чин. (1)

Шаҳ дағи ҳулла мушкфом айлаб, (3)
Кирди маҳваш сари хиром айлаб. (3)

Агар эътибор қаратилса, келтирилган 5 байт (10 мисра)дан 8 мисра юқоридаги жадвалда акс этган 3- ва 4-ритмик вариацияларда яратилганинги кўриш мумкин. Ушбу вариацияларнинг тақтиъида чўзиқ бўғинларнинг етакчилик қилишини (қисқа бўғинлар сони 3 та) кўрамиз. Аслида, бошқа баҳрларга нисбатан енгил оҳангга эга бўлган хафиф баҳрининг ушбу ритмик вариациялари чўзиқ бўғинлар сонининг етакчилик қилиши ҳисобига вазминроқ оҳанг касб этяпти ва бу жиҳат Баҳромнинг «ҳижрон ўтининг дуди қаро қилғон кун»даги ҳолатига мос келяпти.

Энди Баҳромнинг ҳикоятлар охирида – Дилоромнинг хабарини эшитган пайтдаги ҳолати ифодаланган парчани кўриб чиқсан:

Чунки ул кечা шоҳи шоҳнишон. (2)
Ғойибидин бу наевъ топти нишон. (2)

To саҳар беқарору бедил эди. (1)
Ўйлаким сайди нимбисмил эди. (1)

Шавқ ўтиға куюб нечукки хасе. (1)
Бетаҳаммуллук айлар эрди басе. (1)

Топса эрди бузук мизожи қарор. (2)
Буюрур эрди қиссаға тақрор. (8)

Иши чун қилғанини билмак анга. (1)
Гоҳ ўлмак, гаҳи тирилмак анга. (1)

Мазкур парчада жадвалдаги 1- ва 2-ритмик вариацияларнинг етакчилик қилишини кузатишмиз мумкин. Энди, биринчи парчадагидан фарқли равишда, тақтиъда қисқа бўғинлар сони ортятпи, бу ўзгариш эса оҳангга ўйноқилик ҳамда енгиллик баҳш этяпти.

Бу ҳол «ўлук таниға руҳ киргон» Баҳромнинг руҳий ҳолати билан мутаносиблик касб этяпти.

Таянч тушунчалар

- илтизом
- 7 рақами талқини
- ваҳдат ул-вужуд
- хафиғ баҳри
- хафиғи мусаддаси солими маҳбуни маҳзуф
- ритмик вариациялар

Савол ва топшириқлар:

1. Тарихий Баҳром ва бадиий Баҳром образи ўртасида қандай боғлиқлик мавжуд деб ўйлайсиз?
2. Достонда келтирилган илтизом санъати асарнинг бадиий ва ғоявий моҳиятини англатишда қандай ўрин тутган?
3. Нима сабабдан Навоий айнан «етти» рақамига маҳсус тўхтатланган?
4. Навоий ўз салафларини Баҳром тимсолини ифодалашда қандай камчиликларга йўл қўйган деб ҳисоблайди?
5. Қасрларнинг ранги, ҳафта кунлари ва ҳикоятларнинг Баҳром қайфияти билан боғлиқлик жиҳатини қандай тушундингиз?
6. Баҳром орқали Навоий Ҳусайн Бойқарога қандай фикрларни айтишга ҳаракат қилган?
7. Достонда илгари сурилган ғоялар бугунги кунда ўз аҳамиятини қай тарзда намоён қиласди деб ўйлайсиз?

Адабиётлар:

1. Навоий Алишер. Сабъаи сайёр. Муқаммал асарлар тўплами. 20 жилдлик. – Тошкент: Фан, 1992. 10-жилд.
2. Navoiy Alisher. Sab'ai sayyor. – Тошкент: G'.G'ulom, 2006.
3. Навоий Алишер. Сабъаи сайёр (насрый баёни билан) / Таҳрир ҳайъати: А.Қаюмов ва бошқ. – Тошкент: Адабиёт ва санъат, 1991.

4. Алишер Навоий ижодий ва маънавий меросининг оламшумул аҳамияти (халқаро илмий-назарий анжуман материаллари). – Тошкент: O’zbekiston, 2011.
5. Ҳасанов С. Роман о Бахраме. – Ташкент: Литература и искуства, 1988.
6. Ҳасанов С. Навоийнинг етти тухфаси. – Тошкент: Адабиёт ва санъат, 1991.
7. Рустамов А. Навоийнинг бадиий маҳорати. – Тошкент: Адабиёт ва санъат, 1979.
8. Юсупова Д. Алишер Навоий «Хамса»сида мазмун ва ритмнинг бадиий уйғунлиги. – Тошкент: МУМТОЗ СЎЗ, 2011.

«САДДИ ИСКАНДАРИЙ» ДОСТОНИНИНГ ҒОЯВИЙ-БАДИЙ ХУСУСИЯТЛАРИ

РЕЖА:

1. «Садди Искандарий» достонининг яратилиш тарихи.
2. Достоннинг таркибий тузилиши.
3. Искандар ва Доро тимсоллари.
4. Достоннинг бадиий хусусиятлари.

Буасардунёдаги буюксиймолардан бири, учсоҳибқироннингэнг машҳури – жаҳонгир Искандарга бағишлиган бўлиб, «Ҳамса»нинг якунловчи достонидир. Шарқда у Искандар Зулқарнайн (икки шоҳли ёки кун чиқиш ва кун ботиш ҳукмдори) номи билан машҳур. Дастлаб Искандар мавзуси Фирдавсийнинг «Шоҳнома» достонида қаламга олинган. Кейинроқ Низомий Ганжавий у ҳақда маҳсус «Искандарнома» деган достон ёзади. Хусрав Дехлавий бу достонга жавоб тарзида «Ойинайи Искандарий» асарини ёзган бўлса, Абдураҳмон Жомий ўз достонини «Хирадномайи Искандарий» деб атайди. Алишер Навоий эса бу мавзуни туркий тилда қайта ишлаб, ўз асарига «Садди Искандарий» («Искандар девори») деб ном беради.

«Садди Искандарий» «Ҳамса»даги энг иирик достон бўлиб, 89 боб ва 7215 байтдан ташкил топган. Достоннинг муқаддимаси 14 бобни ўз ичига олади.

1-боб анъанавий ҳамд – Аллоҳнинг сифатлари таърифига бағишлиланган. Навоий ушбу бобда тасаввух таълимоти асосида оламнинг яратилиш тарихига тўхталиб ўтади: 9 қават осмон, сайдералар, юлдузлар таркумининг ҳар бирига алоҳида таъриф беради. Яратганнинг буюклигига ҳамду сано айтади. Буларнинг барчасидан мақсад энг олий зот – Одамни яратиш эканини таъкидлайди:

Карам бирла ҳалқ айлагай оламе,
 Бу оламда мақсуд анга одаме.
 Гараз одаме анга олам туфайл,
 Неким гайри оламдур, ул ҳам туфайл.

2-боб муножотни ўз ичига олади. Навоий бобда Аллоҳнинг қарами кенглиги ҳақида гапира туриб банда зоти мавжуд экан, унинг гуноҳ қилиши табиий деган ақидани илгари суради:

*Илоҳий, аларким гунаҳкор экин.
Сен ўткармаган не гунаҳ бор экин?
Чу ҳар мужримеким, сен эттинг карам.
Сўрулмас ҳамул журм ила ўзга ҳам.
Агар афв бирла карам будуур.
Бори халқнинг журми маъруфдуур.*

Муножот сўнгидаги Навоий қуёш ерни ўз нурлари билан мунахвар қилган чоғда зарралар орасидаги фарқни фаҳмлаб бўлмаганидек, зарраларга карам қилган чоғингда Навоийга ҳам бир зарра каби карам айлагил, унинг гуноҳларини кечиргил деб илтижо қиласди:

*Ёрурда қуёш партавидин саро,
Қачон фарқ ўлур фаҳм заррот аро.
Қилур өақт бу зарраларга карам.
Навоийға лутф айла бир зарра ҳам.
Сазо андин ар журму пиндор эрур,
Сен ул қилки сендин сазовор эрур.
Хато айлаганни ҳисоб айлама.
Хатосиға лойик азоб айлама.*

Достоннинг 3-боби «сайийд ул мурсалин» (пайғамбарлар улуғи) расули акрам васфи (наът)дан иборат. Навоий дастлабки байтларда пайғамбарлик нури ҳақида гапирав экан, Одам Ато унга ўғил, қолганлар набира қаторидадир дейди ва барча муқаддас китобларда унинг хусусиятлари баён қилинганини таъкидлайди. Расули акрамнинг туғилиши гўё кўкда яна бир қуёшнинг порлашига ўхшатилади:

*Сенинг туғмоғинг равшан айлаб жаҳон,
Анингдекки, туққай қуёш ногаҳон.*

Анъанага мувофиқ, наътдан сўнг меърож туни таърифи келаади. Навоий бу бобда пайғамбаримизнинг бирин-кетин 9-осмонга

кўтарилгани, сайёralарнинг бу ҳолатни кўриб ҳайратга тушгани, ниҳоят, Ломакон оламига сайр қилгани, 70 минг қават парда кўтарилиб, Жаноби Ҳақ билан дийдорлашгани жараёнини кучли пафос билан тасвирлайди. Унинг ерга қайтиши ҳам фалак аҳли ва малойиклар томонидан чуқур ҳайрат билан кузатилгани бетакрор бадиий санъатлар воситасида баён қилинади:

Фалак аҳли ичра аполо тушуб,
Малак хайлиға шўруға тушуб.
Малоик тутуб ўйл бошин жавқ-жавқ,
Тамошосида борча кўнглида шавқ.
Жамолиға чун кўзларин очибон,
Табақ нурлар бошиға сочибон.
Анга нур сочмоққа монанд бу
Ки, сочқай киши Баҳри Уммонға сув.

Достоннинг 5-боби «Хамса» такмили (мукаммал битказиш) хусусида бўлиб, Навоий бу бобда унда «Хамса» ёзиш ҳаваси анча илгари, Низомий ва Деҳлавий «Хамса»ларини ўқиб юрган чоғларидаёқ уйғонганини баён қилиб, улуғ устозлари руҳидан мадад сўрайди:

Бу водий аро Хизри роҳум бўлинг,
Қаён юз кетурсам, паноҳум бўлинг.
Бурундин чу кўргуздунгуз ёрлик,
Басе етти сиздин мададкорлиқ.
Кичик эрканимдин бўлуб қошима,
Улуғ муддао солдингиз бошима.

6-боб сўз таърифи, Низомий Ганжавий ва Хусрав Деҳлавий мадҳига багишлиланган. Навоий бу бобда дастлаб сўзга таъриф берар экан, уни ўз аҳамияти билан инсон идрок этган ҳамма нарсадан юқори деб баҳолайди, «жавҳари жон», «оби ҳайвон» деган сифатлашлар билан мадҳ қиласди:

Бийикрак мақом ичра афлокдин,
Не афлокдин, ваҳму идрокдин...
Башар зотида жаөҳари жон ҳам ул,
Ўлук жисмида оби ҳайвон ҳам ул.

Навоий сўз хазинасига эга бўлганларнинг нодири яктоси сифатида Ганжада парвариш топган зот Низомий Ганжавийни тилга олиб, котибларнинг ҳомийси Аторуд (Меркурий) унинг хизматкоридир дейди. Шунингдек, бу бобда Низомий бешлигига муносиб жавоб битган Хусрав Дехлавий ҳам мадҳ этилиб, унга сўз жодуғари, илму ҳикмат билимдони дея таъриф берилади. Сўз авжида Низомий қуёш бўлса, Дехлавий Муштарий кабидир дейилади:

*Сўз авжида гар ул маҳи ховарий,
Бу гар йўқ маҳи ховарий. Муштари.*

7-боб Низомий ва Дехлавийнинг назмдаги издошлари Нуриддин Абдураҳмон Жомий мадҳига бағишлиланган. Навоий китобат (ҳарф) санъати воситасида Жомийнинг тахаллусига ишора қилиб, унинг назмини «жом» ва «май» деб таърифлайди ҳамда бу назмдан еруқўк эти маству нотавон бўлганини айтади:

*Дема жом ила майки, назми равон,
Еру кўк элин айлади нотавон.*

Шунингдек, Навоий ушбу бобда Жомийнинг ғазалу маснавий жанрларида эришган ютуқларига ҳам тўхталиб ўтиб, унинг «Хамса» таркибиға кирувчи достонларини номма-ном санайди:

*Ғазал дарду сўзини, ваҳ-ваҳ, не дей.
Деса маснавий, Аллоҳ-Аллоҳ, не дей...
Бўлуб жилвагар табъи кўзгусида
Ки, сабт айлади «Хамса» ўтрусида...
Бурун жилва айлаб аён «Тухфа»си,
Берид олам аҳлига жон тухфаси.
Яна «Субҳа» жон риштасин тор этиб
Ки, ҳар муҳра бир дурри шаҳвор этиб.
Чу Юсуф сўзин ошкор айлабон.
Зулайҳо киби элни зор айлабон.
Чекиб хома «Лайлию Мажнун» сари,
Юз оғат солиб тогу ҳомун сари.
Бу дамким қилиб ҳомасин дурфишон,
Сикандар ҳадисидин айтур нишон.*

Бу маълумотлар адабиётшунослиқдаги Жомийнинг «Ҳамса» ёзган-ёзмаганлиги билан боғлиқ баҳсларга ҳам муносиб жавоб бўла олади.

Достоннинг 8-боби – «Иноят қүёши васфи ва ҳидоят булути таърифида» деб аталиб, бу бобда Навоий кимгаки баҳту иқбол ёр бўлса, унинг ҳамма ишида зафар бўлади, тикан ушласа ғунча, тупроқ олса олтин бўлади, буларнинг барчаси Худодан, шундай экан, унга шукронга билдириш керак деган фикрларни келтираскан, Аллоҳ унга назм ёзиш фазилатини тақдим қилгани учун, унга шукронга айтади ва назмнинг турли синф (жанр)ларида шуҳрат қозонганини фаҳр билан баён қиласди:

*Ғазал тарзига аввал айлаб ситеz,
Жаҳон ичра солдим улуғ рустахеz.
Ўқур вақти аҳли саломат муни.
Кўруб олам ичра қиёмат куни...
Ҳар аснофи зикри эмас шаънима.
Билур ҳар киши боқса девонима.*

Шунингдек, Навоий назмдаги бу муваффақиятларига қаноат қилмай, улуғ муддао – «Ҳамса» ёзиш ниятида эканини, бу йўлда Низомий ва Дехлавийларнинг нуроний руҳига, Жомийнинг илоҳий қувватига Қуръон тиловат қилиб, фотиҳа ўқийман деб ёзади:

*Аларнинг равони пур анвориға,
Бу бирнинг доғи қуввати корига.
Қилиб фотиҳа хатми ихлос ила,
Кўзум баҳрида жисми ғаввос ила.*

9-боб Шоҳ Ғозий Ҳусайн Бойқаро таърифига бағишланган. Навоий бу бобда муболаға санъати воситасида Муҳаммад (с.а.в.) пайғамбарлар орасида алоҳида мавқеда бўлса, сulton Ҳусайн Бойқаро ҳам барча шоҳлар ичида шундай мақомдадир деб ёзади. Шунингдек, унинг жанггоҳдаги маҳоратини тасвиirlар экан, достон мазмуни билан боғлиқ равишда душманларига нисбатан садди Искандарийдек ғов чекади, агар жаҳонда Искандардек улуғсиғат зотни топиш керак бўлса, сulton Ҳусайндан бошқаси мос келмайди дейди.

Достоннинг 10-боби шаҳзосда Бадиuzzамон Баҳодир мадҳида-дир. Навоий унга донишмандлик боғининг сарви, замона аҳлининг шаҳзодаси деб таъриф берар экан, зоти ҳам, сифати ҳам малак (фаришта)ка ўхшашини айтиб, тавзеъ (бир товушни бир неча марта такрорлаш) ва тақрир (бир сўзни байтда икки ва ундан ортиқ ҳолда такрорлаш) санъатлари воситасида унинг бошдан-оёқ яхшилилар яхши хислатлардан иборат эканини баён қиласиди:

*Йигиб яхшилиқ бирла яхши қилиқ,
Қилиқдек бошингдин аёқ яхшилиқ.*

11 – 14-бобларда қадимги форс шоҳларининг тўрут табақаси: пешдодийлар, каёнийлар, ашконийлар ва сосонийлар тарихи ҳақида маълумотлар келтирилади.

Достоннинг асосий қисми 15-бобдан бошланади. Асосий қисм ўзига хос композицияга эга. Уни шартли равишда қуидаги 4 қисмга бўлиш мумкин:

- 1) Искандар воқеаси – Искандар ҳаёти билан боғлиқ бирор воқеа ёки ҳодиса баёни;
- 2) назарий масала – муайян ахлоқий муаммонинг таърифи;
- 3) ҳикоят – шу ахлоқий масалага доир ҳикоят;
- 4) ҳикмат – Арасту ва Искандарнинг сұхбати.

Биринчи қисм лирик хотимага ҳам эга. Бу соқий, муганний ва Навоийга мурожаат тарзида байтлар бўлиб. Низомийда «Искандарнома»нинг биринчи қисми бўлмиш «Шарафнома»да соқийга, иккинчи қисм «Иқболнома»да мутрибга мурожаатни кўрсак, Дехлавий достонида ҳам соқий, ҳам мутрибга мурожаат мавжудлигини кузатамиз. Навоий эса соқий ва мутрибдан сўнг ўз-ӯзига ҳам мурожаат қиласиди. Хусусан, 15-бобнинг лирик хотимаси қуидагича:

*Аёғчи, бер ул жавҳари ғамзудо.
Дема ғамзудо. жоми мотамзудо
Ки, андин сумурсам ғамим қолмасун,
Ато сўғидин мотамим қолмасун.
Муганний, қилиб соз руди нишот,
Анинг бирла тузгил суруди нишот
Ки, сўз тахтида бўлдум оромг'и.*

*Бўлай таҳният базмida жомгири.
Навоий, жаҳоннинг фирибин ема.
Хирад оллида нақшу зебин дема.
Чу даврон иши беъафолиқдурур.
Фузун шоҳлиғдин гадолиқдурур.*

Асосий қисм воқеалари Искандарнинг туғилишидан бошланади. Рум мамлакатининг шоҳи Файлақус тангридан фарзанд сўрайди. Бир куни овдан қайтар экан, шаҳарга кираверишдаги вайронада янги туғилган чақалоқ ва ўлик онани учратади. Шоҳ ўликни дағн эттириб, чақалоқни ўзига фарзанд қилиб олади ва унга Искандар деб ном беради. Шоҳ Искандарнинг таълим-тарбиясига катта эътибор қиласи ва Арастунинг отаси Нақуможисни унга устод қилиб тайинлади. Искандар тож-тахт ва бойликка эмас, балки илм-фан ва олижаноб фазилатларга муҳаббат руҳида улғаяди.

Достон билан танишиш жараённада Навоий шунчаки Искандар тарихини ёзишни эмас, балки у билан боғлиқ воқеаларнинг маънносини очишни мақсад қилганини кўрамиз. Буни юқорида келтирганимиз муайян ахлоқий масаланинг таърифи, ҳикоятлар, савол-жавоб ва лирик хотималарнинг ўзаро алмашиниб келишидан ҳам сезиш мумкин.

Файлақус вафот этгач, валияҳд сифатида тахтни Искандар эгаллаши керак эди, лекин у тахтга чиқишига ошиқмайди. Халқ унинг шоҳ бўлишини қаттиқ талаб қилиб туриб олгандан кейингина, Арасту унга тож кийгизади. Искандар халқ олдига шарт қўйиб, кимнинг арз-доди бўлса, шоҳни ўзи билан тенг кўриб аҳволини айтишини сўрайди:

*Ки, берди манга додгарлик Илоҳ,
Бор эрса ҳалойқ аро доддоҳ,
Келиб оллима арзи ҳол айласун,
Ўз аҳволини қийлу қол айласун!*

Искандар тахтга ўтиргач адолат билан мамлакатни бошқара бошлияди. Халқни икки йиллик хирождан озод этади. Достонда шу ўринда адолатнинг таърифи берилади. Бу таъриф ҳадислар воситасида тушунтирилади. Масалан, бир соатлик адолат фаришталарнинг, дунёдаги барча инсонларнинг тоатидан афзал

деган ҳадис келтирилади. Сўнг шоҳ Масъуднинг бир куни тушида отаси Маҳмудни нурга ғарқ бўлган ҳолда жаннат боғларида юрганини кўргани ва отасидан бу ҳолга қандай сазовор бўлганини сўраганида. отаси Ҳиндиstonни эгаллаш вақтида элга қилган биргина адолати туфайли Аллоҳ унга шундай мартабани лойик кўргани ҳақида сўзлаб бергани түғрисида ҳикоят илова қилинади. «Ҳикмат» бобида эса Искандарнинг Арасту билан адолат ҳақидағи савол-жавоби келтирилади. Арастунинг фикрича, шоҳ ҳар бир ишда адолат мезони асосида иш тутса. унинг мулку мамлакати обод, халқи бадавлат бўлади. Халқ бадавлат бўлса, аскарларнинг маоши ҳам ортади ва қўшин ҳамиша ғолиб бўлади.

Шу тариқа Искандар адолат мезони асосида кўплаб мамлакатларни эгаллайди, сув тубига тушади. 23-бобдан достонга Доро образи кириб келади. Навоий Дорога тавсиф берар экан, унинг каёнийлар суполаси вакили, жаҳон подшоси сифатида Кайхисраву Кайкубодларнинг авлоди эканини, унинг давлатни бошқаришида Лухросбнинг тартиблари, қўшинида Гуштосбнинг қонунлари устуворлигини баён қилади. Доро ва Искандар орасидаги хирож можароси ихтилофнинг пайдо бўлишига олиб келганини афсус билан таъкидлайди.

Уруш бошланади. Аммо тез орада Доронинг ноиблари хиёнат қиладилар ва у ярадор ҳолда Искандарга асир тушади. Ўлими олдидан хиёнаткорларни жазолаш. унинг қариндош-уруғларига озор бермаслик ва қизи Равшанакка ўйланишни Искандарга васият қилади. Искандар Доронинг барча васиятларини ортиги билан адо этади, Дорони иззат-икром билан дафн қилади. Шу ўринда Искандарнинг жаҳонгир шоҳ бўлиш билан бирга мард инсон экани ҳам ғоят моҳирлик билан тасвиранади.

Искандар Эронни эгаллагач жаҳонни фатҳ этишга киришади. Кўплаб ўлка подшоларига хат ёзиб, мамлакатда адолат ва осоишишталик ўрнатмоқчилигини ва шунга мос ҳолда ўз ихтиёрлари билан унга таслим бўлишларини сўрайди. Аксарият подшолар бўйин эгиб келадилар. Фақат Кашмир. Ҳинд ва Чин хоқонларигина унга бўйсунишни истамайдилар. Искандар Кашмирга юриш қилишга мажбур бўлади ва мамлакат шоҳи Маллуни бўйсундиди. Унинг васиятига биноан қизи Мехрнозга уйланади, ўғли Ферузни Кашмирга подшо қилади. Ҳирот ва Самарқанд шаҳарларини барпо қилади. Тез орада Ҳинд ва Чин хоқонлари ҳам

Искандарнинг шаъну шавкатига тан бериб, унга жангсиз таслим бўладилар.

Искандар ер юзини эгаллагач, денгиз сирларини ҳам билиш учун узоқ сафарга чиқади. Шишадан сандик ясаб, уммон тубига тушади ва кўплаб ажойиботларни кўради. Аммо сафардан қайтишда хасталанади ҳамда тутинган онаси Бонуга ўғилликни ўрнига қўя олмагани учун узр сўраб мактуб ёзади. Мазкур мактуб бутун дунёни забт этса-да, охир-оқибат у дунёга ҳеч бир нарсасиз, очиқ қўл билан кетаётган, оламга шоҳ бўлгандан кўра онадек буюк зотга қуллик қилиш шарафи юксакроқ эканини англаган улуғ жаҳонгирнинг иқрорномаси эди:

*Бошимға тушуб ҳарза андешае,
Дедим олам очмоқ эрур пешае.*

*Не қулғон хаёлум бори хом эмиш,
Ҳавас жоми кўнглумга ошом эмиш.*

*Керак эрди, то кирди мағзимға ҳуш.
Хирад токи солди димогимға жўш.*

*Демон қилсанам эрди ўғуллуқ санга,
Қабул айласам эрди қуллуқ санга.*

*Санга айлабон хоки даргоҳлиқ,
Анинг отин айтсанам эди шоҳлиқ.*

Асосий қисмнинг сўнгги бобида етти файласуф ҳаким: Афлотун, Суқрот, Балинос, Буқрот, Ҳурмус, Фарфинюс ва Арасту Искандарнинг онасига таъзия билдиргани келадилар. Шу билан Искандар воқеаси поёнига етади.

Асар, бошқа достонлардан фарқли равишда, каттагина хотима билан якунланади. У бобдан иборат бўлиб, «Садди Искандарий» достонини тугаллаш билан муайян маънода «Ҳамса»га ҳам якун ясади. Хотима қўйидаги бобларни ўз ичига олади:

84-боб – Ҳусайн Бойқаро ва унинг фарзандлари таърифи.

85-боб – Ҳакимлар (донишмандлар) таърифи.

86-боб – Гадонинг шоҳга насиҳати хусусида.

87-боб – Сўз гавҳари хусусида.

88-боб – Дарвешалига насиҳат.

89-боб – Хулоса.

Достоннинг сўнгги бобида Навоий унга баҳт-давлат раҳнамолик қилиб, ниҳоят, «Ҳамса»ни якунлаганини ёзар экан, «Ҳайрат ул-аброр» достони ёзилишидан бошлаб «Садди Искандарий» якунлангунча бўлган жараённи бирма-бир эслаб ўтади. Навоий тонг отиб кеч киргунча эл-юрт ташвиши билан банд бўлгани ҳолда салафлари узок муддат ёзган «Ҳамса»ни жуда қисқа муддатда – икки йилда якунлаганини, агар бевосита фақат ёзиш учун кетган вақт ҳисоблаб чиқилса, олти ойга ҳам бормаслигини фахрия тарзида баён қиласди:

Сангаким ўйқ эмгакда ғоят падид.

Улус меҳнатида ниҳоят падид.

Қилиб тонгдин оқшомғача қийлу қол,

Юзунга етиб ҳар нафас юз малол.

Ўзунг тинмайин халқ ғавғосидин.

Қулогинг халойиқ алолосидин.

Бу меҳнатлар ичра чекиб сўзга тил,

Замондин камо беш ўтууб ики йил.

Чекиб хома бу нома иттомуниға.

Етургайсен оғозин анжомиға

Ки, ақли муҳосиб шитоб айласа,

Дейилган замонин ҳисоб айласа

Йигиштурса бўлмас бори олти ой

Ки, бўлдунг бу раъноға суратнамоӣ.

Навоий ўз бешлиги китобхонлар томонидан қандай баҳоланишини билиш учун устози Абдураҳмон Жомийнинг ҳузурига боради ва унга «Ҳамса»ни тақдим этади. Жомий асарни бирма-бир вақтлаб, шоирга лутф билан муносабатда бўлади ҳамда бир қўлини унинг елкасига қўяди. Устоз ва пир Жомийнинг қўли елкасига теккач, шоир бир лаҳза хушини йўқотади ва тахайюл оламига ғарқ бўлади: Навоий ажойиб бир гулистонда сайр қилиб юриб бир гурӯҳ суҳбатдошларни кўриб қолади. Улардан бири шоир томонга келиб ўзини форс-тожик шоири Ҳасан Дехлавий деб таниши ради ва даврадагилар Навоийни кўрмоқчилигини айтади. Навоий ҳаяжон билан давра аҳлига яқинлашади. Ҳасан Дехлавий улар-

ни Навоийга таништиради. Ўртада Низомий Ганжавий, унинг икки ёнида Хусрав Дехлавий ва Абдураҳмон Жомий, уларнинг атрофида ўтирганлар эса Фирдавсий, Унсурий, Саъдий, Саноий, Хоқоний ва Анварийлар эди:

«...Ўртодағи пири фаррухжамол
Ки, васф�다 келди хирағ нутқи лол,
Эрур ҳазрати Шайх, огоҳ бўл!
Ниёз айлабон хоки даргоҳ бўл.
Ўнг илги сори анга пайравдурур,
Жаҳон офати – Мир Хусравдурур.
Яна бир ён устоду пириң сенинг,
Рақамхони лаөхи замиринг сенинг
Чу Саъдию Фирдаусиу Унсурий,
Саноиу Хоқониу Анварий»...

Даврадагилар Навоийни кўришлари билан ўринларидан турадилар ва бир қўлидан Хусрав Дехлавий, иккинчи қўлидан Абдураҳмон Жомий тутиб Низомийнинг ёнига ўтқизадилар. Навоий Низомийга таъзим бажо келтириб, ёнига ўтиради. Низомий Навоийнинг «Хамса»сига юксак баҳо беради ва Жомийдан шоир ҳаққига дуо ўқишини сўрайди...

Шу онда Навоий тахайюл оламидан қайтиб қараса, Жомий қўлини унинг елкасидан олган ва унга қараб турган экан. Жомий Навоийни улуғ муддаога етишгани билан кутлаб, Тангрига шукронга келтиришга чорлайди. Ниҳоят, Аллоҳдан мадад сўраб ибтидо топган «Хамса» буюк Яратганга шукроналик билан яқун топади:

Навоий, қилиб Тенгри коминг раво,
Санга рўзи этти ажойиб наво.
Узот Тенгри шукри навосига тил,
Наво ортуқ истар эсанг шукр қил!

«Садди Искандарий» мутакориб баҳрининг мутакориби мусаммани маҳзуф (рукнлари ва тақтини: фаувлун фаувлун фаувлун фаул $V-- / V-- / V-- / V-$) вазнида ёзилган.

Таянч тушунчалар

- достон композицияси
- ҳикмат
- лирик хотима
- «Хамса» тақмили
- мутақориби мусаммани маҳзуф

Савол ва топшириқлар:

1. Тарихий шахс ва бадиий тимсол сифатида олинган Искандар фаолиятини қиёслашга ҳаракат қилинг.
2. Навоий Искандар образи орқали мукаммал шоҳ қандай сифатларга эга бўлиши керак деб ҳисоблайди?
3. Искандар ва Доро ўртасидаги зиддият сабаблари нимада деб ўйлайсиз?
4. Даставвал Искандарга бўйсунмаган ҳукмдорлар кейинрок ўз ихтиёри билан унга хайриҳоҳ бўлиб қолганлари сабаби ҳақида тўхталинг.
5. «Садди Искандарий» достони умумий «Хамса»нинг якуни сифатида ўзида қандай хусусиятларни намоён қиласди?

Адабиётлар:

1. Алишер Навоий. Садди Искандарий. Мукаммал асарлар тўплами. 20 жилдлик. – Тошкент: Фан, 1993. 11-жилд.
2. Navoiy Alisher. Saddi Iskandariy. – Тошкент: G'ulom, 2006.
3. Навоий Алишер. Садди Искандарий (насрый баёни билан) / Тахрир ҳайъати А.Қаюмов ва бошқ. – Тошкент: Адабиёт ва санъат, 1991.
4. Бертельс Е.Э. Роман об Александре и его главной версии на Востоке / Избранные труды. Навои и Джами. – М.: Наука, 1965.
5. Қаюмов А. «Садди Искандарий». – Тошкент: Адабиёт ва санъат, 1975.
6. Эркинов А.С. Навоий – пейзаж устаси. – Тошкент: Фан, 1988.
7. Ўзбек адабиёти тарихи. Беш жилдлик. 2-жилд (XV асрнинг иккинчи ярми). – Тошкент: Фан, 1977.

«ЛИСОН УТ-ТАЙР» ДОСТОНИНИНГ ГОЯВИЙ-БАДИЙИХ ХУСУСИЯТЛАРИ

РЕЖА:

1. *Достоннинг маркибий тузилиши.*
2. *Достоннинг гоявий хусусиятлари.*
3. *Рамзий тимсоллар таҳлили.*

«Лисон ут-тайр» достони шоир умрининг сўнгги йилларида, аниқроғи, 1499 йил ёзиб тугалланган. Филология фанлари номзоди Ш.Эшонхўжаев достоннинг илмий-танқидий матнини яратиб, изоҳлар билан нашрга тайёрлаган (МАТ, 12-жилд). Мазкур нашрда достон ҳажман 193 боб, 3666 байтдан иборат.

«Лисон ут-тайр» фалсафий-тасаввуфий мавзуда яратилган бўлиб, улуғ форс-тоҷик адаби Фаридиддин Атторнинг «Мантиқ ут-тайр» достонига жавобан ёзилган. Алишер Навоийнинг ўзи шу асарида болалик давридаёқ «Мантиқ ут-тайр»ни иштиёқ билан ўқигани ва ёд олганини айтади:

Ёдима мундоқ келур бу можаро
 Ким, туфулият чоги мактаб аро
 Ким, чекар атфол марҳуми забун,
 Ҳар тарафдин бир сабақ забтиға ун...
 Манга ул ҳолатда табъи булҳавас,
 «Мантиқ ут-тайр» айлаб эрди мултамас.
 Топти сокин-сокин ул тақородин,
 Сода кўнглум баҳра ул гуфтордин.
 Табъ ул сўзларга бўлғоч ошно,
 Қилмади майл ўзга сўзларга яно.

«Лисон ут-тайр» достони анъанавий тарзда муқаддима, асосий қисм ва хотимани ўз ичига олади. Муқаддима 13 бобдан иборат.

Достоннинг биринчи боби Аллоҳ ҳамдига бағишлиланган. Навоий Аллоҳ бу оламни аниқ бир режа асосида бунёд қилгани ҳақида ёзар экан, унда ҳеч бир нарса тасодифий яратилмаганини айтади. Аллоҳнинг мӯъжизаси сифатида бир-бирига зид бўлган тўрт унсур (сув, олов, тупроқ ва ҳаво)ни инсон вужудида бир бутун ҳол-

да бирлаштирганини таъкидлаб, бутун оламни яратишдан мақсад ҳам инсон бўлганини айтади:

Ўйлакум душман яротиб ўтқа сув,
Елни ҳам түфроққа айлаб адув.
Сунъидин кўргилки мундоқ тўрт зид,
Бўлуб инсон хилқатида муттаҳид.
Офаринишидин қилиб инсон ғараз,
Они айлаб халқ ичинда беэваз.

Бобда, шунингдек, Алишер Навоий Аллоҳ инсонни ўз сиридан хабардор этди, халифалик тожи билан юксалтириди, шайтонни эса унга сажда қилишдан бош тортгани учун мардуду лаъин (рад этилган ва лаънатланган) қилди дейди:

Ҳам қилиб ўз сирри бирла ганжи роз,
Ҳам хилофат бирла айлаб сарфароз.
Бўлди саркашлиқдин онинг офати,
Ажзу түфроғлиқ бу бирнинг рофати.
Бирга ул масжуслуғ берган ўзи.
Бирга бу мардуслуғ берган ўзи.

Достоннинг 2-боби муножотни ўз ичига олади. Бобда Алишер Навоий ўтган умрини сарҳисоб қилар экан, Яратган қошида ўзини бехад гуноҳкор ҳисоблайди:

Аллоҳ, Аллоҳ, ўлтурур шармандалиқ,
Ёдима келса бу янглиғ бандалиқ.
Юз қаролиғ онча бўлмиш жаҳл аро
Ким, кўзимга қилди оламни қаро.
Қилмадим умрумда бир ракъат намоз.
Сар-басир маҳзи ниёз, эй бениёз.
Ҳаргиз андоқ қўймадим түфроққа бош
Ким, кераклик бўлмағай бошимға тош.
Бермадим ҳаргиз гадоға бир дирам,
То ўзумни кўрмадим соҳиб қарам.
Тутмадим отинг қилиб фарзоналиқ,
Сабҳа элдин осмайин юз доналиқ.

Бир амал ҳаргиз риёсиз қилмадим,
 Зарқисиз ҳаргиз ўзумни билмадим.
 Ўйлаким мендурмен инсон бўлмасун,
 Йўқки инсон – деву шайтон бўлмасун.

3-боб пайғамбар расули акрам мадҳи – наътни ўз ичига олади. Бобда Навоий «Нури Муҳаммадия» ҳақида фикр юритар экан, бу нур олам яратилишидан ҳам илгари мавжуд бўлганлигини, Одам Атодан Шис пайғамбарга ва шу орқали кўплаб наслларга ўтиб, расули акрамнинг оталари Абдуллоҳга етиб келгани ва, ниҳоят, унинг фарзанди чехрасида пайғамбарлик нури сифатида зоҳир бўлганини ёзади.

Бобда, шунингдек, расули акрамнинг пайғамбарлик даврлари-даги фаолиятлари: кофириларга қарши курашганлари, Лот бути-нинг ҳолини хароб қипганлари, ҳалққа Аллоҳдан бошқа илоҳ йўқ-лиги ҳақидаги ҳақиқатни етказганликлар ҳақида сўз боради. Боб сўнгидиа расули акрам ва улар орқали барча яқинлари – саҳоба ва тобеинлар ҳам пок эканлиги айтилиб, уларга салом йўлланади:

Ўзи пок, азвож ила авлоди пок,
 Зоти пок. асҳоб ила аҳфоди пок.
 Анга ҳар дам юз дуруду минг салом.
 Олам аҳлидин ила ёвмул қиём.

4-боб меъроj туни таърифига бағишланган. Унда пайғамба-римизнинг ҳузурларига «Рұх ул-амин» (Жаброил фаришта) келиб, Яратганинг хабарини етказгани ва расули акрамнинг Буроқ оти-ни миниб Аллоҳ ҳузурига қўтарилгани, орадаги етмиш қават пар-да очилиб, бор-йўқ тўсиқлар бартараф бўлгани, пайғамбаримиз Аллоҳдан умматларининг гуноҳини сўраганликлари ва Аллоҳ ўз ҳабибининг барча истакларини қабул қилгани ҳақида фикр юри-тилади.

Достоннинг 5-боби тўрт ҳалифанинг биринчиси Ҳазрат Абу Бакр Сиддиқ мадҳига бағишланган. Алишер Навоий бу зотни «со-диқу сиддиқ» атаб, ташбех санъати воситасида пайғамбаримизни ғор ичидаги хазинага, Абу Бакр (р.а.)ни эса шу хазинани қўриқлаб ётган аждаҳога ўхшатади:

*Содиқу сиддиқу ҳамрози онинг,
Ҳар ёмон-яхшида дамсози онинг...
Ганжким ғор ичра пинҳонлик қилиб,
Аждаҳодек ул нигаҳбонлик қилиб.*

Абу Бакр Сиддиқнинг пайғамбаримиздан кейин халифа имом бўлиб қолганини гўё қўёш кетиб, ой қолганига ўхшатади:

*Ўрниға они расул айлаб имом.
Ой бўлиб хуршидға доим мақом.*

6-боб ҳазрат Абу Бакр Сиддиқ ҳақидаги ҳикоятни ўз ичига олади. Унда айтилишича, Абу Бакр Сиддиқ халифалик таҳтига ўтирганида, диндан қайтган бир гурӯҳ кишилар ислом фарзларидан бири бўлган закотни бекор қилишни талаб этади. Шунда халифа ғазаб билан: «Пайғамбар қонунида бирор ип миқдорича нарсани ҳам ўзгартириш мумкин эмас. Кимки бунга қарши бош кўтарса, уларга жавоб қилич ва ўқдир», – деб айтади.

Достоннинг 7-боби ҳазрат Умар Форуқ (р.а.) мадҳига бағишиланган. Алишер Навоий ислом оламида ҳақни хатодан фарқ қилишда бу кишига тенг келувчи бошқа зот йўқ эди дейди:

*Ҳақни ботилдин бироғким қилди фарқ,
Адли бирла равшан этти гарбу шарқ.
Ондин ўзга йўқ эди оғоқ аро,
Балки ушбу қасри олий тоқ аро.*

8-боб ҳазрат Умар Форуқقا бағишиланган ҳикоятдан иборат. Ҳикоятга кўра, ҳазрати Умар Мадойинни эгаллаганида, жуда катта хазина ийғилади. Ҳазрати Умар бу хазина ва мол-мулкка қўз қирларини ҳам ташламайди: барча хазинани ғазотга чиқувчилар учун бўлиб беришни буюради.

9-боб – ҳазрат Усмон (р.а.) мадҳидадир. Ҳазрат Усмон пайғамбаримизнинг икки қизларига уйланганлари учун «зуннурайн» лақабини олганлар. Алишер Навоий бу зотни, Қуръони Каримни тўплагани сабабли, халқ Усмон ибн Аффон деб атади дейди:

*Тенгри айлаб жомеъи Қуръон они.
Халқ деб Усмон бин Аффон они.*

10-боб ҳазрат Усмон ҳақидаги ҳикоятни ўз ичига олади. Ҳикоятга кўра, пайғамбаримиз бир куни элдан фароғат истаб, хилватга кириб, бир оёқларини узатиб ўтирадилар. Уларнинг ҳузурларига баъзи зодагон саҳобалар, айрим азиз ва шариф кишилар киргандарида ҳам, уларнинг ҳолатларида ўзгариш бўлмайди. Лекин хонага ҳазрат Усмон киргач, расули акрам узатган оёқларини йиғиб оладилар. Бу пайғамбаримизнинг ҳазрат Усмонга бўлган чексиз ҳурматлари ифодаси эди.

11-боб мўминлар амири Ҳазрат Али (р.а.) мадҳига бағишланган. Навоий бу зотнинг пайғамбаримизга фарзанд даражасида бўлганликларини айтиб, улар орасида «мен сеникиман, сен меникисан» деган аҳд мавжудлигига ишора қилади:

Анбиё сархайлига фарзанд ул,
Хайли одам ичра бемонанд ул...
Иттиҳодида нубувеат шамъининг
Сўзи букум сен менингсен, мен сенинг.

12-боб ҳазрат Алига бағишланган ҳикоятни ўз ичига олади. Ҳикоятга кўра, ғазот жангларидан бирида ҳазрат Алига ўқ тегади. Ўқнинг уни уларнинг суюкларигача ботиб, тортиб олишнинг иложи бўлмайди. Шунда саҳобалар пайғамбаримиздан бу ишнинг чорасини сўраганларида, расули акрам: «У намоз ўқиётган пайтда ўқни тортиб олиш пайида бўлингиз. У намозга шундай бериладики, ўқни тортиб олганларингни билмай қолади», – дейдилар. Саҳобалар айтилгандек қиладилар ва Аллоҳ кушойиш бериб, бирлаҳзада жароҳатдан на дард-у, на ўқ уни қолади.

13-боб буюк форсигўй адаб Фаридиддин Аттор мадҳига бағишланган. Алишер Навоий сўз ўйини воситасида шоир тахаллусига мажозий нисбат бериб, бу дўконда оламдаги барча бойликлар: дуру гавҳарлар, гулобу мушки анбарлар, ширинликлар жам эканлигини айтади:

Ҳар не гардун баҳр ила конида бор,
Онча юз Аттор дўконида бор.

Алишер Навоий Атторнинг ёзган асарлари халқ учун гулқанд каби фойдалидир дейди ва шу муносабат билан унинг асар-

лари рўйхатини келтиради: «Мусибатнома», «Илоҳийнома», «Уштурнома», «Лужжай ҳилол», «Тазкират ул-авлиё», «Мантиқ ут-тайр» ва бошқалар. Боб сўнгидаги Навоий агар Ҳақ мадад берса, мендек гадо шайх руҳидан ёрдам олиб, қушлар нутқини изҳор қилсанам, яъни «Мантиқ ут-тайр»га жавоб ёзсан дейди:

Лек ҳақ тавфиқ берса, мен – гадо,
 Шайхнинг руҳига айлаб иқтидо.
 Ўйла қушлар нутқини изҳор этай,
 Булбулу тўти киби ғуфтор этай
 Ким, халойиқ чун тараннум айлагай,
 Қуш тили бирла тақаллум айлагай.
 Лек сурмак нуктани тўти мисол.
 Будур инсоф ўлса, эй фарҳунда фол
 Ким, бу тўти тўймаси бўлғой шакар,
 Ул шакар фикр айласанг бўлғай магар.
 Тенгрининг лутфу иноят хонидин,
 Яъни ул Атторнинг дўконидин.

Достоннинг асосий қисми 14-бобдан бошланади. Бир куни барча қушлар мажлис қурмоқ учун ийғилибидилар. Лекин мажлисда ўрин талашиб, жанжаллашиб қолибидилар. Шунда улар агар бир адодлатли подшо бўлганда, баҳсга ҳожат қолмасди деб ўйладидилар. Шу вакт Ҳудхуд деган қуш шундай подшоҳ борлигини, унинг номи Симурғ экани ва Симурғнинг ҳузурига бормоқчи бўлганлар узок ҳамда машақатли йўлни босиб ўтишлари зарурлигини айтади:

Борча олам қушларига шоҳ ул,
 Ҳолингиздин мў-бамў огоҳ ул.
 Ул ёқин сизга-ю. сиз ондин иироқ,
 Васл – анга ойин, вале сизга – фироқ.
 Йўлида етса талабдин минг тааб,
 Ҳам анга етмас киши қилмай талаб.
 Лекин ул водий ниҳоятдин узун,
 Қатъида оғнат ниҳоятдин фузун.
 Умрлар урмоқ керак тинмай қанот,
 Неча каркас умрича бўлса ҳаёт

Қушлар Ҳудхуд бошчилигига йўлга тушадилар. Бир неча кун йўл юргач, машақатли сафар уларни толиқтиради. Ортга қайтмоқчи бўладилар ва бирин-кетин Ҳудхудга ўз узрларини айта бошлайдилар. Дастрраб Тўти узр айтади. Ҳудхуд унга жавобан «Хийлагарликни касб қилган яшил чакмонли киши» билан боғлиқ ҳикоятни келтиради. Тўтидан сўнг Товус узр айтиб: «Тангри мени атрофдагилар кўриб ҳуснимга таҳсин айтишлари учун яратган, шундай экан, менга бу сафардан не ҳожат?» – дейди. Ҳудхуд унга жавобан масҳарабоз бир ҳиндунинг ўзини турли нақшу нигорлар билан безаб майдонда томоша кўрсатгани, унинг атрофи бир гала бебошлар тўдаси билан тўлгач, назоратчилар томонидан тутиб олиниб, дарра билан савалангани ҳақидаги ҳикоятни келтиради. Ундан сўнг Булбул узр айтади. У ўз чаманидаги бир гулга ошиқлигини, айрилиққа чидай олмаслиги ва бу сафар унга чексиз ҳажр азобини олиб келаётганлигини баён қиласди. Ҳудхуд унга бир подшоҳга ошиқ бўлиб қолғани ҳақида лофт урган гадо ҳикоятини келтиради. Шу тариқа Қумри, Кабутар, Кабки дарий (Тоғ каклиги), Тазарв, Қарчиғай, Шунқор, Бургут, Куф (Бойўғли), Ҳумой, Ўрдак, Товуқ (Хўроз) каби қушлар ўз узрларини айтадилар. Ҳудхуд уларнинг ҳар бирига мос ҳолатда турли ҳикоятлар билан жавоб қайтаради.

Қушлар йўлларида давом этадилар. Улар Ҳудхуддан Симурғга етишиш йўли ҳақида сўрайдилар. Ҳудхуд уларга достондаги энг катта ва алоҳида мавқега эга бўлган «Шайх Санъон» ҳақидаги ҳикоятни сўзлаб беради.

Ҳикоятда келтирилишича, Шайх Санъон²¹ исмли авлиё Каъбадаги барча шайхларга муршид – устоз даржасида эди. Унинг 400 га яқин муриди бўлиб, ҳар бири Жунайд²² ва Боязидларга²³ тенг эди. Шайх Санъон тушида бирор нарсани кўрса, бу воқеа ўнгидага ҳам юз берарди. Бир куни тушида ўзини Рум мамлакатида бутхона ичига маст ҳолда сайр қилиб юрганини кўради. Уйғониб бу ҳолига тавба қиласди. Лекин туш бир неча бор тақрорлангач,

²¹ Шайх Санъон (ибн Саққо) – XI – XII асрларда яшаган тарихий шахс.

²² Жунайд Бағдодий – тасаввуфдаги саҳв (хушёрлик) концепциясининг асосчиси. 910 йилда вафот этган.

²³ Боязид Бистомий – тасаввуфдаги сукра (илоҳий шаробдан мастилик) (девоналийк) йўлининг асосчиси. 961 йилда вафот этган машҳур шайх.

унинг таъбири тақдирни билан алоқадорлигини ҳис қилиб, ўз муридлари билан Рум сари йўлга тушади. Ниҳоят, Рум ўлкасига етиб келишади. У ерда ғаройиб бир бутхонани кўрадилар. Шайх бутхонага киргач, ҳолатида ўзгариш содир бўлади, кўнгли изтиробдан бетоқатлана бошлайди. Шунда беихтиёр унинг қаршисида юзига парда тортган тарсо (христиан динига мансуб) қиз пайдо бўлади. Шамол кўтарилиб, гўзалнинг юзидаги парда очилгач, шайх ўзидан кетиб, тупроққа йиқилади. Шу тариқа шайх ишқ дардига мубтало бўлади. Навоий шайхнинг изтиробли ҳолатини ўз тилидан шундай тасвирлайди:

*Ким: «Бўлур ҳар лаҳза ранж афзун манга,
Не эдиким қилдинг, эй гардун, манга!*

*Офиятдин ишқ сори бошладинг,
Юз ёнар ўт ичра олиб тошладинг...*

*Аллоҳ! Аллоҳ! Не кечадур бу кеча!
Саъб мундог, ё раб, ўлғайму кеча!*

*Ўткарибмен кўп суубат кечалар,
Қўрмадим мундог уқубат кечалар!..*

*Дўстлар, нетти мадад еткурсангиз,
Жамъ ўлуб мен зорни ўлтурсангиз.*

*То қутулса даҳр оримдин менинг,
Даҳр эли афгону зоримдин менинг.*

*Жонима, асҳоб, тифи қатл урунг,
Күйдурууб, ҳарён кулумни совурунг.*

*То жаҳонда бўйла расво бўлмайин,
Бир ўлай, юз қатла ҳардам ўлмайин!»*

Шайхнинг бу мусибатли ҳолатини кўриб, муридлари насиҳатлар бера бошлайдилар. Улар шайхга ақл мезони билан хитоб этадилар, шайх эса ишқ йўсинида жавоб қайтаради. Муридлар

унга таҳорат олиб, ибодат қилмоқни маслаҳат берганларида шайх уларга шундай жавоб қайтаради:

*Шайх деб: «Йўқ кўз ёшимдин ўзга сув,
Қон келур ҳардам боғирдин кўзга сув».*

Муридлардан бирининг Каъбани зиёрат қилмоқ даркор деган даъватига шайх томонидан шундай жавоб бўлади:

*Шайх дебким: «Онда қилғонни талаб,
Мунда топдим, не чекай ул ён тааб».*

Шу тариқа шайх ҳар муриднинг куйиниб айтган ўгитларига ишқ сўзи билан жавоб қайтаради.

Бутхонадаги кишилар эса дин аҳлининг бу ҳолатини мазах қилиб, ўз динларининг устунлигини гумроҳларча таъкидлай бошлайдилар. Бу ҳол тонг ёришгунча давом этади. Муридлар номусга чидай олмай шайхни ёлғиз ташлаб кетадилар. Шайх бутхонадаги болаларга ҳам масхара бўлади. Шу тариқа орадан бир ой ўтади. Нихоят, тарсо қизи яна бутхонада пайдо бўлади ва исломдек буюк дин пешвоси шайхнинг кофирлар бутхонасида бу тарзда яшашидан мақсади не эканини сўрайди. Шайх тарсо қизига ўз ҳолини баён қилиб, буларнинг барчасига сабабчи сенинг оразинг деб жавоб беради. Тарсо қизи шайх ишқининг далили сифатида унга тўрт шартни бажариши ва икки журмонга (жарима) тўлаши кераклигини айтади. Айтилган тўрт шарт қўйидагилар эди:

- 1) май ичмоқ;
- 2) зуннор боғламоқ;
- 3) Қуръонни ўтда куйдирмоқ;
- 4) бутпарастлар динига кирмоқ.

Журмонга сифатида эса бир йил давомида чўчқабоқарлик қилиш ва оташгоҳда ўт ёқишини буюради. Шайх бу шартлар ва журмоналарни ортиғи билан адо этади. Шу тариқа орадан бир йил ўтади.

Шайхнинг Каъбада бир фоний²⁴ муриди бўлиб, шайх Румга отланганида, у бошқа бир мамлакатда сафарда эди. Сафардан қайт-

²⁴ Фоний – ўзлигидан кечиб. Ҳақ васлига етишган солик.

гач Шайхни тополмай, бўлиб ўтган воқеалар ҳақида суриштиради. Муридлар унга аҳволни баён қиласидилар. Фоний мурид уларга таъна қилиб шундай дейди:

*Шайхким пир эрди-ю. сизлар мурид.
Борчага иршодидин беҳбуд умид...*

*Шайхингизга бевафолик бошлабон,
Қиблангизни дайр ичинда ташлабон....*

*Одами бўлса. вафо андин йироқ,
Ит вафо бобида андин яхшироқ...*

Шу тариқа шогирд бу ерда ўтириш билан иш битмайди деб барча муридларни Рум сари бошлайди. Етиб бориб кўрадиларки, шайхда на ислом, на иймон маслагидан асар қолмаган эди. Содик шогирд бу ҳолни кўриб оҳ уради ва кеча-кундуз Яратганга муножот қилиб шайхнинг ҳақига дуо ўқиди. Ниҳоят, Аллоҳ унинг дуосини қабул этади шайхга ғойибдан огоҳлик етиб, кўзларидан хижолат ёшларини тўкиб, садоқатда бемисл бўлган шогирдига узроҳлик қиласиди. Шайх яна эгнига поклик хирқасини кийиб ўз муридлари билан Каъба сари йўл олади.

Румда қолган тарсо қизи туш кўради. Тушида Исо (а.с.)дан: «Шайх Санъондек буюк муршид сенинг ҳузурингга мәҳмон бўлиб келса-ю, сен мезбонлик одатини билмасдан унинг бошига не кунларни солдинг?! Энди вақтни ғанимат билиб унинг ортидан бор, динига мушарраф бўл», – деган хабар келади. Тарсо қизи оҳ урганча кўзларидан надомат ёшларини тўкиб Каъба томон йўлга тушади. Йўлда унга хасталик ва ожизлик юзланиб, тупроқ устида ҳушидан кетади. Шайхга бу ҳол аён бўлиб, муридлари билан орта қайтади ва тарсо қизининг сўнгги лаҳзаларда иймон соҳибаси бўлиб жон беришига шоҳид бўлади. Алишер Навоий ҳикоят сўнгига ишқа шундай таъриф беради:

*Ишқ баҳредурки. йўқ поён анга,
Ҳар ҳубоби гунбади гардон анга...*

*Оламедур ишқ. лекин бас васеъ.
Торамедур ишқ. лек эсру рафет...*

Шу ўринда Навоий агар унга Аллоҳ умр берса, ўз ишқи шарҳини назмга солиб бир достон ёзиш нияти борлигини айтади:

*Бир неча кун умрдин топсам амон,
Шарҳи ишқим назм этай бир достон.*

*Анда билгай кимгаким инсофдур
Ким, сўзум чинмудурур ё лофдур.*

Маълумки, тасаввуфда Ҳақни танишнинг икки йўли мавжуд. Биринчиси ҳаяжонли, руҳий кечинмаларни ошкора изҳор этиб бориш майли бўлса, иккинчиси осойишта, ички дардни яшириш майлидир. Биринчи майл «сукра» (мастлик) йўли деб аталиб, унинг йирик намояндалари сифатида Боязид Бистомий, Мансур Ҳаллож, Абу Саъид Абулхайр, Фаридиддин Аттор, Жалолиддин Румий, Бобораҳим Машраб номларини келтириш мумкин.

Иккинчи майл саҳв (хушёрлик) йўли деб номланиб, унинг таравфорлари қаторида Жунайд Бағдодий, Саъдий Шерозий, Баҳоуддин Нақшбанд каби ижодкорларларни санаб ўтиш мумкин.

Адабиётшунос олим Н. Комиловнинг фикрича, Шайх Санъоннинг барча диний илмлари ва Қуръонни унутиши бу Ҳаққа етиш учун дунёвийлиқдан, жумладан, ақл ва ақлий нарсалардан қутулиш, ўзлигини унутишга ишорадир. Унинг хотираси қайтиши сукрадан саҳвга қайтиш ҳисобланади. Ҳақиқий бақо эса саҳв, яъни ҳушёрликка қайтишдан кейин бошланади. Сукрадаги солик бамисоли денгизга шўнғиб ғарқ бўлган киши бўлса, саҳвга қайтган денгизга шўнғиб гавҳар доналарини олиб қайтиб чиққан ғаввос кабидир.

Худхуд ҳикоятдан сўнг асл манзилга етиш учун 7 водийни босиб ўтиш кераклигини айтади. Қушлар водийлардан ўта бошлайдилар:

1. Талаб водийси – қушларнинг Симурғ васлига талабгорлиги билан боғлиқ бўлиб, Навоий бу водийга шундай таъриф беради:

*Чун талаб водийсиға қўйсанг қадам,
Оллингга ҳар дам келур юз минг алам...*

*Истамак ранжи қўнгулни зор этар,
Топмомоғлиғ руҳни афгор этар...*

*Ламъа кўргузган сои мөхри висол,
Айлагай шоминг саҳарға интиқол...*

*Аждаҳодин етмагай кўнглунгда ранж,
Ўйла бўлмиш бўлгай ул машъуф ганж.*

Алишер Навоий ҳар бир водий таърифидан сўнг шу водий моҳиятини очиб берувчи ҳикоят ҳам келтиради. Жумладан, асарда Талаб водийси билан боғлиқ қўйидаги ҳикоят берилади.

Қадимда бир қудратли подшоҳнинг Юсуфдек гўзал ўғли бўлган экан. Бутун олам аҳли унга ошиқу шайдо бўлиб, агар у қатл этмоқчи бўлса ҳам, кишилар бундан ғам чекишимас экан. Бир куни саҳрода айланиб юриб минглаб ошиқи зорларнинг унинг ишқида изтироб чекаётганини кўради.²⁵ Улар орасида икки девона шаҳзоданинг дикқатини тортади. Мулозимлар уларни ушлаб қаср томон олиб келадилар. Шоҳ улардан бирини зиндонга ташлаб, иккинчисини ўзига итбоқар қилиб тайинлади. Шунда улардан бири иккинчисидан бу азоб-уқубат ичидаги ҳоли қандай эканлигини сўраганида, у бу ҳолат мashaққат эмас, балки ошиқ учун роҳат эканлигини айтади. Иккинчиси ҳам бу сўзларни тасдиқ этиб, ошиқ ўз маъшуқи васлига талабгор экан, бу азоблар унга фақат мамнунлик баҳш этишини баён қиласиди. Бу сўзларни пана жойдан эшишиб турган шаҳзода бениҳоя хурсанд бўлиб, уларни ўзининг яқин маҳрамларига айлантиради.

Ҳикоятдан келиб чиқадиган хulosса шуки, талаб водийсига қадам қўйган солик ошиқлиқдан келадиган жами синовларга, мashaққат ва уқубатларга тайёр туриши, маъшуқ васли йўлидаги қийинчиликларни баҳту саодат деб қабул қилиши керак. Зоро, бу водийдан мақсад Яратганинг васлидир.

2. Ишқ водийси – бу водийда қушларнинг қалбини Симурғнинг ишқи банд этади, улар ўзларини ва дунёни унутадилар. Алишер Навоий бу водийни шундай таърифлайди:

²⁵ Тасаввуф таълимотига кўра, маъшуқ, яъни илоҳий мазҳар моддий жисмдан холи деб қаралади, унинг жинси ва ёши (аёл ёки эркак, кекса ёки навқиронлиги) аҳамият касб этмайди. Шу ўринда буюк сўфий Шамс Табризий ва соҳирнафас шоир Жалолиддин Румийларнинг муҳаббатини эслга олиш кифоя.

*Ишқ келди машъали гетиfurўз,
Дема машъал шуълайи офоқсўз.*

*Ишқ аро ҳар кимса дархур бўлмағай,
Ўтқа лойиқ жуз самандар бўлмағай...*

*Куймаган ишқ ичра эрмас ишқбоз,
Ошиқ эрмас улки эрмас жонгудоз.*

Мазкур водий тавсифи учун ҳазрат Алишер Навоий Асмаъий²⁶ билан боғлиқ ҳикоятни келтиради. Ҳикоятга кўра, Асмаъий ҳаж томон кетаётиб бир чашма бошида ёзув битилган тошни кўради. Тошга шундай деб ёзилган эди: «Эй Ҳижоз аҳли! Бир сирнинг чорасини топсангиз: агар киши ишққа мубтало бўлиб, ишқ уни сабру қароридан жудо этган бўлса нима қилсин?»

Асмаъий қўлига қалам олиб, ёзув тагига шундай сўзларни битади: «Кимки бу ҳалокатли йўлга кирган бўлса, ундан қўрқмасин». Бу сўзларни ёзиб бўлиб, Асмаъий йўлида давом этади. Эртасига яна шу жойга келиб қараса, тошда янги ёзув пайдо бўлган экан: «Агар ошиқ пок бўлса-ю, ишқини яширин сақласа, лекин муҳаббат шиддатидан тоқати тоқ бўлиб васлга эҳтиёж сезса, бунинг иложини топмаса нима қилсин?» Асмаъий бу сўзларни ўқиб, қалами билан шундай деб ёзиб қўяди: «Агар ўша дардли инсон насиҳатларимдан ўз мақсадига эришмаган бўлса, ўлсин ва ишқ ўтидан ўзини халос қилсин!»

Орадан бир кун ўтиб ошиқнинг жавобини билиш учун ўша жойга келган Асмаъий чашма ёнида бошини тошга уриб ҳалок бўлган бир кишини кўради. Асмаъий бу ҳолдан азобланиб, ҳалок бўлган ошиқ учун мотам тутади ва марҳумни қабрга қўяди.

Ушбу ҳикоятдан келиб чиқадиган хулоса шуки, ошиқнинг асосий маслаги – ишқ йўлида жисмдан воз кечиш ва ёр учун ўлмоқликни арзимас иш деб билиш.

3. *Маърифат* водийси – бунда күшлар Симурғ ҳақидаги билимлар, ғоялар чексизлигини ҳис этадилар, Симурғни таний бошлайдилар.

²⁶ Асмаъий Абу Саъид Абдумалик бинни Қурайб – 828 йилда вафот этган машҳур араб тилшунос олими.

*Кимки бу водийға бұлды мұттасиғф,
Топти анда ҳолларни мұхталиғ.*

*Водиедур. юз туман минг онда үйл.
Ул бу бир келмай. онынгдекким бу ул...*

*Гар сулук авторида тағыйир әди,
Мақсади лекин борининг бир әди.*

Водий таърифига илова тарзіда құйидаги қикоят көлтирилған: Айтишларича, бир куни бир гурух күрлар тақдир тақозоси билан Ҳиндистонда бир муддат яшаб, үз юртларига қайтибдилар. Шунда бир киши улардан: «Ҳиндистонда филни күрдингларми?» – деб сүрабди. Күрлардан тасдиқ жавобини олгач, филнинг қандай ҳайвон эканини таърифлашларини илтимос қилибди. Шунда күрларнинг ҳар бири филнинг маълум бир аъзосини пайпаслаб ҳосил қылған тасаввури асосида филни устунга, аждахога, иккита сүякка, осилиб турған илонга, чүққига, қимирлаб турған иккі еллигичга үхшатибди. Уларнинг таърифини тинглаб турған филбонликдан хабари бўлган бир киши күрларга танбех бермасдан шундай дебди: «Гарчи улар үз билгандарича сўз айтиб, бир-бирларига зид фикрларни көлтирган бўлсалар-да, бу кечирарлайдир. Чунки улар айтган сифатларнинг барчасини бир ерга жам қиласа, жавоблардан фил ҳақидаги муайян тасаввур пайдо бўлади».

Ҳикоятдан келиб чиқадиган хулоса шуки, Аллоҳни таниш ва билиш йўли ҳар бир солик учун ўзига хос бўлиб, бу йўллар қанчалик хилма-хил бўлмасин, мақсади бир – Яратганни англаш.

4. *Истиғно* (эҳтиёжсизлик) водийсида қушларнинг эҳтиёжманд, Симурғнинг эса эҳтиёжсизлиги тасвири баёнида соликнинг мана шу эҳтиёжсизликни англаб етиш замиридаги ҳолати ифодаланади. Навоий водийни шундай тасвирлайди:

*Водий ондин сўнгра истиғнодуурур,
Онда тенг аълову гар аднодуурур...*

*Етти кишвар ичра шоҳи қаҳрамон,
Бир гадо онда ҳамону ул ҳамон...*

Онда тенг кўр гумраҳу огоҳни,
Дайр кўйи бирла Байтуллоҳни.

Водий моҳиятини ёритиш учун Алишер Навоий шатранж ўйини билан боғлиқ ҳикоятни келтиради. Унга қўра, икки шатранж устаси икки томонга ўтириб, ўртага тахтани қўйган ҳолда унга шатранж доналарини териб чиқишиади. Икки ўртада кураш бошланади. Бунда шатранж тахтаси ўраб олинган қалъага, ундаги кураш эса худди ҳакиқий уруш майдонига ўхшаб қолади. Агар ўйин тугаб, шатранж ўйновчи тахтанинг бир четини кўтарса, буларнинг барчаси бир зумда йўққа чиқади. Чунки шатранж ўйновочи уста учун, ўйин тугагач, шатранж доналарининг ҳеч қандай фарқи қолмайди. Шатранж доналари халта ичига солингач, «шоҳ» қўйи тушиши, «пиёда» эса юқорига кўтарилиши мумкин. Хулоса шундаки, Ҳақ наздида барча инсонлар шатранж доналари каби «ҳаёт ўйини»-дан сўнг тенг даража касб этадилар.

5. Тавҳид (бирлик) водийси. Бутун борлиқ ягона руҳ – Симурғдан иборат эканини тушуниш:

Чун бу водий сори сайринг қўйди гом,
Фарду яктолиғ санга бўлди мақом...

Бирда бирдин ҳосил ўлди бир адад,
Йўқ хирадқа мунда дам урмоққа ҳад...

Бир бўлу бир кўру бир де, бир тила.
Майл қилма мунда иккилик била.

Водий моҳиятини янада аниқ ифодалаш учун Алишер Навоий Мансур Халлож²⁷ билан боғлиқ воқеани келтиради. Унга қўра, Мансур Халлож доим тилида «Анал Ҳақ» жумласини тақрорлаб юради. Дин арбоблари: «Сенга юзланган ҳолат сулук аҳлининг кўпига аён, лекин улар одоб сақлаб, ўз даъволарини ошкор қилмаганлар. Сен ҳам нафсингни дорга сазовор қилма», – деб на-

²⁷ Мансур Халлож – 858 – 922 йилларда яшаб ўтган сўфий шахс. «Анал Ҳақ» – «Мен Ҳақман» дегани учун руҳонийлар томонидан ўлимга ҳукм қилинган. Тасаввудаги сукра йўли тарафдорларидан.

сиҳат қиласидилар. Лекин Мансур Ҳаллож бу жумлани тақорорлашдан тұхтамайди. Бир куни у тушида расуулллоҳ (с.а.в.)ни құради. Расуулллоҳ (с.а.в.) унинг дилидаги «Нега Мұхаммад (с.а.в.) мейрөж кечаси фақат ислом умматининг гунохини сұради, барча осийларнинг гунохини тилаганда нима бўларди?» деган ўй-хаёли учун унга танбәх беради:

Онда менликнинг хаёли йўқ эди,
Балки бу лафз эҳтимоли йўқ эди.

Элтган ул эрди. бошлиғон ҳам ул,
Истағон ҳам ул, бағишлиғон ҳам ул...

Ул эди дегон ўзи, берғон ўзи,
Базл аро сочқон ўзи, терғон ўзи.

Ҳикоятдан келиб чиқадиган хulosса шуки, Мансур Ҳаллож тавҳид моҳиятими тұла англаб етмагани учун «менлик» хаёли билан «Анал Ҳақ» жумласини тақорорлаб юрап эди. Аслида, тавҳид водийисида «менлик»ка йўл йўқ.

6. Ҳайрат водийси – Симурғнинг улуғворлигидан ҳайратга тушиб ақлдан маҳрум бўлиш.

Алишер Навоий мазкур водий ҳақида шундай дейди:

Ҳайрат айлар тилни гунгу лол ҳам,
Ақл зойил. ҳушни помол ҳам...

Йўқни билмас, борини ҳам онгламас.
Не буларни тонглар-у, не тонгламас...

Фоний эрканнию боқиилиғни ҳам,
Маст эрканнию соқиилиғни ҳам.

Алишер Навоий мазкур водий билан боғлиқ қарашларини ифодалаш учун бир бора васл шаробидан маст бўлиб ўзини йўқотган ва ҳажрда қолган йигит ҳақидаги ҳикоятни илова қиласиди. Унга қўра, бир подшохнинг ҳуснда ягона қизи тушида бир йигитни севиб қолади. Бир куни отасининг базмида у йигитни қўриб ҳушидан айрилади. Йигит ҳам қизни қўриб ишқда ёна бошлайди.

Подшоҳнинг қизи икки маҳрам канизагига ўз сирини очиб, дардига даво топишларини ўтинади. Канизаклар жуда устомон ва ақли бўлиб, ўз маликаларининг ҳажр азобини бартараф этиш учун йигитни излаб топиб, у билан дўст тутина дилар. Суҳбатларда йигит ўз ишқи ҳақида уларга айтиб беради. Икки канизак базм уюштириб йигитни чорлайдилар, қўшиқ айтиб, май билан масти қиласидилар. Сўнг подшоҳнинг қизи ҳузурига йигитни элтадилар. Йигит у ерда ҳам май ичади, ақлни олгувчи базмда масти бўлади, мутлақо ўзини унугради... Нихоят, ҳуши ўзига қайтгач, маъшуқа васлининг тушми, ўнгми эканини фаҳм этолмай паришон бўлади. Атрофдагилар унинг ҳолини сўрашса, мен ҳажр ўтида ён япман, яна ҳолимни сўраб азобга солманг деб жавоб беради. Буюк шоир бу ҳикоятни айнан ҳайрат водийси билан боғлаб келтирад ёкан, Ҳақ васли сари интилган солик ҳали чинакам висолга эришмай туриб ундан бениҳоя ҳайратга чулғаниб, ўзлигини унугтишига ишора қиласиди. Бу эса ўз ўрнида чинакам дийдор учун солик руҳини тайёрлаш босқичини ўтайди.

7. Фақру фано водийсида ўзликдан воз кечиб, Симурғ билан бирлашиш, абадийликка қайтиш моҳияти мужассам. Навоий бунга шундай таъриф беради:

*Йўқ бу водий ичра жуз хомушлук,
Гунгун кар бўлмоғлигу бехушлук...*

*Ҳар некум қилсанг гумон топғон вужуд,
Буди йўқ, бу наевъ эрур бори намуд.*

*Ғайри ҳақкум, қодири барҳақдур ул,
Борча фоний, боқийи мутлақдур ул.*

Ушбу водий шарҳида Навоий бир эмас, тўрт ҳикоят келтиради. Улар орасида «Парвоналар ва шам» ҳикояти алоҳида аҳамиятга эга. Ҳикоятга кўра, бир кеча парвоналар жам бўлиб шамга этишмоқни мақсад қилишибди. Қанотларини ўтда ёқишига ҳозирлаб, ўз ҳолларини изҳор қилмоқчи бўлибдилар. Парвоналардан бири қанотларини қоқиб шамда ёна бошлабди ва шам ҳақидаги сўзларни бошқа парвоналарга аён қилибди. Парвона ҳар қанча равшан сўзламасин, эшитувчилар уни англай олмабдилар. Шунда бошқа

парвоналар ҳам бу ҳолни англамоқ учун уриниб қўрибдилар ва ўз қанотларини кўйдирибдилар. Сўнгги парвона қўрқмасдан ўзини шуълага уриб пок бўлибди ва ўзи ҳам шуълага айланиди. У ўз мақсади ичра нобуд бўлибди ва фанода айни муддаога эришибди. Ҳикоятдан келиб чиқадиган хулоса шуки, куймай туриб шам билан бирликка эришиб бўлмайди. Солик фано бўлмай туриб абадийликка, Ҳақ висолига эришолмайди. Шоир ҳикоят сўнгида Фоний тахаллусини қўллаш билан водий моҳиятини янада теранроқ, чуқурроқ англатади:

*Фониё, лофи фано урмогни қўй,
Васл эса коминг, фано ўтиға куй.*

*Эврулуб шамъ ўтиға парвонавор,
Ўзни ташла шуълаға девонавор.*

Нихоят, водийлар сўнгида фақат ўттиз қуш қолгани маълум бўлади. Ўттиз қуш форсчада «Си мурғ» дегани. Бу қушлар қаерга боқмасинлар, у ерда ўзларининг аксларини кўра бошлайдилар:

*Кўрдилар ўзни қаёнким тушти кўз,
Аллоҳ-Аллоҳ, не ажойибдур бу сўз*

*Ким, қилиб Симурғни ўттиз қуш ҳавас,
Ўзларин кўрдилар ул Симурғ бас.*

Достон сўнгида қушлар ўзларидаги Симурғни кашф этадилар.

Тасаввуф фалсафасига кўра, бу дунё Ҳақнинг тажаллийси – Аллоҳнинг жилоланишидир. Дунёдаги барча мавжудот Аллоҳнинг зухуридир. Шу маънода инсон ҳам ўзидаги мана шу заррани кашф этмоғи, бунинг учун эса жуда узун ва машақкатли йўлни босиб ўтмоғи керак. Бу, юқорида келтирилганидек, етти водийдир. Сўнгги водий Фақру фано водийси, яъни йўқликка айланиб, Аллоҳга қўшилмоқдир.

Шундан келиб чиқиб айтиш мумкинки, Симурғ – Ҳаққа етишиш тимсоли. Қушлар – Ҳақ висолига талабгор соликлар тимсоли. Ҳудхуд – пири комил рамзи.

Юқорида кўринганидек, «Лисон ут-тайр» достони Фаридиддин Атторнинг «Мантиқ ут-тайр» достонига жавоб тарзида ёзилган.

Бир қарашда бу икки достондаги воқеалар ривожи ҳам, қаҳрамонлар ҳам бир хилдек тасаввур уйғонади. Аслида, ҳар икки муаллиф ғоявий нұқтаи назар ҳамда қаҳрамонлар зиммасидаги бади-и юқ жиҳатидан бир-бирларидан фарқланадилар. Адабиётшунос З.Мамадалиева «Алишер Навоий «Лисон ут-тайр» достонидаги рамзий образлар тизими» номлы тадқиқотида мазкур икки достондаги рамзий тимсолларни таҳлил қиларкан, «Лисон ут-тайр»даги Ҳудхуднинг ўзига хос бир неча хусусиятларини кўрсатиб ўтади:

1) Навоий талқинидаги Ҳудхуд комил инсон рамзи бўлиш билан бирга муаллифнинг достондаги биринчи рақамли тимсоли ҳамдир;

2) Навоий тасвирилаган Ҳудхуд юксак ирфоний масалаларни ҳар бир қушнинг даражасига мос равишда содда ҳаётий воқеалар ва мисоллар билан тушунтириб беради;

3) Фаридиддин Аттор ўз достонида асар сюжетини ҳеч бир воқеасиз, қушларни таърифлаш билан бошлайди, «Лисон ут-тайр»да эса қушларни таърифлаш вазифаси Ҳудхудга юкландади;

4) «Мантиқут-тайр»да етти водий таърифи келганда Ҳудхуднинг вазифаси тугайди, лекин Навоий достонидаги Ҳудхуд қушларни сўнгги – Фақру фано водийсида ҳам қўллаб-қувватлайди.

Шунингдек, тадқиқот муаллифининг фикрича, «Мантиқ ут-тайр»даги ғояга кўра, ундаги қушлар Симурғнинг сояси, холос. Яъни улар Симурғга интилгандаридагина аҳамиятли. Қушлар (инсонлар)нинг бу дунёдаги ҳаёти ҳижрон ва айрилиқда. Навоийда эса уларнинг яратилиши ҳижрон ва айрилиқда эмас, балки Яратганинг ҳикматидадир. Шу маънода икки достонда ваҳдат ул-вужуд фалсафасининг икки хил талқини акс этганини кўрамиз. Аттор достонида қушлар сўнгги водийда Симурғ билан бирлик касб этадилар, Навоий достонида эса риёзат чекиши асносида покланиб, ўзларидаги Симурғни кашф этадилар.

Достондаги баъзи қушларни рамзий тимсоллар сифатида қуидагича талқин қилиш мумкин:

Товус – дунё гўзалигига маҳлиёлик.

Қарчигай – ҳокимлик қилиш истаги.

Булбул – фоний дунё ошиғи.

Каклик – ўз рафттору амалларига маҳлиё бўлиш.

Бургут – мақсадсиз куч-кудрат.

Товук – фикрий, маънавий парвоздан маҳрумлик.

Бундан келиб чиқадыки, күпчилик Ҳаққа етишиш даъвоси билан сулукка кириши мумкин, лекин ҳамма ҳам бу йўлдаги имтиҳон ва синовлардан ўта олмайди.

«Лисон ут-тайр» «Мантиқ ут-тайр» сингари рамал баҳрининг рамали мусаддаси маҳзуф (рукнлари ва тақтиъи: фоилотун фоилотун фоилун – $V - - / - V - - / - V -$) вазнида ёзилган.

Таянч тушунчалар

- Рух ул-амин
- Нури Мұхаммадия
- Талаб өодийси
- Ишқ өодийси
- Маърифат өодийси
- Истиғно өодийси
- Тавҳид өодийси
- Ҳайрат өодийси
- Фақру фано өодийси
- рамали мусаддаси маҳзуф
- рамзий тимсоллар

Савол ва топшириқлар:

1. «Лисон ут-тайр» муқаддимасида «Хамса»да зикр этилмаган қайси тарихий шахсларга бағишинган маҳсус боблар бор?
2. Достонда мавжуд рамзий тимсолларни шарҳланг.
3. Достонда келтирилган өодийлар моҳиятини изоҳлашга ҳаракат қилинг.
4. Асардаги Симурғ өа қушлар диалоглари орқали қандай ғоялар илгари суриласди?
5. Навоий нима учун «Лисон ут-тайр»да айнан Фоний таҳаллусини қўллаган?

Адабиётлар:

1. Навоий Алишер. Лисонут тайр. Мукаммал асарлар тўплами. 20 жилдлик. – Тошкент: Фан, 1994. 12-жилд.
2. Navoiy Alisher. Lison ut-tayr (nasriy bayoni bilan). – Тошкент: G.G'ulom, 2005.

3. Лисонут тайр (насрий баёни билан) / Таҳрир ҳайъати А.Қаюмов ва бошқ. – Тошкент: Адабиёт ва санъат, 1991.
4. Н.Комилов. Тасаввуф. – Тошкент: Mavarounnahr – O'zbekiston, 2009.
5. Бертельс Е.Э. Навои и Аттар. Суфизм и суфийская литература. – М., 1965. – С.377 – 421.
6. Имомназаров М. Ҳақиқат ва мажоз (2 – 3-мақолалар) // Шарқ юлдузи. – Тошкент, 1989. – №4; 1991. – №4.
7. Олимов С. Ишқ, ошиқ ва маъшуқ. – Тошкент: Адабиёт ва санъат, 1992.
8. Шарипов Ш. Алишер Навоий «Лисон ут-тайр» достонининг генезиси ва ғоявий-бадиий хусусиятлари. – Тошкент: Фан, 1982.– 96 б.
9. Шарипов Ш. «Лисонут тайр» ҳақиқати. – Тошкент: Маънавият, 1998.
10. Мамадалиева З. «Лисон ут-тайр» достонидаги рамзий образлар тизими. Филол. фан. номз... дисс. – Тошкент, 2011.

АЛИШЕР НАВОЙИННИГ АДАБИЁТШУНОСЛИК ВА ТИЛШУНОСЛИККА ДОИР АСАРЛАРИ

РЕЖА:

1. «Муфрадот» – муаммо жанрига бағишиланган асар.
2. «Мажолис ун-нафоис» – туркий тилдаги биринчи таз-кира сифатида.
3. «Мезон ул-авzon»да аruz назариясига доир масалалар-нинг ёритилиши.
4. «Мұхқамат ул-луғатайн»да туркий ва форсий тил қи-ёси масалалари.
5. «Сабъат абхур» – араб луғатшунослигига құшилған ҳисса сифатида.

Алишер Навой бадиий ижод билан бирга илмий фаолиятни тенг олиб борган буюк мутафаккирдир. Унинг адабиётшунослик, тилшунослик, тарих, дин тарихи ва назариясига доир күплаб асарлари мұхим маълумотларни қамраб олгани, аниқ далилларга асосланғани ва объектив хulosаларга әгалиги билан бугунги кун илм-фани учун ҳам ниҳоятда қимматлидир.

Алишер Навой адабиётшуносликка доир уч асар яратған бў-либ, унинг «Муфрадот» ёки «Рисолаи муаммо» асари ҳижрий 890, милодий 1485 йилда форс-тожик тилида яратилган.²⁸ Рисола муаммо жанрини ечиш қонун-қоидаларига бағишиланған.

Маълумки, муаммо арабча «күр қилинган», «яширинган» маъ-ноларини билдирувчи ва бир, баъзан эса икки байтдан иборат мус-тақиқ шеър туридир. Муаммода бирор исм ёки нарса-буюм номи беркитилади. Бунда араб ёзувидаги ҳарфлар турлича ўзgartириш йули билан яширинган сўзлар топилади. Муаммо 2 хил маъно асосига қурилади: ташқи (чалғитувчи) ва ички (асосий).

Алишер Навой «Рисолаи муаммо» асарида унгача яратилган асарларнинг мураккаблиги ва улардаги камчиликлар ҳақида га-пирав экан, ўз асарида иложи борича уларни бартараф қилишга интилади. Шоир рисоланинг кириш қисмida ғоят камтарлик билан

²⁸ «Муфрадот» асари бўйича Л.Зоҳидов номзодлик диссертациясини ёқлаган.

уни яратишдан мақсад олимлар эътиборига ҳавола қилиш эмас, балки кенг ҳалқ оммаси, хусусан, ёш авлодга муаммо сирларини ўргатиш эканини таъкидлайди:

«Бу мухтасар асарнинг рисолалар қаторига кириш қобилияти ва бу каминада уни олимлар қўзларига қўрсатиш салоҳияти бўлмаса ҳам, болаларга муаммо амалларини ўрганишларини осонлаштириш учун яраши мумкин».

Рисоланинг ёзилиш тарихи ҳақида «Хамсат ул-мутаҳайирин» асарида ҳам маълумот берилади. Асарда айтилишича, бир куни Алишер Навоий ўзидан аввал муаммо ҳақида яратилган асарлар ва улардаги мураккабликлар ҳақида ўйлаб ўтирганида, ҳузурига Абдураҳмон Жомий ташриф буюради. Навоий унга муаммога доир содда ва оддий ҳалқ оммаси учун тушунарли бўлган асар ёзмоқчилигини айтади. Шунда Жомий ўзи ҳам анчадан бери шу ҳақда ўйлаб юрганини таъкидлаб, қисқа муддат ичида «Рисолаи муаммои манзум» асарини яратади ва Алишер Навоийга қўрсатади. Навоий унинг анча мураккаб (ҳалқ оммаси учун тушунарсиз) эканини кўриб ўзи «Рисолаи муаммо» асарини яратади ва Жомийга тұхфа қилади. Жомий асарни ниҳоятда юксак баҳолаб, ўғли Зиёвуддин Юсуф учун дарслик сифатида тавсия этади.

«Муфрадот» асарида муаммонинг турли услугуб ва амаллари ихчам, равон тилда баён қилинади. Муаммо амалларига келтирилган мисоллар ҳам ниҳоятда аниқ ва тушунарлидир.

Асарда Алишер Навоий муаммо амалларини 3 қисмга ажратади:

- 1) аъмоли таҳсилӣ – ҳосил қилиш амаллари;
- 2) аъмоли тақмилӣ – мукаммалаштириш амаллари;
- 3) аъмоли тасхилий – осонлаштириш амаллари.

Навоий аъмоли таҳсилӣга таъриф берар экан, унинг интиқод (сарапаш) деган турини изоҳлаб, унга кўра сўзнинг баъзи ҳарфларини олиш орқали муаммо ҳосил қилинишини айтади ва ОДАМ исмида:

*Дили моро чу хоҳй боз жусташ
З-оху дарду меҳнат чў нахусташ*

(Маъноси:

Дилимизни яна ахтармоқчи бўлсанг
Оҳ, дард, меҳнатдан биринчисини қидир)

муаммосини мисол қилиб келтиради. Бу муаммони ечиш учун ох, дард, мехнат сўзларининг бош ҳарфлари олинса. ОДАМ исми келиб чиқади.

Шунингдек. МАЛИК исмида:

Жониби ҳуру сўйи Кавсару Фирдаев малўй,
Рухи он моҳу лаби лаълу сари кўяш жўй

(Мазмуни:

Хур, Кавсар, Фирдавс томонига бориб юрма,
Ул моҳ (ой)нинг юзини, лаъл лабини ва қўчасининг бошини изла)

муаммоси келтирилиб, бунда моҳ, лаъл ва куча сўзларининг боши, яъни биринчи ҳарфлари олиниши орқали МАЛИК исми келиб чиқиши таъкидланади.

Муаммони ечиш амалларининг иккинчиси аъмоли *такмилӣ*, яъни мукаммалаштириш амаллари деб аталиб, унинг ўзи яна З турга бўлинади: таълиф, исқот, қалб. Таълиф (улаш)га кўра, мисрадаги баъзи сўзларнинг бир-бiri билан қўшилиши натижасида яширинган исм ҳосил қилинади. Масалан:

Чун бибирад жом ба сўи даҳан,
Қатра зи лаб пок кунад моҳи ман.

(Мазмуни:

Менинг ойим жом (қадаҳ)ни даҳан (оғзи) томон олиб борса,
Лабидаги қатраларни тоза қилади).

Бунда «жом» сўзи «даҳан» (оғзи) томонга, яъни «д» томонга олиб борилади ва «жомид» сўзи ҳосил бўлади, иккинчи мисрада назарда тутилган лабдаги қатра, яъни нуқта тозаланса (олиб ташланса), «Ҳомид» исми келиб чиқади.

Асарда шу тарзда 3 амал, 15 қисм, 48 та услуг қоидалари ҳамда улар билан боғлиқ ҳолда 121 та муаммо ва уни ечиш усуллари кўрсатиб берилади. Рисолада муаммонинг турли услуг қоидалари, юқорида кўринганидек, ихчам ва тушунарли тилда баён этилгани учун асар ўз даврида ва ундан кейин ҳам кенг !шухрат қозонди.

Алишер Навоийнинг адабиётшунос олим сифатидаги фаолиятини кўрсатиб берувчи яна бир асар бу «**Мажолис ун-нафоис**» тазкирасидир.²⁹ Навоий тазкирани 1491 – 1498 йиллар давомида яратади. Тазкирада XV асрда яшаб фаолият юритган 459 шоир ҳақида маълумот келтирилади. Алишер Навоий тазкиранинг муқаддимасида асарнинг таркибий қисми ва номланиши ҳақида шундай ёзади: «...чун бу мақсадга етилди, они секкиз қисм этилди. ҳар қисми бир мажлисга мавсум бўлди ва мажмуига «Мажолис ун-нафоис» от қўйилди». Тазкирадаги шоирлар мажлис, яъни қисмларга қуидагича тақсимланган: 1-мажлисда 46 та, 2-мажлисда 91 та, 3-мажлисда 175 та, 4-мажлисда 72 та, 5-мажлисда 21 та, 6-мажлисда 31 та, 7-мажлисда 22 та ва 8-мажлисда Ҳусайн Бойқаро билан боғлиқ маълумотлар келтирилган.

Тазкиранинг 1-мажлиси «Жамоати маходим ва ализлар зикри-даким, бу факир аларнинг шариф замонининг охирида эрдим ва мулозиматлари шарафига мушарраф бўлмадим» деган ном билан тасниф этилган бўлиб, бунда ҳазрат Навоий ўз тазкирасини «табаррук қилмоқ учун» шайхлардан Хожа Қосим Анвор зикри билан бошлаганини таъкидлайди:

«Ул жумладин солики автор ва кошифи асрор, яъни ҳазрати Амир Қосим Анвор (куддиса сурруҳу)дур. Ҳар неча аларнинг рутбаси шоирлик поясидин юқорироқдур ва валоят аҳли зумрасида веасфдин тошқарироқ, аммо чун ҳақойиқ ва маориф адосида назм либоси дилпазирроқ учун илтифот қилур экандурлар, таяммун жиҳатидин бу муҳтасарни аларнинг шариф исмлари била ибтидо қилилди».

Қосим Анвордан кейин унинг шогирдлари Мир Маҳдум ва Ҳофизи Саъд ҳақида маълумотлар берилади.

Тазкиранинг 2-мажлисида шоир болалиги ва йигитлик пайтида суҳбатларига мушарраф бўлган шоирлар ҳақида ҳикоя қилинади. Бу мажлис машҳур тарихчи, «Зафарнома» муаллифи Шарафиддин Али Яздий зикри билан бошланади. Мажлисда Алишер Навоий ўзининг тарбияси ва ижодий камолотига алоҳида таъсир кўрсатган зотлар: Хожа Фазлуллоҳ Абуллайсий, Шайх Садриддин Равосий, Шайх Камол Турбатий, Дарвеш

²⁹ Мазкур асар проф. С.Ғаниева томонидан чуқур тадқиқ қилинган.

Мансур, Ҳофиз Али Жомий, Ҳожа Юсуф Бурҳон; ўз замонининг таниқли шоирлари: Мавлоно Лутфий, Яқиний, Атойи, Муқимий, Саккокий, шоир тоғалари: Мир Сайд Кобулий, Мұхаммад Али Ғарибий, фарзанд үрнида қадрлагани шоир Мирзобек, устози ва дўсти Сайид Ҳасан Ардашер ҳақида маълумот беради. Ҳусусан, Алишер Навоий Мирзобек ҳақида ёзар экан, унинг жуда эрта вафот этганини, бадиий жиҳатдан етук байтлар битса-да, уларни якунига етказмаганини афсус билан баён этади. Ҳусусан, унинг:

*Кўзунг не бало қаро бўлубтур
Ким, жонга қаро бало бўлубтур. –*

деб бошланувчи матлаъсини тугатиб, ўз девонига киритганини айтади.

Тазкиранинг 3-мажлиси ўз даври шеъриятига улкан ҳисса қўшган юксак табъли шоирлари ҳақида бўлиб, Абдураҳмон Жомий зикри билан очилади. Мажлисда, шунингдек, Амир Шайхим Суҳайлий, Абдуллоҳ Ҳотифий, Осафий Ҳиравий, Заве Қозиси каби «Ҳамса» достонларига татаббуъ битган ижодкорлар, Сайфий Бухорий каби муаммо ва аруз илмига доир рисола битган ижодкор, Камолиддин Биной, Гадоий каби соҳиби девон шоирлар ҳақида маълумотлар келтириллади.

4-мажлисда замон фозиллари – шеърда машҳур бўлмасалар-да, аммо баъзан латиф байт айтuvчи ижодкорлар ҳақида сўз боради. Алишер Навоий бу мажлисни камолоти «азҳару мин ашшамс» (қуёшдан порлок) шахс – Паҳлавон Мұхаммад Гўштигир зикри билан бошлайди. Шоир унинг паҳлавонлиги у эришган камолотнинг энг қуий даражаси бўлиб, мусиқа илмида ўз даврининг беназири эканини таъкидлайди. Шунингдек, назм айтишда ҳам юксак иқтидорга эгалигини айтиб, Ҳусайн Бойқаро Паҳлавон Мұхаммаднинг қуидаги байтига минг олтин танга туҳфа қилганини фаҳр билан тилга олади:

*Гуфтамаш: «Дар олами ишқи ту корам боғам аст»,
Гуфт хандон зери лаб: «Ғам нест, кори олам аст».*

(Мазмуни:

Унга айтдимки: «Сенинг ишқинг оламида ишим ғамдан иборат бўлди»,

У кулгу аралаш мийигида: «Ғам эмас, оламнинг ишидир», – деди).

Ушбу мажлисда, шунингдек, Хожа Камолиддин Удий, Атоуллоҳ Ҳусайнний, Ҳусайн Воиз Кошифий, Мирхонд, Ҳондамир, Султон Али Машҳадий каби замонасининг фозиллари ҳақида сўз боради.

Тазкиранинг 5-мажлиси Хуросоннинг «табъи назми бор» мир-зозодалари зикрида бўлиб, Давлатшоҳ Самарқандий таърифи билан бошланади. Алишер Навоий Давлатшоҳнинг ҳашам ва мол-дунёдан воз кечиб, фақирлик йўлини тутганилиги ҳақида маълумот берар экан, унинг «Мажмаъ уш-шуаро» («Тазкират уш-шуаро») асарини мутолаа қилган шахс Давлатшоҳнинг истеъоди ва камолоти қай даражада эканидан хабар топади деган фикрни келтиради. Мазкур мажлисда, шунингдек, Мир Ҳусайн Али Жалойир, Муҳаммад Солих, жияни Мир Ҳайдар Сабухий, акасининг набираси Мир Иброҳим каби мирзозодалар ҳақида ҳам маълумотлар келтирилади.

Тазкиранинг 6-мажлисида Хуросондан ташқаридағи, хусусан, Самарқанддаги фозиллар ҳақида сўз боради. Ушбу мажлис Самарқанд ҳокими Аҳмад Ҳожибек таърифи билан очилади. Алишер Навоий унинг Вафоий таҳаллуси билан шеърлар битишини, Ҳиротда ҳам ўн йил ҳокимлик қилганини, «сурати хуш ва сийрати дилкаш» шахслигини таъкидлаб, жангчи сифатидаги шижоати ва ботирлигига алоҳида таҳсин ўқиди. Унинг ижодидан қўйидаги матлаъни келтиради:

*Гирифти жони ман аз тан ба зулфи пуршикан басти,
Кушоди парда аз рухсори хешу чашми ман басти.*

(Мазмуни:

Танимдан жонимни олиб кўп занжирли сочинг билан боғладинг, юзингдан пардани очиб (у билан) кўзимни боғладинг).

Мазкур мажлисда «Улуғбек мирзо» мадрасасининг мударриси Хожа Хурд, Низомий «Лайли ва Мажнун»ига татаббуъ битган Хожа Имод Лорий, Кирмон вилояти ҳокими Амир Маҳмуд Барлос ва бошқалар ҳақида ҳам маълумотлар келтирилади.

7-мажлис Амир Темур ва темурий ижодкорлар зикрига бағишланган. Унда Соҳибқирондан бошлаб Султон Али мизогача жами 22 темурий ҳақида сўз боради. Тазкиранинг сўнгги 8-мажлиси тўпалигича Ҳусайн Бойқаро – Ҳусайнний ижодига бағишлиланган.

Алишер Навоий «Мажолис ун-нафоис»да адабиёт майдонида эндиғина кўрина бошлаган шоирларни ҳам эътибордан четда қолдирмайди. Буни қуйидаги мисопларда кўриш мумкин:

«*Мавлоно Сифотий эмди пайдо бўлғонлардандур, факур ҳануз ани кўрмайдурмен, аммо шеърин эшишибмен*»;

«*Мавлоно Асирий ҳам эмди пайдо бўлғон хуштабъ йигитлардиндур*» ва бошқалар.

«Мажолис ун-нафоис»да ўша даврда яшаган баъзи аёл шоирлар ҳақида ҳам маълумот келтирилади. Гарчи уларнинг номлари тазкирада алоҳида ижодкор сифатида келтирилмаса ҳам, улар ҳақидаги шоирнинг қайдлари адабиётшунослик учун ниҳоятда муҳимдир. Алишер Навоий тазкиранинг шоир Шайхзода Анзорийга бағишлиланган фаслида «андоқ зоҳир бўлурким, волида-си ҳам хуштабъдур ва Бедилий тахаллус қилур» деган маълумотни келтирса, Мавлоно Сулаймоний ҳақидаги фаслда Ҳофиз Шерозий ғазалига назира тариқасида ёзилган ва Мавлоно Сулаймонийники деб ҳисобланган шеър ҳақида «Ва машҳури мунундоқдуурким, бу абёт Мавлоно Ҳаким табибининг хотини Мехринингдур» деб ёзади.

«Мажолис ун-нафоис» асари кейинги асрлар тазкирачилик тараққиётига самарали таъсир кўрсатди.

Алишер Навоийнинг «**Мезон ул-авzon**» асари 1492 – 1493 йилларда яратилган.³⁰ Навоий туркий тилдаги адабиётшунослик масалаларига бағишлиланган Шайх Аҳмад Тарозийнинг «Фунун ул-балоға» асари билан таниш бўлмагани учун аруз назариясига доир қонун-қоидаларни туркий тилда илк марта баён қилаётганини алоҳида таъкидлайди, хусусан, «*ғараз бу мақолотдин ва мақсад бу муқаддимотдин бу эрдиким, чун турк алфози билаким*

³⁰ «Мезон ул-авzon» асари бўйича С.Мирзаев, И.Султонов, А.Хожиаҳмедов каби олимлар илмий изланишлар олиб боришган.

назм өоқиъ бўлубдур, анга зобитае ва қонуне йўқ эркондур...» деб ёзаркан. туркий тилда аruz қонун-қоидаларига оид маҳсус асар йўқлигини айтиб ўтади.

Шунингдек, Алишер Навоий муқаддимада ўзидан аввал яратилган арузга доир манбалар: Халил ибн Аҳмаднинг «Китоб ул-айн», Шамс Қайс Розийнинг «Ал-мўъжам», Носируддин Тусийнинг «Меъёр ул-ашъор», Абдураҳмон Жомийнинг «Рисолаи аруз» асарларига тўхталиб ўтиб, уларда мавжуд бўлмаган баъзи доира ва вазнларни ўз асарида келтириб ўтишини айтади. Яъни: «...неча қоидая доира ва вазнким, ҳеч арузда, мисли фан возии Халил ибни Аҳмад ва илм устоди Шамс Қайс кутубида ва Ҳожа Насир Тусийнинг «Меъёр ул-ашъор»ида, балки Ҳазрати Махдумий наввара марқадаҳу нуран «Аруз»ларида йўқ эрдиким, бу фақир бу фан усулидин истихроj қилиб эрдиким, бу китобға изофа қилдим».

«Мезон ул-авzon»да дастлаб Аллоҳга ҳамд, пайғамбарга наът айтилгач, султон Ҳусайн Бойқаронинг ушбу асарни ёзишга илҳомлантиргани ҳақида сўз боради. Сўнгра Навоий арузнинг «шариф» фан эканлигига тўхталар экан, Қуръони Каримдаги баъзи оятлар ва пайғамбаримиз ҳадисларидаги айрим жумлаларнинг аruz вазнлари билан мос келиши, амир ул-мўминин ҳазрат Али девонларидаги шеърларнинг кўпи аruz вазнида эканини таъкидлаб ўтади. Кейинги қисмда Навоий аruz вазнининг кашфиётчиси Халил ибн Аҳмад ва «аруз» истилоҳи ҳақида маълумот беради. Шундан сўнг арузнинг назарий қоидаларини баён қилишга ўтади.

Дастлаб аруздаги энг кичик бирлик – жувзвлар ҳақида маълумот берилар экан, асарда улар «рукн» истилоҳи остида келтирилади. Рукнлар сони 6 та бўлиб, улар қуйидагилардир: енгил ва оғир сабаб, бириккан ва ажралган ватад ҳамда кичик ва катта фосила.

Жувзвлардан сўнг асл рукнлар таърифи келади, улар «асллар» ёки «усул» номи билан берилади. Алишер Навоий асл рукнларни умумий ҳолатда 8 та деб келтиргани ҳолда улардан фақат бештасига тўхталиб ўтади ва ушбу беш асл рукн форсий, шу билан бирга, туркий шеърда кўп қўлланилгани учун қолган З аслга тўхталиб ўтмаслигини таъкидлайди.

Мазкур асллар таърифидан кейин улардан ҳосил бўлувчи зиҳоф (асл рукнларни турлича ўзгартириш) ва фуруъ (тармоқ рукнлар)га тўхталади. Алишер Навоий зиҳофлар сонини

45 та деб келтиради.³¹ Кейинроқ доиралар таърифига ўтилади. Маълумки, аруздаги доира тузилиш жиҳатидан ўхшаш бўлган баҳрлар гуруҳи бўлиб, асарда 7 та доира келтирилган: «Доираи мўъталифа» (рамал, ҳазаж ва ражаз баҳрларидан тузилган), «Доираи муҳталифа» (муқтазаб, мужтасс. мунсариҳ ва музореъ баҳрларидан тузилган), «Доираи мунтазиа» (мушокил, сарий, жадид, қариб ва хафиҳ баҳрларидан тузилган), «Доираи муттағиға» (мутақориб ва мутадорик баҳрларидан тузилган) келтирилади.

5-доира бевосита Алишер Навоийнинг ўз ихтироси бўлиб, бунда Навоий 2-доирадаги 4 баҳр ва 3-доирадаги 5 баҳр – жами 9 баҳрнинг солим (яъни зиҳоф кирмаган, ўзгаришга учрамаган) рукнларини жамлаб уларни бир доирага киритади ҳамда бу доирани «Доираи мужтамиа» деб атайди. 6-доира «Доираи муҳтала» аталиб, унга Навоий комил ва воfir баҳрларини киритади ва мазкур баҳрларнинг матбуъ (ёқимли) баҳрлар эканини, лекин негадир уларда кам шеър ёзилгани ва доира тартиб берилмаганини айтади. Демак, бу доира ҳам бевосита арузшуносликка ҳазрат Навоий томонидан олиб кирилган. 7-доира эса уч баҳр – тавил, мадид ва басит баҳрларидан тузилган бўлиб, Навоийнинг ёзишича, бу баҳрлар араб адабиётига хос, ажам шеъриятида қўлланилмаган ва маҳсус доирага киритилмаган.

«Мезон ул-авzon»да жами 19 баҳр, 160 та вазн келтирилган бўлиб, барча мисоллар муаллифнинг ўз ижоди маҳсулидир. Фақат асарнинг ҳалқ оғзаки ижоди билан боғлиқ жанрлар қисмида бир байт Ҳусайн Бойқародан, бир байт «Муҳаббатнома»дан келтирилганини қўрамиз.

Навоий вазнларга таъриф берар экан, унга қўпроқ мисолларни ўз ғазалиётидан келтиради. Ҳусусан, ҳазажи мусаммани солим вазнини таърифлашда:

Зиҳи мулкунгнинг ўн секиз мингидин бир келиб олам,
Бу олам ичра бир уйлук кулунг Ҳавво билан одам;

Ражази мусаммани матвийи маҳбун вазни билан боғлиқ ўринда:

³¹ Зиҳофлар сони «Ал-мўъжам»да 35 та, «Фунун ул-балоға»да 35 та. «Муҳтасар»да 44 та, Жомийнинг «Рисолай аруз»ида 45 та деб қўрсатилган.

*Гар аламимға чора йўқ, бўлмаса бўлмасун, нетай,
Ваҳ, ғамима шумора йўқ, бўлмаса бўлмасун, нетай;*

Мутақориби мусаммани маҳзуф вазнида:

*Очилди чаман, гулъузорим қани,
Сиҳи сарв бўйлуқ нигорим қани? –*

каби байтларни келтирадики, бу ҳолат Навоий келтирган вазнлар туркий адабиёт учун шунчаки тажриба бўлмай, балки уларда бадиият жиҳатдан юксак ғазаллар ёзиш мумкинлигини кўрсатади.

Навоий туркий тилнинг ривожига шоҳ асарлар яратиш билангина ҳисса қўшиб қолмай, унинг тараққиётини назарий жиҳатдан ҳам бойитди. Бу борадаги хизматларидан бири 1499 йилда яратилган «**Муҳокамат ул-луғатайн**» («Икки тил муҳокамаси») асариdir. Мазкур асарида Навоий туркий ва форсий (сорт) тилларини бир-бирига қиёслаш асносида туркий тилнинг бой ва кенг имкониятларга эгалигини исботлади. Шарқ мусулмон адабиётидаги анъянага кўра, ҳамд ва наът қисмларидан кейин Навоий дунё тилларидан учтаси (туркий, форсий ва ҳинд) асл ва мўътабар бўлиб, уларнинг вужудга келиши Нуҳ пайғамбарнинг ўғиллари: Ёфас (туркий), Сом (форсий) ва Ҳом (ҳинд) билан боғлиқ деб ҳисоблайди. Туркий тилни Ёфас орқали пайғамбарлик тожи билан улуғланди деб ёзади.

Навоийнинг фикрича, араб тили бундай улуғланишга муҳтоҷ эмас, ҳеч шубҳасиз, у барча тиллардан мумтоз ва «мўъжизатироз»dir, чунки Аллоҳнинг қаломи ва расули акрам ҳадислари шу тилда яратилган.

Алишер Навоий икки тилни қиёслаш жараёнida форсий тилнинг кучли билимдони сифатида намоён бўлади, зоро, объектив хуносалар чиқариш учун икки тилни ҳам мукаммал билмоқ талаб қилинади. Бу мукаммаллик Навоийнинг:

– форсий тилда муодил (эквивалент)и бўлмаган 100 та феълни келтириши³²;

³² Асарда юзта феъл дейилгани ҳолда 99 та феъл келтирилган. Котиб асарни кўчириш жараёнida бир феълни тушириб қолдирган бўлса керак.

– турли соҳаларга доир нарса-буюм, табиий ҳодисалар ва ҳайвонларнинг форсий тилда мавжуд бўлмаган номларини бериб, уларнинг баъзилари форсий тил лексикаси таркибига ҳам киргани ҳақида маълумот бериши;

– тажнис ва ийҳом санъатига асос бўладиган сўзларнинг форсий тилдагига нисбатан кўплигини мисоллар билан исботлаши;

– туюқ жанрининг фақат туркий шеъриятда қўлланишига эътибор қаратиши;

– туркий тилда форсий тилда йўқ баъзи грамматик шакллар (масалан, биргалик нисбатини ясовчи -иш, орттирма нисбат ясовчи -т қўшимчалари)нинг мавжудлигини мисоллар билан далиллаши;

– туркий тилнинг фонетик хусусияти қофиядош сўзлар учун форс тилига нисбатан кулайлигини асослаб бериши билан боғлиқ ҳолатларда кўринади.

Шунингдек, асарда Алишер Навоийнингижодий биографияси билан боғлиқ қимматли маълумотлар ҳам келтирилган. Хусусан, туркий тилда яратган асарлари рўйхати уларга асос бўлган манбалар номи билан бирга келтирилиши Навоий асарларининг туб моҳиятини англашда муҳим аҳамиятга эга. Масалан, унинг «Ҳамса» таркибига кирувчи достонларнинг ҳар бири учун асос бўлган манбалар қуидаги тартибда келтирилади:

«Аввалким, «Ҳайрат ул-аброр» богида табъим гуллар очибдур, Шайх Низомий руҳи «Махзан ул-асрор»идин бошимга дурлар сочибдур.

Яна чун «Фарҳод ва Ширин» шабистонига хаёлим юз тутубдур. Мир Хусрав дами «Ширин ва Хусрав» ўтидин чарогимни ёрутубдур.

Яна чун «Лайли ва Мажнун» водисида ишқим пўя уруб, Хожу ҳиммати «Гаевҳарнома»сида нисоримга гавҳарлар еткуруптур.

Яна чун «Сабъаи Сайёра» расадин замирим боғлабдур, Ашраф «Ҳафт пайкар»ининг етти ҳурвашин пешкашимга яроғлабдур.

Яна чун «Садди Искандарий» асосин хотирим муҳандиси солибдур, Ҳазрати Махдум «Хираднома»сидин кўси испоҳ ва имдод чолибдур».

Алишер Навоийнинг араб тили луғатшунослигига бағишланган асари «Сабъат абҳур» деб аталиб, навоийшуносликда нисбатан кам тадқиқ қилинган асарлар сирасига киради. Асарнинг муаллифи масаласи ҳам кўп йиллар адабиётшуносликда баҳсли ма-

сала бўлиб келди. Мазкур мавзуда тадқиқот олиб борган олим Б.Ҳасанов изланишлари самараси ўлароқ «Сабъат абҳур» ҳазрат Навоий қаламига мансуб деган хуносага келинди. Б.Ҳасанов ўз фикрини далиллашда асарнинг кириш ва хотима қисмидаги котиб Аҳмад ибн Али Дамашқий Маниний келтирган қуидидаги фикрларни асос қилиб олади: «Бу вақт ва замон ягонаси Ҳурросон уфқида порлаган қуёш Мир Алишер Навоий тартиби, таълифи, яхшиланиши ва таснифи устида заҳмат чеккан «Сабъат абҳур» мусаввадасидан топилган нарсаларнинг сўнгидир».

Асарнинг «Сабъат абҳур» – «Етти денгиз» деб аталишига сабаб араб луғатшунослигига мансуб етти китобнинг мазкур асар учун манба бўлганидир. Улар қуидагилар:

- 1) Жавҳарийнинг «Саҳоҳ» изоҳли луғати;
- 2) Соғонийнинг «Такмила» луғати;
- 3) Замахшарийнинг «Кашшоф» (Қуръон тафсирига оид) асари;
- 4-5) Ибн Ҳожибининг грамматикага оид «Муфассал» (иккита муқаддим ва шарҳлари) асари;
- 6) «Ғаройиб ул-ҳадис» – ҳадис сўзларига тузилган луғатлар.
- 7) турли муаллифлар, девон, рисола ва бошқа асарларнинг шарҳлари. Улар шартли равиша «Завойид» номи билан аталган.

«Сабъат абҳур»нинг таркибий тузилиши асосига ўзак тизими (флексия) қўйилган. Араб тилидаги сўзлар (мисол учун, катаба – мактуб – котиб – китоб – мактаб)да ўзак чиқариш қоидасига асосан сўз таркибидаги қўшимча унлилар тушириб қолдирилгандан кейин қоладиган маъно ташувчи ҳарфлар маълум бир маъноли ўзакни ташкил қиласи (юкоридаги мисолда келтирилган КТБ – катаба). Луғат лексикасининг асосий қисмни уч ҳарфли ўзаклар ташкил қиласи (6451 луғат мақола). Миқдор жиҳатдан иккинчи ўринни тўрт ҳарфли ўзаклар эгаллайди (2056 та). Учинчи ўринда беш ҳарфли ўзаклар туради (94 луғат мақола). Араб тилига четдан кирган кам истеъмондаги сўзлар олти (1 луғат мақола) ва етти ҳарфли (2 луғат мақола) сўзлардир.

Алишер Навоийнинг мазкур асари араб луғатшунослиги ривожланиши сусайган даврда вужудга келгани билан алоҳида аҳамият касб этиб, араб лексикографияси тарихида Жавҳарийнинг «Саҳоҳ» ва Фирузободийнинг «Қомус» луғатлари билан бир қаторда туради.

Таянч тушунчалар

- тазкира
- муаммо амаллари
- аъмоли таҳсилий
- аъмоли тақмилий
- аъмоли тасхилий
- таълиф
- исқот
- қалб
- мажлис
- азҳару мин аш-шамс
- шариф фан
- жузғ
- руқн
- асл руқнлар
- тармоқ руқнлар
- енгил ва оғир сабаб
- бириккан ва ажралган ватад
- катта ва кичик фосила
- асл руқн
- усул
- зиҳоф
- фуруъ
- аруз доиралари
- доираи мўъталифа
- доираи мухталифа
- доираи мунтазиа
- доираи муттафиқа
- доираи мужтамиа
- баҳр
- маттбуъ вазнлар
- солим
- муодил
- сажъ
- луғатшунослик
- тафсир
- флексия
- луғат мақола

Савол ва топшириқлар:

1. Алишер Навоийнинг «Рисолаи муаммо» асари яратилиш тарихи билан боғлиқ нималарни биласиз?
2. Муаммо жанрининг хусусиятларини айтиб беринг.
3. Алишер Навоий муаммо амалларини неча қисмга ажратган? Уларни шарҳлашга ҳаракат қилинг.
4. Туркий тилда яратилган илк тазкира сифатида қайси асарни тилга олиш мумкин?
5. «Мажолис ун-нафоис» мажлисларида тилга олинган шоирлар билан боғлиқ қайси жиҳатларни биласиз?
6. Алишер Навоий «Мажолис ун-нафоис»нинг 1-мажлисини қайси шоир билан бошлайди?
7. «Мажолис ун-нафоис»да адабиёт майдонига кириб келаётган шоирлар хусусида Алишер Навоий қандай фикрлар билдиради?

8. «Мезон ул-авзон» муқаддимасида Алишер Навоий тилга олган манбаларни санаб бера оласизми?
9. «Мезон ул-авзон»да жами нечта вазн ва баҳрлар келтирилган?
10. «Мезон ул-авзон»да Алишер Навоий қайси шоирларнинг байтларидан мисол тариқасида фойдаланган?
11. «Муҳокамат ул-луғатайн»да Алишер Навоий тилнинг пайдо бўлиши билан боғлиқ қандай фикрларни илгари сурган?
12. «Муҳокамат ул-луғатайн»да шоир ўзининг қайси достонлари билан боғлиқ маълумотларни келтириб ўтади?
13. «Сабъат абхур» асарининг кам тадқиқ қилингани сабаби нимада деб ўйлайсиз?
14. «Сабъат абхур» асарининг бундай номланиши сабабини шарҳлаб беринг.
15. «Сабъат абхур»нинг таркибини ташкил этувчи луғат-мақолалар хусусида нима дея оласиз?

Адабиётлар:

1. Навоий Алишер. Мажолис ун-нафоис. МАТ. 20 жилдлик. – Тошкент: Фан, 1997. 13-жилд.
2. Навоий Алишер. Муҳокамат ул-луғатайн. МАТ. 20 жилдлик. – Тошкент: Фан, 2000. 16-жилд. – Б.6 – 40.
3. Навоий Алишер. Мезон ул-авзон. МАТ. 20 жилдлик. – Тошкент: Фан, 2000. 16-жилд. – Б.42 – 95.
4. Навоий Алишер. Муфрадот. МАТ. 20 жилдлик. – Тошкент: Фан, 2000. 20-жилд. – Б. 367 – 418.
5. Зоҳидов Л. Алишер Навоий ижодида муаммо жанри / Масъул муҳаррир С.Эркинов. – Тошкент: Фан, 1986.
6. Зоҳидов Л. Алишер Навоийнинг «Рисолаи муфрадот» асари ва унинг муаммолари: Филол. фан. номз... дисс. – Тошкент, 1970.
7. Орзібеков Р. Муфрадот // Адабий мерос. – Тошкент, 1982. – №2.
8. Воҳидов Р. «Мажолисун-нафоис»нинг таржималари / Масъул муҳаррир Б.Валихўжаев. – Тошкент: Фан, 1984.
9. Фаниева С. Алишер Навоийнинг «Мажолис ун-нафоис» асари ва самарқандлик шоирлар // Ўзбек тили ва адабиёти. – Тошкент, 1970. – №6.

10. Ҳасанов Б. Алишер Навоийнинг «Сабъат абхур» луғати. – Тошкент: Фан, 1981.
11. Ҳожиаҳмедов А. Навоий арузи нафосати. – Тошкент: Фан, 2006.
12. Юсупова Д. Жомий ва Навоий: арузга доир рисолаларнинг қиёсий таҳлили // Ўзбек филологиясининг долзарб муаммолари. – Тошкент: MUMTOZ SO'Z, 2010.
13. Ўзбек адабиёти тарихи. Беш жилдлик. 2-жилд (XV асрнинг иккинчи ярми). – Тошкент: Фан, 1977.

АЛИШЕР НАВОЙНИНГ ДИНИЙ ВА ТАСАВВУФИЙ АСАРЛАРИ

РЕЖА:

1. «Арбаъин»да саҳиҳ ҳадислар таржима ва талқини.
2. «Вақфия»да Алишер Навоийнинг ижтимоий фаолияти билан боғлиқ масалалар.
3. «Назм ул-жавоҳир» рубоийлар тўплами ҳазрат Алиниңг «Наср ул-лаолий» асари таржимаси сифатида.
4. «Сирож ул-муслимин» асарида ислом динига оид ҳукмларнинг ифодаланиши.
5. «Муножот»да тавба-тазарру ва Ҳаққа бўлган ишқ оҳанглари.
6. «Рисолайи тийр андохтан»да камончиликнинг савобли иш экани тўғрисидаги диний қарашлар.
7. «Насойим ул-муҳаббат» тазкирасида тасаевуф масалалари.

Давлатшоҳ Самарқандий Алишер Навоийни «Мир Низомиддин», яъни «диннинг низоми – қонуни» деб бежиз улуғламаган. Ҳазрат Навоийнинг деярли барча асарларида, хусусан, «Хамса» достонларининг муқаддималарида Аллоҳга ҳамд, пайғамбарга наът, муножот ва расулulloҳ (с.а.в.) мадҳининг мавжудлиги ёки фикрни тасдиқлайди. Биз қуйида кўриб чиқадиган асарларда Алишер Навоий шариат ва тасаввуф илмининг чуқур билимдони, назариётчиси сифатида намоён бўлади.

«Арбаъин» (**«Қирқ ҳадис»**) – ҳадисларнинг шеърий таржимаси бўлиб, анъанавий ҳамд ва наът билан бошланади. Асар муқаддимаси – «Сабаби таълифи манзума»да Навоий устози Абдураҳмон Жомий саҳиҳ ҳадислардан 40 тасини танлаб олиб форсий тилда «Арбаъин» яратганини, лекин туркий китобхон бу чашмадан бебаҳра эканини айтиб, Жомийнинг руҳсати билан шу 40 ҳадисни туркий тилга таржима қилганини ёзади:

Форсийдонлар айлабон идрок,
Орий эрди бу нафъдин атрок.
Истадимки, бу халқ ҳам бори

*Бўлмагайлар бу нафъдин орий.
Мен демакни чу муддао айлаб,
Ул ижозат бериб дуо айлаб.*

Шунингдек, муқаддимада Навоий Жомий ўз асарини ҳижрий 886 (милодий 1486) йилда яратганини, у ҳам тез орада устозидан ижозат олиб асарни бир-икки кун ичида тамомлаганини айтади:

*Бир-ики кунки эҳтимом эттим.
Кўз тутардин бурун тамом эттим.*

Ушбу маълумотдан Алишер Навоий ўз асарини Жомий билан бир даврда яратган деган хulosага келиш мумкин. Шоир пайғамбаримиз (с.а.в.)нинг ҳадисларини аввал араб тилида беради ва унинг таржимасини шеърий усолда тақдим этади.

«Арбаъин»нинг асосий қисми «Сизлардан ҳеч бирингиз ўзига раво кўрган нарсасини биродарига раво кўрмагунча чин мӯъмин бўлолмайди» деган машҳур ҳадиснинг навоиёна талқини билан бошланади:

*Мӯъмин эрмастур. улки иймондин
Рўзгорида юз сафо кўргай.
Токи қардошига раво кўрмас
Ҳар некум ўзига раво кўргай.*

Танланган ҳадисларнинг деярли барчаси комил инсон ахлоқига оид қарашларни ўзида акс эттирганини кўришимиз мумкин. Бу ҳадисларда инсонлар яхшилик қилишга чорланади, ёмон иллатлардан қайтарилади, умуман олганда, улар инсоннинг ҳаёт ва жамиятдаги вазифасини англатади. Масалан, «Инсонларнинг энг яхшиси инсонларга фойдаси тегадиганидир» деган ҳадисни Алишер Навоий тилда шундай ифода этади:

*Халқ аро яхшироқ, дединг. кимдур?
Эшишиб айла шубҳа рафъ андин.
Яхшироқ бил ани улус ароким,
Етса кўпрак улусқа нафъ андин.*

Кўриб ўтганимиздек, ушбу шарҳ орқали инсоннинг улусга – жамиятга хизмат қилиши улуғланяпти. Машхур «Курашда ғолиб чиққан паҳлавон эмас. балки ғазаби келганда ўзини енга олган одам паҳлавондир» ҳадисини шоир шундай талқин қилади:

Эмас ул паҳлавонки ўз қадрин
Бош уза элтибон нигун қулғай.
Паҳлавон они билки, етса ғазаб
Нафси амморани забун қулғай.

Мазкур ҳадис инсонни ўз нафси – ғазаби устидан ҳокимлик қилишга чақиради. Алишер Навоий буни таржима қилиш орқали киши жаҳлга қўл бўлиб қолишдан сақланиши кераклигини эслатяпти.

Умуман олганда, «Арбаъин» асари инсоннинг маънавиятини юксалтиришга хизмат қилади. Бу ҳақда шоир асарнинг хотима қисмида айтиб ўтади:

Эрур ул арбаъиннинг аввали ҳол,
Айла бу «Арбаъин» била аъмол.

Асарнинг умумий ҳажми 108 байтдир. Эътиборли жиҳати, кириш (ҳамд ва наът) ва якуний қисмлар бир хил – 5 байтдан иборат.

Асосий қисмда келтирилган шеърлар шакл жиҳатидан қитъа сингари бўлиб, бунда фақат жуфт мисралар қофияланган, тоқ мисралар очиқ қолдирилган:

Тенгридин раҳм агар тамаъ қилсанг,
Аввал ўлмоқ кераксен элга **раҳим**.
Ҳар кишиким улусқа раҳм этмас,
Анга раҳм айламас раҳими **карим**.

«Арбаъин» хафиғ бахрининг хафиғи мусаддаси солими маҳбуни маҳзуф ёки мақтуъ (рукнлари ва тақтеъи: фоилотун мағоилун фаилун ёки фаълун – V – – / V – V – / V V – ёки – –) вазнида яратилган.

Алишер Навоийнинг ***«Вакғия»*** асари 1481 – 1482 йиллар орагида яратилган бўлиб, алломанинг давлат арбоби сифатидаги

фаолияти. вақф қилдирған ерлари, қурдирған бинолари ҳақида маълумот берувчи асадыр.³³ «Вақфия» ҳамд, наът ва султон Ҳусайн Бойқаро мадхини ўзи ичига олган каттагина муқаддима билан бошланади. Асадынг асосий қисмими шартли равишда икки қисмга бўлиш мумкин:

1. Навоийнинг султон Ҳусайн Бойқаро саройида давлат арбоби сифатидаги фаолияти акс этган ўринлар.

2. Навоийнинг хайрия ишлари ва вақф қилдирған мулк, ерлари: вақфия жойлардаги идора усули, хизмат учун белгиланган лавозимлар, тайин этилган маош, ўрнатилган тартиб-қоидалар баёни.

Ҳар бир қисм муайян тарздаги муқаддима ва хотимани ўз ичига олади.

Асада Навоийнинг мамлакат ободлиги ва эл-юрт фаровонлигига доир муҳим фикрлари ҳам ўз ифодасини топган:

*To ҳирсу ҳавас хирмани барбод ўлмас,
To нафсу ҳаво қасри барафтод ўлмас.
To зулму сутам жонига бедод ўлмас.
Эл шод ўлмас, мамлакат обод ўлмас.*

Алишер Навоийнинг «**Назм ул-жавоҳир**» асари насрий усулда ёзилган муқаддима ва ҳазрат Алининг иккى юз эллик беш рақам остида тартибланган араб тилидаги ўйтларининг туркий тилда рубоий шаклида берилган талқинидан иборат.

Асад муқаддимаси ҳамд ва наът билан бошланиб, унда сўз ва унинг қудрати, инсон яратилиши билан боғлиқ диний-тасаввуйий қарашлар баёни келтирилади. Шунингдек, шоир «Назм ул-жавоҳир»нинг ёзилиши билан боғлиқ маълумотларга тўхталади. Ҳар бир фикр сурга ва ҳадислардан парчалар келтириб исботлаб борилади, уларнинг таъсирчанлигини ошириш учун тўрт мисраси ҳам қофиядош – таронайи рубоийлардан фойдаланилади.

Шунингдек, муқаддимада шоир анчадан бўён ҳазрат Алининг ўйтларини шеърга солмоқчи бўлиб юрганини, лекин негадир бунга журъат қила олмаётганини айтади. Шоҳ Ҳусайн Бойқаро «Рисола» биттач, унга жавоб тариқасида ушбуни ёзишга қарор

³³ Асад юзасидан И.Шамсимуҳамедов номзодлик диссертациясини ҳимоя қилган.

қилади. Айнан «Наср ул-лаолий»ни Ҳусайн Бойқаро рисоласига жавоб тарзида таржима қилишида ҳам маъно бўлиб, бу ҳазрат Алиниң ислом оламида тутган юксак ўрни билан изоҳланади. Ҳусайн Бойқаро даражаси ҳазрат Алиниң мақоми билан қиёс этилади. Бундан ташқари, ўша даврда ҳазрат Али ҳикматлари форсий шоирлар томонидан назмга солинган бўлиб, Алишер Навоий улар билан яхши таниш эди ва бу анъанани туркий тилда амалга оширишни мақсад қилган.³⁴

Алишер Навоий шоҳнинг саховатини, адолатини меҳр билан таърифлагач ҳазрат Али ўғитлари талқинларини рубоий тарзида беришини маълум қилади. Мазкур рубоийларнинг тўрт мисраси ҳам қофиядош бўлишида рамзий маъно бор: шоҳ таҳтининг тўрт пояси уни кутариб туради, Каъбатуллоҳни биз тўрт девори бўлгани учун тасаввур эта оламиз, фалакнинг тўртинчи қавати қуёшнинг масканидир ва бошқалар:

*Ҳар бирини тўрт дурри шаҳвор дегил,
Тўртунчи фалакда меҳр заркор дегил.
Рубъи маскунда Каъба осор дегил,
Байтул муқаддасқа тўрт девор дегил.*

Сўнг ҳазрат Алиниң ўғитлари «Наср ул-лаолий» («Сочма дурлар») деб аталган бўлса, бу таржима «Назм ул-жавоҳир» («Назм жавоҳирлари») дея номлангани айтилади, бу сочма дурларни бир риштага – ипга жавоҳир сингари тизилганига ҳам ишорадир.

Асарнинг асосий қисми ўзига хос тузилишга эга. Даставвал ҳазрат Алиниң араб тилидаги фалсафий ўғитлари келтирилади, сўнг эса туркий тилда рубоий шаклидаги талқин берилади. Биз бу ўринда таржима эмас, кўпроқ талқин атамасини ишлатяпмиз. Чунки Алишер Навоий тўғридан-тўғри таржимани эмас, балки бадиий жиҳатдан бойитилган фикрларни тақдим этади.

³⁴ Адабиётшунос М.Ражабова «Назм ул-жавоҳир»нинг яратилишига яна бир сабаб сифатида ҳазрат Али қабрининг Балхда экани ва уни таҳқиқ этишда Алишер Навоийнинг шахсан ўзи қатнашганини келтириб ўтади. (Бу ҳақда қаранг: М.Ражабова. «Назм ул-жавоҳир» тарихига оид муҳим манба // Алишер Навоий ижодий ва маънавий меросининг оламшумул аҳамияти (халқаро илмий-назарий анжуман материаллари). – Тошкент: Ўзбекистон, 2011. – Б.72 – 75).

«Назм ул-жавоҳир»даги рубоийлар мавзу жиҳатдан ранг-брангдир. Уларда биз ҳаётнинг моҳияти, дўстлик ва севгининг улуғворлиги, инсонийликнинг қадр-қиммати тўғрисидаги нодир фикрлардан баҳраманд бўламиз. Масалан, 100-рубоийга ҳазрат Алининг «Дўстларни зиёрат қилиш муҳаббатни оширади» деган ўғитлари асос қилиб олинган:

*Ҳар кимки ҳабибинг ўлса эврул бошиға,
Маҳе ўл юзиға, жонни фидо қил қошиға,
Тош урса, равонингни туфайл эт бошиға,
Таждиidi муҳаббат англа бормоқ қошиға.*

Кўриб турганимиздек, Навоий ҳазрат Алининг фикрини талқин қилиш баробарида бу фикрни тўлдириб, таъсир қувватини оширувчи ёндашувни беряпти: «Ким дўстинг бўлса, унинг бошига айлан. яъни ҳар бир хаёлу ўйидан хабардор бўл. дийдори учун қошига бориши учун жон фидо қил. Агар тош урса ҳам, унга ўзингни бағишила. унинг қошига бориши муҳаббатни зиёда қилишини англа!»

Ёки 237-рубоийда «Кишининг улуғлиги унинг ҳимматидан билинади» деган фикр шарҳланади:

*Ҳар кимсаки иқбол аниңг ёваридур,
Ҳар ёнки юз урса, ҳиммати раҳбаридур.
Ҳиммат дури фаҳр тожининг гавҳариидур,
Чун ҳиммати одам ўғлининг сарваридур.*

Умуман олганда, Алишер Навоий «Назм ул-жавоҳир» асарида ўзининг дунё ва ҳаёт ҳақидаги фалсафасини янада аниқроқ шаклда юксак бадиий маҳорат билан намоён қиласди. Биз бу асар орқали шоирни файласуф-донишманд қиёфасида кўрамиз.

Алишер Навоийнинг **«Сирож ул-муслимин»** («Мусулмонлар нури») асари соғ диний йўналишида бўлиб, ислом дини аҳкомларини ёритишга бағишлиланган. Асар маснавий шаклида ёзилган бўлиб, ҳажман 197 байтдан иборат. **«Сирож ул-муслимин»** ҳамд ва наът, китоб ёзилишининг сабаби, исломга оид фиқҳий ва ақидавий масалалар шарҳи ҳамда хотимани ўз ичига олади.

Ҳазрат Навоий, аввало, Аллоҳга ҳамд ва пайғамбаримиз Мұхаммад (с.а.в.)га салот ва саломларини йўплагач мазкур ки-

тоб назмининг сабаби баёнига ўтади. Даставвал султон Ҳусайн Бойқарога чексиз ҳурматини изҳор этиб, бир воқеани баён қилади. Унга кўра, шоҳ мажлислиридан бирида бир нуктадон инсон Ҳусайн Бойқарога: «Навоийнинг шеърлари жуда ажойиб, ундан баҳраманд бўлган одам яна баҳра олмоқни хоҳлади, лекин бундан не фойда бор?» – деган маънода фикр билдиради. Аслида, шоир кўпдан буён фикҳ ва ақидага доир асар ёзишни ният қилиб юрарди-ю, бунга фурсат тополмаётган эди. Бир улуғ инсоннинг Самарқанддан Ҳиротга ташриф буюриб, пири муршид Ҳожа Аҳор Ҷалийнинг шоирдан диний масалалар шарҳини ёритувчи китоб ёзишни сўраганини айтганидан сўнг Алишер Навоий катта иштиёқ билан ишга киришади:

...Чу сўрди Исо анфоси бу дамни,
Ҳам ул дам азмиға йўндум қаламни...

Алишер Навоий «Китоб назмининг сабаби» қисмида аввал ақида шарҳини, сўнг фарз, вожиб, суннатни баён этишини, бундан ахли исломга фойда бўлишини айтади:

...Ҳам эткаймен бурун шарҳи ажойиод
Ки, ислом аҳлиға бергай фавоийид.
Яна ҳам фарз, ҳам вожиб, суннат ҳам,
Неки ориз бўлур яхши, ёмон ҳам...

Асарнинг асосий қисмида Алишер Навоий, ўзи айтганидек, даставвал ақоид ҳамда шариат ҳукмлари шарҳига тўхталади. Бунда шоир ислом аҳкоми икки қисм: ақида ва амал (шариат)дан иборат деб ёзар экан, ақида пок бўлмаса, амалнинг аҳамияти йўқолишини таъкидлайди.

Алишер Навоий иймон шартлари сифатида Аллоҳнинг биру борлигига, фариштапарга, илоҳий китобларга, пайғамбарларга, охират кунига, қадар – тақдирга ишониш кабиларни санаб ўтади.

Кейинги қисмда шоир Аллоҳнинг сифатларини баён этади. Унга кўра, мўмин инсон Аллоҳнинг замон ва макондан мунаzzазаҳ – холи эканига, шериги йўқлигига, унинг безавол илмига, эшитиш ва кўришига, қаломига, тақдир эгаси эканига ишониши шарт. Ҳазрат Навоий, шунингдек, Аллоҳнинг ўхшаши йўқ, унинг қудрати ҳар

қандай жисмдан холи бўлиб, бандалар каби эҳтиёжманд эмасдур деган ислом ақидасидаги фикрни уқтирас экан, бунга исбот та-риқасида «Шўро» сурасидаги 11-оятни келтиради.

Кейинги бобда шоир ислом ақидасидаги – қабр азоби, қабрда-ги савол-жавоб, Сирот қўприги, тарози, дўзах, жаннат, расууллоҳ (с.а.в.) шафоати, набийлар мўъжизалари, авлиёлар каромати ҳақ эканини таъкидлайди ҳамда коҳинни³⁵ тасдиқ этиш куфр эканини ҳам айтиб ўтади.

Ислом ақидаси шартлари баёнидан сўнг Алишер Навоий ис-лом аҳкомларини ёритади. Бунда шоир ислом дини фарзлари: таҳорат, ғусл, намоз, закот, рамазон рӯзаси, ҳаж билан боғлиқ ша-рият ҳукмларини батафсил баён этади.

Асарнинг хотима қисмida шоир ўз манзумаси инсонлар учун фойдали бўлишига умид қилиб, мусулмонлар дилини равшан эт-син дея бу китобга «Сирож ул-муслимин» («Мусулмонлар қуёши») деб ном қўйганини айтади.

Асар арузнинг ҳазажи мусаддаси маҳзуф (мафоийлун мафо-ийлун фаявлун, чизмаси: V — — / V — — / V —) вазнида ёзилган.

«Муножот» Аллоҳга илтижо тарзида яратилган насрый асар бўлиб, «Ҳамд», «Наът» ва «Муножот» деб аталган уч қисмни ўз ичига олади. «Ҳамд»да Аллоҳнинг буюклиги, абадийлиги ҳақида сўз борса, «Наът»да пайғамбаримиз расули акрам таърифлари кетирилади. «Муножот» қисми бевосита шоирнинг Аллоҳдан на-жот сўраб қилган илтижоларига бағишинланган. Асарнинг ҳар бир жумласи Аллоҳга мурожаат, яъни «илоҳи» сўзи билан бошланади. Навоий ўзини беҳад гуноҳкор, Яратганни пок ва акрам (карамли), ўзини чексиз исёнкор ҳамда Холиқни раҳмли ва меҳрибон деб атар экан, ички қофия, тазод, иштиқоқ санъатларининг бетакрор намуналари шоир ҳис-туйғулари билан уйғунлик касб этганини кўрамиз:

Илоҳи, акрам ул-акрамин – сен ва мен – гуноҳкор.
 Илоҳи, арҳам ар-роҳимин – сен ва мен тийрарўзгор.
 Илоҳи, агарчи журму исёндин ўзга ишим йўқ,
 аммо сендин ўзга ҳам кишим йўқ..

³⁵ Коҳин – 1) исломгача бўлган динларда руҳоний; 2) баҳшоратчи.

«Муножот» асари моҳияттан Ҳақ васлига ташна, орифлик мақомига эришган ошиқнинг ҳиссиётларини ўзида акс эттириб, жанрий жиҳатдан назм ва наср хусусиятларини намоён қилади. Асарнинг ўзига хос мусиқий оҳангига, сажъ усулидан маҳорат билан фойдаланилгани унинг бадиий қийматини оширган дейиш мумкин. Мазкур асар ўзининг ғоявий ва бадиий хусусиятлари билан мумтоз адабиётимиздаги шоҳ асарлар сифатида ўз ўрнига эгадир.

Алишер Навоийнинг тирандозлик – камондан ўқ отиш фазилатига бағишинган «Рисолайи тийр андохтан» рисоласи ҳар бир фикрнинг соф диний далиллар – ҳадис ва ривоятлар воситасида изоҳлангани билан алоҳида характерланади. Рисола ҳажман кичик, муаллиф бунда камондан ўқ узишнинг қанчалик савобли амал эканини асослашга эътибор қаратади.

Рисолада бир нечта ҳадис ва ривоятлар келтирилган бўлиб, улар қуйидагилардир³⁶:

- Ҳазрат Одам Ато алайҳиссалом шайтон ҳийласи туфайли жаннатдан ерга туширилгач, Аллоҳнинг амри билан дехқончилик қилади – буғдой экади. Аммо қарғалар экилган буғдойни кавлаб еб қўя бошлагач, Худога муножот қилади. Шунда Худо камон ва ўқ юборади. Ёйдан ўқ отишни фаришта Жаброил (алайҳиссалом) Одам алайҳиссаломга ўргатади. Одам Ато алайҳиссалом қарғаларга отган биринчи ўки тегмайди, фаришта Жаброил алайҳиссалом табассум қилади, иккинчи бор отилган ўқ нишонга тегади, шунда Жаброил алайҳиссалом ўз табассумини қуйидагича изоҳлайди: «Агар илк ўқинг нишонга текканида, қиёматгача ҳеч нарса болаларинг қўлидан қутулмас эди».

Шундан кейин ҳазрат Навоий ўқ отишни Худонинг лутфи, Одам Сафий алайҳиссаломнинг мӯъжизаси деб хулоса қилади.

- Шайхлардан Шафиқи Балхий жон бериш чоғи ўқ-ёй олиб келиб ўқ отади. Дўстлари буни кўриб: «Шайх шифо топибди», – деб хурсанд бўлдилар. Шунда шайх ўз ҳолатини: «Умрим охирлабди, шунда бир яхши амал қилгим келди. Бирор амални ёйдан ўқ узишдан кўра яхшироқ деб топмадим. Чунки ўқ отища савоб кўп», – деб изоҳлайди.

³⁶ «Рисолайи тийр андохтан» асари навоийшунослиқда кам ўрганилгани учун рисоладаги ҳикоятларни тўлиқ келтиришга қарор қилдик.

• «Кимки камончиликни ўрганиб, сўнг тарк этса, суннатимдан юз ўигрған ҳисобланади. У мендан эмас».

• Расулуллоҳ (с.а.в.) камончиликнинг фазилатини кўпайтилар. Саҳобалар камондан ўқ отишнинг савобини қанча миқдорда деб сўрадилар. Шунда у зот алайҳиссалом: «Агар камончиликнинг савобини айтсанам, халқ тирикчиликни ташлаб, камондан ўқ отишга берилиб кетади. Бир соат ўқ отишнинг савоби эллик йиллик тоат савоби билан тенгдур. Агар ким ўқ отса, Аллоҳ унга жаннатийлар савобини беради, нишонга тегизса, жаннат эшигини очиб, бир хурни унга атайди», – деб жавоб беради.

• Бир куни пайғамбаримиз алайҳиссалом борар эдилар. Саҳоба Саъд Баққоснинг ўз фарзандларига камондан ўқ отишни ўргатаётгани устидан чиқдилар. Расулуллоҳ томоша қилиб турдилар. Шу пайт бир йигит келиб ёйдан ўқ узди. Расули акрам саллолоҳу алайҳи ва саллам хушнуд бўлдилар. Саҳобалар бунинг сабабини сўраганларида: «У йигит келганида гуноҳлари кўп эди, ўқ отди – гуноҳлари тўкилди, шунинг учун шодландим», – деб изоҳ бердилар.

• «Агар бир жойга масжид қуриладиган бўлса, у ер менда масжид қурадилар деб 40 йил олдин шодланади. Агар бир ерда ўқ отиладиган бўлса, у ер менда ўқ отилади деб 80 йил илгари хурсанд бўлади».

• Али (р.а.) гоҳо яланг бош ва яланг оёқ ўқ келтирас эдилар. Бир куни Саъд Баққос ўқ отар эдилар. Жаброил алайҳиссалом келдилар. Расулуллоҳ алайҳиссалом мен учун ўқ от дедилар. Шунда Жаброил алайҳиссалом мен учун ҳам Саъд ўқ отсин деди. Саъд Баққос ўқ отдилар. Шунда расулуллоҳ алайҳиссалом Худойи таоло номи учун ўқ отгил дедилар. Саъд ўқ отдилар. Саҳобалар нишонга бориб, икки ўқни топиб, учинчисини тополмадилар. Жаброил алайҳиссалом айтдиларки: «Ё Мұхаммад, у ўқни топмасинлар. Бу ўқ жаннатда Саъд Баққос учун ер олиб туриби».

Қўриб ўтганимиздек, Навоий камондан ўқ отишнинг қанчалик савобли амаллардан эканига асосий ургуни қаратади. Бу бежиз эмас, чунки ўрта асрларда юрт ҳимояси аскарларнинг фидойи ва жасурлиги ҳамда бевосита қуролларни, айниқса, камонни маҳорат билан ишлата олиши орқали таъминланган. Мазкур асар Ватан ҳимоясига ҷоғланган йигитларни ўз ишларининг Тангри ва

пайғамбар томонидан севилган, маъқул кўрилган амал эканига ишонтириш учун хизмат қилган.

«Рисолайи тийр андохтан» асари фақат диний далиллардан иборат ҳамда баён тилининг бошқа илмий асарларидан содда ва тушунарлилиги, бадиий бўёқдор эмаслиги билан алоҳида характерланади. Бу ҳам асарнинг омма учун маҳсус бағишланган дейишига асос беради.

Алишер Навоийнинг «**Насойим ул-муҳабbat**» (тўлиқ номи «Насойим ул-муҳабbat мин шамойил ул-футувват» – «Мардлик хушбўйликларини таратувчи муҳабbat шабадалари») асари 1495 – 1496 йилларда яратилган бўлиб, Абдураҳмон Жомийнинг «Нафаҳот ул-унс мин ҳазарот ул-қудс» («Дўстлик таровати») асарининг ижодий таржимасидир.

Асарнинг танқидий матни муаллиф яшаган даврда кўчирилган нусха асосида 1996 йили Туркия (Анқара)да Камол Эраслон томонидан яратилган. 2011 йили навоийшунос олим Ҳ.Исломов ҳам мазкур асарнинг илмий-танқидий матнини яратиб чоп қилдириди.

Абдураҳмон Жомийнинг «Нафаҳот ул-унс» асарида 616 та шайх ҳақида маълумот келтирилган. Ҳазрат Навоий бу маълумотларни қайта ишлаб, тўлдириб, шайхлар сонини 770 тага етказади, улардан 35 тасини авлиё аёллар ташкил этади.

Адабиётшунос олим Н.Рамазонов «Насойим»нинг ўзига хос хусусиятларига доир» мақоласида³⁷ «Насойим ул-муҳабbat» ва «Нафаҳот ул-унс»ни қиёслар экан, ҳазрат Навоий тазкиранинг кириш қисмини таржима қилмасдан ўзи ёзганини айтади.

«Насойим ул-муҳабbat» муқаддима (ҳамд, наът ва асар ёзилиши сабаби, «Бу тоифа муқаддима тамҳиди», «Бу тоифа аъмолу афъоли ва муомилату риёзотидин баъзини зикр қилмоқ»), 770 шайх зикрини ўз ичига олган асосий қисм ва хотимадан иборат.

Ҳазрат Навоий асарнинг ёзилиш сабаблари ҳақида тўхталар экан, Жомий билан ўзининг тазкираси ўртасидаги фарқларни айтиб ўтади. Унга кўра:

– «Нафаҳот ул-унс»да Фаридиддин Атторнинг «Тазкират ул-авлиё» асаридаги баъзи авлиёлар тушириб қолдирилган, Навоий эса уларни ўз тазкирасида зикр қилган;

³⁷ Рамазонов Н. «Насойим»нинг ўзига хос хусусиятларига доир // Навоийнинг ижод олами (мақолалар тўплами). – Тошкент: Фан, 2001.

– Жомийда ҳинд ва турк машойих (шайх)ларига кенг ўрин ажратилмаган, лекин ҳазрат Навоий имкон қадар уларнинг барчасини ўз асарида акс эттиради.

Шунингдек, шоир «Насойим ул-муҳаббат»да Абдураҳмон Жомий ҳамда унинг замондоши бўлган валий зотлар ҳаёти ва фолиятини ҳам ёритганини маълум қиласди.

«Бу тоифа сулукида муқаддима тамҳиди» деб аталган қисмда Навоий инсон яратилиши сабаби, Аллоҳнинг ҳикмати, пайғамбарлар саййиди Муҳаммад саллаллоҳу алайҳи ва салламнинг Ҳаққа ҳабиб эканлиги билан боғлиқ тушунчаларни баён қиласди. Алишер Навоий расууллоҳ (с.а.в.)дан сўнг пайғамбарлик эшиги беркитилган бўлса-да, мўминлар пок эътиқод, тақво билан Аллоҳга дўстлик – валийлик мақомига эришишлари мумкин, чунки «Олимлар – пайғамбарларнинг ворислариридир», валий зотларнинг барчаси Аллоҳ ўйлида собит бўлган зотлардир, улар халқни тұғри йўлга бошлайди деб таъкидлайди.

Муқаддиманинг «Бу тоифа аъмолу афъоли ва муомилату риёзотидин баъзини зикр қилмоқ» деб номланган қисми авлиёларнинг аъмоли – амаллари, афъоли – феъл-атвори, муомилоту риёзати – муомаласи (халқ билан муносабати) ва Ҳақ йўлида чекадиган мashaқатларини ёритишга бағишиланган. Унда валий зотлар билан боғлиқ луқма ҳалоллиги, шариатга амал қилиш, имон калимасини руҳга сингдириш, беш вақт намоз ўқиш, закот бериш, рўза тутиш, ҳаж қилиш, одоб, ҳилм, тақдирга ризо бўлиш ва сабр қилиш, сидқ – ростгўйлик, риёзат чекиши каби амаллар келтириб ўтилади. Бу фазилатли амаллар оддий одамларницидан фарқ қиласди. Асарда келтирилишича, имон калимаси – калимаи шаҳодатни ҳамма чин дилдан айтгани билан, валийлар бу каломни айтиб ҳушларини ҳам йўқотишлари мумкин. Ёки шариатда закот молнинг қирқдан бир қисмини фақирларга бериш билан амалга оширилса, валийлар қўлидаги нарсанинг ортиғи билан эҳсон қилишини закот деб билишлари ҳақида ибратли фикрлар келтирилади (шайх Абу Бақр Шиблининг бир факиҳга берган жавоби мисолида).

Бундан ташқари, луқма ҳалоллигига эришиш учун ҳар бир валий зот ўз касби-корига эга бўлган. Масалан, шайх Абу Саид Ҳарроҳ, Ҳожа Абдуллоҳ Ансорийлар этиқдўзлик, шайх Муҳаммад Саккок пичоқчилик, шайх Абу Ҳафз Ҳаддод темирчилик билан машғул эдилар.

Ислом ақидасига кўра, мўъжиза ва каромат ҳақдир. Мўъжиза пайғамбарлар томонидан Аллоҳнинг қудрати билан амалға ошириладиган ва инсон ақли етмайдиган ҳодисалар бўлса, авлиёларнинг бу каби ишлари каромат дейилади. Булар умумий хавориқи одат – ғайриодатий, ғайритабиий ишлар деб аталади. Масалан, дуолар ижобати. ғайб сирларидан огоҳ бўлиш, инсон кўнглидаги ўйни англаш, сув ва таомсиз рўза тутиш, бир лаҳзада дунёning у четидан бу четига бориб қолиш каби оддий инсон ақли учун ғайритабиий ҳолатлар авлиёларга хос бўлиб, уларни кўп ошкор қилмаслик валийнинг юксак мақомини билдиради.

Шундан сўнг бевосита валийларнинг номлари ва таржимаи ҳоли билан боғлиқ маълумотлар келтирилади. Номи зикр этилган илк валий зот – авлиёлар султони деб улуғланган Увайс Қаранийдир. Увайс Қаранийнинг пайғамбаримиз саллалпоҳу алайҳи ва салламга ғойибона ошиқ бўлгани, унинг кучли ва мустаҳкам муҳаббати барча ислом уммати учун ибрат ҳисобланади.

Асарда авлиёларга доир маълумотлар турли ҳажмда бўлиб, баъзилари ҳақида бир жумла билан кифояланилса, баъзи шайхлар таърифига кенг ўрин ажратилади. Авлиёларнинг таржими ҳолидаги маълумотлар муайян мезонларга эга эмас: айрим шайхларнинг яшаган йиллари, жойлари, касби-корлари ва ҳоказолар билан боғлиқ маълумотлар батағсилоқ келтирилса, баъзиларининг фақат каромат ёки ўйтларидан парча берилади.

Тазкирада асосий эътибор валий зотнинг амалига қаратилган. Ҳар бир авлиё шариат ҳукмларини сўзсиз ва итоат билан адо этиб, Ҳақ васли талабида мол-дунё ташвишидан, ўз борлигидан мутлақо воз кечади. Бу дунёга заррача муҳаббат қўйиш Ҳақ ишқига соя солади деб эътиқод қилинади. Ҳар бир авлиё ҳақидаги маълумотлар таркибида араб тилидаги байтлар, ҳикматли фикрлар бериб борилади.

«Насойим ул-муҳаббат» таркибида тилга олинган авлиёлар орасида исломдаги тўрт мазҳаб бошлиқлари – имом Аъзам, имом Молик, имом Шофеъий, имом Аҳмад ибн Ханбалдан тортиб Муҳаммад Ғаззолий, Баҳоуддин Валад, унинг ўғли Жалолиддин Румий, Румийнинг ўғли Султон Валад каби буюк зотлар ҳақидаги турли қизиқарли, ибратли ҳикояларга дуч келамиз. Ушбу авлиёлар ҳақидаги маълумотлар илмий асосга эга бўлиб, тасаввуф тарихини ўрганишда алоҳида аҳамият касб этади (масалан, Жалолиддин

Румийга болалигига Фариддин Аттор ўзининг «Асрорнома» асарини ҳадя қилиши ёки Шамсиддин Табризий ва Румий учрашуви билан боғлиқ маълумотлар).

Умуман олганда, ҳазрати Алишер Навоийнинг авлиёлар таржимаи ҳолига бағишланган мазкур «Насойим ул-муҳаббат мин шамойил ул-футувват» асари шоирнинг етук мутасаввиф олим сифатидаги фаолиятини кўрсатувчи муҳим манбадир.

Алишер Навоийнинг диний йўналишдаги асарларини ўрганиш орқали шоирнинг динга муносабати, эътиқоди билан боғлиқ маълумотлар олиш билан бирга унинг ислом илмларининг етук билимдони экани тўғрисида тасаввур ҳосил қиласиз. Бу улуғ шоирнинг ўз даври ижтимоий ҳаётида тутган ўрни нечоғлик муҳим бўлганини белгилаб берувчи ўзига хос омилдир.

Таянч тушунчалар

- диннинг низоми
- шариат
- масаввүф илми
- дин назариётчиси
- ҳадислар талқини
- саҳиҳ ҳадис
- фалсафий ўғит
- фикҳий ва ақидаевий масалалар
- шариат ҳукмлари
- Аллоҳнинг сифатлари
- ислом дини фарзлари
- тирандозлик
- авлиё
- риёзат
- луқма ҳалоллиги
- мутасаввиф олим

Савол ва топшириқлар

1. Алишер Навоийнинг саҳиҳ ҳадисларни тўплаб таржима қилиши сабаблари ҳақида нима дея оласиз?
2. «Арбаъин»да тўплланган ҳадислар мазмун-моҳияттан қандай характеристга эга?

3. «Вақфия» Алишер Навоийнинг бошқа асарларидан ўзининг қайси жиҳатлари билан фарқланади?
4. «Вақфия»да Алишер Навоий асосий эътиборни қайси жиҳатга қаратган?
5. «Назм ул-жавоҳир» асарининг яратилиши тарихи билан боғлиқ маълумотларни келтиринг.
6. «Назм ул-жавоҳир»даги фикрларнинг айнан таронайи руబий шаклида келтирилгани боиси нимада деб ўйлайсиз?
7. «Сирож ул-муслимин» асарининг ўзига хос хусусиятлари қайси ўринларда намоён бўлади?
8. «Муножот» асари Навоийнинг «Хамса» достонлари муқаддимасида келтирган муножотларидан мазмунан қайси жиҳатлари билан фарқланади?
9. «Рисолайи тийри андохтан» асарининг моҳияти нимада деб ўйлайсиз?
10. «Насойим ул-муҳаббат» тазкирасининг «Нафоҳат ул-унс»дан фарқланувчи хусусиятларига тўхталинг.
11. «Насойим ул-муҳаббат» асарининг илмий жиҳатдан аҳамияти қайси ўринларда намоён бўлади?

Адабиётлар:

1. Навоий Алишер. Вақфия. Мукаммал асарлар тўплами. 20 жилдлик. – Тошкент: Фан, 1998. 14-жилд. – Б. 231 – 270.
2. Навоий Алишер. Арбаъин. Сирож ул-муслимин. Муножот. Рисолайи тийр андохтан. Мукаммал асарлар тўплами. 20 жилдлик. – Тошкент: Фан, 2000. 16-жилд. – Б. 261 – 308.
3. Навоий Алишер. Вақфийя / Нашрга тайёрл. И.Шамсимуҳамедов. – Тошкент: Фан, 1991.
4. Муножот / Нашрга тайёрл. ва луғатлар муаллифи Суйима Ғани қизи. – Тошкент: Адабиёт ва санъат, 1991.
5. Арбаъин / Нашрга тайёрл. Каримбек ва Сайдбек Ҳасан; шарҳловчи А.Рустам. – Тошкент: Мерос, 1991.
6. Арбаъин: Қирқ ҳадис шарҳи / Сўз боши муаллифлари ва шарҳловчи Қ.Аҳад, О.Махмуд. – Тошкент: Адабиёт ва санъат, 1995.

7. Комилов Н. Тасаввуф. – Тошкент: Movarounnahr – O'zbekiston, 2009.
8. Қаюмов А. Дилкушо тақорлар ва руҳафзо ашъорлар. – Тошкент: MUMTOZ SO'Z, 2011.
9. Рамазонов Н. «Насойим»нинг ўзига хос ҳусусиятларига доир // Навоийнинг ижод олами (мақолалар тўплами). – Тошкент: Фан, 2001.
10. Ражабова М. «Назм ул-жавоҳир» тарихига оид муҳим манба // Алишер Навоий ижодий ва маънавий меросининг оламшумул аҳамияти (халқаро илмий-назарий анжуман материаллари). – Тошкент: Ўзбекистон, 2011.
11. Ўзбек адабиёти тарихи. Беш жилдлик. 2-жилд (XV асрнинг иккинчи ярми). – Тошкент: Фан, 1977.
12. Шамсимухамедов И.У. «Вакфийе» Алишера Навои как литературный памятник: Дисс... канд. филол. наук. – Ташкент, 1991.
13. Исламов Х.И. «Насойим ул-мухаббат» Алишера Навои и его научно-критический текст: Дисс... канд. филол. наук. – Ташкент, 1990.

АЛИШЕР НАВОЙНИНГ ТАРИХИЙ, ЁДНОМА ВА ТУРЛИ МАВЗУДАГИ АСАРЛАРИ

РЕЖА:

1. «Зубдат ут-таворих» – мумтоз тарихнавислик манбаси.
2. Навоий ёдномалари – мемуар жанрининг юксак намунаси сифатида.
3. «Муншаом» асарининг туркий эпистоляр жанр тараққиётидаги ўрни.
4. «Маҳбуб ул-қулуб» – ахлоқий-таълимий асар.

Алишер Навоийнинг олим сифатидаги фаолияти унинг нафқат тилшунослик, адабиётшунослик, балки тарихшуносликка доир асарлари билан ҳам белгиланади. У ушбу фан тараққиётига ўзининг «Тарихи анбиё ва ҳукамо» ҳамда «Тарихи мулуки ажам» асарлари билан улкан ҳисса қўшди.³⁸

Алишер Навоийнинг «Тарихи анбиё ва ҳукамо» рисоласи ислом дини манбаларига асосланган асар бўлиб, пайғамбарлар – расул ва набийлар ҳамда ҳаким зотлар – алломалар тарихига бағишиланган. Шу маънода асарни шартли равишда икки қисмга бўлиш мумкин:

1. Анбиё – пайғамбарлар тарихи.
2. Ҳукамо – ҳаким зотлар тарихи.

Даставвал, Одам Ато (а.с.) қисссаси ҳикоя қилинади. Үнда Одамнинг яратилиши, Иблиснинг Олий Даргоҳдан қувилиши, сўнг Одам ва Ҳаввонинг ер юзига туширилиши билан боғлиқ ҳикоялар келтирилади.

Ҳазрат Навоий пайғамбарларни, анъанага биноан, икки гурӯҳга бўлади: расул ва набийлар. Расулларга Аллоҳ китоб ва саҳифа нозил қилган бўлиб, улар «мурсалин» номи билан аталади. Набийлар эса фақат ваҳий олган пайғамбарлар бўлиб, уларга китоб нозил қилинмаган (туширилмаган).

³⁸ Академик Азиз Қаюмов бу асарларни, аспида, умумий тарих китобининг бўлаклари деб ҳисоблайди. Олимнинг фикрича, Навоий яшаган даврда тарихшунослиқда мавжуд анъанага кўра муайян ҳукмдорнинг тарихини ёзишдан аввал пайғамбарлар тарихи, сўнгра 4 ажам сулолалари тарихи, ислом даври тарихи, ундан сўнггина замон тарихига ўтилар эди (Бу ҳақда қаранг: Қаюмов А. Дилкушо такрорлар ва руҳафзо ашъорлар).

Алишер Навоий пайғамбарлар ҳақида сўзлаб, уларнинг яшаган даврларига тўхталади, аниқ ийлларни келтиради (масалан, Маҳойил бинни Қинон 865 йил яшаган). Шунингдек, пайғамбарларнинг аҳли аёли, фарзандлари, касбу кори ҳақида маълумот берилади. Пайғамбарзодаларнинг ҳаммасига ҳам пайғамбарлик мақоми берилмаган, уларнинг баъзиларигагина Аллоҳдан ваҳий тушган. Масалан, Одам Атонинг невараси Ануш, унинг ўғли Қинон кабилар бу шарафга ноил бўла олмаганлар. Шу тариқа муаллиф олтмишдан зиёд пайғамбар ва пайғамбар авлодларининг ҳаёти, таржимаи ҳолини батафсил ёритади.

Зикр этилганлар сирасида «Қуръон»да номи тилга олинган барча пайғамбарлар, Луқмони ҳаким, Зулқарнайн каби ваҳий тушган ё тушмагани ихтилофли бўлган валий зотларни ҳам кўришимиз мумкин. Мазкур асарда бир замонда бир неча пайғамбарлар яшагани ҳам айтилади. Масалан, Исҳоқ (а.с.) вафот этган йили Юсуф (а.с.)нинг Миср ҳокими бўлгани ва ҳоказо. Шунингдек, «Қуръон»да тилга олинган «Асҳоби қаҳф» қиссаси ҳам мазкур асардан ўрин олган.

Пайғамбарлар қиссаси ҳажман ўзаро фарқланади. Баъзи пайғамбарлар, масалан, Хизр (а.с.) ҳақида қисқа маълумот билан чекнисла, Юсуф (а.с.), Иброҳим (а.с.), Мусо³⁹ (а.с.) ва Исо (а.с.)ларнинг ҳаётига доир жуда кўп воқеалар баён қилинади. Алишер Навоий Юсуф (а.с.) ҳақидаги қиссани баён қилишга киришаркан, Фирдавсий Тусий ва Абдураҳмон Жомийлар ҳам мазкур мавзуда достон ёзганларини айтиб, ўзининг ҳам туркӣ тилда маснавий ёзиш нияти борлигини билдириб ўтади.

Мазкур қисмда келтирилган маълумотларнинг бош манбаси Қуръони Карим бўлиб, муаллиф ўз фикрларини асослаш учун музайян оятларни ҳавола қилиб боради. Яна бир эътиборли жиҳати, Алишер Навоий пайғамбарларнинг иймони, сабри ва юксак фази-

³⁹ Асар билан танишиш жараёнида баъзи пайғамбарлар қиссалари билан бошқа халқлар ижодида мавжуд эпос ёки ҳикоятлар билан ўхшаш ҳолатларни учратамиз. Масалан, арман эпоси «Довуд Сосуний»да тилга олинган Миср шохи Малик, унинг аёли Ҳондут хотун ҳамда унинг асрар олган ўғли ҳақидаги воқеалар билан Мусо (а.с.)ни фиръянвнинг аёли Осия асрар олгани билан боғлиқ ҳолатларда жуда аниқ ўхшашликлар кўзга ташланади (Бу ҳақда қаранг: Наири Заръян. Довуд Сосуний. – Тошкент: Адабиёт ва санъат, 1976. – Б.114).

латларини алоҳида тасвирлайди. Масалан, Айюб (а.с.)нинг бошига тушган ташвиш ва балолар ҳам уни Аллоҳга ибодат қилишдан тўсмаганини айтаркан, бу билан севги ва дўстликнинг собит бўлиши ҳақидаги ғояларини баён қиласди.

Асарда ҳар бир пайғамбар қиссасидан сўнг муайян шеърий парчалар келтирилади. Шоир уларни «маснавий», «рубоий», «байт», баъзан эса «шеър» ёки «назм» номлари остида бериб боради. Мазкур шеърий парчаларда қиссаси ҳикоя қилинган пайғамбар номи тилга олинади ва фалсафий хулосалар чиқарилади.

«Тарихи анбиё ва ҳукамо» асарининг иккинчи қисми ҳукамолар тарихига бағишлиланган, бу қисм умумий асарнинг тахминан тўртдан бир қисмини ташкил этади. Ҳукамолар тарихи анбиёларникига нисбатан қисқа бўлиб, умумий маълумотлар билан чекланилган. Алишер Навоий Луқмони ҳаким, Фишогур (Пифагор), Жомосб, Буқрот (Гиппократ), Буқротис, Суқрот (Сократ), Афлотун (Платон), Аристотилис (Арасту), Балинос, Жолинус (Гален), Батлимус (Птолемей) каби юонон файласуфлари ва Содик, Бузургмехр каби форс ҳакимларининг, жами ӯн уч нафар олимнинг тарихини қисқача ёритади. Ҳар бир ҳикоядан кейин анъанавий тарзда бир байт шеър илова қилиб борилади.

Биз мазкур асардаги пайғамбарлар билан боғлиқ анъанавий воқеаларни «Қисаси Рабғузий» ва «Шажараий турк» каби туркӣ тилда яратилган бошка кўплаб асарларда ҳам учратамиз. Умуман олганда, Алишер Навоийнинг «Тарихи анбиё ва ҳукамо» асари дин тарихига бағишлиланган, бу ўринда муаллиф дин тарихи ҳамда юонон фалсафаси билимдони сифатида намоён бўллади.

Алишер Навоийнинг **«Тарихи мулуки Ажам»** («Араб бўлмаган шоҳлар тарихи») асари ўз даври нуқтаи назаридан илмий далилларга асосланган рисола ҳисобланади. Асарда Эрон ва Турон мулкида ҳукмронлик қилган тўрт сулола: пешдодийлар, каёнийлар, ашконийлар, сосонийлар тарихи батафсил ҳикоя қилинади.

Анъанага мувофиқ, тарих Одам Ато (а.с.) даврига боғлиқ равишда талқин қилинади. Алишер Навоий мазкур асарда **«Низом ут-таворих»**, **«Жоме ут-таворихи Жалолий»**, **«Насиҳат ул-мулук»**, **«Жовидон хирад»**, **«Одоб ул-араб вал-фурус»**, **«Гузида»**, **«Мунтаҳаб»**, **«Девон ун-насад»** каби манбалардан фойдалана-ди ва Банокатий, имом Муҳаммад Ғаззолий, Табарий, Бу Али

Мискавайҳ, Қози Барзовий каби тарихчи олимларнинг номларини келтириб, маълумотларни уларнинг асарларидан олганини айтиб ўтади. Шоирлардан Абулқосим Фирдавсий ва унинг «Шоҳнома»сига кўпроқ мурожаат қиласди. Искандар ҳақидаги қиссада эса ҳамсанавислар Ҳусрав Деҳлавий, Низомий Ганжавийларнинг қарашларини келтириб ўтади.

Алишер Навоий масалага нуктадон муаррих – тарихчи олим сифатида ёндашар экан, ҳар бир маълумотнинг аниқ ва асосли бўлишига алоҳида эътибор қаратади.

Алишер Навоий пешдодийлар сулоласига мансуб 11, каёнийлар сулоласидан 9, ашконийлар сулоласидан 15, сосонийлар сулоласидан 28, жами тўрт сулоладан 63 ҳукмдорнинг номлари, таржимаи ҳоли, ҳаёти ва юритган сиёсатига доир маълумотларни тақдим этади. Деярли ҳар подшоҳ қиссасидан кейин, анъанага мувофиқ, «шеър» номи остида қисса мазмунига уйғун байтлар илова қиласди. Бундан ташқари, тўрт сулола ҳукмдорлари ҳақидаги қиссаларнинг сўнгида ҳам умумий якунловчи маснавийлар мавжуд.

Алишер Навоий мазкур асарида тарихга оид жуда қизиқарли ва аҳамиятли кўплаб маълумотларни беради. Балх, Бобил, Нишопур, Марв. Самарқанд ва яна ўнлаб шаҳарларни бунёд қилган шоҳлар, Наврӯз байрамининг келиб чиқиши, рўзанинг пайдо бўлиши, бутпарастликнинг сабаблари билан боғлиқ воқеалар шуляр жумласидандир.

Ҳазрат Навоий шоҳлар ҳақида сўзлар экан, адолатли сultonларни олқишлияди, уларнинг хайрли тақдирини мамнуният билан ҳикоя қиласди, золим ва мустабид ҳукмдорларга салбий муносабат билдириб, уларнинг аянчли кечмишига ибрат назари билан боқишга ундейди. Масалан, Жамшид ҳақидаги ҳикояда шоҳ Жамшид дастлаб адолатли ҳукмдор бўлганини, кейинчалик эса ўз қудратига ишониб кибру ҳавога берилганини ва одамлардан ўзига сигинишни талаб қилганини қоралайди.

Алишер Навоий Нўширавони Одил ҳақида маълумот берар экан, унинг сосонийлар сулоласига мансуб ўн тўққизинчи ҳукмдор эканини, отасининг исми Қубод бўлганини айтиб, Нўширавоннинг адолатига алоҳида ургу беради ва бир қатор машҳур ҳикоятларни илова қиласди. Ҳикоятлардан бирида айтилишича, Нўширавон даврида бир киши боғ сотиб олади. Бу боғдан ҳазина топиб олгач сотган кишининг олдига бориб, оптинларни унга бермоқчи бўлади.

Боғни сотган одам: «Боғга қўшиб ерни ва ундаги ҳамма нарсани сенга сотганман, олтинлар сенга тегишли», – деб жавоб беради. Уларнинг бу можароси Нўширавоннинг қулоғига ҳам етиб боради ва у икки кишини чақириб куда бўлишни ва хазинани барпо этилажак янги оилага топширишни маслаҳат беради. Бу ҳикоятда ҳукмдор адолатли бўлса, халқда ҳам инсофу иймон бўлади деган фалсафий хулоса мавжуд.

Алишер Навоий Искандар ҳақида тўхталаркан, унинг тарихи ихтилофли эканини айтади ва гарчи у каёнийлар сулоласи вакили сифатида келтирилса-да, бу борада ҳам турли тахминлар мавжуд деб таъкидлайди. Шоир Искандар ва унинг туғилиши, насл-насаби тўғрисида гапира туриб Хусрав Деҳлавийнинг «Ойинайи Искандарий» ва Низомий Ганжавий «Искандарномаси»даги маълумотларни ўзининг «Садди Искандарий»сида келтирган маълумотлари билан қиёслайди. Ўртадаги фарқларни айтиб ўтади. Самарқанд, Ҳирот, Марв ва Исфаҳонни Искандар бунёд қилгани билан боғлиқ маълумотларни ҳам келтириб ўтади.

Навоий номларини келтирган 63 ҳукмдор ичида уч аёл подшоҳ исми ҳам зикр этилган бўлиб, улардан бири каёнийларнинг олтинчи ҳукмдори Ҳумой ёки Ҳумондур. У каёнийлар ҳукмдори Баҳманнинг аёли бўлиб, шоҳ вафот этганда, ҳомиладор эди. Баҳман жон бериш пайтида тохини аёлининг қорнига қўяди ва оламдан ўтгач, аркони давлат Ҳумойни подшоҳ қилиб кўтаради. Ҳумой ўғил фарзанд кўргач салтанатга меҳри зўрлиги ёки ўғлиниң хавфсизлигини ўйлаб уни сандиққа солиб дарёга оқизади ва сандиққа ўғлиниң подшоҳзода эканини англатувчи ёқутларни ҳам солади. Тақдир тақозоси билан ўғли улғайиб онасини топади. Ҳумой унга давлат бошқарувини топширади.

Алишер Навоий тилга олган кейинги икки аёл подшоҳ сосонийларнинг 27- ва 28-ҳукмдорлари Турондўҳт ва Озармдўҳтдир. Шоир уларнинг таҳтга чиқиши ва ҳукмдорлик даври билан боғлиқ қизиқарли фактларни келтиради. Бу икки аёл опа-сингилт бўлиб, 23-подшоҳ Хусрав Парвизнинг қизлари эди.

Алишер Навоий «Тарихи мулуки Ажам» асари орқали тарих билимдони қиёфасида намоён бўлади. Асаддаги юзлаб географик номлар, шахсларнинг исми-шарифи ҳамда воқеалар муаллифнинг кучли хотирасидан ҳам дарак беради.

Аасарнинг хотимаси маснавий тарзида бўлиб, 50 байтдан иборат. Унда Навоий бевосита Шоҳ Ғозий – дўсти султон Ҳусайн Бойқарога мурожаат қиласади. Унинг адолати ва саховатини, инсон сифатидаги юксак хулқини мадҳ этади. Шоҳни ягона жавҳарга қиёслайди, шунинг учун ҳам унга бағишлаб «Назм ул-жавоҳир» асарини ёзганини айтади. Айнан Ҳусайн Бойқаро тарихини битиш нияти борлигини билдиради:

*Вале азмим эмди будурким худой,
Агар бўлса умрумға муҳлат физой.
Чекиб турфа тарихингга ҳомани.
Қилиб нуктаға тез ҳангомани...
... Валодат кунидан тутуб то бу дам,
Борин шарҳ ила айлагаймен рақам.*

Шу тариқа хотима-маснавийнинг сўнгги байтларида Навоий шоҳсиз жаҳонга омонлик бўлмаслигини айтиб, Ҳусайн Бойқарога яхши тилаклар билдиради. дуосини йўллайди ва ўзи ҳам дуолардан умидвор эканини асарни якунлайди.

Хуллас, Алишер Навоийнинг «Тарихи мулуки Ажам» асари шоирнинг тарихчи олим сифатидаги яна бир муҳим қиррасини очиш билан биргаликда Шарқ ҳалқарининг тарихидан кенгроқ хабардор бўлиш имкониятини беради.

Алишер Навоий ўзининг уч устозига бағишлаб уч ёднома – маноқиб яратган. Маноқиб юксак фазилатли, валий ва ўзига хос хислат эгаларининг таржимаи ҳоли, сиyrати ва сажиисини акс эттирувчи мумтоз жанр ҳисобланади.

Шундай асарлардан бири Навоийнинг пири, устози Абдураҳмон Жомий хотирасига бағишлиланган «Хамсат ул-мутаҳайирин» («Беш ҳайрат») ҳисобланади. Муаллиф кириш қисмида асар мундарижасини келтиради. Унга кўра, мазкур асар муқаддима, уч мақолат ва хотимадан иборат.

Асар муқаддимасида Алишер Навоий Абдураҳмон Жомийнинг насл-насаби, болалиги, умр йўли ҳақида тўхтапади. Шунингдек, Жомийнинг хизматига қачон келгани ҳақида ҳам хабар беради. Шоир муқаддимада Абдураҳмон Жомийнинг болалиги ҳақида ҳикоя қилиш асносида қозиқ воқеани келтиради. Бир куни замонаси-нинг пири муршидларидан ҳисобланмиш Фахрилдин Луристоний

Жом вилоятига – Абдураҳмон Жомийнинг уйларига келади. Ӯша пайтларда тұрт-беш ёшлар атрофида бўлған Абдураҳмон жуда сезгирилқ билан улуғ муршиднинг ҳаракатларини кузатади ва шайх бармоқлари билан «Умар» ва «Али» сўзларини ҳавога ёсса, илғаб олиб ўқиб беради. Буни кўриб Фахриддин Луристоний боладаги зийраклиқдан ҳайратга тушади. Ҳазрат Навоий Жомийнинг умр йўли билан боғлиқ маълумотларни келтириб, устозининг Шоҳруҳ мирзо замонидан Абу Сайд замонигача Ҳирот шаҳрида яшаганини айтади. Сўнг авлиё Саъдиддин Кошғарий мозори қошида маскан тутади. Шундан сўнг умрининг охиригача шу ерда яшайди.

Асарнинг иккинчи қисми «Аввалғи мақолот» деб аталиб, ҳазрат Навоий ўзи ва устози ўртасида бўлиб ўтган қизиқ, ибратли воқеалар, маънавий сухбатлар хусусида маълумот беради. Мазкур қисмда Абдураҳмон Жомий ва Алишер Навоий иштирокидаги ўн тўрт воқеа келтирилган. Уларнинг барчаси турли вақт ва ҳолатларда рўй берган бўлса-да, устоз ва шогирднинг, балки икки дўстнинг меҳру муҳаббати, садоқати, ҳамфирклилиги ҳақидаги хуло-саларни беради. Масалан, Навоий келтирган воқеалардан бирида котиб Абдуллоҳнинг Алишер Навоийга шайх Ҳожа Абдуллоҳ Ансорийнинг «Илоҳийнома» китобини қўчириб келтиргани қаламга олинади. Котиб китобни ташлаб кетгач, Алишер Навоий бир варақлаб кўриш баҳонасида икки қисмдан иборат йирик асарни бир ўтиришда ўқиб тугатиб қўяди. Эртаси куни котиб Абдуллоҳ шоирдан китобни қайтаришини ёки ҳақини тўлашини сўрайди. Шунда атрофдагилар унга Алишер Навоий китобни қўлига олиб бир зарб билан ўқиб тугатганини айтадилар. Ҳайратга тушган котиб: «Кечакитобни ҳазрати Маҳдуми Нуран – Абдураҳмон Жомийга ҳам элтиб эдим, ул зот ҳам худди шу тарзда уни хатм қилиб эдилар», – дейди.

Шунингдек, яна бир қизиқ воқеа келтирилади. Бир мажлисда Удий исмли ҳофиз Ҳожа Ҳасан Дехлавийнинг ғазалини куйлайди. Шунда ғазалнинг:

*Мисоли қатри борон сиришки ман ҳам дур шуд.
Чунин асар дижад. алҳақ, тулуу чун ту сұхайле*

Маъноси:

(«Менинг ёмғир томчиси каби кўз ёшларим инжуга айланди, ҳақиқатан, сенинг Сұхайл юлдузида чиқишинг шундай таъсирлантиради»)

байтига келганда мажлис аҳли мисрадаги «дур» сўзидан кўра кўз ёшнинг қонга ўхшатилгани бадий таъсирчанликни оширади дейишади. Ҳамма шундай фикр айтиб, Навоидан ҳам фикр сўрайдилар. Шоир ғазалдаги ифоданинг ўзи чиройли, лекин буни исботлаб беролмайман, келинглар. бир кишини ҳакам қиласиз, у тўғри фикрни айтсин, гаров ўйнаймиз дейди. Ҳамма рози бўлади ва ғазал байти Абдураҳмон Жомийга юборилади. Байтдаги «дур» ёки «хун» («қон») сўзларининг қайси бири маъкул эканини сўрашади. Шунда Жомий Сухан дурр асту тааллуқ бу гўши шах дорад (Сўз—дур, шоҳнинг қулогига тегишли) мазмунидаги бир мисрани битиб юборади. Давра аҳли жавобнинг нозик ва қисқалигидан, Навоий ва Жомийнинг шу қадар ҳамфирклигидан ҳайратга тушадилар. Бу воқеа бутун Ҳиротга тарқалиб кетади, мажлисларда узоқ вақт айтиб юрилади.

Яна бир воқеада қурилишга сарв дарахтлари кесиб олиб кетилаётгани билан боғлиқ ҳолат тилга олинган. Аравада сарв дарахтлари олиб кетилаётганини кўрган Жомий аравакашдан: «Сарв дарахти қолдими, нечта ёғоч олиб кетяпсан?» – деб мутойиба билан савол берса, бир юз тўртта дейди. Навоий: «Адад, ахир, сарв ёрнинг қаддига қиёсdir, «қад»⁴⁰ сўзининг адади ҳам бир юз тўртдир», – дейди. Жомий Навоийнинг заковатига қойил қолади.

Асарнинг иккинчи мақолати Алишер Навоий ва Абдураҳмон Жомий бир-бирига ёзган хатлари хусусида. Бу мактублар Жомийнинг ҳам, Навоийнинг ҳам баъзи асарлари таркибиغا киритилган. Айнан шу қисмда Алишер Навоий ўзининг «Тұхфат ул-афкор» қасидасининг ёзилиши тарихига ҳам тұхталиб ўтади. Мақолатда ёзилишича, бир куни Алишер Навоий ва Жомий суҳбатлашиб ўтирганларида, Хусрав Дехлавийнинг «Дарёйи аброр» қасидасидан сўз кетади. Сўз асносида Навоий Хусрав Дехлавийнинг «Агар афлок ҳаводиси ва рўзиғор навоийбидин менинг борча назмим замона саҳифасидан маҳв бўлса ва бу қасидам қолса, менг басдир, нечунким ҳар киши ани ўқиса билурким. назм мулкида менинг тасарруф ва иқтидорим не мартабада эркандур» мазмунидаги фахриясини эслаб ўтади. Бир оз вақт ўтиб Жомий Марвга равона бўлади. Ҳазрат Навоий Жомий ҳузурига

⁴⁰ «Қад» сўзи абжад ҳисобида 104 рақамини ҳосил қиласи. Бунда ё 100 ни, ё 4 ни билдиради.

борганида, Жомий «Дарёйи аброр»га татаббу тарзида ёзилган «Лужжат ул-асрор» қасидасини Навоий эътиборига ҳавол қиласди. Навоий қасидани ўқиб ғоят таъсириланганидан йўлда унга татаббу тарзида матлаъ битиб, агар Жомийга маъқул келса, уни давом эттириши мумкинлигини айтади. Жомийга матлаъ маъқул келиб, уни якунлашга Навоийни илҳомлантиради.

«Учинчи мақолат»да Жомий яратган асарлар таърифига бағишлиланган бўлиб, мазкур фаслни жомийшуносликнинг пойдевори деб айтиш мумкин. Унда Навоий Жомийнинг 38 асари номини келтирган.

«Хотима»да Навоий устози Жомий ҳузурида ўқиган асарлари рўйхатини келтиради. Бу асарларнинг баъзилари Абдураҳмон Жомий қаламига мансуб бўлса («Рисолаи қофия», «Рисолаи муаммо»нинг иккинчи дафтари, «Рисолаи аруз», «Лавоеҳ» («Ялтироқликлар»), «Лавомеъ» («Равшанликлар»), «Шарҳи рубоийёт», «Нафаҳот ул-унс» («Дўстлик таровати»), «Ашиъат ул-ламаот» («Порлоқ шуълалар»), «Шавоҳид ун-нубувват» («Пайғамбарлик шоҳидлари»), «Ҳафт авранг»), қолганлари Хожа Мұхаммад Порсонинг «Қудсия», Фахриддин Ироқийнинг «Ламаот», Хожа Убайдуллоҳ Ахронинг фақр ва фано тўғрисидаги рисолалари, Абдуллоҳ Анзорийнинг «Илсҳийнома» асари ва бошқалар эди. Шунингдек, хотимада Жомийнинг хасталиги, вафоти, дафн қилиниш тафсилотлари ҳам келтириб ўтилади. Абдураҳмон Жомий вафотидан бир йил кейин Навоий устози қабри устига улкан мақбара қурдиради, сulton Ҳусайн Бойқаро иштирокида катта маросим ўтказиб, маросимда устозининг вафотига бағишлиб ёзган таърих ва марсиясини ўз даврининг машҳур нотиги мавлоно Ҳусайн Воиз Кошифийга ўқиттиради. Мазкур марсия кейинчалик «Девони Фоний» таркибидан ўрин олган.

«Холоти Сайид Ҳасан Ардашер» маноқиби Сайид Ҳасан Ардашер вафотидан иккى йил кейин – 1490 – 1491 йилларда яратилган. Алишер Навоий Сайид Ҳасан Ардашер билан биринчи марта ҳижрий 860 йил (милодий 1455 – 1456), яъни сulton Иброҳим мирзо тахтга ўтирган иили учрашиб танишган. Буюк шоирнинг бу зотга алоҳида ҳурмат ва эҳтиром билан қараганини йигитлик даврида унга бағишлиб шеърий мактуб – маснавий битгани, унинг номини «Мажолис ун-нафоис», «Насойим ул-муҳаббат» асарларига

киритгани, «Хазойин ул-маоний»даги таркибанд-марсияни буюк зот вафотига бағишилагани, «Соқийнома»да унинг номини алоҳида эслаб ўтгани ҳам кўрсатади.

Навоий бу зотнинг сарф (морфология), нахв (синтаксис), луғат, араб тили, мантиқ, калом (эътиқод илми), фикқ (ислом ҳукуқ-шунослиги), ҳадис, тафсир (Қуръон оятлари шарҳи), муаммо ва таърих илми, нужум илми (астрономия), адвор (мусиқа назаријаси) соҳаларида мукаммал билимга эга бўлса-да, ғоят камтарлик ва одоб юзасидан мажлисларда сукут сақлаб ўтиришларини чуқур ҳурмат билан қайд этади. Саййид Ҳасан Ардашер Лутфий, Атойи, Муқими, Навоий, форсигўй ижодкорлардан Хожа Ҳофиз Шерозий, Саъдий Шерозий, Фаридиддин Аттор асарларини севиб мутолаа қилган. Айниқса, ҳазрат Навоийнинг қўйидаги байтларини такорлаб юришни хуш кўрган:

*Фурқатингдин заъфарон узра тўкармен лолалар,
Лолалар эрмаски, бағримдин эрур парголалар...*

*Ул паривашким, бўлубмён зору саргардо анга,
Ишқдин олам манга ҳайрон-у, мэн ҳайрон анга.*

Навоий бу зотни риндлар шоҳи деб атар экан, Саййид Ҳасан Ардашер саховат, шафқат, лутфу тавозе, одоб, ҳилм (юмшоқ табиатлилиқ), таҳаммул (сабрлилик), дунёга бефарқлик каби бошқа ҳамма риндларга ҳам насиб этавермайдиган кўплаб но-дир фазилатлар эгаси бўлганини таъкидлайди. Саййид Ҳасан Ардашернинг бу каби фазилатларини Навоий бир неча воқеалар мисолида исботлаб беради. Масалан, сulton Ҳусайн Бойқаро ҳам Саййид Ҳасан Ардашернинг жуда чуқур ҳурмат қилиб, саройда вазир сифатида ўз ёнида бўлишини истаган. Бироқ «риндлар шоҳи» Саййид Ҳасан Ардашер розилик бермайди ва шоҳнинг раъйини қайтармаслик учун лашкарда оддий навкар бўлиб икки йил хизмат қиласди. Лекин сulton бу билан у зотга зулм қилаётганини англайди ва хизматдан озод этади. Ҳусайн Бойқаро ўз фарзандларига ҳамиша Саййид Ҳасан Ардашерни ўрнак қилиб кўрсатган.

Асарда Саййид Ҳасан Ардашернинг пок эътиқоди, Ҳаққа муҳаббати, Аллоҳнинг тақдирига ҳамиша розилигини таъкидлар

екан, Навоий бир воқеани келтиради. Унга кўра, Сайид Ҳасан Ардашернинг Сайид Муҳаммад исмли ўн тўрт ёшли яккаю ягона ўғли вафот этганида, ҳамма ғаму қайғуга тушади. Шунда бу зот «Аллоҳнинг иродаси» дея сабр билан мусибатни енгади, ҳатто бошқаларга таскин беради.

Ҳазрат Навоий ва Сайид Ҳасан Ардашер жуда яқин дўст эдилар. Улар ҳамиша, ҳар куни бир-бирларига маънавий-руҳий эҳтиёж сезардилар. Алишер Навоий бу ҳолатни шундай ифодайди:

«... бир кун алар мулозаматига еттасам эрди, сабру тоқатим қолмас эрди ва алар ҳам келиб аҳвол сўрарлар эрди: «Ташвише бўлмамиш бўлғайким, букун сендин хабар топа олмадуқ».

Сайид Ҳасан Ардашер ҳажга боришни ният қилас эди, лекин кўп монеликлар бўлиб ниятига эришолмайди. Навоий давлат юмуши билан Ҳиротдан ташқаридалигида Сайид Ҳасан Ардашер етмиш тўрт ёшида вафот этади. Бундан буюк шоир чукур қайғуга ботади. Ҳирот шимолидаги тоғ этагида дўсти ва устози ҳисобланмиш бу зотнинг қабри устига сағана қурдиради. Кейинчалик Сайид Ҳасан Ардашернинг бошқа яқин инсонларининг хоклари ҳам бу ерга келтирилиб дафн этилади. Эп орасида бу жой «Азизлар ҳазираси» – «Азиз зотлар хилхонаси» деб ном олади.

«Ҳолоти Сайид Ҳасан Ардашер» якунида бу зотнинг вафоти санасига бағишланган таърихни илова қиласди, унга кўра, бу сана «Жаннати покаш макон бод»⁴¹ («Макони пок жаннатда бўлсин») жумласида намоён бўлади.

Хулоса тарзида шуни айтиш мумкинки, Алишер Навоий Сайид Ҳасан Ардашерни комил инсон сифатида тасвирлайди. Асарни ўқиш жараёнида Сайид Ҳасан Ардашернинг маънавий-руҳий дунёси билан яқиндан танишар эканмиз, улуғ шоир бу зотни бејиз комил инсон сифатида танламаганлигига гувоҳ бўламиш.

Ҳазрат Алишер Навоий учун ҳам дўст, ҳам ота, ҳам устоз мақомида бўлган зотлардан бири Паҳлавон Муҳаммад эди. Бу зотнинг вафотидан сўнг улуғ шоир «Ҳолоти Паҳлавон Муҳаммад» асарини ёзади. Асарда Паҳлавон Муҳаммаднинг эзгу амаллари, барчага бирдек ёқимли феъл-атвори, кучли салоҳияти ҳақида сўз боради.

⁴¹ Абжад ҳисобида бу сана ҳижрий 894, милодий 1488 ёки 1489 йилга тўғри келади.

Навоий Паҳлавон Мұҳаммад ҳақида сүз бошлар экан. аввало, унинг жисмоний жиҳатдан забардаст ва кучли бўлганини айтади. Ҳатто унинг каби кучли инсон беш юз. минг йилларда ҳам туғилмайди дейди. Сўнг унинг юксак илмий истеъдод ва иқтидори ҳақида тўхталиб, мусиқа, тиббиёт, шеърият, қофия, аruz, бадиий санъатлар, илми нужум (астрономия), фикҳда кенг маълумотга эга бўлганини таъкидлайди. Айниқса, мусиқа борасида жуда иқтидорли саналиб, бир неча ғазалларга куй боғлаган эди. Масалан, устод Мұҳаммад Ҳоразмий, мавлоно Нуъмон, мавлоно Соҳиб Балхий, шайх Сафойи Самарқандий, хожа Юсуф Андижоний каби моҳир созанда ва бастакорлар йўлида яратган кўйлари тингловчилар томонидан илиқ кутиб олинган. Айниқса, Мир Бузург Термизийга бағишлаб кашф қўлган «Чоҳоргоҳ» кўйи бутун Ҳурросонда, ҳатто Самарқанд ва Ироқда ҳам бағоят машҳур бўлиб, уни кўйламаган бирор ҳофиз қолмаган.

Муаммо илми борасида ҳам Паҳлавон Мұҳаммад тенгсиз бўлиб, Куштигир тахаллуси билан бир қанча муаммолар яратган.

Паҳлавон Мұҳаммад ғоят хушахлоқ инсон бўлиб, уни Ҳиротда барча таниган-билган инсонлар яхши қўриб, ҳурмат қилганлар: «Такаллуфсиз ва муболагасиз подшоҳдин гадогача ва аҳлууллоҳдин яҳуд ва марсоғача Паҳлавонни севмас ва тиламас киши йўқ эрди».

Шунинг учун ҳам Паҳлавон Мұҳаммад сulton ҳузурида юксак мавқега эга бўлиб, шоҳнинг ҳар бир мажлисида иштирок этган.

Навоий Паҳлавон Мұҳаммад билан боғлиқ хотираларини эсларкан, Абу Сайд мирзо даврида Машҳадда бўлган қизиқарли воқеани келтиради. Мафосил (бод. ревматизм) билан оғриган ёш Алишер Навоийни табиб мавлоно Абдуссалом Шерозий муолажа қилиб, уқалаш лозимлигини айтади. Паҳлавон Мұҳаммад меҳрибонлик қўрсатиб ўзи бу ишни бажаришини айтади ва сухбат орасида туркий шоирлардан қайси бирини кўпроқ маъқул кўришини сўрайди. Навоий аввалига ҳамма шоирларни ҳурмат қилишини айтади. Лекин Паҳлавон Мұҳаммад, барибир, улар орасида тафовут бор, ўзингга энг маъқулини айт деб туриб олгач, Навоий Лутфий дея жавоб беради. Шунда Паҳлавон Мұҳаммад нега Сайид Насимиини айтмадинг дейди. Алишер Навоий Лутфий мажоз билан сўз айтади, Насими эса ҳақиқат йўлидагилар каби Ҳақ ишқни ошкора кўйлади. сен мендан мажоз йўли билан ижод

қиласиганларни сўрадинг дейди. Паҳлавон Муҳаммад ундаи эмас. Насимида ҳам ишқни мажоз билан ифода этиш бор дейди ва шу куни Навоий тонгда ёзиб ҳали ҳеч кимга кўрсатмаган ғазалини ўқиб беради ва унинг мақтаъсидаги Навоий сўзи ўрнига Насимиини қўяди:

*Гар Насими сиймбарлар васлин истаб кўрса ранж,
Йўқ ажаб, нечунки хом этган киши ранжур эрур.*

Навоий бундан ҳайратга тушади. Ғазал ёзилган қофозини текширса, ўз жойида. Эртаси тонгда Паҳлавон Муҳаммад учтўрт кишини етаклаб келиб бу ғазални ўн икки йил бурун Абулқосим Бобур мажлисида «тинглаб, ёд олганини» исботлаш учун уларни гувоҳ қиласи. Улар ҳам бу ғазални ўша мажлисдан эшигтанмиз деб ғазални ёддан айтиб берадилар. Навоий эса янаям ҳайрон бўлади. Кейинчалик маълум бўладики, шу куни ёш шоирнинг либосларини тикаётуб Паҳлавон Муҳаммад янги ғазални топиб, ёд олади ва жойига қўяди. Сўнг эса биз юқорида кўриб ўтган ҳолатни уюштиради. Шундан сўнг Алишер Навоий беморлиқдан қутулади.

Бу ерда биз Паҳлавон Муҳаммаднинг беғубор ҳазилига гувоҳ бўлиш билан биргаликда оёғи боддан азият чекаётган Навоийнинг касалини даволаган ҳам дея оламиз. Чунки ўзи ёзган ғазални бошқа шоирга нисбат бериб ўқилганидан кейин Навоий бу ҳолатни таҳлил қилиб оёқ оғригини ҳам унутиб юборади. Бу эса оёқдаги касалликни бosh орқали чиқариб юборишдир, эҳтимол.

Навоий ва Паҳлавон Муҳаммад қирқ йил давомида дўсту ҳам-суҳбат бўладилар: «Қирқ йилга яқин бу фақир била мусоҳиби жоний, маҳрами рози пинҳоний эрди».

Навоий Паҳлавон Муҳаммаднинг вафот этганини чуқур алам ва ғам билан тасвирлайди. Бир куни Паҳлавон Муҳаммаднинг шогирдларидан бири унинг ахволи оғирлашиб колганини айтадилар. Навоий табиб юборади. Бир оздан сўнг, табиблар етиб боргунла-рича, Паҳлавоннинг вафот этгани тўғрисида хабар келади.

Паҳлавон Муҳаммад сulton Ҳусайн Бойқаро унинг учун атаб маҳсус қурдирган Ҳеъматободдаги даҳмага дафн этилади. Шоир унинг хотирасига бағишлиб ёзган таърихида Паҳлавоннинг вафо-

ти санаси «баъди Махдуми ба як сол»⁴² («Махдумдан бир йил кейин») жумласида аниқланади. Чунки Паҳлавон Муҳаммад махдуми нуран – Абдураҳмон Жомийдан бир йил ўтиб бу фоний дунёни тарк этган эди.

«Муншаот» асари Алишер Навоийнинг турли вақтда турли шахсларга йўллаган мактубларидан иборат тўплам бўлиб, мусулмон Шарқи иншо санъатининг туркий тилда яратилган юксак намуналаридан ҳисобланади. Мазкур асар устида адабиётшунос олимлар С.Ғаниева, Ю.Турсунов ва Қ.Эргашев илмий изланишлар олиб бориб, «Муншаот»нинг хос хусусиятларига доир тадқиқот ва мақолалар яратганлар.

Хусусан, Ю.Турсунов 2001 йилда «Муншаот»ни бугунги кун ўзбек тилига мослаб нашр эттириди.⁴³ Олим мазкур китобнинг сўзбошисида асарнинг ўзига хос хусусиятлари ҳақида тўхталиб, «Муншаот»ни нашрга тайёрлаш жараёнида асарнинг бир неча қўлёзма нусхалари қиёсан ўрганиб чиқилганини ва улар таркибидаги мактублар сон жиҳатдан фарқланишини таъкидлайди. Ю.Турсунов Санкт-Петербургдаги Давлат ҳалқ кутубхонасида 588-тартиб рақами билан сақланувчи «Муншаот» таркибида 60 та, бошқа кўплаб нусхаларда 90 та атрофида, ниҳоят, Алишер Навоийнинг ўзи тузган «Куллиёт»га киритилган «Муншаот»даги мактублар сони 104 та эканини маълум қиласди. Олим бу ҳолатни Алишер Навоийнинг мактублари турли даврларда яратилганлиги ва кейинроқ ёзилган хатлар асосида «Муншаот» таркиби тўлдириб борилганлиги билан изоҳлайди. Ю.Турсунов амалга оширган «Муншаот» нашри Истанбулдаги Тўпқопи саройи кутубхонасида 808-ракам остида сақланаётган Алишер Навоий асарлари куллиётининг қўлёзма нусхаси асосида бўлиб, мазкур нусхадаги «Муншаот» бошқаларига нисбатан тўлиқроқ ҳисобланади, яъни 107 мактубни ўз ичига олади.⁴⁴

Мусулмон Шарқида мактуб иншо санъатини ўзида намоён қилиб, унда мактуб битувчининг бадиий салоҳияти, нуктадонлиги,

⁴² Абжад ҳисобида бу сана 899 ҳижрий, 1493 милодий йил чиқади.

⁴³ Навоий Алишер. Муншаот: (Мактублар) / Изоҳли баён муаллифи Ю.Турсунов. – Тошкент: Маънавият, 2001 – Б.152.

⁴⁴ МАТнинг 14-жилдига киритилган «Муншаот» таркибида 103 та мактуб келтирилган.

сўзга ҳассослиги акс этган ва бу хатларда маҳсус ахборот етказишдан кўра чуқур мазмуннинг мавжудлиги устувор ҳисобланган. Алишер Навоий «Муншаот» муқаддимасида бу ҳақда тўхталиб, форсий тилда ёзилган мактублардаги жимжимадорлик, нозиклик, мазмунан теран байтларнинг туркий тилда битилган мактубларда мавжуд эмаслигини, аксинча, туркий тилдаги хатларнинг бадиийликдан ийроқ бўлганини таъкидлаб, турли шеърий парчалар билан безалган гўзал мактубларни туркий тилда ҳам ёзиш мумкинлигини исботлаш мақсадида ўз хатларини тўплаб, тақдим этаётганини маълум қиласди. Ҳақиқатан ҳам, Алишер Навоий «Муншаот»и таркибиға кирган мактублар моҳияти билан танишиш натижасида шу нарса маълум бўладики, ҳар бир мактубда турли бадиий санъатлар: ўхшатиш, истиора, ташбех, муболага ва сажъ усулидан жуда кўп ўринларда фойдаланилган. Бундан ташқари, деярли ҳар бир хатда Қуръон оятлари, ҳадислар, руబий, байт, маснавий, шеърий парчалар келтирилган бўлиб, улар хат юборилган инсонга фикрни янада таъсирчан тарзда етказишига хизмат қиласди.

Алишер Навоийнинг «Муншаот» асаридаги мактублар турли воқеа-ҳодисалар муносабати билан шоирнинг дўсти султон Ҳусайн Бойқарога, шаҳзодаларга ва бошқа шахсларга йўлланган бўлиб, улар мазмунан насиҳат, йўл-йўриқ кўрсатиш руҳидадир. Хатларда турли тарихий шахслар номлари, уларнинг ҳаёти билан боғлиқ ибратли жиҳатлар тилга олинниб, Алишер Навоий бу орқали мактуб йўлланайдиган одамни тўғри йўлга чақиради.

Умуман олганда, Алишер Навоийнинг «Муншаот» асари мусулмон Шарқи иншо санъатининг юксак намунаси бўлиш билан бирга ўз даврининг ижтимоий-сиёсий, маданий-маънавий ҳаёти ҳақида хабар берувчи мухим манба сифатида ҳам ғоят қимматлидир.

«Маҳбуб ул-қуслуб» («Кўнгилларнинг севгани») ҳазрат Навоийнинг умри поёнида ёзган сўнгги асари бўлиб, 1500 йилда яратилган. Асар ахлоқий-таълимий мазмунда, буюк мутафаккирнинг бой ҳаётий тажрибаси ва холосалари асосида яратилган, Навоийнинг ўзи бу ҳақда асар муқаддимасида шундай ёзади:

«...Бу наевъ асҳоб ва аҳбобга интибоҳ қилмоқ ва аларни бу наевъ ҳолатдин огоҳ қилмоқ вожиб кўрундики, ҳар тоиға хисолидин вуқуфлари ва ҳар табака аҳволидин шуурлари бўлганки, муно-

сиб эл хизматиға шитоб құлғайлар ва номуносиб эл суҳбатидин ижтиноң өзінде билгайлар ва бори эл била мағфий розларин сүзлашылар ва шаётин ва инс макру фирибдин бозий өмәгайлар. Ва ҳар нағы өлшемдегі суҳбат ва хусусиятику, аларга ҳавас бўлғай, бу фақирнинг тажрибаси аларға бас бўлғай».

«Махбуб ул-қулуб» асари 3 қисмга бўлинади. Биринчи қисм «Халойиқ аҳвол ва афъол ва аквонининг кайфияти» деб аталиб, 40 фаслни ўз ичига олади. Унда султонлардан тортиб дарвешларгача бўлган 49 ижтимоий табақа ва гурухларнинг тавсифи келтирилади. Навоий биринчи фаслда, аввалги асарларида бўлгани каби, ҳукмдор, энг аввало, адоплатли бўлиши керак деган масалани қўяди ва одил подшо Аллоҳнинг фуқарога юборган раҳматидир, унинг адоплати мамлакатга омонлик ва фаровонлик олиб келади дейди:

«Одил подшоҳ ҳақдин халойиққа раҳматдур ва мамоликка мујиби амният ва рафоҳият». Навоий ана шундай одил подшо сифатида султон Ҳусайн Бойқарони мадҳ этади:

Бори бенаволар наевосози ул.
Ҳамул наевъким, шоҳ Абулғози⁵ ул,
Келиб айни инсону инсони айн.
Жаҳон вориси шоҳ султон Ҳусайн
Ки, то бўлса гардунга давворлиқ,
Анга боқий ўлсун жаҳондорлиқ.

Шунингдек, биринчи қисмда вазирлар, ноиблар, муфтийлар, котиблар, табиблар, шоирлар, дәхқонлар каби турли тоифа вакиллари таърифлари ҳам келтирилганки, бу фикрлар бугунги кун учун ҳам ибратли бўлиб, жамият кишилари учун дастуриламал бўла олади.

Асарнинг 10 бобдан иборат иккинчи қисми «Ҳамида афъол ва замима хисол хосиятида» деб номланиб, ахлоқий масалаларга бағишинланган. Мазкур қисм «Ҳайрат ул-аброр» достони сингари муайян ахлоқий масаланинг тавсифи ва унга илова қилинган ҳикоят баёнидан иборат. Ҳусусан, биринчи фасл «Тавба зикрида» деб аталган. Маълумки, тавба тасаввуф мақомларидан биринчиси бўлиб, бунда солик Ҳаққа етишиш йўлида ғов бўладиган жамики нарсалардан юз ўгиришга қатъий жазм қиласи, бутун

интилиши, таважжухини Аллоҳга қаратади, аввалги ҳаёт тарзи-дан бутунлай воз кечади. Навоий тавбага таъриф бериб шундай ёзади:

«Тавба мужрим банданинг вақти кўзгусин исён зангидин оритур ва ниёз мусқили билан ёритур... Бу мартааба тариқат аҳли-нинг аввалғи гомидур ва мақсад водийисининг аввалги манзилиға ҳомийдур...».

Таърифдан сўнг Навоий тавба мақоми билан боғлиқ ҳикоят келтиради. Ҳикоятга кўра, буюк шайх Абдулло Муборак (ваф. 171/787 – 788) бир канизак ишқига гирифттор бўлади. Қиши кечаларидан бирида тонгга қадар маъшуқа девори остида туради. Қор ва совуқда қолади. Саҳар намози азонини хуфтон деб ўйлайди. Ўзига келгач дейди: – Эй Муборакнинг номуборак ўғли, сенга уят эмасми? Агар имом намозда узунроқ суро қироат қилса, толикардинг. Энди нафсинг ҳавосига тонг отқунча мундоғ азоб тортарсен». Шундан сўнг Абдуллоҳ Муборак тавба қилиб, сулукка берилади.

Шунингдек, мазкур қисмда яна зухд, таваккул, қаноат, сабр, тавозуъ ва адаб, зикр, таважжуҳ, ризо, ишқ каби ахлоқий масалалар таърифи ва уларга илова қилинган ҳикоятлар баёни ҳам келтирилган.

Асарнинг учинчи қисми «Мутаффариқа фавойид ва амсол сурати» деб аталиб, турли фойдали пандлар ва ҳикматларни ўз ичига олади. Асарда улар «танбех» номи билан аталиб, жами 127 та танбех келтирилган. Танбехларнинг аксарияти ҳадислар мазмуни билан уйғунлик касб этади. Хусусан, 30-танбех:

«Сизлардан ҳеч бирингиз ўзига раво кўрган нарсасини биродарига раво кўрмагунча чин мўъмин бўлолмайди» ҳадисига мазмунан яқинлигини кўриш мумкин:

«Ҳар кимки бирор билан ёрдур ёки ёрлиғ даъвийси бордур, керакким ўзига раво тутмогонни ёрига раво тутмаса, кўп нимаким. ўзига ҳам раво тутмаса, анга тутмаса. Бас машаққатким, андин руҳфа алам етар, киши ани ўз жисму жонига тажвиз этар. Аммо ани ёрига тахайюл қила олмас, агар тахайюл қилса, веҳшатидин ҳаёти қолмас.

Қитъа:

*Ёр улдурки, ҳар нечаким ўзига
Истамас. ёрига ҳам истамагай.*

Үзи истарки, ёр учун үлгай,
Ани мунда шарик айламагай.

Алишер Навоийнинг «Маҳбуб ул-қулуб» асари бадиий жиҳатдан ҳам юксак савияга эга. Асарда қўлланилган сажъ (насрин қофия) усули асарга мусикий оҳанг бағишлаб, унинг таъсиричанлиги ва бадиий жозибасини оширган. Асарда келтирилган кичик ҳажмли ҳикоялар, шеърий парчалар, мақоллар қўйилган масалаларга якун ясаш, «қиссадан ҳисса» чиқариш вазифасини бажарган. Умуман олганда, Навоийнинг мазкур асари буюк мутафаккир мөросининг муҳим ва қимматли ёдгорлиги бўлиб, XV асрдан кейинги бадиий наср тараққиётига самарали таъсир кўрсатди.

Таянч тушунчалар

- тарихшунослик
- анбиё
- ҳукамо
- мурсалин
- вахий
- Қуръон қиссалари
- Ажам
- тарихий манбалар
- муаррих
- суполалар
- ҳолот
- ёднома асарлар
- жомийшунослик
- сарф
- наҳв
- таърих илми
- риндолар шоҳи
- азизлар хазираси
- иншо санъати
- табақалар
- Ҳаққа етишиш
- танбех

Савол ва топшириқлар:

1. Алишер Навоийнинг «Тарихи анбиё ва ҳукамо» асари бош манбаси сифатида қайси манбаларни кўрсата оласиз?
2. «Тарихи анбиё ва ҳукамо» таркибидаги қиссалардан шоир қандай фалсафий хуносалар чиқаради?
3. «Тарихи анбиё ва ҳукамо» асарининг маънавий-маърифий жиҳатдан бугунги кундаги аҳамияти қайси ўринларда намоён бўлади деб ўйлайсиз?
4. «Тарихи мулуки Ажам» асари учун асос бўлган манбаларни санаб беринг.
5. «Тарихи мулуки Ажам» асарида келтирилган суполалар

тарихига оид маълумотлар Алишер Навоийнинг яна қайси асарида учрайди?

6. «Тарихи мулук Ажам» асарини Алишер Навоийнинг сulton Ҳусайн Бойқаро тарихини ёртишига багишланган асарнинг бир қисми деган қарашга муносабат билдира оласизми?

7. «Хамсат ул-мутаҳайирин» асари таркиби, унда келтирилган маълумотлар ҳақида тўхталинг.

8. Алишер Навоий «Хамса»си достонлари муқаддималарида берилган Абдураҳмон Жомий билан боғлиқ маълумотларни «Хамсат ул-мутаҳайирин»даги маълумотлар билан қиёслаб таҳлил этинг.

9. «Ҳолоти Сайид Ҳасан Ардашер» асарида Алишер Навоий нима учун Сайид Ҳасан Ардашерни «комил инсон» сифатида тасвирлаган?

10. «Ҳолоти Паҳлавон Муҳаммад» асари асосида Алишер Навоийнинг Паҳлавон Муҳаммад билан бўлган муносабатлари хусусида тўхталинг.

11. «Муншаот» асарининг мазмун-моҳияти ва мусулмон Шарқидаги инишо санъати хусусида фикр билдиринг.

12. «Маҳбуб ул-қулуб» асарининг инсон маънавий дунёси тарбиясидаги аҳамиятини қай даражада деб баҳолайсиз?

Адабиётлар:

1. Навоий Алишер. Маҳбуб ул-қулуб. Муншаот. Муқаммал асарлар тўплами. 20 жилдлик. 14-жилд. – Тошкент: Фан, 1998. – Б.5 – 230.

2. Навоий Алишер. Хамсат ул-мутаҳайирин. Ҳолоти Сайид Ҳасан Ардашер. Ҳолоти Паҳлавон Муҳаммад. Муқаммал асарлар тўплами. 20 жилдлик. 15-жилд. – Тошкент: Фан, 1999. – Б.7 – 122.

3. Навоий Алишер. Тарихи анбиё ва ҳукамо. Тарихи мулук Ажам. МАТ. 20 жилдлик. – Тошкент: Фан, 2000. 16-жилд. – Б.99 – 260.

4. Маҳбуул-қулуб / Насрий баён муаллифи И.Махсумов. – Тошкент: Адабиёт ва санъат, 1983.

5. Муншаот (Мактублар) / Изоҳли баён муаллифи Ю.Турсунов. – Тошкент: Маънавият, 2001.

6. Алишер Навоий ижодий ва маънавий меросининг оламшумул аҳамияти (халқаро илмий-назарий анжуман материаллари). – Тошкент: O'zbekiston, 2011.
7. Комилов Н. Тасаввубуф. – Тошкент: Movarounnahr – O'zbekiston, 2009.
8. Қаюмов А. Дилкушо тақрорлар ва руҳафзо ашъорлар. – Тошкент: MUMTOZ SO'Z, 2011.
9. Ўзбек адабиёти тарихи. Беш жилдлик. 2-жилд (XV асрнинг иккинчи ярми). – Тошкент: Фан, 1977.

ФОЙДАЛАНИЛГАН АДАБИЁТЛАР РЎЙХАТИ

Манбалар:

1. Аёзий Мирзо Муҳаммад Ҳайдар. Тарихи Рашидий. – Тошкент: O'zbekiston, 2011. – 704 б.
2. Атоуллоҳ Ҳусайнин. Бадойиъ ус-санойиъ / Форсчадан А.Рустамов таржимаси. – Тошкент: Адабиёт ва санъат, 1981. – 398 б.
3. Бобур Захириддин. Бобурнома / Ҳозирги ўзбек тилига Ваҳоб Раҳмонов ва Каромат Муллаҳўжаева табдили. – Тошкент: O'qituvchi, 2008. – 288 б.
4. Бобир Захириддин. Мухтасар / Нашрга тайёрловчи С.Ҳасанов. – Тошкент: Фан, 1971. – 413 б.
5. Бойқаро Ҳусайн. Рисола: Девон. – Тошкент: Шарқ, 1995. – 160 б.
6. Восифий Зайниддин. Бадоеъул вақоєъ – Нодир воқеалар / Форсийдан Н.Норқулов таржимаси. – Тошкент: Адабиёт ва санъат, 1979. – 216 б.
7. Жомий Абдураҳмон. Лайли ва Мажнун. Саломон ва Абсол / Масъул муҳаррир ва сўзбоши муаллифи А.Қаюмов. – Тошкент: Адабиёт ва санъат, 1989. – 224 б.
8. Навоий Алишер. Айёми висол ўлди яна: Янги топилганд ғазаллар / Нашрга тайёрловчи Ф.Сулаймонова. – Тошкент: Адабиёт ва санъат, 1995.
9. Навоий Алишер. Ҳазойинул маоний / Илмий-танқидий текст асосида нашрга тайёрловчи Ҳ.Сулаймонов. 4 жилдлик. 1 – 4-жилдлар. – Тошкент: Фан, 1959 – 1960.
10. Навоий Алишер. Бадоеъ ул-бидоя. МАТ. 20 жилдлик. – Тошкент: Фан, 1987. Т.1. – 723 б.
11. Навоий Алишер. Наводир ун-ниҳоя. МАТ. 20 жилдлик. – Тошкент: Фан, 1987. Т.1. – 620 б.
12. Навоий Алишер. Ҳазойин ул-маоний. Ғаройиб ус-сиғар. МАТ. 20 жилдлик. – Тошкент: Фан, 1988. Т.3. – 616 б.
13. Навоий Алишер. Ҳазойин ул-маоний. Наводир уш-шабоб. МАТ. 20 жилдлик. – Тошкент: Фан, 1989. Т.4. – 557 б.
14. Навоий Алишер. Ҳазойин ул-маоний. Бадоеъ ул-васат. МАТ. 20 жилдлик. – Тошкент: Фан, 1990. Т.5. – 541 б.

15. Навоий Алишер. Ҳазойин ул-маоний. Фавойид ул-кибар. МАТ. 20 жилдлик. – Тошкент: Фан, 1990. Т.6. – 568 б.
16. Навоий Алишер. Ҳайрат ул-аброр. МАТ. 20 жилдлик. – Тошкент: Фан, 1991. Т.7. – 392 б.
17. Навоий Алишер. Фарҳод ва Ширин. МАТ. 20 жилдлик. – Тошкент: Фан, 1991. Т.8. – 544 б.
18. Навоий Алишер. Лайли ва Мажнун. МАТ. 20 жилдлик. – Тошкент: Фан, 1992. Т.9. – 356 б.
19. Навоий Алишер. Сабъаи сайёр. МАТ. 20 жилдлик. – Тошкент: Фан, 1992. Т.10. – 448 б.
20. Навоий Алишер. Садди Искандарий. МАТ. 20 жилдлик. – Тошкент: Фан, 1993. Т.11. – 640 б.
21. Навоий Алишер. Лисонут-тайр. МАТ. 20 жилдлик. – Тошкент: Фан, 1996. Т.12. – 326 б.
22. Навоий Алишер. Мажолис ун-нафоис. МАТ. 20 жилдлик. – Тошкент: Фан, 1997. Т.13. – 284 б.
23. Навоий Алишер. Маҳбуб ул-қулуб, Муншаот. Вақфия. МАТ. 20 жилдлик. – Тошкент: Фан, 1998. Т.14. – 303 б.
24. Навоий Алишер. Ҳамсат ул-мутаҳайирин. Ҳолоти Сайийд Ҳасан Ардашер. Ҳолоти Паҳлавон Муҳаммад. Назм ул-жавоҳир. МАТ. 20 жилдлик. – Тошкент: Фан, 1999. – Т.15. – 236 б.
25. Навоий Алишер. Муҳокамат ул-луғатайн. Мезон ул-авзон. Тарихи анбиё ва ҳукамо. Тарихи мулуки Ажам. Арбаъин. Сирож ул-муслимин. Муножот. Рисолаи тийр андохтан. МАТ. 20 жилдлик. – Тошкент: Фан, 2000. Т.16. – 336 б.
26. Навоий Алишер. Насойим ул-муҳаббат. МАТ. 20 жилдлик. – Тошкент: Фан, 2001. Т.17. – 519 б.
27. Навоий Алишер. Девони Фоний. МАТ. 20 жилдлик. – Тошкент: Фан, 2002. Т.18. – 551 б.
28. Навоий Алишер. Девони Фоний (Давоми). МАТ. 20 жилдлик. – Тошкент: Фан, 2002. Т.19. – 600 б.
29. Навоий Алишер. Девони Фоний (Давоми): Қасидалар, муфрадот, иловалар. МАТ. 20 жилдлик. – Тошкент: Фан, 2003. Т. 20. – 567 б.
30. Навоий Алишер. Ҳайратул-аброр (насрий баёни билан) / Тахрир ҳайъати А.Қаюмов ва бошқ. – Тошкент: Адабиёт ва санъат, 1989. – 352 б.
31. Навоий Алишер. Фарҳод ва Ширин (насрий баёни билан) /

- Таҳрир ҳайъати А.Қаюмов ва бошқ. – Тошкент: Адабиёт ва санъат, 1989. – 246 б.
32. Навоий Алишер. Лайли ва Мажнун / насрый баён муаллифлари В.Раҳмонов, Н.Норқулов. – Тошкент: Адабиёт ва санъат, 1990. – 365 б.
33. Навоий Алишер. Сабъаи сайёр (насрый баёни билан) / Таҳрир ҳайъати А.Қаюмов ва бошқ. – Тошкент: Адабиёт ва санъат, 1991. – 544 б.
34. Навоий Алишер. Садди Искандарий (насрый баёни билан) / Таҳрир ҳайъати А.Қаюмов ва бошқ. – Тошкент: Адабиёт ва санъат, 1991. – 832 б.
35. Лисонут тайр (насрый баёни билан) / Таҳрир ҳайъати А.Қаюмов ва бошқ. – Тошкент: Адабиёт ва санъат, 1991. – 464 б.
36. Navoiy Alisher. Hayrat ul-abror (nasriy bayoni bilan). – Toshkent: G'.G'ulom, 2006.
37. Navoiy Alisher. Farhod va Shirin (nasriy bayoni bilan). – Toshkent: G'.G'ulom, 2006.
38. Navoiy Alisher. Layli va Majnun (nasriy bayoni bilan). – Toshkent: G'.G'ulom, 2006.
39. Navoiy Alisher. Sab'ai sayyor (nasriy bayoni bilan). – Toshkent: G'.G'ulom, 2006.
40. Navoiy Alisher. Saddi Iskandariy (nasriy bayoni bilan). – Toshkent: G'.G'ulom, 2006.
41. Navoiy Alisher. Lison ut-tayr (nasriy bayoni bilan). – Toshkent: G'.G'ulom, 2005.
42. Навоий Алишер. Маҳбуб ул-қулуб: Қалблар севгилиси / Масъул муҳаррир ва сўз боши муаллифи С.Фаниева. – Тошкент: Адабиёт ва санъат, 1983. – 111 б.
43. Навоий Алишер. Муншаот / Изоҳ баён муаллифи Ю.Турсунов. – Тошкент: Маънавият, 2001. – 152 б.
44. Самарқандий Давлатшоҳ. Шоирлар бўstonи («Тазкират ушшуаро»дан). – Тошкент: Адабиёт ва санъат, 1967. – 224 б.
45. Хондамир Гиёсиддин бинни Ҳумомиддин. Макорим ул-ахлоқ. – Тошкент: Адабиёт ва санъат, 1981. – 136 б.
46. Шайх Аҳмад ибн Ҳудойдор Тарозий. Фунун ул-балога. – Тошкент: Хазина, 1996. – 212 б.

Илмий-назарий адабиётлар:

1. Абдуғафуров А. «Хазойин ул-маоний»дан четда қолган ғазаллар // Навоийнинг ижод олами (мақолалар тўплами). – Тошкент: Фан, 2001.
2. Акбарова М. Алишер Навоий ғазалларида қофия: Филол. фан. номз... дис. автореф. – Тошкент, 1997. – 20 б.
3. Алиев Г. Ю. Темы и сюжеты Низами в литературах народов Востока. – М.: Наука, 1985. – 366 б.
4. Алишер Навоий: 1441 – 1501 йил. Адабиётлар кўрсаткичи / Туз. З.Бердиева, А.Туропова. – Тошкент, 1991.
5. Алишер Навоий. Ғазаллар. Шарҳлар. – Тошкент: Камалак, 1991.
6. Алишер Навоий «Хамса»си (мақолалар тўплами): Тадқиқотлар.– Тошкент: Фан, 1970.
7. Алишер Навоий ижодий ва маънавий меросининг оламшумул аҳамияти (халқаро илмий-назарий анжуман материаллари). – Тошкент: O'zbekiston, 2011. – 176 б.
8. Араслы Н.Г. Ариф Ардебили и его поэма «Фархаднаме»: Афтореф. дис... канд. филол. наук. – Баку, 1969. – 27 с.
9. Араслы Н. Г. Низами ва турк эдебияти. – Баку: Элм, 1980. – 206 с.
10. Афсаҳзод Аълоҳон. Лирика Абд ар-Рахмана Джами. Проблемы текста и поэтики. – М.: Наука, 1988. – 326 с.
11. Аҳмедов Т. Алишер Навоийнинг «Лайли ва Мажнун» достони.– Тошкент: Фан, 1970. – 140 б.
12. Бартольд В.В. Мир Али Шир и политическая жизнь. Сочин. В IX томах. – М.: Наука, 1964. Т. II. Ч.2.
13. Бертельс Е.Э. Низами. Творческий путь поэта. – М.: Наука, 1956.
14. Бертельс Е.Э. История персидско-таджикской литературы. – М.: Наука, 1960. – 554 с.
15. Бертельс Е.Э. Избранные труды. Низами и Физули. – М.: Наука, 1962. – 552 с.
16. Бертельс Е.Э. Избранные труды. Навои и Джами. – М.: Наука, 1965. – 500 с.

17. Бертельс Е.Э. Суфизм и суфийская литература. – М.: Наука, 1965.
18. Бертельс Е.Э. Избранные труды. История литературы и культуры Ирана. – М.: Наука, 1988. – 560 с.
19. Валихўжаев Б. Ўзбек адабиётшунослиги тарихи. – Тошкент: Ўзбекистон, 1993. – 191 б.
20. Vohidov R., Eshonqulov H. O'zbek mumtoz adabiyoti tarixi. – Toshkent: O'zYU Adabiyot jamg'armasi nashriyoti, 2006.
21. Жумахўжа Н. Сатрлар силсиласидаги сеҳр. – Тошкент: Ўқитувчи, 1996.
22. Зоҳидов Л. «Девони Фоний» бадииятига доир мулоҳазалар // Адабиёт кўзгуси. – Тошкент, 2010. – №10.
23. Имомназаров М. Ҳақиқат ва мажоз (2 – 3-мақолалар) // Шарқ юлдузи. – Тошкент, 1989. – №4; 1991. – №4.
24. Исҳоқов Ё. Сўз санъати сўзлиги. – Тошкент: Зарқалам, 2006. – 128 б.
25. Исҳоқов Ё. Навоий поэтикаси. – Тошкент: Фан, 1983. – 168 б.
26. Комилов Н. Маънолар оламига сафар. – Тошкент: TAMADDUN, 2012. – 316 б.
27. Комилов Н. Фақр нури порлаган қалб (Алишер Навоийнинг форсий қасидалари). – Тошкент: Маънавият, 2001.
28. Комилов Н. Тасаввуф. – Тошкент: Movarounnahr – O'zbekiston, 2009. – 448 б.
29. Конрад Н.И. Запад и Восток (статьи). – М.: Восточная литература, 1972. – 496 с.
30. Литературный энциклопедический словарь / Под общей редакции В.М.Кожевникова и П.А.Николаева. – М.: Советская энциклопедия, 1987. – 752 с.
31. Мамадалиева З. «Лисон ут-тайр» достонидаги рамзий образлар тизими. Филол. фан. номз... дисс. – Тошкент, 2011. – 26 б.
32. Мирзаев С. Навоий арузи. Филол. фан. номз... дисс. автореф. – Тошкент, 1946.
33. Мухиддинов М. Алишер Навоий ва унинг салафлари ижодида инсон концепцияси («Хамса»ларнинг биринчи достонлари асосида). Филол. фан. докт... дис. автореф. – Тошкент, 1995. – 60 б.

34. Муҳиддинов М. Комил инсон – адабиёт идеали. – Тошкент: Маънавият, 2005. – 208 б.
35. Нарзуллаева С.Н. Тема «Лейли и Меджнун» в истории литературы народов Советского Востока: Афтореф. дисс... док. филол. наук. – Баку, 1980. – 49 с.
36. Олимов М. Рисолай аруз. – Тошкент: Ёзувчи, 2002. – 88 б.
37. Олимов С. Ишқ, ошиқ ва маъшуқ. – Тошкент: Адабиёт ва санъат, 1992. – 80 б.
38. Рахимов Ж. Жанр автобиографии (хасби хол) в «Пятерице» Алишера Навои: Афтореф. дисс... канд. филол. наук. – Ташкент, 1991. – 20 с.
39. Расулов А. Илми ғарифани қўмсаб... – Тошкент: Маънавият, 1998. – 64 б.
40. Раҳмонов В. Шеър санъатлари. – Ленинобод, 1972. – 180 б.
41. Рустамов А. Навоийнинг бадиий маҳорати. – Тошкент: Адабиёт ва санъат, 1979. – 216 б.
42. Сирожиддинов Ш. Навоий замондошлари эътирофида. – Самарқанд: Зарафшон, 1996. – 65 б.
43. Сирожиддинов Ш.С. Алишер Навоий ҳаёти ва фаолиятига оид XV – XIX асрларда яратилган форс-тожик манбалари (қиёсий-типологик, текстологик таҳлил). Филол. фан. докт... дисс. автореф. – Тошкент, 1998. – 45 б.
44. Сирожиддинов Ш. Алишер Навоий: манбаларнинг қиёсий-типологик, текстологик таҳлили. – Тошкент: Akademnashr, 2011. – 326 б.
45. Стеблева И.В. Ритм и смысл в классической тюркоязычной поэзии. – М.: Наука, 1993. – 180с .
46. Султон Иззат. Навоийнинг қалб дафтари. – Тошкент: Адабиёт ва санъат, 1973.
47. Султон И. Адабиёт назарияси. – Тошкент: Ўқитувчи, 1980. – 392 б.
48. Sulton I. Adabiyot nazariyasi. – Toshkent: O'qituvchi, 2005. – 272 b.
49. Хасанов С. Роман о Бахраме. – Ташкент: Литература и искусства, 1988. – 208 с.
50. Шарипов Ш. Алишер Навоий «Лисонут тайр» достонининг

- генезиси ва ғоявий-бадиий хусусиятлари. – Тошкент: Фан, 1982. – 96 б.
51. Шарипов Ш. «Лисонуттайр» ҳақиқати. – Тошкент: Маънавият, 1998. – 160 б.
52. Шарқ мумтоз поэтикаси: Манба ва талқинлар / Нашрга тайёрловчи, талқин ва шарҳлар муаллифи Ҳ.Болтабоев. – Тошкент: ЎзМЭ, 2006. – 430 б.
53. Шомухамедов Ш.М. Форс-тоҷик адабиёти тарихидан қисқача курс: Ўқув қўлланма. – Тошкент: ТошДУ, 1987. – 110 б.
54. Эркинов А.С. Алишер Навоийнинг пейзаж яратиш маҳорати («Садди Искандарий» достони мисолида). Филол. фан. номз... дисс. – Тошкент, 1990. – 121 б.
55. Эркинов А.С. Алишер Навоий «Хамса»си талқинининг XV – XX аср манбалари. Филол. фан. докт.. дисс. – Тошкент, 1998. – 220 б.
56. Эркинов А.С. Источники интерпретации «Хамса» Алишера Навои в XV – XX вв. Афтореф. дисс... док. филол. наук. – Ташкент, 1998. – 52 с.
57. Эркинов А.С. Подражательность или оригинальность: оценка В.В.Бартольдом узбекской классической литературы // Русская диаспора в Узбекистане: время, события, люди. Материалы научной конференции. – Ташкент, 2009. – С.72 – 78.
58. Эркинов С. Навоий «Фарҳод ва Ширин»и ва унинг қиёсий таҳлили. – Тошкент, 1971. – 276 б.
59. Эркинов С. Шарқ адабиётида Фарҳод қиссаси. – Тошкент: Фан, 1985. – 64 б.
60. Эркинов С., Ғанихонов М. Низомий Ганжавий. – Тошкент: Фан, 1992. – 68 б.
61. Эркинов А. Навоийнинг мухлислари томонидан тузилган яна бир девони // Ўзбек тили ва адабиёти. – Тошкент: Фан, 2012. – №1.
62. Юсупова Д., Куронов С. Навоийнинг форсий қасидалари // Жаҳон адабиёти. – Тошкент, 2011. – №1.
63. Юсупова Д. Алишер Навоий «Хамса»сида мазмун ва ритмнинг бадиий уйғунлиги. – Тошкент: MUMTOZ SO‘Z , 2011. – 144 б.
64. Ўзбек адабиёти тарихи. Беш жилдлик. Ж.2 (XV асрнинг иккинчи ярми). – Тошкент: Фан, 1977. – 460 б.

65. Қаюмов А. Нодир саҳифалар. Навоийнинг кам ўрганилган баъзи асарлари тўғрисида. -- Тошкент: Фан, 1991. – 144 б.
66. Қаюмов А. «Ҳайрат ул-аброр» талқини. – Тошкент: Адабиёт ва санъат, 1985.
67. Қаюмов А. Ишқ водийси чечаклари: А.Навоий ижоди ҳақида. – Тошкент: Адабиёт ва санъат, 1985. – 256 б.
68. Қаюмов А. «Садди Искандарий». – Тошкент: Адабиёт ва санъат, 1975. – 196 б.
69. Фаниева С. Алишер Навоий: Ҳаёти ва ижоди / Масъул муҳаррир А.Қаюмов. – Тошкент: Фан, 1968. – 148 б.
70. Фаниева С. Алишер Навоийнинг прозаик асарлари. – Тошкент: Ўзбекистон, 1981. – 37 б.
71. Фаниева С. Алишер Навоий: Ҳаёти ва ижоди / Масъул муҳаррир А.Қаюмов. – Тошкент: Фан, 1968. – 148 б.
72. Фаниева С. Алишер Навоийнинг прозаик асарлари. – Тошкент: Ўзбекистон, 1981. – 37 б.
73. Фаниева С. Навоий ёдга олган асарлар. – Тошкент, 2009.
74. Қуронов Д. Адабиётшуносликка кириш. – Тошкент: Фан, 2007. – 227 б.
75. Ҳайитметов А. Навоийхонлик суҳбатлари. – Тошкент: Ўқитувчи, 1993. – 216 б.
76. Ҳайитметов А. Темурийлар даври ўзбек адабиёти. – Тошкент: Фан, 1996. – 160 б.
77. Ҳасанов С. Бобирнинг «Аруз рисоласи» асари. – Тошкент: Фан, 1981. – 96 б.
78. Ҳасанов С. Навоийнинг 7 тухфаси. – Тошкент: Адабиёт ва санъат, 1991. – 192 б.
79. Ҳаққулов И. Тасаввуф ва шеърият. – Тошкент: Адабиёт ва санъат, 1991. – 184 б.
80. Ҳаққулов И. Камол эт касбким. – Тошкент: Чўлпон, 1991. – 240 б.
81. Ҳаққулов И. Навоийга қайтиш. – Тошкент: Фан, 2007. – 224 б.
82. Ҳожиаҳмедов А. Ўзбек арузи луғати. – Тошкент: Шарқ, 1998. – 224 б.
83. Ҳожиаҳмедов А. Шеърий санъатлар ва мумтоз қофия. – Тошкент: Шарқ, 1998. – 158 б.

84. Ҳожиаҳмедов А. Мумтоз бадиият малоҳати. – Тошкент: Шарқ, 1999. – 240 б.

85. Ҳожиаҳмедов А. Навоий арузи нафосати. – Тошкент: Фан, 2006. – 288 б.

86. Ҳожиаҳмедов А. Ҳусни таълил санъати. – Тошкент: Фан, 2006. – 288 б.

<http://www.referun.com/n/issledovanie-zhizni-i-tvorchestva-alisher-navoi-v-zapadnoevropeyskom-vostokovedenii#ixzz2HOWXH4iO>

<http://www.payam-aftab.com/en/news/3094/Ali-Shir-Nava%27i>

НАВОИЙ ҲАЁТИ, ИЖОДИ ЧИЗМА ВА ЖАДВАЛЛАРДА



Юртимизда навоийшуносликнинг ривожланиши

Истиқолгача бўлган навоийшунослик

Абдурауф Фитрат. «Навоийнинг форсий шоирлиги ҳам унинг форсий девони тўғрисида» («Маориф ва ўқитучи» журн., 1925), «Фарҳоду Ширин» достони тўғрисида» («Аланга» журн., 1930). «Хамса»нинг қисқартирилган варианти (Садриддин Айний, 1939). Олим Шарафиддинов. «Алишер Навоий». 1939. М.Шайхзода. «Гениал шоир». 1940. В.Абдулаев. «Навоийнинг Самарқандаги ҳаёти ва фаолияти ҳақида». 1940. А.Боровков. Е.Э.Бертельс. Х.Олимжон. Х.Зариф. О.Усмонов. М.Шайхзода ва бошқа олимларнинг илмий мақолаларини ўз ичига олган тўплам – «Родоначальник узбекской литературы». 1940.

«Хамса»нинг мукаммал нашри (Порсо Шамсиев, 1960). «Хазойин ул-маоний»нинг академик нашри (Ҳамид Сулаймонов, 1959 – 1960). Алишер Навоий. «Асарлар»и 15 томлиги, «Алишер Навоий: 1441 – 1501 йил. Адабиётлар кўрсаткичи» (1991). 20 жилдлик «Мукаммал асарлар туплами» (1987 – 2003). П.Шамсиев, Н.Маллаев. В.Зоҳидов. И.Султон, Ҳ.Сулаймонов, А.Қаюмов. С.Ғаниева, А.Рустамов, А.Ҳайитметов, А.Абдуғафуров, С.Эркинов, Б.Валихўжаев, Е.Исҳоқов, Н.Комилов, Р.Воҳидов, М.Ҳакимов. Л.Зоҳидов каби олимлар навоийшунослик тараққиетига алоҳида ҳисса қўшдилар

Истиқолол давридаги н

Тадқиқотлар: И.Ҳақкулов. «Ят», 1991; С.Ҳасанов. «Навоийн М.Муҳиддинов. «Икки олам ёғудуси «Алишер Навоийнинг адабиёти»; «Темурийлар даври ўзбек адабиёти»; «Буюк бешлик сабоқлари», 1991; Навоийнинг ижод мактабих, 1993; илоҳиёт», 1994; Н.Комилов. ««Маънолар оламига сафар»; С.Навоий», 1996; Н.Жумәев. «Сатрі», 1996; А.Ҳожиаҳмедов. «Навоий А.Қаюмов. «Дилкушо тақрорлар Ш.Сироҳиддинов. «Алишер Навоийн типологик, текстологик таҳлили»,

Диссертацион ишлар: М.Ҳамид Садди Искандарий» достонини ва матний тадқиқи» (1994); Навоий ва унинг салафлари цияси» («Хамса»ларнинг биринчи», 1995). Қ.Эргашев. «Ўзбек насрини «Муншаот»и мисолида, 1996); Навоий газалларида қофия». 1996; Навоий «Хамса»си талқинининг ри», 1998; К.Муллахўжаева. «Алишер Навоий шуносликнинг тарзи», 1998; З.Мамадалиева. «Алишер Навоийн достонидаги рамзий образлар ти

1-илюза

**1987 – 2003 йилларда чоп этилган Алишер Навоий
«Муқаммал асарлар тўплами»нинг тўлиқ рўйхати**

Жилд рақами	Жилд таркибидағи асарлар
1-жилд	«Бадойиъ ул-бидоя», девон.
2-жилд	«Наводир ун-ниҳоя», девон.
3-жилд	«Гаройиб ус-сиғар», девон.
4-жилд	«Наводир уш-шабоб», девон.
5-жилд	«Бадойиъ ул-васат», девон.
6-жилд	«Фавойид ул-кибар», девон.
7-жилд	«Ҳайрат ул-аброр», достон.
8-жилд	«Фарҳод ва Ширин», достон.
9-жилд	«Лайли ва Мажнун», достон.
10-жилд	«Сабъаи сайёр», достон.
11-жилд	«Садди Искандарий», достон.
12-жилд	«Лисон ут-тайр», достон.
13-жилд	«Мажолис ун-нафоис».
14-жилд	«Маҳбуб ул-қулуб», «Муншашот», «Вақфия».
15-жилд	«Девони Фоний» (давоми), «Муфрадот», Иловалар.
16-жилд	«Муҳокамат ул-пуғатайн», «Мезон ул-авзон», «Тарихи анбиё ва ҳукамо», «Тарихи мулуки Ажам», «Арбайин», «Сирож ул-муслимин», «Муножот», «Рисолаи тийр андохтан».
17-жилд	«Насойим ул-муҳаббат».
18-жилд	«Девони Фоний», ғазаллар
19-жилд	«Девони Фоний», ғазаллар (давоми).
20-жилд	«Девони Фоний» (давоми), «Муфрадот», Иловалар.

2-илова

**2011 йилда чоп этилган Алишер Навоий
10 жилдлигининг тўлиқ рўйхати**

Жилд рақами	Жилд таркибидағи асарлар
1-жилд	«Ғаройиб ус-сиғар»
2-жилд	«Наводир уш-шабоб»
3-жилд	«Бадоев ул-васат»
4-жилд	«Фавойид ул-кибар»
5-жилд	«Девони Фоний»; «Қасоид»; «Муфрадот»; «Ҳамсат ул-мутаҳайирин»
6-жилд	«Ҳамса»; «Ҳайрат ул-аброр»; «Фарҳод ва Ширин»
7-жилд	«Лайли ва Мажнун»; «Сабъаи сайёр»
8-жилд	«Садди Искандарий»; «Тарихи анбиё ва ҳукамо»; «Тарихи мулуки Ажам»
9-жилд	«Лисон ут-тайр»; «Мажолис ул-нафоис»; «Маҳбуб ул-кулуб»; «Муншаот»; «Вақфия»
10-жилд	«Ҳолоти Сайид Ҳасан Ардашер»; «Ҳолоти Пахлавон Муҳаммад»; «Назим ул-жавоҳир»; «Насойим ул-муҳаббат»; «Муҳокамат ул-лугатайн»; «Мезон ул-авзон»; «Арбаъин»; «Сирож ул-муслимин»; «Муножот»

Алишер Навоий ҳасби ҳоли масалалари. Ҳаётига доир муҳиммийтлар

1441 йил 9 февралда Амир Темурнинг ўғли Шоҳрух мирзо хуқмронлиги даврида Ҳиротда туғилди. Бу сана ҳижрий 844 йил рамазон ойининг 17-кунини, товуқ ӣилига тӯғри келади («Макорим ул-ахлоқ»).

1445 йил мактабга боради ва шаҳзода Ҳусайн билан бирга ўқиди.

1447 йил Шоҳрух мирзо вафот этади ва Алишерлар оиласи Ироқча кўчади. Алишер Тафт шахрида Шарафиддин Али Яздий билан учрашиди. улғ олим ёш Алишерни дуо қиласиди.

1451 йил га Абулқосим Бобур чиқа Фиесиддин Синни олиб Ҳаётига кайтади.

1465 – 1466 йилларда Машҳадда Навоийнинг муҳлислари унинг шеърларини тўплаб девон туздилар. Уни Султонали Машҳадий кўчирдади. Бу девон бугунги кунда «Илк девон» номи билан машҳур.

1465 – 1469 йилларда Навоий Самарқандда яшаб илм олади. Дастлабки кўйинчилликлардан кейин ёш шоирга шаҳар ҳокими Аҳмад Ҳожибек ҳомийлик қиласиди. Ҳожа Абуллайс Фазуллуҳоҳдан фикҳ имленинни ўрганади, илм ва шеър ахли сұхбатида бўллади.

1457 йил Абулқосим Бобур вафот этади. Абу Сайд таҳтга чиқади. Ҳусайн таҳт учун курашга киришиб кетади. Алишер Машҳадда ўқишини давом эттиради. шу даврда Лутфий ва Камол Турбатийлар билан учрашиди.

1468 йил Абу Сайд Эрон учун жангда ҳалок бўлгач таҳтади 1469 йил Ҳусайн Бойқаро эгаллаб, дусти Навоийни Ҳиротга чакиради. муҳрдор қилиб тайналайди.

1471 йил оқкуюнлилар саройида (Ғарбий Эрон) Навоийнинг иккинчи девони муҳлислари томонидан тузилади.

1469 – 1472 йилларда Навоий муҳрдор лавозимида хизмат қиласиди.

1472 – 1476 йилларда Навоий амир (вазир) вазифасини бажаради. «амир ул-қабир», «амир ул-муқарраб» каби унвонлар олади.

1501 йил 3 январь куни уч кун хушсиз ётган Алишер Навоий Ҳирот шахрида сакта касаллиги сабабли вафот этади.

1500 йил декабрь ойи охирида Ҳусайн Бойқаро Астробод юришидан қайтади. Навоий уни кутиб олганни сарой аўенлари билан чиқади. Йўлда унинг ҳоли оғирлашади. Шоҳ билан учрашганда эса Навоий унинг кўксига бош кўйиб ҳушдан кетади.

1499 йил Навоий бу ҳодисадан қаттиқ таъсирланиб кўндан бүён ният қилгани – ҳажгаган тайергарлик кўра бошлайди. Аммо шу пайтада Ҳусайн Бойқаронинг ўғли Абулумхсин Марғони исен кўтаради. сulton исенни бостиришга бошганда. шаҳзода фақат Навоий уртага тушсанда сўлтузисини айтади. Навоий йўлдан ноилорга қайтади ва ота-болани яраштиради.

Алишер Навоийнинг XV аср 60-йилларида Хуросондан кетиши сабаблари хусусида



**Алишер Навоий лирикаси. Девонлари.
Алишер Навоий тўлақонли девон учун белгилаган мезонлар
«Бадоеъ ул-бидоя»нинг кириш қисмида)**



**Алишер Навоий девонларидағи шеърий
жанрлар миқдори**

№	Шеърий жанрлар	«Илк девон» (1465 – 1466)	«Оқкуюнлилар саройи девони» (1471)	«Баддоевъ ул-бидоя» (1470 – 1480)	«Наводир ун-ниҳоя» (1487 – 1490)	«Хазойинъ ул-маоний» (1492 – 1498)
1	Ғазал	391	224	777	804	2600
2	Мустазод	1	1	3		4
3	Мухаммас	1	3	5		10
4	Мусаддас			2		5
5	Мусамман					1
6	Таржыбанд		1	3		4
7	Таркибанд					1
8	Маснавий					1
9	Қасида					1
10	Соқийнома					1
11	Қитъа			46		210
12	Рубоий	41		85		133
13	Муаммо			52		52
14	Луғз			10		10
15	Туюқ			10		13
16	Фард			53		86
	Жами	434	229	1046	862	3132

Алишер Навоийнинг «Хазойин ул-маоний» куллиётига кирмай қолган шеърлари манбалари



«Хазойин ул-маоний» куллиётидаги лирик жанрлар тавсифи

№	Навоий фойда-ланган лирик жанрлар	«Ғаройиб ус-сигар» девонида	«Наводир уш-шабоб» де-вонида	«Бадоеъ ул-ва-сат» де-вонида	«Фавойид ул-кибар» девонида	Жами тўрт де-вонда
1	Ғазал	650 та (4975 байт)	650 та (4998 байт)	650 та (5001 байт)	650 та (5029 та)	2600 та (20003 байт)
2	Мустазод	1 та (7 байт)	1 та (7 байт)	1 та (7 байт)	1 та (7 байт)	4 та (28 байт)
3	Мухаммас	3 та (57,5 байт)	3 та (52,5 байт)	2 та (30 байт)	2 та (37,5 байт)	10 та (177,5 байт)
4	Мусаддас	1 та (27 байт)	1 та (27 байт)	2 та (42 байт)	1 та (21 байт)	5 та (117 байт)
5	Мусамман				1 та (28 байт)	1 та (28 байт)
6	Таржиъ-банд	1 та (100 байт)	1 та (103 байт)	1 та (56 байт)	1 та (110 байт)	4 та (369 байт)
7	Таркиб-банд		1 та (56 байт)			1 та (56 байт)
8	Маснавий	1 та (148 байт)				1 та (148 байт)
9	Қасида			1 та (91 байт)		1 та (91 байт)
10	Соқийнома				1 та (458 байт)	1 та (458 байт)
11	Қитъа	50 та (138 байт)	50 та (126 байт)	60 та (127 байт)	50 та (112 байт)	210 та (503 байт)
12	Рубоий	133 та (266 байт)				133 та (266 байт)
13	Муаммо		52 та (54 байт)			52 та (54 байт)
14	Лугз			10 та (40 байт)		10 та (40 байт)
15	Туюқ			13 та (26 байт)		13 та (26 байт)
16	Фард				86 та (86 байт)	86 та (86 байт)
Жами		840 та (5718,5 б.)	759 та (5423,5 б.)	740 та (5420 б.)	793 та (5888,5 б.)	3132 та (22450,5 б.)

**Алишер Навоийнинг «Хазойин ул-маоний»даги
ғазаллари байтлари миқдори таснифи**

Байтлар сони	«Ғаройиб ус-сиғар» девонида	«Наводир уш-шабоб» девонида	«Бадоев ул-васат» девонида	«Фавойид ул-кибар» девонида	Ҳаммаси
5	2	-	-	-	2
6	1	3	1	-	5
7	434	446	437	430	1747
8	30	8	8	12	58
9	163	162	187	183	695
10	8	7	1	3	19
11	11	23	14	20	69
12	-	-	1	-	1
13	1	1	1	2	5
	650	650	650	650	2600

«Хазойин ул-маоний» жанрлари таърифи

Ғазал – ар. «ошиқона сўз», «ишиқ изҳор қилиш». а-а, б-а, в-а, г-а... тарзида қофияланувчи, 3 байтдан 19 байтгача ҳажмдаги, байтли шеър шакли. Ўзбек адабиётида 5 – 10 байтгача F. кўп учрайди. Навоий F., асосан, 7 байтдан 13 байтгача ҳажмда. F. дастлабки намуналари VIII – IX асрларда араб адабиётида пайдо бўлган, форс-тохик адабиётида илк F. ёзган шоир сифатида Рудакий тилга олинади. Ўзбек адабиётида эса дастлабки F. Рабгузийнинг «Қисаси Рабғузий» асарида (XIV аср) учрайди. F.нинг достонлар таркибида учраши илк бор Хоразмийнинг «Мұхаббатнома»сидан (1353 – 1354) бошланади.

Мустазод – ар. «орттирилган», «зиёда қилинган», ҳар мисраси 1,5 қатордан иборат шеър шакли. М. учун ғазал асос замин вазифасини ўтаган. Иккала жанрнинг қофияланиш тизими, байтлар сони, матлаъ ва мақтаъ, тахаллуснинг мавжудлиги бу фикрни исботлайди. Лекин ғазал аруз тизимининг барча баҳрларида яратилгани ҳолда, М. фақат ҳараж баҳрининг ҳазажи мусаммани ахраби макфуфи маҳзуфи мустазод (рукнлари ва тақтеъи: мафъулу мағойилу мағойилу фаувлун мафъулу фаувлун – – V / V – – V / V – – V / V – – / – V / V – –) вазнида ёзилади. Туркий адабиётда Навоийгача М. жанри Ҳофиз Хоразмий ижодида учрайди. Унинг девонида ҳар бири 7 байтдан иборат иккита М. бор.

Байтли шеърий жанрлар

Қасида – ар. «максад», «ният» маъноларини билдириб, бирор тарихий шахс ёки воқеага багишлаб ёзиладиган катта ҳажмли шеър тури ҳисобланади. Қ. ҳажман 12 байтдан бир неча юз байтгача бўлиши мумкин. Қ. ғазал сингари а-а, б-а, в-а, г-а ... тарзида қофияланади. Айрим ҳолларда маснавий сингари қофияланishi ҳам мумкин. Қ. тузилишига кўра 2 хил бўлади:


1. Қасида том (тўлиқ Қ.) – бунда Қ. тўрут қисмдан таркиб топади: а) насиб – лирик кириш (табиат тасвири); б) гуризгоҳ – насиб билан мадҳни боғловчи, 4 – 5 байтдан ташкил топувчи қисм; в) мадҳ – асосий қисм; г) қасд – мамдуҳ (мадҳ этилаётган шахс)га ният ва истаклар билдирилган қисм.
2. Қасида мужаррада (чала Қ.) – бунда фақат мадҳ келтирилади. Қ. мавзусига кўра васф, мадҳ, ҳажв, марсия, муножот ва фалсафий қасидаларга бўлинади. Туркий адабиётдаги илк Қ. «Девону луғотит турк»да «қўйунғ» шаклида учрайди.



Қитъа – ар. «парча», «бўлак», «қисм», 2 байтдан бир неча байтгача ҳажмда бўлган. фақат жуфт мисралари қофияланадиган (ба, ва, га ...) байтли шеър шакли.

Туркӣ адабиётда Қ. илк намуналари Рабгузийнинг «Қисаси Рабгузий» асарида учрайди. Навоий Қ. мавзусига кўра шартли равишда икки гурӯхга ажратиш мумкин:

- 1) ижтимоий ҳаёт масалалари акс этган фалсафий-ахлоқий мазмундаги Қ.;
- 2) муайян давр воқеа-ҳодисалари ҳамда ўёки бу гурӯх вакиллари фаолияти ҳақидаги Қ.



Алишер Навоий мухаммас ва тахмислари

Лутфийга тахмис-нинг 1-мисраси ва у киритилган девон	Ўз ғазалларига тахмис	
	Мухаммаснинг 1-мисраси ва у киритилган девон	Мухаммасга асос бўлган ғазалнинг 1-мисраси ва у киритилган девон
Ҳалқайи зулфунгда кўнглум бўлғали ғам маҳрами («Фаройиб ус-сигар», 1-мухаммас)	Оҳқим, волиҳ мен ул сарви хиромондин жудо («Наводир уш-шабоб», 2-мухаммас)	Не наво соз айлагай булбул гулистондин жудо («Фаройиб ус-сигар», 38-ғазал)
	Бўлмағай эрди жамолинг мунча зебо кошки («Наводир уш-шабоб», 3-мухаммас)	Очмағай эрдинг жамоли олам оро, кошки («Наводир уш-шабоб», 625-ғазал)
	Неча, эй ой, мендин айру айлагай даврон сени («Бадоеъ ул-васат», 2-мухаммас)	Келгил, эй ороми жонимким, тилайдур жон сени («Фавойид ул-кибар», 618-ғазал)
Маснади ҳусн узра токим кўрмишам ул шоҳни («Наводир уш-шабоб», 1-мухаммас)	Оҳқим, тарки муҳаббат қилди жонон оқибат («Фаройиб ус-сигар», 2-мухаммас)	Ёшурун дардимни зоҳир қилди афғон оқибат («Наводир уш-шабоб», 72-ғазал)
	Жилва қилди даҳр аро кўп ҳусни бехамто йигит («Фавойид ул-кибар», 1-мухаммас)	Кўнглум олди бир парий-пайкар малаксиймо йигит («Фаройиб ус-сигар», 80-ғазал)
Шарбати юҳийл изом эрни майи нобиндадур («Бадоеъ ул-васат», 1-мухаммас)	Ишқ ўтидин жисми зори нотавоним ўртадинг («Фаройиб ус-сигар», 3-мухаммас)	Ваҳки, ўтлуқ чеҳра очиб хонумоним ўртадинг («Наводир уш-шабоб», 354-ғазал)
	Кўргузуб юз, кўнглума юз минг жафому қилмадинг («Фавойид ул-кибар», 2-мухаммас)	Ишқ ўтидин қисматим дарду балому қилмадинг («Бадоеъ ул-васат», 356-ғазал)

Алишер Навоий мусаддас ва тасдислари

Табъи худ мусаддас	Путфийга тасдис	Хусайн-нийга тасдис	Ўз ғазалларига тасдис	
			Тасдисга асос бўлган ғазал	Тасдис
«Даҳр аро чун қай-ғусиз йўқ хеч ишрат, эй рафиқ» («Наводир уш-шабоб», 1-мусаддас)	<p>«Жоним ўртарга ул ўтлуқ чехра гулзори Халил» («Бадоеъ ул-васат», 1-мусаддас)</p> <p>«Зулфу сиймин жисминг афъи ганжи Корун устина» («Фавойид ул-кибар», 1-мусаддас)</p>	<p>«Ишқ зор этти халойик ибтило-сидин мени» («Бадоеъ ул-васат», 2-мусаддас)</p>	<p>«Субҳидам махмурлуқтин тортибон дарди саре» («Ғаройиб ус-сигар», 1-мусаддас)</p>	<p>«Ваҳки, диним кишварин торож қилди кофире» («Наводир уш-шабоб», 580-ғазал)</p>

**«Девони Фоний»нинг жанрлар кўлами,
төявий-бадиий хусусиятлари**

**МАТ асосидаги
«Девони Фоний» таркиби**


№	Жанрлар	Шеърлар миқдори
1	Ғазал	552
2	Мусаддас	1
3	Таркибанд-марсия	1
4	Қитъа	64
5	Рубоий	72
6	Луғз	16
7	Муаммо	266
8	Қасида	10
9	Луғз	9
Жами		991

Ғазалларига татаббуъ ва тавр битилган шоирлар

№	Шоирлар	Татаббуъ	Тавр
1	Амир Хусрав Деклавий	32	11
2	Хожа Ҳофиз Шерозий	211	20
3	Шайх Муслиҳиддин Саъдий Шерозий	22	2
4	Котибий	1	
5	Хожа Салмон Соважий	2	
6	Хожа Камол Хўжандий	4	
7	Хожа Ҳасан Деклавий	2	
8	Абдураҳмон Жомий	31	8
9	Амир Шайхим Сухайлий	3	
10	Аҳмад Ҳожибек Вафойи	2	

11	Шоҳий Сабзаворий	3	
12	Соҳиб Балхий	1	
13	Сайфий Бухорий	1	
14	Исмат Баҳорий	1	
15	Нажмиддин Коҳий Миёнқолий	1	
16	Ҳусайнӣ	2	
Жами		317	41

«Девони Фоний» тарибидаги қасидалар таснифи




XV аср Ҳирот адабий муҳити ҳамсанавислиги

Тўлиқ «Ҳамса» муаллифлари	Баъзи достонларга жавоб ёзган муаллифлар	Фақат битта достонга жавоб ёзганлар	
		«Махзан ул-асрор» типида	«Лайли ва Мажнун» типида
Жамолий «Ҳамса» (1402 – 1417) «Тұхфат ул-абброр» «Мехру Ниғор» «Маҳзун ва Маҳбуб» «Ҳафт авранг» «Искандарнома» типида)	Котиби Туршизий «Гулшан ул-абброр» «Лайли ва Мажнун» «Баҳром ва Гуландом»	Осафий Ҳиравий	Шайхим Суҳайлий
Ашраф Марогий «Ҳамса» (1428 – 1444) «Минҳож ул-абброр» «Риёз ул-ошиқин» «Ишқнома» «Ҳафт авранг» «Зафарнома»	Абдуллоҳ Ҳотифи «Лайли ва Мажнун». «Шириң ва Ҳусрав» «Ҳафт манзар» «Етти манзара», «Темурнома»	Наргисий	Али Оҳий
Абдураҳмон Жомий «Ҳамса» (1481 – 1484): «Тұхфат ул-аҳрор» «Субҳат ул-абброр» «Юсуф ва Зулайх» «Лайли ва Мажнун» «Хирадномаи Искандарий»	Бадриддин Ҳилолий «Сифат ул-ошиқин» «Лайли ва Мажнун»	Ғиёсиддин Сабзаорий Фосиҳ Румий Сайийд Қосимиј	Хожа Имод Лорий Хожа Ҳасан Ҳизришоҳ Заве Қозиси
Алишер Навоий	Шаҳобиддин Жомий «Лайли ва Мажнун» «Ҳусрав ва Шириң»		

«Ҳайрат ул-аброр» достонидаги мақолат ва ҳикоятлар

№	Мақолатлар	Ҳикоятлар
1	Иймон шархида	Шайх Боязид Бистомий ва унинг муриди ҳақидаги ҳикоят
2	Ислом бобида	Иброҳим Адҳам ва Робия Адвия ҳақидаги ҳикоят
3	Салотин (султонлар) зикрида	Шоҳ Фозий ҳикояти
4	Хирқа кийган риёкор шайхлар хусусида	Абдулла Анзорий ҳақидаги ҳикоят
5	Карам (хайру эҳсон) васфида	Ҳотами Тойи ҳикояти
6	Адаблилик түғрисида	Нўширавон ва Наргис ҳақидаги ҳикоят
7	Қаноат бобида	Қаноатли ва қаноатсиз дўстлар ҳақидаги ҳикоят
8	Вафо бобида	Икки вафоли ёр ҳикояти
9	Ишқ ўти таърифида	Шайх Ироқий ҳақидаги ҳикоят
10	Ростлиқ таърифида	Шер билан Дуррож ҳикояти
11	Илм осмонининг юлдузлардек баланд мартабалилиги ҳақида	И мом Розий ва Хоразмшоҳ ҳақидаги ҳикоят
12	Қалам ва қалам аҳллари ҳақида	Ёқут ҳақидаги ҳикоят
13	Булатдек фойда келтирувчи одамлар ҳақида	Айюб ва ўғри ҳақидаги ҳикоят
14	Осмон тузилишида шикоят	Искандар ҳақидаги ҳикоят
15	Жаҳолат майининг қўйқасини ичадиганлар ҳақида	Исройлий ринд ҳақидаги ҳикоят
16	Хунасасифат олифталар ҳақида	Абдуллоҳ Муборак ҳақидаги ҳикоят
17	Баҳор йигитлигининг соғлиги ҳақида	Зайнобиддин ва унинг ўғли ҳақидаги ҳикоят
18	Фалак ғамхонаси ҳақида	Гўзал малика ва унинг ошиғи ҳақидаги ҳикоят
19	Хурсоннинг мисли йўқ вилояти баённида	Баҳром ва боғ ҳақидаги ҳикоят
20	Мақсаднинг ўталгани ҳақида	Хожа Муҳаммад Порсо ҳақидаги ҳикоят


«Фарҳод ва Ширин» достонининг тимсоллар олами




**«Фарҳод ва Ширин» достонидаги рамзий тимсоллар
ифодалаган маънолар**

Тимсоллар номи	Улар англатган маъно
Фарҳод	Ҳаққа етишишни мақсад қилган солик
Ширин	Мазҳар, яъни Ҳақ жамолини ўзида зоҳир қилган тимсол
Моний, Боний, Қоран	Фарҳодга, яъни соликка дунёвий илмларни ўргатган устозлар
Суҳайло	Фарҳодга Ҳаққа етишда йўл кўрсатувчи муршидни топишга кўмаклашган устоз, Фарҳоднинг тариқатдаги 1-пир
Хизр	Тариқатдаги 2-пир
Суқрот	Ҳаққа етиш ва кўнгил сирларини ечишнинг йўлини кўрсатган пири муршид
Аждарҳо	Нафс
Дев	Салтанат
Самандар ёғи	Ишқ
Шер	Ғазаб
Темир пайкар	Рӯё, ёлғон дунё
Жамшид жоми	Кўнгилни очиш калити
Ойинаи жаҳоннамо	Кўнгил
Хусрав, Шеруя, Ёсуман	Нафсга қул бўлган, шайтон измидаги бандалар


«Фарҳод ва Ширин» достонида соликнинг Ҳаққа эришиш босқичларининг рамзий ифодаси




«Лайли ва Мажнун» достонининг ғоявий-бадиий хусусиятлари «Лайли ва Мажнун» достонининг таркибий тузилиши




Ҳаққа етиш йўлидаги соликлар – Фарҳод ва Мажнун қиёси



«Сабъаи сайёр» достонининг тузилиши, ҳикоятлар таҳлили «Сабъаи сайёр» достони таркибий тузилиши




«Садди Искандарий» достонининг ғоявий-бадиий хусусиятлари «Садди Искандарий» достонининг тузилиш таркиби




«Лисон ут-тайр» достонининг ғоявий-бадиий хусусиятлари «Лисон ут-тайр» достонининг таркибий тузилиши




Худҳуд бошчилигидаги қушлар босиб ўтган етти водий тавсифи




Алишер Навоийнинг адабиётшунослик ва тилшуносликка доир асарлари



Навоийнинг диний ва тасаввуйи асрлари



Тарихий, ёднома ва турли мавзудаги асарлари





Илмий нашр

Дилнавоз ЮСУПОВА

ЎЗБЕК МУМТОЗ АДАБИЁТИ ТАРИХИ

(Алишер Навоий даври)

Муҳаррир: Шаҳноза ТЎРАХОДЖАЕВА

Мусаххих: Марҳабо ЖУРАЕВА

Техник муҳаррир: Алимардан АҚИЛОВ

Бадиий муҳаррир: Хуршид ИБРОҲИМОВ

Нашриёт лицензияси: АI №134. 27.04.2009

Теришга берилди: 11.01.2013 й.

Босишига руҳсат этилди: 22.02.2013 й.

Офсет қоғози. Қоғоз бичими 60x84 1/₁₆.

Arial гарнитураси. Офсет усулида босилди.

Хисоб-нашириёт т.: 10.62. Шартли б.т.: 15.81.

Адади: 500 нусха.

Буюртма № 15

«AKADEMNASHR» нашриётида тайёрланди ва чоп этилди.
100156, Тошкент шаҳри. Чилонзор тумани, 20⁴-мавзе, 42-үй.

Тел.: (+99871) 217-16-77.

e-mail: akademnashr@mail.ru

web-site: www.akademnashr.uz